

中華二千年史

卷五下冊

鄧 之 著



中華書局出版







中華二千年史

卷五下冊

鄧之誠 著





中華二千年史

卷五 下冊

鄧之誠著

*

中華書局出版

(北京東總布胡同57號)

北京市書刊出版業營業許可證出字第17號

中華書局上海印刷廠印刷 新華書店總經售

*

787×1092 耗 1/25·242/5 印張·373,000 字

1958年1月第1版

1958年1月上海第1次印刷

印數：1—6,800 定價：(4) 2.70 元

統一書號：11018.37 58.1, 鳳凰

目錄

卷五 明清下

(十三) 戊戌變政	一
(1) 康梁之維新運動	一
(甲) 康有爲之學說	一
(乙) 運動之經過	五
「公車上書」(附公車簽名表)	五
「強學會——保國會」	八
「新政建議」	二二
(2) 百日維新	二五
(甲) 翁同龢之得罪	二五
(乙) 維新之事項	三〇
(3) 政變	四〇
(甲) 訓政	四〇
(乙) 盡罷新政	四三
(丙) 殺六君子(附戊戌黨禁簡表)	四六
(丁) 立儲	五一
(1) 富有貴爲之獄	五三
(甲) 保皇公司	五三
(乙) 富有票	五九
(十四) 義和團	六三
(1) 義和團之崛起	六三
(甲) 起源	六三
「源流」	六三

「組織」……………	六七	(3) 辛丑議和……………	九九
(乙) 民教之相仇……………	七〇	(甲) 辛丑和約……………	九九
(丙) 義和團之起兵……………	七三	「懲辦罪魁」……………	一〇二
(丁) 直隸境內之蔓延……………	七四	「賠款」……………	一〇五
「淞水案」……………	七四	「駐兵」……………	一〇七
「剛趙之查辦」……………	七五	「謝罪」……………	一〇八
(2) 義和團之抗戰……………	七六	「和約」……………	一一三
(甲) 使館及教堂之圍攻……………	七六	(乙) 東北俄約……………	一一七
(乙) 對外之宣戰……………	七九	(十五) 清末之時局……………	一二三
「宣戰之詔書」……………	七九	(1) 庚子以後之維新……………	一二三
「軍民之苦戰」……………	八二	(甲) 維新詔書……………	一二三
(丙) 京津之淪陷……………	八七	(乙) 練兵……………	一二五
「天津之外人管理」……………	八七	(丙) 興學……………	一二七
「北京之八國分佔(附抗戰各軍簡表、 入侵聯軍簡表)」……………	八八	(丁) 改官制……………	一二九
(丁) 東南自保……………	九五	(戊) 改革幣制……………	一二二

(己) 預備立憲	一三三	「日俄戰後之東北」	一六七
(2) 庚子以後之外交	一四九	「東三省之措施」	一六九
(甲) 爭路礦	一四九	(戊) 中美德聯盟之說	一七二
「京漢路」	一五〇	(3) 宣統間之中央集權	一七三
「蘇杭甬鐵路」	一五一	(甲) 軍權之集中	一七四
「福公司」	一五五	(乙) 財權之集中	一七五
「隆興公司」	一五七	(十六) 辛亥革命	一七八
(乙) 爭界	一五八	(丁) 孫中山之倡導	一七九
「西藏界」	一五八	(甲) 十次之失敗	一七九
「片馬」	一六〇	(乙) 同盟會	一八五
「間島」	一六一	(丙) 黃花崗(附辛亥以前革命軍起義簡表)	一九〇
(丙) 抵制外貨	一六四	(2) 川路風潮	一九五
「抵制美貨」	一六四	(3) 革命之成功	二〇六
「抵制日貨」	一六五	(甲) 武昌起義	二〇六
(丁) 東三省之設立	一六七	(乙) 漢陽戰事	二一三

〔丙〕各省獨立(附各省獨立表).....	二一六	清.....	二四二
〔丁〕各國中立.....	二二三	〔民田(附明清兩代墾田數比較表).....	二四二
〔4〕清之亡.....	二二三	〔屯田.....	二四六
〔甲〕南北議和.....	二二三	〔旗田(附八旗莊田數附表).....	二四七
〔乙〕清室退位.....	二二八	〔官田.....	二五四
明清兩代社會生活.....	二三四	〔乙〕賦役.....	二五七
〔一〕制度.....	二三四	〔正賦.....	二五七
〔1〕田制.....	二三四	〔加餉.....	二五九
〔甲〕田之種類.....	二三四	〔歲計(附崇禎十六年三餉合一出入簡表).....	二六二
明.....	二三四	〔丁役.....	二六六
〔民田.....	二三五	〔免糧.....	二六九
〔軍屯.....	二三六	清.....	二七〇
〔民屯.....	二三七	〔正賦.....	二七〇
〔商屯.....	二三八	〔火耗.....	二七二
〔莊田.....	二三九		

〔普免〕（附清代普免錢糧簡表）……………二七四

〔江浙減賦〕……………二七五

〔加賦〕……………二七七

〔歲計〕（附清代歲計簡表）……………二八〇

〔丁賦〕……………二八一

（丙）漕糧……………二八六

明……………二八六

〔額運〕……………二八六

〔交兌〕……………二八七

〔河運〕……………二八九

〔海運〕……………二九〇

清……………二九一

〔額徵〕……………二九一

〔河運〕……………二九三

〔海運〕……………二九四

目錄

〔搭載貨物〕……………二九五

〔京通倉〕……………二九六

（2）征權……………二九八

（甲）明之征權……………二九八

〔鈔關〕……………二九八

〔商稅〕（附商稅總額簡表）……………三〇〇

〔抽分〕……………三〇五

〔河泊所〕（附萬曆時魚課簡表）……………三〇六

〔市舶司〕……………三〇八

〔牙稅〕……………三一〇

〔稅監〕……………三一〇

（乙）清之征權……………三一—

〔常關〕（附嘉慶四年各關贏餘額簡表）……………三一—

〔洋關〕（附宣統四年預算歲入關稅簡表）……………三一四

〔釐金〕（附宣統四年預算歲入釐金簡表）……………三一八

「洋藥釐稅並徵」	三二一	「院試」	三五一
「牙稅」〔附牙稅額簡表〕	三二三	「鄉試」	三五三
「姓稅」〔附姓膏稅額簡表〕	三二六	「會試」	三五四
〔3〕幣制	三二七	「殿試」	三五五
（甲）銀	三二七	（乙）試藝	三五八
（乙）錢	三三一	〔7〕官制	三六〇
（丙）鈔	三三五	（甲）中央官	三六一
〔4〕茶法	三三八	（乙）地方官	三六六
（甲）明代茶法	三三八	〔8〕兵制	三六九
（乙）清代茶法	三四〇	（甲）明代兵制	三六九
〔5〕鹽法	三四一	（乙）清代兵制	三七三
（甲）明代鹽法	三四一	〔9〕刑法	三七八
（乙）清代鹽法	三四六	（甲）明代刑法	三七八
〔6〕科舉	三五〇	（乙）清代刑法	三八〇
（甲）考試	三五二	〔11〕生業	三八五

(1) 農業.....	三八六	「蠶」.....	四三一
(甲) 農佃.....	三八七	「紙」.....	四三一
(乙) 授田.....	三九六	「布疋」.....	四三三
(丙) 豪強.....	三九八	「綢緞」.....	四三四
(丁) 投獻.....	四〇一	「五金器具」.....	四三六
(戊) 錢糧.....	四〇二	「造船」.....	四三七
(2) 工業.....	四〇九	(3) 商制.....	四三九
(甲) 工人.....	四一二	(甲) 商之類別.....	四三九
「官工」.....	四一二	「行商」.....	四三九
「官工」(匠)(附輪班人匠簡表、各省府班 匠徵銀簡表).....	四一三	「牙商」.....	四四〇
(乙) 工之組織.....	四一五	「鹽商」.....	四四二
「行」.....	四二六	「洋商」.....	四四五
「作坊」.....	四二八	「外商」.....	四五四
(丙) 工藝品.....	四三〇	「買辦」.....	四五六
		(乙) 商之組織.....	四五七

「行」	四五七	「木廠」	四八三
「幫」	四五八	(二)學術	四八五
「會」	四六〇	(1)理學	四八五
(4)礦廠業	四六一	(甲)紫陽之學	四八六
(甲)礦之採禁	四六一	(乙)陽明之學	四八七
「明代礦政」	四六一	(丙)東林講學	四八九
「清代礦政」	四六五	(丁)清初三大儒	四九〇
(乙)礦工之生活	四七二	(戊)顧李之學	四九六
「明代礦工」	四七二	(己)道光後理學復興	四九七
「清代礦工」	四七四	(2)經學	四九九
(丙)礦之生產	四七八	(甲)明代經學之衰	四九九
「明代礦產」	四七八	(乙)清代經學派別	五〇四
「清代礦產」	四七九	「蘇州之學」	五〇四
(丁)廠	四八二	「寶應之學」	五〇七
「鐵廠」	四八二	「儀徵三劉」	五〇八

「徽州之學」	五〇九	「明史」	五二九
「高郵王氏」	五一一	「政書」	五三一
「常州之學」	五一二	「丁」清代私人撰述	五三二
「丙」清代經學名著	五二三	「(4)文學」	五三八
「(3)史學」	五一八	「(甲)古文」	五三八
「甲」明代官修之史	五一九	「明初宋王」	五三八
「實錄」	五一九	「復古之文」	五三九
「寶訓」	五二〇	「八家文之復興」	五四〇
「元史」	五二〇	「清初三家」	五四二
「政書」	五二一	「桐城派」	五四三
「乙」明代私人撰述	五二二	「乙」駢體文	五四五
「丙」清代官修之史	五二七	「丙」制義文	五四七
「實錄」	五二七	「八股」	五四七
「聖訓」	五二八	「名家」	五四八
「方略」	五二八	「選家」	五五〇

(丁)詩.....五五二

「明初四家」.....五五二

「明七子」.....五五三

「鍾譚」.....五五四

「錢吳陳之派別」.....五五五

「亭林之名世」.....五五六

「朱王領袖南北」.....五五七

「袁蔣趙張」.....五五八

「道光之復古」.....五五九

(戊)詞.....五六一

「明詞」.....五六二

「清詞之盛」.....五六二

(己)戲曲小說.....五六七

「雜劇」.....五六七

「傳奇」.....五七〇

「小曲」.....五七五

「小說」.....五七八

補遺

中華二千年史（中國通史講義）

卷五 明清下

（十三）戊戌變政

（1）康梁之維新運動

（甲）康有爲之學說

康有爲之師朱次琦。治學平實。兼綜漢宋。而歸本於經世。與有爲行逕不類。嘉慶中。治經者喜今文家微言大義之說。莊存與、劉逢祿、宋翔鳳皆言公羊。龔自珍、魏源論時事。亦主今文。海通以後。外患日深。策時務者。若湯鵬著浮丘子。孫鼎臣著芻言。效

之而有作者。無慮數十種。各抒其所見。漸趨於維新。光緒初。廖平傳王闈運之學。有爲與廖平爲友。熟聞其緒論。以公羊改制。足爲變法張目。自號長素。比於孔子之素王。且倡孔教。欲傳之於世界。著新學僞經考。力攻劉歆竄改經文。而致疑於堯舜之有無。所以震撼一世。破其守舊之習。習知民權之說。主開國會立憲。較他人所言爲得其要。當甲午前後。稍有知識者。無不日盼富強。而有爲遂爲之魁率。

康有爲。字廣廈。號更生。原名祖詒。廣東南海人。光緒二十一年進士。用工部主事。少從朱次琦遊。博通經史。好公羊家言。言孔子改制。倡以孔子紀年。尊孔保教。（清史稿列傳二六〇康有爲傳）

光緒二年。一八七六年十九歲。是年應鄉試不售。憤學業之無成。邑有大儒朱九江先生。諱次琦。號子襄者。……乃

請從之學。先生碩德高行。博極羣書。……而其學平實敦大。……特重氣節。……其教學者之恆言。則曰四行

五學。四行者。敦行孝弟。崇尚名節。變化氣質。檢攝威儀。五學則經學。史學。掌故之學。性理之學。詞章之學也。先生……強記博聞。每議一事。論一學。貫串今故。……發先聖大道之本。……掃去漢宋之門戶。而歸宗於孔子。

……既從先生學。……日讀宋儒書。及經說、小學、史學、掌故、詞章。兼綜而並驚。……蓋余家小有藏書。久好涉

獵。讀書甚多。但無門徑。及一聞先生之說。與同學簡君竹居。名朝胡君少愷。名景棠日上下其議論。即渙然融釋貫

串。……光緒五年。一八七九年二十二歲。……正月。遂入樵山。居白雲洞。……編修張延秋先生。諱鼎與朝士四五

人來游樵山。張君素以文學有盛名於京師者。至是見之。……由是訂交焉。……自是來城訪張君談。則竟夕申旦。盡知京朝風氣。近時人才。及各種新書。道咸同三朝掌故。皆得咨訪焉。……吾自師九江先生。而得聞聖賢大道之緒。自友延秋先生。而得博中原文獻之傳。（康南海自編年譜）

光緒十六年。^{一八九〇年}……三十三歲。春。居徽州會館。……既而移家羊城之雲衢書屋。……三月。陳千秋來見。

六月。來及吾門。八月。梁啓超來學。陳通甫又字禮吉。時讀書甚多。能考據。以客禮來見。凡三與論詩禮。泛及諸經。吾乃告之以孔子改制之意。仁道合羣之原。破棄考據舊學之無用。禮吉恍然悟。首來受學。（康南海自編年譜）

梁啓超字卓如。號飲冰。廣東新會人。光緒十五年舉人。從康有爲受學。能屬文。有爲主維新。設保國會。啓超爲之奔走最力。二十四年。以六品銜辦理譯書局事務。事敗。由日本人保護赴日本。設新民叢報。鼓吹立憲。辛亥。革命軍起。袁世凱爲內閣總理大臣。以啓超爲學部副大臣。不赴官。而應召歸國。初。有爲主保皇。與世凱尋仇。而啓超主立憲。設進步黨。與世凱合。遂與有爲離。……卒於民國十八年。年五十六。（松堪小記）

光緒十年。^{一八八四年}……二十七歲。……秋冬。獨居一樓。萬緣澄絕。俛讀仰思。至十二月。所悟日深。因顯微鏡之

萬數千倍者。視虱如輪。見蟻如象。而悟大小齊同之理。因電機光線。一秒數十萬里。而悟久速齊同之理。知至大之外尙有大者。至小之內尙包小者。剖一而無燾。吹萬而不同。根元氣之混侖。推太平之世。既知無來去。則專以現在爲總持。既知無無。則專以生有爲存存。既知氣精神無生死。則專以示現爲解脫。既知無精粗。無淨

機。則專以悟覺爲受用。既以畔援歌謠皆盡絕。則專以仁慈爲施用。其道以元爲體。以陰陽爲用。理皆有陰陽。則氣之有冷熱。力之有拒吸。質之有凝流。形之有方圓。光之有白黑。聲之有清濁。體之有雌雄。神之有魂魄。以此八統物理焉。以諸天界、諸星界、地界、身界、魂界、血輪界。統世界焉。以勇、禮、義、智、仁五運。論世宙。以三統論諸聖。以三世推將來。而務以仁爲主。故奉天合地。以合國、合種、合教一統地球。……浩然自得。然後莫往莫來。因於所遇。無毀無譽。無喪無得。無始無終。……生死示現。來去無數。富貴貧賤。……皆所已作。故無所希望。無所逃避。其來現也。專爲救衆生而已。故不居天堂而故入地獄。不投淨土而故來濁世。不爲帝王而故爲士人。不肯自潔。不肯獨樂。不顧自尊。而以與衆生親。爲易於援救。故日日以救世爲心。刻刻以救世爲事。舍身命而爲之。……日號於衆。望衆從之。以是爲道術。以是爲行己。（康南海自編年譜）

新學僞經考。經林樂知譯成英文。傳於歐美。英國李格附會其說。日本亦效之。盛言疑古。其意在否認中國爲四千年文明首出之國家。後二十年疑古之風盛行於中國。則爲倡導新文化。然是時康有爲對於前此所說。多已自加否定矣。

光緒十七年^{一八九}年……七月。新學僞經考刻成。陳千秋、梁啓超助焉。（康南海自編年譜）

始作僞亂聖制者。自劉歆。布行僞經纂孔統者。成於鄭玄。閱二千年……咸奉僞經爲聖法。誦讀尊信。奉持施行。違者以非聖無法論。亦無一人敢違者。亦無一人敢疑者。於是誓孔子之經以與周公。而抑孔子爲傳。於是

掃孔子改制之聖法。而目爲斷爛朝報。六經顛倒。亂於非種……以孔子天命大聖……蒙難遘閔。乃至此極。豈不異哉。且後世之大禍。曰任奄寺。廣女色。人主奢縱。權臣篡盜。是嘗累毒生民。覆宗社者矣。古無有是。而皆自劉歆開之。是上爲聖經之篡賊。下爲國家之鴆毒者也。夫始於盜篡者。終於即真。始稱僞朝者。後爲正統。……習非成是之後。丹黃亂色。甘辛變味。孤鳴而正易之。吾亦知其難也。然提聖法於既墜。明六經於闇習。劉歆之僞不黜。孔子之道不著。吾雖孤微。烏可以已。竊怪二千年來。通人大儒。肩背相望。而咸爲瞶惑。無一人焉發奸露覆。雪先聖之沈冤。出諸儒於雲霧者。豈聖制赫闇。有所待邪。不量綿薄。摧廓僞說。犁庭掃穴。魑魅奔逸。茅散陰谿。日趨星呀。冀以起亡經。翼聖制。其於孔氏之道。庶幾禦侮云爾。（康有爲新學僞經考卷一）

（乙）運動之經過

「公車上書」

光緒二十一年一八九五年……（三月）十二日。偕卓如、梁小山入京。將至大沽。日人來搜船。當頗憤……時旅順已失。朝廷震動……命大學士李鴻章求和。議定割遼台。並償款二萬萬兩。三月二十一日。電到北京。吾先知消息。即令卓如鼓動各省。並先鼓動粵中公車。上摺拒和議……於二十八日。粵楚同遞……台灣舉人。垂涕而請命。莫不哀之。時以士氣可用。乃合十八省舉人於松筠庵會議。與名者千二百餘人。以一晝二夜。草萬言書。請拒和、遷都、變法三者……至四月八日投遞。則察院以既已用寶。無法挽回。卻不收。（康南海自編年譜）爲安危大計。乞下明詔。行大賞罰。遷都、練兵。變通新法。以塞和款而拒外夷。保疆土而延國命。呈請代奏事。竊

聞與日本議和。有割奉天沿邊。及台灣一省。補兵餉二萬萬兩。及通商蘇杭。聽機器洋貨流行內地。免其釐稅等款。此外尚有獻俘。遷民之說。……天下震動。……都人惶駭。又聞台灣臣民。不敢奉詔。思戴本朝。……伏乞皇上。下詔鼓天下之氣。遷都定天下之本。練兵強天下之勢。變法成天下之治而已。何謂鼓天下之氣也。……伏乞皇上。上近法列聖。遠法禹湯。時下明詔。責躬罪己。……激厲天下。同雪國恥。使忠臣義士。讀之而流涕情發。驕將懦卒。讀之而感愧忸怩。士氣聳動。慷慨效死。……而豈有聞風譁潰者哉。……故罪己之詔宜下也。……凡輔佐不職。……主和辱國之樞臣。……喪師失地之將帥。……辱國通款之使臣。……守禦無備之疆吏。或明正典刑。以寒其膽。或輕予褫革。以蔽其辜。……其餘大僚尸位。……咸令自陳。無妨賢路。……此明罰之詔宜下也。……然後懸賞功之格。爲不次之擢。……凡有高材。不次拔擢。天下之士。既懷國恥。又感知遇。必咸致死力。以報皇上。故求才之詔宜下也。……苟三詔既下。賞罰得當。士氣咸伸。天下必距躍鼓舞。奔走動容。以赴國家之急。所謂下詔鼓天下之氣者此也。何謂定天下之本也。……方今旅順已失。威海既墮。險阻無有。京師孤立。……故今日大計。必在遷都。……以今事言之。吾所以忍割地棄民者。爲保都畿。安乘輿也。……夫王者有都。以治天下耳。豈有割天下以保都城。而特爲至計哉。……皇上既講明利害。遠之防諸國之聯鑣。近之拒日本之脅制。急斷乃成。……即日移駕。奉皇太后。巡於陝西。……擇親藩之望重者。留守舊京。……日人雖欲輕兵相襲。數日乃抵津沽。而我大兵雲集都畿。猶可一戰。……以二萬萬之費。改充軍餉。示之以雖百戰百敗。沿海糜爛。必不爲和。日本既失脅制之術。即破舊京。不足輕重。必不來攻。都城可保。或俯就駕馭。不必割地。和

議亦成。即使不成。可以言戰矣。故謂遷都以定天下之本者此也。何謂強天下之勢也。……兵者國之甲冑也。……大國練兵至百餘萬。……而我猶守大一統之舊制以待之。不訓兵備。至有割地款和之事。今日氣未已。不及精練。然能將卒相知。共其甘苦。器械精利。壯其膽氣。亦可自用。選將購械。猶可成軍。……今請更練重兵。以待敵變。……宜選精於製造。操守廉潔之士。專購英黎姆斯槍十數萬。以備前敵。並廣購毒烟空氣之砲。禦敵之衣。庶器械精利。有恃無恐。……所謂練兵以強天下之勢者此也。然凡上所陳。皆權宜應敵之謀。非立國自強之策也。伏念國朝法度。因沿明制數百年矣。物久則廢。器久則壞。法久則弊。……變之之法。富國爲先。……夫富國之法。有六。曰鈔法。曰鐵路。曰機器。輪舟。曰開礦。曰鑄銀。曰郵政。今奇窮之餘。急籌巨款。而可以聚舉國之財。收舉國之利。莫如鈔法。令天下銀號。報明資本。皆存現銀於戶部。及各省藩庫。戶部用精工製鈔。自一至百。量其多少。皆給現銀之數。而加其半。……巨商樂借國力。富戶不患倒虧。以十八省計之。可得萬萬。……上下相通。……要需可以立辦。……鈔票通行。可擴商務。……此鈔票宜行一。可縮萬里爲咫尺。合旬月於晝夜。便於運兵。便於運械。便於賑荒。便於漕運。便於百司走集。便於庶士通學。便於商賈運貨。便於負擔謀生。便於通言語一風俗。……莫如鐵路。……此鐵路宜行二。機器廠可興作業。小輪舟可便通達。……宜縱民爲之。並加保護。……此機器輪舟宜行三。……美人以開金銀之礦。富甲四海。英人以開煤鐵之礦。雄視五洲。……而藏富於地。中國爲最。……宜開礦學。專延比人教之。且爲踏勘。購械器以省人工。築鐵路以省轉運。……選才督辦。而無濫私人。則吾金銀煤鐵之富。可甲地球。此礦務宜開四。……自濠鏡通商。洋銀流入中國。……每

歲運入約數百萬。進口無稅。八成夾鉛。而換我足銀。市價漲落。……多方折耗。是謂大漏卮。……今廣東已開局鑄銀。……請飭下戶部。預籌巨款。並令各直省。皆開鑄銀局。……改鑄錢兩。令嚴而民信。可以塞漏卮。……此鑄銀宜行五。我朝公牘文移。諭旨奏摺。皆由塘驛汛鋪傳遞。而軍務加緊。又有驛馬徧布天下。設官數百。養夫數萬。歲費帑三百萬兩。而民間書札不得過問。……查英國有郵政局。寄帶公私文書。……而歲入一千六百餘萬。我中國人四萬萬。書信更多。若設郵政局以官領之。……而進坐收千餘萬之款。退可省三百萬之驛。……此郵政宜行六。此六者國不患貧矣。然百姓匱乏。國無以爲富也。……養民之法。一曰務農。二曰勸工。三曰惠商。四曰恤窮。……吾地大物博。但講之未至。宜命使者。擇其農書。徧於城鎮。設爲農會。督以農官。……比較則棄耜而從良。鼓舞則用新而去舊。農業自盛。若絲茶爲中國獨擅。……宜設絲茶局。開絲茶學會。力求振興。……其餘東南種棉蔗。西北講牧畜。……以及沙漠可以開河種樹。海濱可以漁網取魚。……宜有以鼓勵之。此務農宜行一也。……宜令各州縣咸設考工院。譯外國製造之書。選通測算學童。分門肄習。……凡有新製繪圖貼說。呈之有司。驗其有用。給以執照。旌以功牌。許其專利。……勸工之法。莫善於此。此勸工宜行二也。……宜特設通商院。派廉潔大臣長於理財者。經營其事。令各直省設立商會。商學。比較廠。而以商務大臣統之。上下通氣。通同商辦。庶幾振興。……然後蠲釐金之害。以慰民心。減出口之稅。以擴商務。……故惠商宜行三也。……其餘窮困無業。游散無賴。所在皆是。京師四方觀望。而乞丐徧地。其他孤老殘疾。無人收恤。廢死道路。日日而有。……恤之之法。一曰移民墾荒。西北諸省。土曠人稀。東三省。蒙古。新疆。疏曠益甚。……移有三。曰

罪遣。……曰認耕。……曰買遷。……二曰教工。……宜令州縣設立警惰院。……凡無業游民。皆入其中。擇其所能。教以藝業。……其乞丐之非老弱殘疾者。咸收於外院。工作如之。……三曰養窮。鰥、孤、獨、疲癯、殘疾、盲、聾、喑啞、斷者、侏儒。民之無告。……宜令各州、縣、市、鎮、聚落。並設諸院。咸爲收養。……民心固結。……故恤窮宜行四也。……夫才智之民多則國強。才智之士少則國弱。……今宜改武科爲藝學。令各省州縣。徧開藝學書院。凡天文、地礦、醫、律、光、重、化、電、機器、武備、駕駛。分立學堂。而測量、繪圖、語言、文字皆學之。選學童十五歲以上入堂學習。仍專一經。以爲根本。延師教習。各有專門。學政有司。會同院師。試之以經題一論。及專門之業。通半中選。不限名額。得薦於省學。謂之秀才。……五年不成者出學。省學、書器益多。見聞益廣。學政督撫。會同其院師。每歲試其專門之業。增以經一。論史一。考掌故一策。通半中選。不限名額。貢於京師。謂之舉人。五年不成者出學。京師廣延各學教習。圖器尤盛。每歲總裁禮部會同大教習試之。其法與省學同。不限名次。及半中選。謂之進士。三年不成者出學。……其文科童試。卽以經古場爲正場。自占經解一。專門之學一。二場試四書文一。中外策一。詩一。亦及格卽取。不限名額。……其鄉會試。頭場四書義一。五經解一。詩一。縱其才力。不限格法。……但在講明義理。宗尙孔子。二場掌故策五道。三場問外國考五道。及格者中。不限名額。殿試策問。不論楷法。但取直言極諫。條對剴切者入翰林。其文科、藝科。願互應者聽。其有創著一書。發明新義。確實有用者。皆入翰林。進士授以檢討。舉人授以庶吉士。諸生授以待詔。如是……則人才皆可勝用矣。……而今官制太冗。俸祿太薄。外之則使才未養。內之則民情不達。……至於鬻及監司。而吏治壞濫極矣。今請首停捐納。乃改官制。用

漢世太守領令長之制。唐代節度兼觀察之條。每道設一巡撫。上通章奏。下領知縣。以四五品京堂、及藩臬之才望者充之。其知縣升爲四品。以給、御、編、檢、郎、員、及道府之愛民者授之。其巡撫之下。增置參議、參軍、支判、凡道、府、同、通。改授此官。其知縣之下。分設公曹、決曹、賊曹、金曹。以州縣進士。分補其缺。其餘諸吏。皆聽諸生考充。漸拔曹長。行取郎官。其上總督。皆由巡撫兼管。……三老之鄉官。各由民舉。……其京官。則太常、光祿、鴻臚。可統於禮部。大理可併於刑部。太僕可併於兵部。通政可併於察院。其餘額外冗官。皆可裁汰。各營一職。不得兼官。章京領天下之事。宜分以諸曹。翰林爲近侍之臣。宜輪班顧問。部吏皆聽舉貢學習。以升郎曹。通政准百僚奏事。以開言路。駢枝既去。宦途甚清。以彼冗糜。增此廩祿。令其達官有以爲輿馬僕從之費。……其小吏有以爲仰事俯畜之用。……若用魏隋之制。予以世祿之田。既體羣臣。庶多廉吏。……今宜立使才館。選舉貢、生、監之明敏有才者。入館學習。其翰林部曹。願入者聽。各國語言、文字、政教、律法、風俗、約章。皆令學習。學成。或爲游歷。或充隨員。出爲領事。擢爲公使。庶幾通曉外務。可以折衝。……夫中國大病。首在壅塞。……伏乞特詔。頒行海內士民。令公舉博古今、通中外、明政體、方正直言之士。略分府縣。約十萬戶而舉一人。不論已仕未仕。皆得充選。因用漢制。名曰議郎。皇上開武英殿、廣懸圖書。俾輪班入直。以備顧問。並准其隨時請對。上駁詔書。下達民詞。凡內外興革大政。籌餉事宜。皆令會議於太和門。三占從二。下部施行。所有人員。歲一更換。若民心推服。留者領班。著爲定制。宣示天下。……天下鼓舞奔走。能者竭力。富者紓財。……君民同體。……中國一家。……合四萬萬人之心以爲心。天下莫強焉。……何至含垢忍恥。割地款於小夷哉。及今爲之。猶可補牢。苟徘徊遲

疑。……因循守舊。……則諸夷環伺。……遲之期月。事變必來。……近日土耳其爲回教大國。不變舊法。遂爲六大國割地廢君。而柄其政。日本一小島夷耳。能變舊法。乃能滅我琉球。侵我大國。前車之轍。可以爲鑒。……伏惟皇上。……歷鑑覆轍。獨奮乾綱。勿搖於左右之言。勿惑於流俗之說。破除舊習。更新大政。宗廟幸甚。天下幸甚。……舉人等草茅疏逖。何敢妄陳大計。自取罪戾。但同處一家。深虞胥溺。……用敢竭盡其愚。惟皇上採擇焉。（康有爲公車上書記）

公車簽名表

省 人		名	
吉林	德 懋		人數
直	劉世駿	何之鎔	三七
	邢霽雲	鄭蜀江	
	劉晉榮	薛士鴻	
	王恩澎	孫同榮	
	李恩銘	張 權	
	郭好蘇	牛桂榮	
隸			
	王蘭元	劉福田	三七
	姚日焜	德 善	
	馬文煜	劉 銅	
	魏景僖	同 書	
	吳毓福	鄭士林	
	呂壽銘	王闊城	
	文 元	孫豫桐	
	王六德	王恩翰	
	賈恩紱	袁勵廷	三七
	文 成		

江	徐普	陳世垣	郭嘉禾	王嘉賓	金還	濮賢恆	王祿孫	四七
	周鉞	羅宏洞	吳廷錫	吳眺	王孝達	濮人驥	馮誠求	
	王鳳璘	劉元炳	張男寅	胡同頰	卞汝方	俞復	高翔	
	張繼良	陳恩洽	許士熊	杜嗣程	錢樹聲	吳曾僊	朱柏	
	唐浩鎮	劉廷弼	繆掄俊	孔揆均	華承謨	吳廷燮	沈恩孚	
蘇	廉泉	汪曾武	周召齊	胡祥鏤	程祖蔚	秦曾澍	茅謙	
	姜汝謨	左運奎	曹元忠	徐秉璜	范蠡			
安	李汝穉	胡嘉楷	胡騰達	劉景墉	胡殿元	何承培	何其純	八
徽	何雲蔚							
山	柴洪	靳紹祖	葛爾壽	崔養鋒	張泰純	寧繩武	王潤章	一〇
西	常立教	李鑑堂	王儀通					
陝	常鼎馨	惠常煜	楊汝春	雷運午	呂國治	崔志遠	高福蔭	五五
	吳星映	申典欽	陳良均	寶牛虛	張效敏	陳名揚	王建	
	王延	鄭書同	李福善	曹邦彥	雷延壽	張鎮岳	溫恭	

肅	趙養廉	張一心	謝邦彥	馬軋德	秦望瀾	苟萃珍	李增稷	馬文蔚	李子緒	甘	西	喬柏蔭	雷光甸	孔繁蔭	宋應相	劉光鈺
蒲春霖	張耀南	高守愚	史彰	李鳳來	孫雲錦	梁窩冕	王國麒	彭汝翼	王汝賢	劉映藜	步紹曰	孫炳麟	校培乙	劉肇復	張繼忠	賴清鍵
王從乾	蘇源泉	羅經權	陸雲錦	李端	張自誠	蔡繩仲	張廷政	吳海淨	陳協華	賴清鍵	張繼忠	曹步章	桂嘉會	常懋德	張繼忠	賴清鍵
劉文炳	柳逢源	趙元貴	黃元清	張自誠	蔡繩仲	劉兆庚	王世相	趙鼎臣	張思永	劉培元	朱陶	曹宏參	張經寅	劉化南	劉化南	劉培元
黃居中	嚴恩榮	李象賢	仙鵬	李其駿	劉兆庚	梁士選	張溥	盧殿魁	侯垣	陳爵	吳琮	似樹森	胡永榮	趙鼎泉	趙鼎泉	陳爵
	錢旭東	蘇曜泉	聶湜	王儀乾	梁士選	孫毓英	牟縉緒	蒲茂	魏鴻儀	高士龍	王炳蔚	吳興敬	張齡	余鼎臣	余鼎臣	高士龍
	安啓楨	滕鈞	王堃域	魏命侯	孫毓英	郭肇燿	郭肇燿	丁俊	張振麒	丁兆松	丁兆松	胡均	謝仁泳	洪祥麟	洪祥麟	丁兆松
									六一							

福建	董元亮	任承紀	董玉林	胡序銓	李景驤	黃家琮	朱勛	八
建	胡兆銓							
江西	陳鵬運	陳鶚運						二
湖北	黃慶曾	夏良材	宋均平	董昌達				四
湖南	劉鎰	曾熙	戴展誠	曾紀先				四
四	張聯芳	楊道南	周銑	鄧代聰	吳昌祀	秦漸和	賴作楫	七一
	李友梁	郭瀚	藍光策	曾鑑	凌開運	李本筠	張繼善	
	羅鴻藻	歐陽薰	劉秉元	龔經估	嚴崇經	藍光第	楊銳	
	李之質	陳禮	賀雲驤	李植	周鴻誌	吳琳	萬正常	
	汪世杰	陳正學	張可均	楊永徵	洪爾振	曹興傑	曾思慎	
	謝剛國	楊宜瀚	賴毓靈	劉濟普	張夢筆	林秉鈞	張西銘	
	劉軋	鄧雲卿	劉焯	羅泰瑩	廖世英	楊紹榮	王濬道	
	劉縱之	謝璋	李作樞	倪文炳	湛鳳翔	胡光大	王鯉	
	賀倫修	王大堯	羅組香	盛時賡	洪子祁	呂廷楨	李樹德	

廣	川	李宗模	周炳燧	王晉涵	戴錫章	曾忠上	胡峻	岳嗣佺
楊巨川	周元蘭	周發祥	洗瑞琪	陳大照	何宗愈	劉慶騏	麥劭祥	
潘志和	吳世泰	何祖濂	何天衢	朱珩	李均琦	左公海		
譚資鑑	魏宗弼	張元鈺	黃心齡	馮祥光	鍾榮光	馮煥章		
譚鏞	梁朝杰	司徒瀾	饒集蓉	鄧潤霖	麥孟華	林憲		
黎宗保	林樹墉	江孔殷	趙純熙	馬鑾光	顏貽澤	王壽慈		
林廷資	謝榮熙	張思澤	龔其華	莫沕缺	江慎中	謝晉勳		
陳謨	陳桂榮	郭金陽	鄭文楨	陳啓人	徐廷傑	梁金鰲		
陳祺年	黃烜林	黃桂瀛	梁驥藻	馮元鼎	梁知鑑	陸錫騏		
梁啓超	李伯興	關伯麟	林鏡鑒	賴際熙	陳廷選	招卓華		
周恩鎬	麥葆元	潘宗尹	梁禹甸	陸壽昌	謝錫勳	杜士琮		
梁冠澄	莫壽彭	曾述經	黃恩榮	黃立權	侯家驥	吳荃選		
湛書	林纘統	劉彥芬	梁念祖	潘焱熊	陳敬彭	葉衍蕃		

八六

東		廣	
梁 泮	周炳蔚	謝經成	梁全士
顏紹澤	李益源	呂增榮	黃得琮
	范晉藩	朱椿林	湯宏業
	文同書	呂鳳儀	甘乃調
	蘇 鑒	林世燾	蘇奇華
	高柱國	莫鴻裁	王國梁
	黃熊祥	陳德三	王子俊
	袁維瀚	朱遠綬	盧榮恩
	李國材	于鳳翔	黃 周
	朱永觀	盧玉鑫	蔣德彰
	黃鳳儀	江蘊深	劉 楷
	施獻瑄	胡建恭	黃祥光
	楊超倫	陳紹湘	蔣士奇
	楊書田	施獻璜	雷廷珖
	胡 梅	黃經垣	雷廷珖
	左慶欣	程式穀	程式穀
	朱賢志	謝寶樹	謝寶樹
	曾文鴻	韋蔭槐	韋蔭槐
	林伯桐	以 莊	以 莊
	鄧幹材	鍾朝綱	鍾朝綱
	鄭幹材	馮希京	馮希京
	黎肇熙	程式穀	程式穀
	黎士璵	鄒戴堯	鄒戴堯
	韋錦恩	黃世洊	黃世洊
	熊振翔	秦鍾毓	秦鍾毓
	李識韓	楊 杰	楊 杰
	黎効松	陳 書	陳 書
	呂炳綸	莫建宰	莫建宰
	張迺森	朱遠緒	朱遠緒
	蔣德彰	劉 楷	劉 楷
	黃 周	黃祥光	黃祥光
	盧榮恩	劉懋官	劉懋官
	王子俊	李慶光	李慶光
	蘇奇華	趙元杰	趙元杰
	甘乃調	杜元椿	杜元椿
	湯宏業	陳慕沅	陳慕沅
	呂增榮	伍登元	伍登元
	李益源	九九	九九

貴							南	雲	西
黃鐘杰	李瑞榮	謝沛澤	喻熙箴	伍襄鈞	吳鶴書	張堯煦	胡開雲	王佩珩	朱賢縉
曾鵬星	陳其鑄	杜樹棻	胡嗣芬	談定安	葛明遠	羅廷珍		白嘉澍	廖鴻年
廖 杭	申德渠	蕭子鑑	蕭正和	黃澤書	謝承珪	黃 明		陳玉相	
李端榮	陳鳳儀	周之麟	周 祐	譚沛林	周守彬	張致安		段榮嘉	周經宗
楊 綬	王崧壽	李端榮	吳懋卿	姜興胄	車鳴楨	李端檢		張 鏞	凌天衢
楊錫謨	蔣燮奇	彭汝壽	胡 俊	周學海	吳廷璧	猶朝選		陳永錕	黎啓勳
柳元翹	徐培中	丁汝窩	王 勳	陳文燾	楊懋林	趙昌麒		繆雲章	蘇汝佶
顧福基	顏德輝	楊國棟	羅會恕	陳端厚	張可瑛	張鴻達		藍和光	謝光墉
呂鈞璜	楊樹琪	申元熙	張清華	張煦春	陳明清	白子釗		鈕尙質	
								趙鶴齡	
								詹太和	
								一五	
								九五	

州	附	記
戴仁祿	熊濱臣	康南海自編年譜謂十八省舉人千二百餘人光緒二十一年文陞閣刻本公車
傅夔	董玉林	上書記只有十六省凡六百三人
胡紀辰	魏祚臣	
王玉梁	楊元龍	
徐致和	孔繁華	
樂嘉藻	馬治源	
何慶崧	聶樹奇	
	吳鵬	
	楊鴻燾	
樊璦	劉廷魁	
黃厚成	丁樹銘	
白贊元	向日葵	
李紹蓮	猶海龍	
王智元		
吳正樞		

「強學會——保國會」

中國風氣。向來散漫。……思開風氣。開知識。非合大羣不可。……合羣。非開會不可。在外省開會。則一地方官足以制之。非合士大夫開之於京師不可。既得登高呼遠之勢。可令四方響應。而舉之於輦轂衆著之地。尤可自白嫌疑。故自上書不達之後。日（光緒二十一年乙未^{一八九五年}五月）以開會之義。號之於同志。……沈子培刑部。陳次亮戶部。皆力贊此舉。七月初。與次亮約集客。若袁慰亭^{世凱}、楊叔嶠^銳、丁淑衡^{立鈞}及沈子培、沈子封兄弟、張巽之^{謙孝}……即席定約。各出義捐。一舉而得數千金。即舉次亮爲提調。張巽之幫之。……舉吾草序文及章程。與卓如擬而公商之。……於是三日一會於炸子橋嵩雲草堂。來者日衆。翰文齋願送羣書。議開

「書藏」於琉璃廠。乃擇地購書。先屬孺博出上海辦焉。……時英人李提摩太亦來會。……英美公使願大助西書及圖器。規模日廣。乃發公函於各督撫。劉坤一、張之洞、王文韶各捐五千金。乃至宋慶、聶士成咸捐數千金。士夫雲集。將俟規模日廓。開書藏。派游學游歷。……於是大學士徐桐、御史褚成博皆欲劾奏。沈子培、陳大亮皆來告。促即行。乃留卓如辦事。而以八月二十九日出京。（康南海自編年譜）

九月……十五。入江寧。……說張香濤開強學會。香濤頗以自任。隔日一談。每至夜深。香濤不信孔子改制。……與黃仲弢、梁星海議章程。出上海刻之。而香濤以論學不合背盟。電來屬勿辦。則以會章大行。不能中止。告乃開會。賃屋於張園旁。遠近響應。而江寧一切不來。處處掣肘。即無楊崇伊之効。亦必散矣。……吾以十二月……急須開報。以用孔子紀年。及刊上諭事。江寧震動。適有京師劾案。遂藉此停止。（康南海自編年譜）

光緒二十一年^{一八九五年}乙未十二月初七日。……言者以城南疆學會。爲結黨歛錢。大干法紀。有寄諭。令都察院封禁。盈廷之是非如此。……十四日。……沈子封來。南城因封禁疆學會。衆洶洶有煩言。（翁同龢翁文恭公日記）

時欲續強學會之舊。先與鄉人士開會。曰粵學會。於（光緒二十三年^{一八九七年}丁酉）十二月十三日。在南海館創辦。京友集者二十餘人。……乃令丁叔雅。佐壽百福。成知恥會。（康南海自編年譜）

（光緒二十四年^{一八九八年}有爲立保國會於京師。（清史稿列傳二六〇康有爲傳）

以公車咸集。欲徧見其英才。成一大會。以伸國憤。……李木齋亦來言開會事。卓如新在湖南開南學會。極盛。

時扶病來京。幼博（康廣仁）以醫卓如故。同寓三條胡同金頂廟。乃定於（光緒二十四年三月）二十二日。開保國會於粵東館。爲草定章程。士夫集者數百。……二十五日。再集於崧雲草堂。二十九日。再集於貴州會館。人皆逾百數。是時各省人士。應時開會。保滇會。保浙會繼起。人數皆逾百數。當是時。公車如雲。來見者日數十。座客填塞。應接不暇。分日夜之力。往各會宣講。……吏部主事洪嘉與者。……三來拜。不得遇。聞者忘其居址。又不答拜。洪以爲輕己。……乃草駁保國會議。謂吾將欲爲民主教皇。刻數千本。徧投朝貴。於是謗言益沸。乃停會。而四方之士。投書預會者紛紛。於是李盛鐸參保國會以求自免。四月初七日。潘慶瀾附片。劾吾聚衆不道。上曰。會爲保國。豈有不善。……時御史黃桂鑒。劾保滇會。保浙會。並及保國會。皆洪嘉與爲之云。於是謗言塞途。賓客至交。皆避不敢來。……與三月時。成兩世界矣。（康南海自編年譜）

自膠州旅順既割。京師人人震恐。……於是康有爲既上書求變法於上。復思開會振士氣於下。於是與□□□等開粵學會。與楊銳等開蜀學會。與林旭等開閩學會。與楊深秀□□□等開陝學會。……於時會試期近。公車雲集。御史李盛鐸。乃就康謀。欲集各省公車。開一大會。康然之。是爲保國會議之初起。康復欲集京官之有志者。李不謂然。後卒從康議。於三月二十七日。康南海自編年譜作二十二日在粵東會館第一集。到會者二百餘人。時會中公推康及李及□□□□□□等演說。而李以事後至。是日公擬保國會章程三十條。今錄於下。一、本會以國地日割。國權日削。國民日困。思維持振救之。故開斯會。以冀保全。名爲保國會。二、本會遵奉光緒二十一年閏五月二十七日上諭。臥薪嘗膽。懲前毖後。以圖保全國地。國民。國教。三、爲保國家之政權土地。四、爲保人民種

類之自立。五、爲保聖教之不失。六、爲講內治變法之宜。七、爲講外交之故。八、爲仰體朝旨。講求經濟之學。以助有司之治。九、本會同志。講求保國、保種、保教之事。以爲論議宗旨。十、凡來會者。激厲憤發。刻念國恥。無失本會宗旨。十一、自京師、上海。設保國總會。各省、各府、各縣。皆設分會。以地名冠之。十二、會中公選總理若干人。值理若干人。常議員若干人。備議員若干人。董事若干人。以同會中人多推薦者爲之。十三、常議員公議會中事。十四、總理以議員多寡決定事件推行。十五、董事管會中雜事。凡入會之事。及文書會計一切諸事。十六、各分會每年於春秋二八月。將各地方入會名籍寄總會。十七、各地方會議員。隨其地情形。置分理議員約七八人。十八、董事每月將會中所收捐款登報。十九、各局將入會之姓名、籍貫、住址、職業。隨時登記。各分局同。二十、欲入會者。須會中人介之。告總理、值理。察其合者。予以入會憑票。二十一、入會者。若心術品行不端。有污會事者。會衆除名。二十二、如有意見不同。准其出會。惟不許假冒本會名滋事。二十三、入會者人捐銀二兩。以備會中辦事諸費。二十四、會期有大會、常會、臨時會之分。二十五、來會者不論名位學業。但有志講求。概予延納。德業相勸。過失相規。患難相恤。務推藍田鄉約之義。庶自保其教。二十六、捐助之款。寫明姓名爵里。交本會給發收條爲據。本會將姓名、爵里、學業、寄寓。按照聯票號數。彙編存記。聯票皆有總理、值理及董事圖章。二十七、來會之人。必求品行心術端正明白者。方可延入。本會中應辦之事。大衆隨時獻替。留備採擇。倘別存意見。或誕妄挾私。及逞奇立異者。恐其有礙。卽由總理、值理、董事諸友。公議辭退。如有不以爲然者。到本會申明。捐款照例充公。去留均聽自便。二十八、商董彙司帳。須習知貿易、書籍情形。及刷印文字者。充其選。必須考查確實。一秉至公。

倘涉營私舞弊。照例責賠。經手之董事會友。凡預有保薦之力者。亦須一律議罰。二十九、本會用項。概由值董核發。如有巨款。在千數百金以上者。須集齊公議。方准開支。收有成數。擇殷實商號存儲。立摺支取。如存數漸多。亦可議生利息。發票之期。按幾日爲限。由值董眼同經理。三十、總理董事。均仗義創辦。不議薪資。將來局款大盛。須專請人辦理。始議薪水。惟撰報、管書、管器、司事、教習、游歷、司帳。酌量給予薪水。（梁啓超戊戌政變記）

「新政建議」

今行世戊戌奏議。多足以表其所見。然自撰或他人代撰。或已上或僅爲擬稿。則未分別註出。

尙書李端棻、學士徐致靖、張百熙、給事中高燾曾等。先後疏薦有爲才。至是始召對。有爲極陳四夷交侵。覆亡無日。非維新變舊。不能自強。變法須統籌全局而行之。徧及用人行政。上歎曰。奈掣肘何。有爲曰。就皇上現有之權。行可變之事。扼要以圖。亦足救國。唯大臣守舊。當廣召小臣。破格擢用。並請下哀痛之詔。收拾人心。上皆聽之。……命在總理衙門章京上行走。特許專摺言事。……有爲連條議以進。（清史稿列傳二六〇康有爲傳）

請勿下部議。特發明詔。立廢八股。其鄉試、童試。請改試策論。……俟學校盡開。徐廢科舉。……並罷試帖。嚴戒考官。勿尙楷法。（南海先生戊戌奏稿）

乞立下明詔。停止弓刀石武試。……廣設武備學校。……派……學生就學德、日兵校。……歸教兵學。且統戎旅。（南海先生戊戌奏稿）

請皇上統籌全局。商定政體。……草具綱領條目。……特御乾清門。大集羣臣。……布告天下。……革舊……維新。……開制度局於內廷。選天下通才任之。皇上親臨。日共商榷。（南海先生戊戌奏稿）

請……鄉立小學。令民七歲以上皆入學。縣立中學。其省、府能立專門、高等學、大學。各量其力。皆立圖書儀器館。京師議立大學。（南海先生戊戌奏稿）

請在京師設譯書局。……日本佳書。可大略皆譯也。……派游學……歐美……縣二人。驟得三千游學生。（南海先生戊戌奏稿）

請……議獎創造新器。著作新書。尋發新地。啓發新俗。……成大工廠以興實業。開專門學以育人才。（南海先生戊戌奏稿）

請裁汰綠營。選改營勇爲巡警。更仿照東西國兵制。大練新軍。（南海先生戊戌奏稿）

乞設立教部教會。並以孔聖紀年。……所有淫祀。……皆以改充孔廟。（南海先生戊戌奏稿）

請停廢漕運。……應發俸餉。……每石折給四兩。……歲餘三千八百萬兩。……專用以興築鐵路。（南海先生戊戌奏稿）

設巡警。整土田。行自治。舉郵政。開學校。定法律。改判獄。……內政辦成。略需一萬萬兩。……陸軍……七十萬

人……須一萬萬兩……海軍……須一萬萬兩……鐵路……分築三大幹路……須三萬萬兩。臣統合計之。應須六萬萬兩……則可大借公債……先辦國家銀行以募之。分立銀行於紐約、倫敦……以此六萬萬存貯于總銀行。而改定金幣。發行公債紙鈔。增其倍數。聽民間銀行以實業押款。（南海先生戊戌奏稿）

請建……十都……自新京及北京、盛京、興京外。請建武昌爲中京……成都爲西京……廣州爲南京……蘭州或長安爲西北京……拉薩……爲藏京……伊犁或迪化……爲西城京。（南海先生戊戌奏稿）

請斷髮易服……改元爲維新元年。（南海先生戊戌奏稿）

請裁撤釐金。（南海先生戊戌奏稿）

請定立憲。開國會。（南海先生戊戌奏稿）

中國向用朝號……伏惟今定國號。因於外稱。順乎文史。莫若用中華二字。（南海先生戊戌奏稿）

頃承恩命。以臣進呈所著各書。編寫有勞。特賞給銀二千兩。微臣拜受……臣竊聞禮部侍郎闕普通武奏請開國會。皇上欲毅然行之。大學士孫家鼐諫曰。若開國會。則民有權而君無權矣。皇上曰。朕但欲救中國耳。若能有益于國民。則無權何害。臣伏聞之。流涕感泣曰。大哉聖人之言也……今歐日之強。皆以開國會。行立憲之故。皇上翕受嘉謨。毅然斷行。此中國之福也……請即定立憲爲國體。預定國會之期。明詔布告天下。然憲法國會條例至繁。尙待選集。取資各國。今未開國會之先。請採用國會之意。一曰。集一國人才而與之議定政制。一曰。聽天下人民而許其上書言事……伏乞皇上特下明詔。令羣臣各薦才俊。府必一人。不問已仕未仕。

概行徵集闕下。大開懋勤殿。令入直行走。……分列百政。各設專科。派以鳩集東西。斟酌今古。編纂政法。以備施行。日輪二十人置之左右。以備顧問。……其有大政。……與之商略。或發與議定。……其外僚微末。士庶專門。各有專長。……故各國議院。學校。農、工、商、礦之人。皆預選焉。今未開國會。一時難集。請明詔特下。許令天下人民上書。聽其所言。……則國才咸集。下情無壅。……其于維新致治。必有大益。（南海先生戊戌奏稿）

（2）百日維新

（甲）翁同龢之得罪

翁同龢先後爲弘德殿、毓慶宮師傅。垂三十餘年。得西太后寵遇。光緒六年。中俄伊犁交涉危急時。特命三王兩大臣專主其事。三王者惇、恭、醇。兩大臣者潘祖蔭、翁同龢也。信任可知。甲申中法之戰。命爲軍機大臣。旋與恭王同退。自後專任戶部尙書者十餘年。醇之枋政。同龢陰爲參佐。光緒親政後。與同龢在書房決定大政。眷顧莫比。對日開戰。再入軍機。力爭和約。又力主締結中俄密約。恥於甲午之敗。力主變法。戊戌四月。御史楊深秀上奏維新守舊應守一途。得懿旨允許。乃下定國是之詔。卽同龢所草。大端在練兵與修鐵路、設銀行、開礦而已。與有爲主張之民權及剪髮易

服。迥然有別。與西后主張之裁綠營裁局員。及剛毅條陳之積穀辦團。亦迥然有別。見起。上頗詰問時事所宜先。並以變法爲急。恭邸默然。臣謂從內政根本起。頗有數對。諸臣亦默然也。（翁文恭公日記光緒二十三年十二月二十四日）

光緒二十四年戊戌^{一八九八年}夏四月……乙巳……諭……數年以來。中外臣工。講求時務。多主變法自強。邇

者詔書數下。如開特科。裁冗兵。改武科制度。立大小學堂。皆經再三審定。籌之至熟。甫議施行。惟是風氣尙未大開。論說莫衷一是。或託於老成憂國。以爲舊章必應墨守。新法必當擯除。衆喁喁。空言無補。試問今日時局如此。國勢如此。若仍以不練之兵。有限之饌。士無實學。工無良師。強弱相形。貧富懸絕。豈真能制挺以撻堅甲利兵乎。朕惟國是不定。則號令不行。極其流弊。必至門戶紛爭。互相水火。徒蹈宋明積習。於時政毫無裨益。卽以中國之大經大法而論。五帝三王不相沿襲。譬之冬裘夏葛。勢不兩存。用特明白宣示。嗣後中外大小諸臣。自王公以及士庶。各宜努力向上。發憤爲雄。以聖賢義理之學。植其根本。又須博採西學之切於時務者。實力講求。以救空疏迂謬之弊。專心致志。精益求精。毋徒襲其皮毛。毋競騰其口說。總期化無用爲有用。以成通經濟變之才。京師大學堂。爲各行省之倡。尤應首先舉辦。著軍機大臣。總理各國事務王大臣。會同妥速議奏。所有翰林院編檢。各部院司員。大門侍衛。候補。候選道。府。州。縣以下官。大員子弟。八旗世職。各省武職後裔。其願入學堂者。均准入學肄業。以期人才輩出。共濟時艱。不得敷衍因循。徇私援引。致負朝廷諄諄告誡之至意。將此通諭知之。（清德宗實錄卷四一八）

同龢屢典試事。門生故吏滿天下。折節下士。爲物望所歸。方恃帝眷。倚清議。盡攬軍機之權。萬無屏黜之理。乃於國是詔下後數日。忽奉硃諭。以原官回籍。謂其以維新得罪於西后。則同龢去後。益進用康有爲。厲行新政。世人多不得其解。實則起因於離間。歸結於黨爭。西后歸政後。以土木宮監之故。因致母子失歡。首遷怒於瑾妃。珍妃。借魯伯陽玉銘買缺事。指爲納賄擅權。黜之爲貴人。次復以離間兩宮逐汪鳴鑾。文廷式。誅內監文得興。汪文皆同龢親信門生。逐之卽所以警同龢。同龢無魄力。多瞻顧。然實任性。恭王以其黨醇而久惡之。李鴻藻性命之交。徐桐弘德同直。皆致終離。李鴻章論事不合。張之洞因購械及漢陽鐵廠經費遭戶部裁抑。致憾尤深。榮祿則視西后意向爲轉移。而皆妬同龢獨得帝眷。異口同聲。詆其導帝對日主戰。以致大挫。而同龢失西后之寵。出納之吝。亦其一端。上下交構。遂致驟逐。遂同龢亦卽所以警光緒帝。

光緒二十四年戊戌一八九八年夏四月……己酉……諭……協辦大學士戶部尙書翁同龢。近來辦事。多未允協。以致衆論不服。屢經有人參奏。且每於召對時。諮詢事件。任意可否。喜怒見於詞色。漸露攬權狂悖情狀。斷

難勝樞機之任。本應查明究辦。予以重懲。姑念其在毓慶宮行走有年。不忍遽加嚴譴。翁同龢著即開缺回籍。以示保全。（清德宗實錄卷四一八）

世皆謂同龢兩黜皆由剛毅下石。而沈鵬參三奸疏所指。爲榮祿、剛毅、李蓮英。沈鵬爲同龢門人。於同龢之黜。不平其事。張之報端。姑以泄忿。榮、剛進用。皆由李蓮英。故并及之。榮祿當甲午之秋。以同龢命漢納根練兵。力持異議。寓書陝撫鹿傳霖。有常熟奸狡性成。誤國甚於合肥語。又徐桐密保張之洞。西后令來京陛見。同龢以計阻之。之洞囑王之春。求援於榮祿。答以南皮公忠可敬。唯常熟一掌遮天。容當緩圖。翁榮交惡若此。非榮不足以逐翁也。

光緒二十四年戊戌一八九八年冬十月……辛丑。硃筆諭內閣。翁同龢授讀以來。輔導無方。從未將經史大義。剴

切敷陳。但以怡情適性之書畫古玩等物。不時陳說。往往巧借事端。刺探朕意。自甲午年中東之役。主戰主和。甚至議及遷避。信口侈陳。任意愆愆。辦理諸務。種種乖謬。以致不可收拾。今春力陳變法。密保康有爲。謂其才勝伊百倍。意在舉國以聽。朕以時局艱難。亟圖自強。於變法一事。不憚屈己以從。乃康有爲乘變法之際。陰行其悖逆之謀。是翁同龢濫保匪人。已屬罪無可逭。其餘陳奏重大事件。朕間有駁詰。翁同龢輒怫然不悅。恟喝要挾。無所不至。詞色甚爲狂悖。其任性跋扈情形。事後追維。殊堪痛恨。前令其開缺回籍。實不足以蔽辜。翁同

蘇著卽行革職。永不敘用。交地方官嚴加管束。不准滋生事端。以爲大臣居心險詐者戒。（清德宗實錄卷四

三二）

常熟翁協揆。學問家世。冠絕班行。兩充帝師。名高望重。而禍亦隨之。當戊戌廷試後。德宗御太和殿傳臚。……翼日爲公揆辰。……忽奉嚴旨驅逐回籍。卽日出京。不准逗遛。霹靂一聲。朝野同爲震駭。公到籍後。閉門謝客。日在山中養疴。迨八月政變。康梁獲罪。剛相時在樞府。首先奏言。翁同龢曾經面保康有爲。謂其才勝臣百倍。此而不嚴懲。何以服牽連獲咎諸臣。維時上怒不測。幸榮文忠造膝婉陳。謂康梁如此橫決。恐非翁同龢所逆料。同龢世受國恩。兩朝師傅。乞援議貴之典。罪疑惟輕。上惻然。僅傳旨交地方官嚴加管束。協揆奉嚴旨後。始知夏間獲譴。係由剛相構成。因謂人曰。子良剛相號前充刑部司員。由余保列一等。得以外簡。厥後以粵撫入京祝嘏。適額相奉旨退出軍機。余卽力保子良。繼入樞垣。雖不敢市恩。實亦未曾開罪。不知渠乘人之危。從井下石如此。嗟歎久之。客有告協揆曰。剛相識漢字無多。聞在直時。每稱大舜爲舜王。讀臯陶之陶字從本音。……指道員劉勳。爲劉鼎。經公當面呵斥。渠隱恨思報復久矣。公熟思良久。曰。是吾之過也。（陳夔龍夢蕉亭雜記卷二）

薦康一事。同龢屬徐致靖疏薦。而已不居其名。庸或有之。就當時事勢而言。康若不得翁之贊許。決不能自達於帝。翁尙賞識陳熾。張謇。豈有獨不喜康。預識其謀之理。乃同龢力辯未嘗薦康。所以愈啓世人之疑。是年四月以後。康有爲之驟用。則張蔭

桓所引進也。

新聞報紀十八日諭旨。嚴拏康梁二逆。並及康逆爲翁同龢極薦。有其才百倍於臣之語。伏讀悚惕。竊念康逆進身之日。已微臣去國之後。且屢陳此人居心叵測。臣不敢與往來。上索其書至再至三。卒傳旨由張蔭桓轉索。送至軍機處。同寮公封遞上。不知書中所言何如也。厥後臣若在列。必不任此逆猖狂至此。而轉因此獲罪。惟有自艾而已。（翁文恭公日記光緒二十五年十一月二十一日）

（乙）維新之事項

變法之事。頑固者及畏被裁而失官者。最爲側目。西后則在若贊若不贊之間。因大事必須請旨。或請安時面稟。西后斷無不知之理。其不贊而帝必欲行者。則亦聽其所爲。不加力沮。母子失和。關鍵在西后不肯作閒人。戊戌所罷新政。庚子後。西后雖復一一行之。而不肯歸政。其意可知。禮部六堂之罷。未經請旨。而懷塔布爲榮祿從叔。其妻常入侍宮中。爲裝扮福祿壽三星之一。此事自爲西后所極不滿。光緒帝於所居瀛臺涵元殿。不時召見康有爲兄弟。抵掌而談。不行君臣之禮。其時即將剪髮易服之言。騰於衆口。頑固者日日走訴。是皆西后萬不能忍之事。而政變以作。

有爲連條議以進。於是詔定科舉新章。罷四書文。改試策論。立京師大學堂。譯書局。興農學。獎新書新器。改各

省書院爲學校。許士民上書言事。諭變法。裁詹事府、通政司、大理、光祿、太僕、鴻臚諸寺、及各省與總督同城之巡撫、河道總督、糧道、鹽道。並議開懋勤殿、定制、改元、易服、南巡遷都。未及行。（清史稿列傳二六〇康有爲傳）

光緒二十四年戊戌一八九八年……五月……丁巳初五日……諭……自下科爲始。鄉會試及生童歲科各試。向

用四書文者。一律改試策論。……（清德宗實錄卷四一九）

五月……辛酉初九日……諭……據……奏請精練陸軍。並神機營改用新法操演。……京營綠營參用西法。

……著軍機大臣會同神機營王大臣、八旗都統。迅速議奏。……（清德宗實錄卷四一九）

五月甲子十二日……諭……鄉會試既改試策論。經濟歲舉……自應併爲一科考試。……生童歲科試……

一律改爲策論。……（清德宗實錄卷四一九）

五月……丁卯十五日……諭……京師大學堂。爲各行省之倡。必須規模宏遠。……派孫家鼐管理大學堂事

務。辦事各員。由該大臣慎選奏派。至總教習。……分教習各員。亦一體精選。中西並用。所需興辦經費。及常年

用款。著戶部分別籌撥。所有原設官書局。及新設之譯書局。均著併入大學堂。由管學大臣督率辦理。（清德

宗實錄卷四一九）

賞舉人梁啓超六品銜。辦理譯書局事務。（清德宗實錄卷四一九）

五月……戊辰十六日……諭……農務爲富國根本。……各省可耕之土。未盡地力者尙多。著各督撫督飭各

該地方官。勸諭紳民。兼采中西各法。切實興辦。……如果辦有成效。准該督撫奏請獎敘。上海近日創設農學會。頗開風氣。著劉坤一查明該學會章程。咨送總理各國事務衙門。查覈頒行。其外洋農學諸書。並著各省學堂。廣爲編譯。以資肄習。（清德宗實錄卷四二〇）

五月……己巳^{日十七}……諭。……各省士民。著有新書。及創行新法。製成新器。果係堪資實用者。尤宜懸賞。以爲之勸。或量其材能。試以實職。或錫之章服。表以殊榮。所製之器。頒給執照。酌定年限。准其專利售賣。其有能獨力創建學堂。開闢地利。興造槍砲各廠。有裨於經國遠猷。殖民大計。並著照軍功之例。給予特賞。以昭激勵。（清德宗實錄卷四二〇）

五月……癸酉^{二十}……諭。……各省綠營練勇。……神機營。……八旗驍騎營。兩翼前鋒護軍營。……按照泰西兵制。更定新章。認真操演。其八旗漢軍砲營。藤牌營。著一併改用新法。（清德宗實錄卷四二〇）

五月……甲戌^{二十}……諭。……前經降旨。開辦京師大學堂。入堂肄業者。由中學、小學。以次而升。必有成效可觀。惟各省中學、小學。尙未一律開辦。總計各直省省會。暨府、廳、州、縣。無不各有書院。著……一律改爲兼習中學西學之學校。……以省會之大書院爲高等學。郡城之書院爲中等學。州縣之書院爲小學。皆頒給京師大學堂章程。令其仿照辦理。其地方自行捐辦之義學、社學等。亦令一律中西兼習。以廣造就。至各書院需用經費。如上海電報局、招商局。及廣東闡姓規。聞頗有溢款。此外陋規濫費。當亦不少。著該督撫儘數提作各學堂經費。各省紳民。如能捐建學堂。或廣爲勸募。准各督撫按照籌捐數目。酌量奏請給獎。其有獨力措捐鉅款

者。朕必予以破格之賞。所有中學、小學應讀之書。仍遵前諭。由官設書局。編譯中外要書。頒發遵行。至如民間祠廟。其有不在祀典者。即著由地方官曉諭居民。一律改爲學堂。（清德宗實錄卷四二〇）

五月……丙子。二十四日……諭。……各國傳教。載在條約。……令各督撫妥爲保護。以期民教相安。……（清德

宗實錄卷四二〇）

五月……丁丑。二十五日……諭。……經濟特科。……著三品以上京官及各省督撫學政。各舉所知。限於三個月

內。迅速咨送總理各國事務衙門。會同禮部。奏請考試。……（清德宗實錄卷四二〇）

又諭。……各省士民著書製器。暨捐辦學堂。……給予世職、實官、虛銜。及許令專利。頒賞扁額。……出示曉諭。

以動觀聽而開風氣。（清德宗實錄卷四二〇）

……戊寅。二十六日……諭。振興商務。……必須講求工藝。設廠製造。……（清德宗實錄卷四二〇）

……己卯。二十七日……諭。……水陸各軍。一律挑留精壯。勤加訓練。……力行保甲。……整頓釐金。……（清德

宗實錄卷四二〇）

……辛巳。二十九日……諭。……馮桂芬校邠廬抗議。……著榮祿迅即飭令刷印一千部。剋日送交軍機處。……

（清德宗實錄卷四二〇）

六月……戊子。初六日……諭。……校邠廬抗議一書。……頒發各衙門悉心覈看。逐條籤出。各註簡明論說。分

別可行不可行。限十日咨送軍機處。彙覈進呈。以備採擇。（清德宗實錄卷四二一）

六月……己丑。初七日……諭……著劉坤一、張之洞、揀派通達商務、明白公正之員紳、試辦商務局事宜。先就沿海、沿江。如上海、漢口一帶。查明各該省所出物產。設廠興工。……應如何設立商學、商報、商會各端。暨某省所出之物產。某貨所宜之製造。並著飭令切實講求。（清德宗實錄卷四二一）

……庚寅。初八日……諭……上海時務報改爲官報。派康有爲督辦其事。所出之報。隨時呈進。其天津、上海、湖

北、廣東等處報館。凡有報單。均著該督撫咨送都察院及大學堂各一份。擇其有關時事者。由大學堂一律呈覽。（清德宗實錄卷四二一）

六月……癸巳。十一日……諭……著各部院堂官。督飭司員。各將該衙門舊例。細心紬繹。其有語涉兩歧。易滋弊混。或貌似詳細。揆之情理。實多窒礙者。概行刪去。另定簡明則例。奏准施行。……迅速辦竣具奏。（清德宗實錄卷四二一）

……又諭……各省中學堂、小學堂。……著各直省督撫就各省在籍紳士。選擇品學兼優、能符衆望之人。派令管理。……（清德宗實錄卷四二一）

六月……丁酉。十五日……諭……著翰林院、詹事府、都察院。各於值日之日。由該堂官輪派講、讀、編、檢八員。中贊二員。科、道四員。隨同到班。聽候召見。俾收敷奏以言之益。其部司員有條陳事件者。著由堂官代奏。士民有上書言事者。著赴都察院呈遞。毋得拘牽忌諱。稍有阻格。用副邇言必察之至意。（清德宗實錄卷四二一）

……又諭……著於京師專設礦務鐵路總局。特派……王文韶、張蔭桓。專理其事。所有各省開礦築路一切

公司事宜。俱歸統轄。以專責成。（清德宗實錄卷四二一）

……己亥_{日十七}……諭。……五城添立小學堂。……著五城御史設法勸辦。……（清德宗實錄卷四二二）

六月……甲辰_{日二十}……諭。……上海時務報改爲官報。……派康有爲督辦其事。……一切學校、農、商、兵、刑、

財賦。均准臚陳利弊。……兼可繙譯各國報章。……所需經費。……由兩江總督按月籌撥銀一千兩。並另撥

開辦經費六千兩。……至報館所著論說。總以昌明大義。扶去壅蔽爲要義。不必拘牽忌諱。……泰西律例。專

有報律一門。應由康有爲詳細譯出。參以中國情形。定爲報律。（清德宗實錄卷四二二）

六月……乙巳_{日二十}……諭。……創建水師……學堂。……增設學額。添置練船。……至鐵路礦務。……亟應設立

學堂。……各處鐵路扼要之區。暨開礦省分。應行增設學堂。……著……奏明辦理。（清德宗實錄卷四二二）

……辛亥_{日九}……諭。……譯書局事務前經派令梁啓超辦理。……所擬章程十條。均尙切實。即著依議行。……

開辦經費銀一萬兩。……著再加給銀一萬兩。……原定每月經費一千兩外。再行增給每月二千兩。……

（清德宗實錄卷四二二）

七月……甲寅_{日初三}……諭。……朝考一場。著即廢止。（清德宗實錄卷四二三）

丙辰_{日初五}……諭。……著即於京師設立農工商總局。派……端方……徐建寅、吳懋鼎爲督理。……各直省

即由該督撫設立分局。……（清德宗實錄卷四二三）

七月……辛酉_{日初十}……諭。……繙譯學堂。准予學生出身。……書籍報紙……免……稅。（清德宗實錄卷

四二三)

七月……乙丑。日十四諭……唐事府……通政司、光祿寺、鴻臚寺、太僕寺、大理寺等衙門……湖北、廣東、雲南

三省巡撫。並東河總督。著一併裁撤。其湖北、廣東、雲南三省。均著以總督兼管巡撫事。東河總督應辦事宜。即歸併河南巡撫兼辦。……其各省不辦運務之糧道。向無鹽場。僅管疏銷之鹽道。亦均著裁缺。歸各藩司巡守道兼理。此外如各省同、通、佐、貳等官。有但兼水利鹽捕。並無地方之責者。均屬閒冗。即著查明裁汰。除應裁之京外各官。……巡撫、河督、京卿等員。聽候另行錄用外。其餘京外尚有應裁文武各缺。及一切裁減歸併各事宜。著……詳議籌辦。(清德宗實錄卷四二四)

又諭……重農之外。桑麻絲茶等項。均爲民間大利所在。……著各直省督撫。督飭地方官。各就物土所宜。悉心勸辦。……(清德宗實錄卷四二四)

……戊辰。日十七諭……昨據吏部、戶部奏。刪訂則例……仿照史表。分門別類。列爲一表。使人易曉。……各衙門均當照此辦理。(清德宗實錄卷四二四)

……諭……士民有上書言事者。著赴都察院呈遞。毋得拘牽忌諱。稍有阻格。……如係封口呈請代奏。即著將原封進呈。毋庸拆閱。其具呈到院者。即將原呈封進。不必另行鈔錄。均著隨到隨遞。不准稽壓。……(清德宗實錄卷四二四)

……庚午。日十九諭……禮部尙書懷塔布等……將該部主事王照條陳。一再駁斥。經該主事而斥其顯

違詔旨。始不得已勉強代表。……禮部尙書懷塔布、許應騤。左侍郎堃岫。署左侍郎徐會灃。右侍郎溥頤。署右侍郎曾廣漢。均著卽行革職。至該主事王照。不畏強禦。勇猛可嘉。著賞給三品頂戴。以四品京堂候補。……

（清德宗實錄卷四二四）

……辛未。日二十……諭。京師爲首善之區。現在道路泥濘。溝渠河道。壅塞不通。……著工部會同管理溝渠河道大臣、步軍統領衙門、五城御史暨街道廳。將京城內外河道溝渠。一律挑挖深通。並將各街巷道路修墊坦平。毋得遷就敷衍。（清德宗實錄卷四二四）

……又諭。……各省實行團練。卽以民團爲民兵。……（清德宗實錄卷四二四）

又諭。內閣侍讀楊銳。刑部候補主事劉光第。內閣候補中書林旭。江蘇候補知府譚嗣同。均著賞加四品卿銜。在軍機章京上行走。參預新政事宜。（清德宗實錄卷四二四）

癸酉。二十日諭。……著各直省督撫。留心訪察。於所屬地方州縣官。如有通達時務。勤政愛民之員。卽隨時保送引見。以備錄用。（清德宗實錄卷四二五）

又諭。……昭信股票苛派擾民。……一概停止勸辦。（清德宗實錄卷四二五）

甲戌。三十日……諭。……現在裁撤各衙門。……裁缺各官。未便聽其閒散。……應於鐵路礦務總局、農工商務

總局。酌設大小官員額缺。以備將來量能任使。（清德宗實錄卷四二五）

又諭。……設工賑廠。……以工代賑。……（清德宗實錄卷四二五）

乙亥。二十日諭……酌置三、四、五品卿、三、四、五、六品學士各職……以備獻納。（清德宗實錄卷四二五）

又諭……設醫學堂。考求中西醫理。歸大學堂彙轄。（清德宗實錄卷四二五）

諭……各衙門呈遞封奏。有一日多至數十件者。嗣後凡有呈請代遞之件。隨到隨即分日進呈。不必拘定值日之期。（清德宗實錄卷四二五）

丙子。二十日諭……將在京各衙門閒冗員缺……外省道員以及同、通、佐、貳等官。暨候補、分發、捐納、勞績等項

人員。認真裁併。並嚴行甄別沙汰。其各局所冗員。一律裁撤淨盡……漕督所轄衛所各官……應行裁汰……

……至京外已裁實缺、候補各員。應如何分別錄用……著妥議條款。（清德宗實錄卷四二五）

丁丑。二十日諭……茶務學堂及蠶桑公院……著已開通商口岸及出產絲茶省分各督撫。迅速籌議開

辦。（清德宗實錄卷四二五）

……戊寅。二十日諭……國家振興庶政。兼採西法。誠以爲民立政。中西所同。而西人考究較勤。故可以補

我所未及。今士大夫昧於域外之觀者。幾若彼中全無條教。不知西國政治之學。千端萬緒。主於爲民開其智。慧。裕其身家。其精乃能美人性質。延人壽命。凡生人應得之利益。務令其推擴無遺。朕夙夜孜孜。改圖百度。豈爲崇尚新奇。乃眷懷赤子。皆上天之所畀。祖宗之所遺。非悉使之康樂和親。朕躬未爲盡職。加以各國環處。陵迫爲憂。非取人之所長。不能全我之所有。朕用心至苦。而黎庶猶有未知。職由不肖官吏。與守舊之士大夫。不能廣宣朕意。乃反胥動浮言。使小民搖惑驚恐。山谷扶杖之民。有不獲聞新政者。朕實爲歎恨。今將變法之意。

布告天下。使百姓咸喻朕心。共知其君之可恃。上下同心。以成新政。以強中國。朕不勝厚望。著查照四月二十三日以後。所有關乎新政之諭旨。各省督撫均迅速照錄。刊刻謄黃。切實開導。著各州縣教官。詳切宣講。務令家喻戶曉。各省藩臬道府。飭令上書言事。毋事隱默顧忌。其州縣官應由督撫代遞者。即由督撫將原封呈遞。不得稍有阻格。總期民隱盡能上達。督撫無從營私作弊爲要。此次諭旨。並著懸掛各省督撫衙門大堂。俾衆共觀。庶無壅隔。（清德宗實錄卷四二五）

又諭……各衙門有條陳事件者。次日即當呈進……所有六月十五日、七月十六日諭旨。七月十九日硃諭。七月十七日暨二十四日交片諭旨。均令各衙門鈔寫一通。同此件諭旨。一併懸掛。（清德宗實錄卷四二五）

又諭……司員……令各部院堂官考試……認真試以策論。秉公分別去取。筆帖式亦著一律考試。又……整頓部務……令司員逐日到署辦事擬稿。藉知司員優劣……（清德宗實錄卷四二五）

又諭。瑞洵奏……商約同志。於京城創設報館。繙譯新報。爲上海官報之續等語。即著瑞洵創辦。以爲之倡。此外官紳士民。並著順天府尹、五城御史。切實勸辦。以期一律舉行。（清德宗實錄卷四二五）

諭……各省教職改爲中小學堂教習……（梁啓超戊戌政變記）

又諭……京師及各通商口岸。設立郵政局。商民既俱稱便。亟宜多設分局。以廣流通。至各省府州縣。著一律舉辦……向設驛站之處。自可酌量裁撤。（清德宗實錄卷四二五）

己卯。二十
八日……諭……各省藩臬道府。均得上書言事。其州縣條陳事件。應由督撫將原書代遞……至士民

有上書言事者。卽經由本省道府隨時代奏。均不准稍有抑格。（清德宗實錄卷四二五）

庚辰。^{二十}諭。……八旗……旗丁生齒日繁。徒以格於定制。不得在外省經商貿易。遂致生計益艱。……宜弛

寬其禁。俾得各習四民之業。以資治生。……（清德宗實錄卷四二五）

八月壬午朔。^初一諭。……直隸按察使袁世凱……著開缺。以侍郎候補。責成專辦練兵事務。……（清德宗

實錄卷四二六）

又諭。……著戶部將每年出款入款。分門別類。列爲一表。按月刊報。俾天下咸曉然於國家出入之大計。……

（清德宗實錄卷四二六）

又諭。……審定官職。……著……詳議具奏。（清德宗實錄卷四二六）

癸未。^{初二}諭。……康有爲前命其督辦官報局。……著……迅速前往上海。毋得遷延觀望。（清德宗實錄卷

四二六）

（3）政變

（甲）訓政

光緒十五年。西后歸政後。軍機處遇大事及二品以上除罷。皆須請旨。每日例必向西后遞本。西后亦常召見軍機。本與訓政無異。所異者。不必日日有起而已。楊崇伊

之請訓政。實際上爲請推翻新政。先是七月中。銳行新政益力。謠傳卽將剪髮易服。榮祿奉西后密旨。令覓京官參奏。崇伊爲原參文廷式之人。獨毅然應募。赴天津與榮祿密議。適袁世凱召見後。回天津。向榮祿告密。乃由崇伊具摺。請慶王代奏。慶王至頤和園請起。西后謂此大事。非小臣所宜言。應由近支議具辦法。問慶王意見。慶王無語。西后遽謂旣爾等意見相同。我不能不從矣。後以謀逆罪康梁。蓋尋題目也。崇伊旋由御史外放漢中府知府。未得峻擢。

八月……丁亥。

初六日

諭……現在國事艱難。庶務待理。朕勤勞宵旰。日綜萬幾。兢業之餘。時虞叢脞。恭溯

同治年間以來。慈禧……皇太后。兩次垂簾聽政。辦理朝政。宏濟時艱。無不盡美盡善。因念宗社爲重。再三籲懇慈恩訓政。仰蒙俯如所請。此乃天下臣民之福。由今日始。在使殿辦事。本月初八日。朕率諸王大臣。在勤政殿行禮。一切應行禮節。著各該衙門敬謹豫備。（清德宗實錄卷四二六）

八月……辛卯。

初十日

諭……朕躬自四月以來。屢有不適。調治日久。尙無大效。京外如有精通醫理之人。

卽著內外臣工。切實保薦候旨。其現在外省者。卽日馳送來京。毋稍延緩。（清德宗實錄卷四二六）

八月丁亥。太后遽自頤和園還宮。復訓政。以上有疾。命居瀛臺養病。（清史稿列傳一后妃傳孝欽顯皇后傳）……聞人持名片來。稱有譚軍機大人有要公來見。不候傳請。已下車至客堂。急索片視。乃譚嗣同也。……譚

云。榮某近日獻策。將廢立弑君。公知之否。予答以在津時常與榮相晤談。察其詞意。頗有忠義。毫無此項意思。必係謠言。斷不足信。譚云。……公如真心救上。我有一策。與公商之。因出一草稿。如名片式。內開榮某謀廢立弑君。大逆不道。若不速除。上位不能保。即性命亦不能保。袁世凱初五請訓。請面付硃諭一道。令其帶本部兵赴津。見榮某。出硃諭宣讀。立即正法。即以袁某代爲直督。傳諭僚屬。張掛告示。布告榮某大逆罪狀。即封禁電局鐵路。迅速載袁某部兵入京。派一半圍頤和園。一半守宮。大事可定。如不聽臣策。即死在上前各等語。……譚云。我僱有好漢數十人。並電湖南。招集好將多人。不日可到。去此老朽。在我而已。無須用公。但要公以二事。誅榮某。圍頤和園耳。……上意甚急。我有硃諭在手。必須即刻定准一個辦法。方可覆命。及出示硃諭。乃墨筆所書。字甚工。亦彷彿上之口氣。大概謂朕銳意變法。諸老臣均不順手。如操之太急。又恐慈聖不悅。飭楊銳、劉光第、林旭、譚嗣同。另議良法等語。……又詰以兩宮不和。究由何起。譚云。因變法罷去禮部六卿。諸內臣環泣於慈聖之前。紛進讒言危詞。懷塔布、立山、楊崇伊等。曾潛往天津。與榮相密謀。故意見更深。……自古非流血不能變法。必須將一羣老朽。全行殺去。始可辦事。……初五日請訓。……即赴車站。……抵津。日已落。即詣院謁榮相。略述內情。……次早。榮相枉顧。以詳細情形備述。……是晚。榮相折簡來招。楊莘伯在坐。出示訓政之電。業已自內先發矣。榮相復撫茶杯笑曰。此非毒藥。你可飲之。惟耿耿於心寢食難忘者。恐累及上位耳。越四日。榮相奉召入都。臨行相約。誓以死保全皇上。……榮相曰。此事在我與慶邸。決不至累及上位。勿慮也。……

……（袁世凱戊戌日記）

戊戌四月。……文忠（榮祿）出領北洋。袁君（世凱）夙蒙恩遇。尙能恪受節制。維時新政流行。黨人用事。朝廷破格用人。一經廷臣保薦。卽邀特簡。袁熱中賦性。豈能鬱鬱久居。倩其至友某太史入京。轉託某學士密保。冀可升一階。不意竟超擢以待郎候補。舉朝驚駭。……袁君遵旨來京。預備召見。入見後。傳聞有旨。以文忠大逆不道。令赴津傳旨。卽行正法。所有直督一缺。卽以袁補授。並帶兵入京。圍頤和園。袁謂天津尙有蘆臺聶士成一軍。曾經百戰。兵數倍於新建陸軍。圍園之事。萬不敢辦。至傳旨將直督正法。亦恐辦不到。或俟九月。兩宮赴津閱操。相機進行。八月初三。袁探知朝局將變。惘惘回津。文忠佯作不知。迨其來謁。但言他事。絕不詢及朝政。袁請屏退左右。跪而言曰。今日奉命而來。有一事萬不敢辦。亦不忍辦。惟有自請死。文忠笑謂究係何事。……袁袖出一紙。……文忠閱竣。正色告曰。大臣事君。雨露雷霆。無非恩澤。但承旨責在樞臣。行刑亦有菜市。我若有罪。甚願自首入京。束身司敗。豈能憑爾袖中片紙。便可欽此欽遵。袁知事不諧。乃大哭失聲。長跪不起。文忠曰。君休矣。明日再談。因晝夜乘火車入京。晤慶邸。請見慈聖。均各愕然。越日奉硃諭。以朕躬多病。恭請太后訓政。時局爲之一變。（陳夔龍夢蕉亭雜記卷二）

（乙）盡罷新政

西后訓政後。新政悉罷。所不罷者。京師大學堂及各省民團。山東義和團卽民團之一。

八月壬辰。^{十一}諭。朝廷振興商務。籌辦一切新政。原爲當此時局。冀爲國家圖富強。爲吾民籌生計。並非好爲變法。棄舊如遺。此朕不得已之苦衷。當爲天下臣民所共諒。乃體察近日民情。頗覺惶惑。總緣有司奉行不善。未能仰體朕意。以致無識之徒。妄相揣測。議論紛騰。卽如裁并官缺一事。本爲沙汰冗員。而外間不察。遂有以大更制度爲請者。舉此類推。將以訛傳訛。伊於胡底。若不開誠宣示。誠恐胥動浮言。民氣因之不靖。殊失朕力圖自強之本意。所有現行新政中裁撤之詹事府等衙門。原議將應辦之事分別歸併。以省繁冗。現在詳察情形。此減彼增。轉多周折。不若悉仍其舊。著將詹事府、通政使、大理寺、光祿寺、太僕寺、鴻臚寺等衙門。照常設立。毋庸裁併。其各省應行裁併局所冗員。仍著各該督撫認真裁汰。至開辦時務官報及准令士民上書。原以寓明目達聰之用。惟現在朝廷廣開言語。內外臣工條陳時政者。言苟可采。無不立見施行。而疏章競進。輒多撫拾浮詞。雷同附和。甚至語涉荒誕。殊多龐雜。嗣後凡有言責之員。自當各抒議論。以達民隱。而宣國是。其餘不應奏事人員。概不准擅遞封章。以符定制。時務官報無裨治體。徒惑人心。並著卽行裁撤。大學堂爲培植人材之地。除京師及各省會業已次第興辦外。其各府、州、縣議設之小學堂。著該地方官察酌情形。聽民自便。其各省祠廟不在祀典者。苟非淫祀。著一仍其舊。毋庸改爲學堂。致於民情不便。此外業經議行及現在交議各事。如通商、惠工、重農、育材。以及修武備、濬利源。實係有關國計民生者。亟當切實次第舉行。其無裨時政而有礙治體者。均毋庸置議。著六部及總理各國事務衙門詳加核議。據實奏明。分別辦理。方今時勢艱難。一切興革事宜。總須斟酌盡善。期於毫無流弊。朕執兩用中。不存成見。爾大小臣工等。務當善體朕心。共矢公忠。實事求

是以副朝廷勵精圖治。不厭求詳之至意。將此通諭知之。（光緒東華錄卷一四八）

戊戌。^{日十七}……諭。……本年江浙新漕。除撥賑外。均卽照常起運。毋庸改折。……（光緒東華錄卷一四八）

乙巳。^{日二十}……諭旨。……嗣後鄉試會試。及歲考、科考等。悉照舊制。仍以四書文、試帖、經文、策問等項。分別考

試。……經濟特科。……並著卽行停罷。……農工商諸務。亟宜實力整頓。惟總局設在京城。文牘往還事多隔

膜。……著卽裁撤。（光緒東華錄卷一四八）

諭。秀言亂政。最爲生民之害。前經降旨將官報局、時務報一律停止。近聞天津、上海、漢口各處仍復報館林立。肆口逞說。……亟應設法禁止。著各該督撫飭屬認真查禁。其中主筆之人。……嚴行訪拿。從重懲治。……

（光緒東華錄卷一四八）

丁未。^{日二十}……諭旨。聯名結會。本干例禁。乃近來風氣。往往私立會名。……結黨營私。……著各省督撫嚴行

查核。拿獲入會人等。分別首從。按律治罪。其設會房屋。封禁入官。（光緒東華錄卷一四八）

九月戊辰。^{日十八}……諭旨。……湖北、廣東、雲南三省巡撫。均著悉仍舊制。勿庸裁併。……河道總督。……著照

舊設立。……督撫既未經裁併。其餘各員自應一仍其舊。……毋庸裁撤。……（光緒東華錄卷一四九）

諭旨。……武場童試及鄉會試。均著仍照舊制。用馬步箭刀弓石等項。分別考試。（光緒東華錄卷一四九）

庚辰。^{日三十}……諭旨。……取士之法。……各省學政暨鄉會試正副考官。務當恪遵學政全書、科場條例內載

條款。實力奉行。……各省書院。……照舊辦理。停罷學堂。……（光緒東華錄卷一四九）

(丙)殺六君子

四京卿進用。西后必知之。而未必知其任寄之隆。楊銳、劉光第爲陳寶箴所保。譚嗣同爲徐致靖所保。康梁變法首要。反致向隅。必因忌者太多。留以有待。故譚嗣同欲行非常之事。使得擢用康梁。所以二人逗留不肯出京。四京卿任事半月。中所行之事。唯免李鴻章總理衙門大臣。及譚嗣同所草廣宣變法之詔。稍足注目。其全力所注。乃在籠絡袁世凱調兵一事。而不料反爲西后添一謀逆題目。四京卿皆著才名。譚嗣同影響於辛亥革命者甚大。唐才常卽其同里。而萍醴之役。多嗣同徒黨也。

八月……丁亥。初六日……諭。工部候補主事康有爲。結黨營私。莠言亂政。屢經被人參奏。著革職。並其弟康廣

仁。均著步軍統領衙門拏交刑部。按律治罪。(光緒東華錄卷一四八)

庚寅。初九日……諭。張蔭桓、徐致靖、楊深秀、楊銳、林旭、譚嗣同、劉光第。均著先行革職。交步軍統領衙門。拿解刑

部審訊。(光緒東華錄卷一四八)

壬辰。初十日……上諭。……官犯徐致靖、楊深秀、楊銳、林旭、譚嗣同、劉光第並康有爲之弟康廣仁。著派軍機大

臣會同刑部都察院。嚴行審訊。……(光緒東華錄卷一四八)

甲午。十三日……諭。……康廣仁、楊深秀、楊銳、林旭、譚嗣同、劉光第等。大逆不道。著卽處斬。(清德宗實錄卷四二七)

乙未。^{十四}……諭……主事康有爲。首倡邪說。惑世誣民。而宵小之徒。羣相附和。乘變法之際。隱行其亂法之

謀。包藏禍心。潛圖不軌。前日竟有糾約亂黨。謀圍頤和園。刦制皇太后。陷害朕躬之事。幸經覺察。立破奸謀。又聞該亂黨私立保國會。言保中國不保大清。其悖逆情形。實堪髮指。朕忝奉慈闈。力崇孝治。此中外臣民之所共知。康有爲學術乖僻。其平日著述。無非離經畔道。非聖無法之言。前因講求時務。令在總理各國事務衙門章京上行走。旋令赴上海辦理官報局。乃竟逗遛輦下。構煽陰謀。若非仰賴祖宗默佑。洞燭幾先。其事何堪設想。康有爲實爲叛逆之首。現已在逃。著各省督撫一體嚴密查拏。極刑懲治。舉人梁啓超。與康有爲狼狽爲奸。所著文字。語多狂謬。著一併嚴拏懲辦。康有爲之弟康廣仁。及御史楊深秀。軍機章京譚嗣同。林旭。楊銳。劉光第等。實係與康有爲結黨。隱圖煽惑。楊銳等每於召見時。欺蒙狂悖。密保匪人。實屬同惡相濟。罪大惡極。前經將各該犯革職。拏交刑部訊究。旋有人奏。若稽時日。恐有中變。朕熟思審處。該犯等情節較重。難逃法網。倘語多牽涉。恐致株累。是以未俟覆奏。於昨日諭令將該犯等即行正法……（光緒東華錄卷一四八）

丁酉。^{十六}……諭。已革工部主事康有爲。學術乖謬。大悖聖教。其所著作。無非惑世誣民。離經畔道之言。著將該革員所有書籍版片。由地方官嚴查銷燬。以息邪說而正人心。（光緒東華錄卷一四八）

又諭……已革工部主事康有爲。已革舉人梁啓超。情罪重大。現飭革職拏辦。所有該革員等原籍財產。著譚鍾麟督飭該地方官。迅速嚴密查抄。該家屬例應緣坐。著一併嚴拏到案。一面根究康有爲。梁啓超下落。一面懸賞購緝……（清德宗實錄卷四二七）

二十六年正月……戊午。^{日十五}……諭。……不論何項人等。如有能將康有爲、梁啓超緝獲送官。驗明實係該逆犯正身。立即賞銀十萬兩。萬一該逆等早伏天誅。只須呈驗屍身。確實無疑。亦卽一體給賞。……至該逆犯等開設報館。發賣報章。……如有購閱……者。一體嚴拏懲辦。此外如尙有該逆等從前所著各逆書。並著嚴查銷燬。……（清德宗實錄卷四五八）

楊深秀字儀村。本名毓秀。山西聞喜人。……光緒十五年成進士。就本官遷郎中。轉御史。……與徐致靖先後疏請定國是。……請設譯書局。派王公游歷各國。……八月政變。舉朝惴惴。懼大誅至。獨深秀抗疏請太后歸政。……官臺諫十閱月。封事二十餘上。……（清史稿列傳二五一楊深秀傳）

楊銳字叔嶠。四川綿竹人。……優貢。朝考得知縣。……光緒十一年。舉順天鄉試。考取內閣中書。二十四年。……上手詔密諭銳。……銳復奏言。太后親挈大位。授之皇上。皇上宜以孝先天下。遇事將順。變法宜有次第。進退大臣不宜太驟。上是之。……宣統改元。銳子慶昶繼手詔於都察院。請代奏。始傳於世。（清史稿列傳二五一楊銳傳）

劉光第字裴村。四川富順人。光緒九年進士。授刑部主事。……家素貧而性廉介。……其召也。亦以陳寶箴薦。然非其素志。……語所親曰。吾終不任此。行當亟假歸矣。（清史稿列傳二五一劉光第傳）

譚嗣同字復生。湖南瀏陽人。……少倜儻有大志。……梁啓超倡辦南學會。嗣同爲之長。……四人雖同被命。每召對。嗣同建議獨多。……啓超……勸嗣同東遊。嗣同曰。不有行者。無以圖將來。不有死者。無以酬聖主。卒

不去……（清史稿列傳二五一譚嗣同傳）

林旭字暉谷。福建侯官人。年十九。舉本省鄉試第一。……入贊爲內閣中書。……爲國學會領袖。又充保國會會員。……年二十有四。（清史稿列傳二五一林旭傳）

康廣仁名有溥。以字行。有爲弟。……謂當先變科舉。庶人才可出。……得旨俞允。……語有爲。今科舉既廢。宜且南歸興學。專教育。俟養成多數有用才。數年後。迺可云改革也。……在獄言笑自若。……（清史稿列傳二五一康廣仁傳）

戊戌黨禁簡表

姓名	官	職	罪	名	懲	罰	備	注
康有爲	工部主事總理各國事務衙門章京督辦官報局	結黨營私、莠言亂政、大逆不道	革職拿辦、查抄家產、懸緝十萬兩					二十六年正月諭
康廣仁		大逆不道	處斬					
宋伯魯	御史	濫保匪人	革職永不敘用					
張蔭桓	戶部左侍郎鐵路礦務大臣	居心巧詐、反覆無常	革職發往新疆、巡撫嚴加管束					
徐致靖	翰林院侍讀學士、署禮部右侍郎		革職永遠監禁					
楊深秀	御史	大逆不道	處斬					

楊銳	內閣中書、四品卿銜、軍機章京、參預新政	大逆不道	處斬	
林旭	同右	大逆不道	處斬	
譚嗣同	候補知府、四品卿銜、軍機章京、參預新政	大逆不道	處斬	
劉光第	刑部主事、四品卿銜、軍機章京、參預新政	大逆不道	處斬	
文廷式	前翰林院侍讀學士	議論時政、與內監往來	處斬	二十二年、革職永不敘用、二十四年、令拿辦
徐仁鑄	翰林院編修、湖南學政		革職、永不敘用	致靖子
梁啓超	舉人、賞六品銜、辦理譯書局	與康有爲狼狽爲奸	革職拿辦、查抄家產、家屬緣坐	二十六年正月諭懸緝十萬兩
王照	候補四品京堂		革職拿辦、查抄家產	
李端棻	禮部尙書	濫保匪人	革職、發往新疆	
陳寶箴	湖南巡撫	濫保匪人	革職、永不敘用	
陳三立	吏部主事	招引奸邪	革職	寶箴子
江標	候補四品京堂	庇護奸黨、暗通消息	革職、永不敘用、交地方官嚴加管束	
熊希齡	庶吉士	庇護奸黨、暗通消息	革職、永不敘用、交地方官嚴加管束	
吳懋鼎	直隸候補道、三品卿銜、督辦農工商局		銷銜撤差	

王錫蕃	詹事府少詹事、署禮部左侍郎		革職、永不敘用	
李岳瑞	工部員外郎		革職、永不敘用	
張元濟	刑部主事		革職、永不敘用	
張百熙	內閣學士	保送康有爲使才	革職、留任	
翁同龢	協辦大學士戶部尚書	濫保匪人、任性跋扈	革職、永不敘用、交地方官嚴加管束	
曾鈺	湖北巡撫	莠言亂政	革職、永不敘用	
皮錫瑞	舉人、主講湖南南學會	宣演平權民主之說	交地方官嚴加管束	
說	一、上表據清德宗實錄及覺迷要錄			
明	一、次序依上諭年月排列			

(丁)立儲

光緒帝爲西后親妹之子。四歲入繼爲帝。幼卽多病。臍中出黃水。瘰癧。咯血。畏雷。唯好讀書。性急且倔強。旣長。喜儉素。惡奢華。每衣敝衣。與西后秉性各異。親政後。屢責內務府浮冒。時杖責中人。讒人交搆。母子失和。宮中禮數最嚴。帝於太后前。奏對及

迎送。皆須長跪。非常之事。帝決不能爲。清代無廢立事。西后縱極惡毒。亦不敢爲。康梁所傳。帝被杖被囚與被弑同爲虛構。然報紙既已喧傳。一若實有其事。後只立大阿哥。兼預布明年光緒帝三旬萬壽典禮。以示無他。而康有爲在海外。遂以保皇爲號召矣。

光緒二十五年己亥一八九九年十二月……丁酉。朕冲齡入承大統。仰承皇太后垂簾訓政。殷勤教誨。鉅細無

遺。迨親政後。正際時艱。亟思振奮圖治。……乃自上年以來。氣體違和。庶政殷繁。時虞叢脞。……前已籲懇皇

太后訓政。一年有餘。朕躬總未康復。……且入繼之初。曾奉皇太后懿旨。俟朕生有皇子。即承繼穆宗毅皇帝

爲嗣。統系所關。至爲重大。……諸病何能望愈。用再叩懇聖慈。就近於宗室中。慎簡賢良。爲穆宗毅皇帝立嗣。

以爲將來大統之界。再四懇求。始蒙俯允。以多羅端郡王載漪之子溥儀。繼承穆宗毅皇帝爲子。……謹敬仰

遵慈訓。封載漪之子溥儀爲皇子。將此通諭知之。（光緒東華錄卷一五七）

丁酉。……諭。大阿哥正當典學之年。嗣後。大內著在弘德殿讀書。駐蹕西苑。著在南殿讀書。派崇綺爲師傅授

讀。並派徐桐常川照料。（光緒東華錄卷一五七）

明年二十六年元旦。大高殿。奉先殿行禮。以溥儀代。都下流言。將下詔禪位。大學士榮祿與慶親王奕劻。以各國公

使有異同。諫止。（清史稿列傳八諸王傳瑞懷親王綿忻傳）

當戊戌政變後。宮闈之內。母子之間。蓋有難言之隱矣。而一班薰心富貴之徒。致有非常舉動之議。東朝惑之。

囑文忠（榮祿）從速辦理。此己亥冬間事也。公諫阻無效。憂懼成疾。適合肥李文忠（鴻章）外任學督。行有日矣。來辭公。見公容貌清癯。曰。何憂之深也。公謂文忠曰。……我受恩至渥。責備亦最嚴。近數日來。求生不能。求死不得。將何以教我。因密語非常之變。恐在目前。文忠聽未終。即大聲起曰。此何等事。詎可行之今日。試問君有幾許頭顱。敢於嘗試。此事若果舉行。危險萬狀。各國駐京使臣。首先抗議。各省疆臣。更有仗義聲討者。無端動天下之兵。爲害曷可勝言。東朝聖明。更事最久。母子天倫。豈無轉圜之望。是在君造膝之際。委曲密陳。成敗利鈍。言盡於此。公聞之悚然若失。翼日以文忠語密奏。幸回天聰。聞某相國。某上公。頗擬藉端建不世之勳。某上公並手擬一稿。開編公然有廢立字樣。公急訶止之。上公意頗快快。（陳夔龍夢蕉亭雜記卷一）時太后議廢帝。立端王載漪子溥儀爲穆宗嗣。患外人爲梗。用榮祿言。改稱大阿哥。（清史稿列傳二二四榮祿傳）

（光緒）二十四年^{一八九八年}太后復訓政。二十五年正月。賜載漪子溥儀頭品頂帶。十二月。上承太后命。溥儀入爲穆宗後。號大阿哥。（清史稿列傳八諸王傳瑞懷親王綿忻傳）

康梁所述戊戌之事。在當時口不擇言。未免言過其實。南海先生十不死記。章炳麟曾痛駁之。康有爲奏稿是否皆已出奏。亦無確證。

（4）富有貴爲之獄

（甲）保皇公司

梁啓超投日本公使館。得其保護。送往橫濱。康有爲由李提摩太介紹。得英使保護。送往上海。清吏預先在碼頭嚴密布置。一俟登岸。卽行逮捕。亦得英人之力而免。旋往日本。後啓超留橫濱辦報。有爲赴美洲。其時正值大阿哥新立。故以保皇公司爲名。向海外華僑招集股本。以營新工商業。前此張謇創大生紗廠於南通。文廷式亦欲辦萍鄉煤礦。其他維新先覺。多投身工礦。謂之辦實業。成爲一時風氣。非官非商。亦官亦商。而以救國爲號召。利用外資。如劉鶚之勾結福公司者。亦有其人。清季工鑛較爲發達。則事實也。

今爲我海外同胞籌之。第一。當每埠公立公司。各立董事。值理。總埠立總理。公舉忠義才能殷實之人爲之。第二。當埠埠相通。誠相聯結。不論萬里。每月每札。互相通信。互相寄相。互激忠義。互講工商進步。互講變法條理。俾知識日開。熱心日加。羣力日合。起大公司。成大商業。皆易。而辦一切事。亦出於此矣。第三。當籌公費。以開銀行。購輪船。將來爲開礦山。築鐵路之用。……今通籌之。若海外五百萬人。扯算計之。每人能以烟酒之餘。人捐美洲銀五圓。合中國銀十圓。則有五千萬矣。先開銀行。印銀紙行之。可得一萬萬零二千五百萬矣。以三千萬辦輪船。以三千萬辦鐵路。以三千萬開礦。以五百萬辦雜業。他日礦路輪船有股者。分利無窮。以三千萬辦一切救國事。以養才能之士。忠義之人。立國體以行之。則中國立可救矣。（海外宜合公司以救君國演說）

今聖主被廢。那拉篡位。榮祿擁兵。日爲賣地賣民之事。幾一年矣。……若我同胞不肯自鬻身。不願自絕種。但同心大發其忠君愛國之心。救之固自易耳。吾爲開二方。上方曰保皇會。則保已能醫救我國民之聖主復位。則四萬萬人立救矣。下方曰保工商會。則我海外五百萬同胞。合力自行保護。則亦可補救我四萬萬人焉。上方至順至易。下方至厚至穩。而皆以人心十分爲引。……保君保民。以保國保種在是矣。……保救大清皇帝公司例。一。此公司欽奉光緒二十四年七月二十九日皇上交軍機楊銳帶出康工部密詔。朕惟非變法不能救中國。而太后不以爲然。今朕位不保。可與同志妥速密籌。設法相救。今同志專以救皇上。以變法救中國。救黃種爲主。一。遵奉聖詔。凡我四萬萬同胞。有忠君愛國救種之心者。皆爲公司中同志。一。此公司爲保救大清皇帝公司。即保種公司。亦爲保工商公司之事。皆同一貫。以保國保種。非變法不可。變法非仁聖如皇上不可。此公司最名正言順。一。各地各埠。皆公舉值理。持簿勸導。以任此事。值理人數。以多爲貴。蓋亡國亡種。人人有份。無可推辭也。凡值理皆得爲本埠公司中議員。一。每埠於值理中。公舉忠義殷實數人爲董事。專任一埠公司事。凡收支捐款。通信各埠辦事。皆主之。有事與各值理公議。卽爲議長。並幫同總理辦事。卽爲總埠議員協理。一。每一大地。合衆埠公舉一尤忠義豪俠著名者爲總理。如美國、加拿大、南洋、澳洲、日本等處。又如美國中之大埠。古巴、檀香山、或紐約。皆可立總理。南洋亦然。近地各埠公司事皆統任之。有事與各埠董事。及本埠中公舉有才望之人爲議員者商議。則爲議長。隨時商告公司長。一。立通信人。中國之患。在於不通。內地則省、府、州、縣不通。外埠亦各地不通。故有才能而不知。有忠義而不達。外人誚吾爲一盤散沙。故雖有四萬萬人。實

散爲一二人而已。安得不弱乎。今各埠立一書記。專主通信各埠。每月互相寄信。總理、董事、值理。互相寄相公函、私札、合影、單片。交互往來。人人相識。埠埠相通。共談國恥而激忠憤。並講工商進益、變法保護之事。則血脈相通。體質自盛。一立總公司所。擇近內地通海外者爲之。澳門知新報、橫濱清議報。皆港澳、日本忠義殷商合股所辦。主持正論。激昂忠愛。薄海共信。今公推爲總公司所。兩報即爲本公司之報。凡同志皆閱此二報。各埠捐款。皆彙匯知新報、清議報妥收。有報館印章。及總公司所印章。總理印章之收單爲據。而知新報與香港接近。皆握外洋之樞。尤爲辦事之主。港澳皆公舉忠義殷實巨商爲大總理。總管收支各款及公司中各事。更立協理、幹事、書記數人。皆公選通才志士任之。以通各埠。任各事……一立公司長。主公司中各事。皆聽指揮。宜公舉維新忠臣、才望最著、薄海信仰者任之。其維新志士。有才望者。將陸續公舉爲公司長、總公司議員。應公商者。與各議員、總理、董事公議。一凡我同志。齊心協力。其有害吾同志者。公司中志士。必報此仇。皇天后土共鑒此言。一同志份金。捐美洲銀一圓。即中國銀二圓以爲本公司支用。其捐千萬份者皆可。一公司中捐款。以招養忠義之士。奔走講勸。通信才能。勞力之人。及開報印紙。傳於各地。發明大義。鼓舞大衆。大款咸集。則爲銀行輪船。以保君國。外護工商。其遵詔設法各事。要皆籌救君國之用。不暇殫及。一求救爲皇上密詔。賞功爲有國大典。況功之高者。莫如救駕。酬勞之厚。尤出非常。此千古罕有之遇也。苟救得皇上復位。公司中帝黨諸臣。必將出力捐款之人。奏請照軍功例。破格優獎。皇上必垂俞允。凡救駕有功者。布衣可至將相。古來常見。願共發憤。立致貴顯。不拘出身。無失機會。今將預擬請獎之格開列。一公司中捐款。無論多少。將來作爲五金煤礦股份。即

以公司中憑票換給股票。均分利息。其十份以上者。分別差等。加賞功牌。一。捐款自百圓以上者。以中國及總之銀計理、董事、值理出力者。除捐款作開礦股份外。分別差等。奏請賞給官階。一。捐款萬圓以上。及總理、董事、值理、各議員。異常出力。及勞歿王事者。應特奏請破格給予世爵。分別差等。子孫襲封。其捐五千圓以上者。有欲承辦開礦工商等事。皆優予權利。至破格封爵。及捐二三千圓。並得工商礦利。當聽聖恩。一。出力之人。由各埠總理、董事。存記於公司長。分別差等。皆賞義士銀牌。或奏請賞職銜功牌。一。出力捐款之人。或未便出姓名者。由總理、董事密記於公司長。到時分別差等。一律奏請獎敘。其有無名氏之款。雖不能賞給官階。亦准持憑票換五金礦股票。一。皇上嘉許。或施破格之恩。更從優厚。凡我同志。上念捨身之聖主。下思自保其身家。各勵忠義。垂名千秋。出洋者。烟酒燒夜。動費巨金。況茲自顧身家國種。預購礦務利權乎。我同胞同志。富者輸財。能者出力。各盡其心。一。各埠皆立三連票簿據。騎縫皆寫千字文號數。蓋印本公司及總理或董事印章。以一爲收銀之憑票。一爲總公司之存票。一爲本埠之存票。票中備記姓名、爵里、事業。以便將來換取礦務股票。及授功牌職銜。其不願者聽。其各三連票簿。皆由總埠分給。與各埠董事管理。以便收銀給據。惟簿冊體式。應同一律。一。捐款姓名數目。願登報者登之。不願者不登。若自願刻報者。告知書記。函告登報。以表彰忠義。其公私兩名。願否登報者同。一。各埠董事。按月將所收捐款。彙匯總公司一次。如不滿百金者。或小埠交總埠彙一次。並按月或按季將本埠公司中情形。寄一函於總公司。有事則總理、董事。宜函告公司長。幸勿逾限。一。各埠皆以忠義報効。惟通信及奔走勸說人。支辛金盤費。截留餘款支之。惟公事開支各埠截留之款。按季彙報總公司。一。總

公司之總理管收支者。皆殷實巨商。其款皆分放銀行。其有支銷千萬之數。皆公司長公函。總理簽名。始準支發。一各埠同志。皆宜酌設公司所。且夕之暇。來復之日。七日來復共到公司所。互談國事。共勵忠義。及保工商期進步之事。隨時量力捐資。不支正款。會中共議擴充本公司之事。宜多閱報。橫濱清議報。澳門知新報。星架坡天南報。皆爲本公司之報。必宜購閱。以知本公司之事。書記住持公司所。每來復日集衆。一公司中各事。各地議員。各埠總理。董事。值理。皆可隨時函商公司長。及互相函商公司事。隨時議例捐益。函宜寫名。一海外志士仁人。同志救國者。望隨時貽書本公司見教。或寄書贈相於公司長者。請寄總公司所。或交各埠公司所代寄亦可。凡我同志。必以多通信。多寄相。多聚談。然後血脈通而氣體盛。一各埠情形不同。其辦事人數。收支存放銀款各情。勸講各法。由各埠議員自議。除此例之外。不必由總公司限定。惟當函告總公司。凡某埠公司成。即當先報總公司。並迅速匯款不可遲。一誦救聖主歌。各國人民。皆有頌其君主歌詩。宴會公聚。皆大衆高歌。今爲歌辭。凡我公司中同志會聚。皆宜歌之。……一各地報館。願作爲本公司報者。即通行公司中同志閱看。廣其銷流。其本不足者。由本埠董事。值理。酌量助資。一上書救主總督劉坤一。曾抗奏保救皇上。以勢薄未成。天下稱忠。本公司先上書太后。請歸政皇上。各埠分上。次則電奏。再次則合各埠簽名千百萬。公請歸政。陳說利害。人心擁戴。西后已悔。當肯相從。否則亦畏人心。不敢害皇上。同志再行設法簽名。以多爲貴。此事但請歸政。並無得罪。宜爭忠義。萬世流芳。一中國賣地鬻權日急。皇上幽囚經年。公司中同志。宜亟發忠憤。日夜念之。奉詔速籌。一切急辦。如救火追亡。以救君國。凡各埠見此序例者。望大呼同志。立即舉行。勿延遲以誤大局。光緒二

十五年月日海外保救大清皇帝公司同啓。（保救大清皇帝公司序例）

（乙）富有票

唐才常特借勤王爲名，未必効忠於清。糾合兩湖志士，欲奪武漢，居中以應四方。與後來武昌起義，用意略同。視戊戌變法爲進一步，張之洞治此獄，株連甚廣，意在杜絕後患。未幾竟有萍醴之起事。

七月初間，湖北巴東、長樂等縣，果有會匪糾衆騷掠起事……旋聞安徽大通已有大股會匪突起焚劫，其勢甚熾。湖北沔陽州之新隄、蒲圻縣之羊樓峒、湖南臨湘縣之灘頭，均有會匪接踵而起……荊州之沙市，以及嘉魚、麻城等縣，均有會匪謀亂情事。各匪聚衆點名，打造刀械，製造號衣，儲備米糧，一似錢財甚爲充裕者。並聞有私運外洋軍火之說……同時各省拏獲各匪，皆係領有富有票。此票乃倣照哥老會散放票布之辦法，其票係上海洋紙石印，寫刻篆印，皆極精工。上橫書富有二字，直書憑票發足典錢一串文。前有編號，後有年月。背有暗口號，圖章二顆，用在湖北者，又鈐楚字圖章。其命名蓋暗寓富有四海之意……凡領票者，均係勾串一氣，互爲聲援。據匪首散票者告人云：持有此票，即可向該匪首處領錢一千文，以後乘坐怡和太古輪船，不索船價。并云中國即將大亂，持票即可保家，以故各省會匪趨之若鶩。旋經查出，此乃大逆康有爲一人主使，調度其夥黨，分布各省，輾轉煽惑，其巢穴即在上海。於租界內設有國會總會……沿江沿海各省，皆有國

會分會。而分會之中。以漢口之分會爲最大。因武漢當南北適中之地。居長江之上游。而兩湖會匪又最多。故先於武漢舉事。其會名曰自立會。其軍名曰自立軍。勾煽三江兩湖等處哥老會匪。……定期七月二十九日。武昌、漢口、漢陽三處。同時起事。約定新隄、蒲圻之匪。速起大股。前來接應。岳州、沙市之匪。遙爲聲援。先於二十七日。訪有端倪。密飭員弁。在漢口地方李慎德堂及寶順里內。拏獲兩湖分會總匪首唐才常、匪首林圭、李虎生等三十餘名。唐才常係督辦南部各省總會。又督辦南部各省軍務處。林圭係統帶國會中軍。李虎生係總窩戶。當時在唐才常寓所。起獲軍械、火藥、偽印、偽札、偽示及富有票多張。又入會各匪姓名簿。又購買洋槍刀械用款。雇募奸細。分往各城各營各局充當內應。月支薪水用款。招募會匪。自稱發餉用款。各項帳簿。又各匪黨往來逆信。又洋文自立會辦事規條。皆在唐才常屋內搜獲。……發交營務處司道、武昌府、江夏縣。公同審訊。該匪等供認開設自立會、勾結哥老會、散放富有票、同夥逆謀不諱。當即將該匪首唐才常等二十名。正法示儆。旋在嘉魚縣拏獲匪黨蔣幗才。搜獲富有票、黃旗。及各匪口號、名單。及正副會長康梁偽諭。暨供出各匪姓名。續據湖南拏獲會匪頭目李英、譚蕙等供稱。康有爲在上海開富有山。正龍頭係康有爲、唐才常、梁啓超、李金彪、楊鴻鈞、師馬炳等。唐才常派爲上海總糧臺。……此事是康有爲爲總。康有爲以唐才常爲總。唐才常以辜仁傑即洪恩、師馬炳即師襄爲總。湘省聞拏自盡之汪鎔。派爲長沙總糧臺。各糧臺之錢。均是康有爲接濟等語。查蔣幗才匪單內。係康有爲爲正龍頭。梁啓超爲副龍頭。並據唐才常供。上海國會總會頭目。係廣東人容閔。此外各處所獲哥老會匪供詞。供出康有爲、唐才常爲首者。不計其數。……查此項自立會匪唐才常

等。以康逆死黨窟穴上海。設立總會。自爲總糧臺。往來沿江沿海各處。廣散銀錢。購誘會匪。……其匪黨往來書信。大指因北方有警。乘此煽動沿江沿海各省。各種會匪。同時作亂。其同謀勾結之人。各省皆有。其購械募匪之款。查簿內存款計洋銀一萬五千餘元。用去已將及萬元。聞康有爲詐騙斂集之款。共有銀六十萬元。安排以二十萬元用之長江。……其偽札有曰。指定東南各行省爲新造自立之國。其華洋文規條內有曰。不認滿洲爲國家。其偽印文曰。中國國會分會駐漢之印。又曰。中國國會督辦南部各省總會之關防。又曰。中國國會督辦南部各路軍務處之關防。又曰。統帶中國國會自立軍中、左、右、前、後等營各關防。其逆信內有曰。以湖北爲中軍。以安徽爲前軍。以湖南爲後軍。其唐才常身邊小篋內。搜出偽號令、告示稿。有云。焚毀各衙署。佔奪槍礮廠。劫掠局庫。佔踞城池。焚戮三日。封刀安民。派將固守。再籌征進。其逆信內有曰。沿途亦可劫掠。其開用偽關防札稿內有曰。業經報明滬會。篆刻關防一顆。內刻中國國會督辦南部各省總會字樣。於庚子年七月初八日開用等語。唐才常到案。一一供認不諱。至平空造言。捏誣狂吠。詆毀兩宮。悖逆凶悍。筆不忍書。令人髮指。該會匪等。以自立爲名號。以焚戮劫掠爲條規。以富有票爲引誘。以哥老會、紅教會及各省各種會匪爲羽翼。意欲使天下人心。同時搖動。天下民生。同時糜爛。實爲兇毒已極。……自漢口匪首伏誅後。各路匪徒。聞之震懾奪氣。惟富有票放出太多。其悍黨匪首尙多漏網。現已訪知。仍復潛蹤往來上海、長江一帶。別設狡謀。力圖糾衆報復。沙市、岳州、常德、澧州一帶匪徒。尙在煽惑窺伺。新隄之匪。竄擾湖南之臨湘、巴陵及監利之朱河等處。其監利、沙洋、麻城、嘉魚、崇陽、巴東、長樂之匪。仍飭各營分投搜勦解散。其襄陽、棗陽、隨州、應山等處。界連

豫邊素多刀匪。豫省年來旱荒。飢民頗衆。亦遂有會匪開堂放票之事。自七月以來。藉開教爲名。嘯聚焚劫。自立會匪滋事。復查有匪目潛往孝感、應山、河南信陽州一帶。謀劫北上諸軍軍火。並煽誘飢民。來漢滋事。現又訊出匪目潛往襄樊一帶。煽動刀匪。已添募馬步各營。沿邊防遏。入境即擊。……惟有仍一面督飭各軍各州縣嚴防密拏。解散脅從。一面照會各國領事。布其逆亂罪狀。囑其遠告外部。勿爲所惑。（葉德輝覺迷要錄卷二鄂督張鄂撫于奏康黨謀逆創設自立會勾結各會匪作亂摺）

光緒二十六年庚子^{一九〇〇年}閏八月……丙午。湖廣總督張之洞等奏。康黨謀逆。創設自立會、自立軍。勾結長

江兩湖會匪。同時作亂。散放富有票。暗寓富有四海之意。在上海開富有山。以康有爲爲正龍頭。梁啓超爲副龍頭。自稱新造自立之國。不認滿洲爲國家。在漢口先期破獲。渠魁唐才常等伏誅。現派營四路剿捕解散。得旨。覽奏殊堪痛恨。著即會商沿江沿海各督撫。將此項會匪。飭屬一體查拏。盡法懲治。務絕根株。（清德宗實錄卷四七〇）

查富有票。係用千字文編號。就查獲親見者。最前有地字號。最後者有職字號。職字已有七百九十四號之票。查職字係第三百一十字。是每字一千張。已有三十一萬張。近據湖南拏獲唐才常之弟唐才中供稱。上海刊印富有票三十多萬。分散夥黨。招匪起事等語。（葉德輝覺迷要錄卷二鄂督張奏分咨各駐使知會各國外部領事勿得容留各匪首片）

庚子聯軍入京。那拉后挾清德宗西狩。保皇會歷在外洋運動華僑。積有巨款。以戊戌維新中止。密謀舉事武

漢時瀏陽唐紱丞才常。實主其事。在長江上下游。有所布置。因哥老會爲秘密會黨之一。有勢力於長江。才常以勤王說之。其頭目謂吾黨若以勤王號召。其勢不可理喻。必動之以利。乃可致之。才常不得已。故有大戮三日、封刀安民之說。爲當局詬病。自滬至漢。均有所謂富有票者。爲入黨秘證。事成則泝漢入襄河。劫德宗於西安。以圖復辟。機事不密。才常被捕授命。亦維新痛史也。梁啓超在橫濱候船失期。事敗。不果行。（張一麐心太平室集卷八）

唐才常。字佛塵。少與嗣同齊名。……聞嗣同死。憂憤屢有所謀。每言及德宗。常泣下。（光緒）二十六年。兩宮出狩。才常陰結富有會。謀舉事。號勤王。將攻武漢。被獲。慷慨言無所隱。請就死。遂殺之。（清史稿列傳二五一 譚嗣同傳附唐才常傳）

（十四）義和團

（1）義和團之崛起

（甲）起源

「源流」

義和拳不知所由起。嘉慶間曾遭嚴禁。然直魯民間。傳習拳法者不絕。傳會神道。持

咒後。神卽附體。謂之上法。自能距躍技擊。或謂屬於八卦教。乾坎二卦。以其習拳而分。卦步相同。八卦教有婦女結隊。窄袖短衣。揮刀善鬥。號紅衣健婦營。而義和拳亦有紅燈照。然蘭簪外史所撰靖逆記。稱齊豫死黨以虎尾鞭、義和拳、紅磚社、瓦刀社與八卦教并列。則非一體可知。義和拳與白蓮教仇殺。不聞八卦教有同此之事。或謂義和爲山東曹州村名。亦無確證。戊戌變政。令各省舉辦團練。改拳爲團。卽在此時。

嘉慶十三年^{一八〇八年}七月戊寅上諭……近日江南之潁州府、亳州、徐州府、河南之歸德府、山東之曹州府、沂州府、兗州府一帶地方。多有無賴棍徒。拽刀聚衆。設立順刀會、虎尾鞭、義和拳、八卦教名目……遇會場市集。公然搭設長棚。押寶聚賭。勾通胥吏。爲之耳目……飭下三省督撫。認真端緝……聚賭械鬥之案。拿獲盡法懲治。（勞乃宣義和拳教門源流考）

王秉衡卽王景會。其族分住直隸灤州及盧龍縣等處。以大乘教清茶門分往外省。傳徒斂錢……石佛口王姓一族。世傳邪教。歷年久遠。蔓延各省……家……藏九蓮如意皇極寶卷真經、元亨利貞鑰匙經。及一切邪悖經卷……滑縣鬧事之人。俱係震卦教。凡有在教者。均稱爲東方震宮王老爺門下。其王老爺係首先傳教之山東荷澤縣人王中。已於乾隆三十七年^{一七七二年}犯案正法。林清徒黨。多係坎卦教。凡有在教者。均稱爲北

方元上坎宮孔老爺門下。其孔老爺係首先傳教之山東寧陽人孔萬林。亦已於王中案內正法。至大乘教、金丹八卦教、義和門、如意門等教。凡有在教者。均稱為南方離宮頭殿真人部老爺門下。其部老爺係首先傳教之河南商邱縣人部生文。已於乾隆三十六年^{一七七一}犯案正法。又……有清茶門教。係滑縣人王正紀所傳。……即係灤州石佛口王姓分支。……嘉慶十六年^{一八一八}經溫承惠審辦過。鉅鹿縣民孫維儉等。係以吳二瓦罐所傳之好話教。即離卦教。改名大乘教。……將大會首孫維儉等五名。分別擬以絞決監候。二會首宋連捷等九十餘名。連吳二瓦罐一併擬遣。其散會首盧珍明等一千六百三十餘名。奏准取具悔結。……再犯加等治罪。十七年^{一八一八}又經溫承惠拿辦過。前案內散會首。復圖興教。私雕偽寶印。蓋護道榜文之劉輞名等。三十餘名口。……是年又拿獲灤州李家套民董懷信等三十餘名。傳習金丹八卦教。……十八年^{一八一八}冬間。大乘教案內。擬絞監禁之大會首李經。在監勾結同教田克岐。散旗謀逆。……旋又究獲八卦教內首要逆犯張九成、楊遇山、宿元謨、劉坤並河南離卦教首部生文之孫部坦、劉功等。……其離卦一教。仍未改悔之案。如所獲安平縣傳習離卦教之楊俊等。究山首先傳教吳二瓦罐之子。仍稱少當家之吳洛雲。並其徒大頭目路運等一案。交河縣傳習一炷香離卦教之齊聞章等。搜出違背十王經卷一案。滄州吳久治、路老等。傳習佛門教一案。青縣季八、葉福明等。傳習義和門教一案。又青縣邊二從習白陽教。預知逆情一案。景州葛錫華等。從習離卦教。預知逆情一案。祁州邢士魁等。傳習如意教。搜獲妄造表名卦號總冊一案。故城縣葛立業傳習義和門拳棒。預知逆情一案。均經訊明。教名雖別。俱係離卦教之子孫徒黨。……現又訪獲青縣尤明等。傳

習義和門離卦教一案。東鹿縣馬楊氏傳習紅陽教。搜獲飄高老祖經一案。亦經奏明。從嚴究辦。至石佛口王姓傳教一案。……派員在盧龍縣安家樓莊。訪獲自江南回籍之王殿魁。並其子王朝萬二犯。提省嚴訊。據王殿魁供認。於乾隆五十七年^{一七九二年}即在淮安、溧水、泗洲、江寧等處傳徒。……並據供出伊族人在湖北傳教共有三人。一名王書魯。一名王泳太。一名王興建。王書魯先在江南儀徵縣傳教。即在彼住家。王泳太、王興建俱在盧龍縣安家樓莊住。又有在山西傳教犯案王如青之次子。小名來子。……續……在安家樓莊。拿獲王三樂、王三畏二名。訊據供稱。伊等均未習教。惟伊次兄王三聘。又名王紹英。曾在山西傳教犯案。業已奏辦。伊三兄王三顧。從前亦往山西。回家後。旋患瘋迷。於本年四月內外出。不知去向。……因查從前辦過王烈案內。有王際昌、王漢倬、王秉鈞三犯。分發邢台縣充徒。行司提省質訊。至王殿魁供出在湖北傳教之王書魯一犯。現准湖廣咨會內開。樊萬興案內之王姓。即王大鼻子。已准江蘇省拿獲。核與王殿魁所供形貌相符。其王泳太、王興建二犯。亦在湖北傳教。當即飛檄各委員訪拿。……教犯王三樂、王三畏、王鳳吉、王來子等四名。已飭提省審辦。並仍……在於該州石佛口、盧龍縣安家樓及闕家莊等處。實力查拿。……（勞乃宣義和拳教門源流考）

義和拳一門。乃白蓮教之支流。其教以練習拳棒爲由。託言神靈附體。講道教拳。詭稱念誦咒語。能禦槍砲。……其黨自嘉慶年間懲辦以後。根株迄未盡絕。直、東兩省各州縣。所在多有。……（勞乃宣義和拳教門源流考）

近年該拳起於山東曹州府之義和村。改名義和拳。（艾聲拳匪紀略）

李秉衡撫山東。適有大刀會仇西教。秉衡獎借之。戕德國二教士。廷議以毓賢官魯久。諳河務。擢代之。光緒二十五年二月既莅事。護大刀會尤力。匪首朱紅燈搆亂。倡言滅教。毓賢令知府盧昌詒按問。匪擊殺官軍數十人。自稱義和拳。毓賢爲更名曰團。團建旗幟皆署毓字。教士乞保護。置勿問。匪浸熾。法使詰總署。迺徵還。至則謁端王載漪。莊王載勛。大學士剛毅。盛言拳民忠勇。得神助。（清史稿列傳卷二五二毓賢傳）

「組織」

義和團之組織。除設壇事事請命于諸神。設糧臺以供食用。二者之外。舉不可知。大約以村爲本。村與村聯。略同于聯莊會。旗幟之色。隨卦而分。亦不止乾、坎二卦。手執刀棍者。皆戴紅巾。相呼曰師兄。主壇者爲大師兄。管事者爲二師兄。張德成、曹福田爲衆所推奉。然亦不能統一指揮。忌諱甚多。諱敗爲勝。至諱同拜爲同勝。知始於兵起之後。因造一切名目。一龍者光緒帝。二虎者禮、慶二王。羊者百官。二毛子三十以上之教民。三毛子則四十以上之教民。洋人謂之狗。或曰大毛子。洋錢謂之狗鈔。洋砲謂之狗銃。洋槍謂之狗桿。火藥謂之散烟粉。鐵軌謂之鐵蜈蚣。電報謂之千里桿。凡洋貨皆必毀之。上陣曰殺狗。帽子曰開元寶蓋。皮帽曰煖兜。酒曰降神湯。烟曰救

睡藥。棍曰二郎神。靴曰黑脚裏。水曰雷公湯。餅曰老君糧。箸曰小二郎神。改洋字爲湫。謂水火夾攻也。清爲桴。謂扶清也。或謂旗幟爲扶清滅洋。容或有之。

其廠前橫大刀一。大刀會所由名也。亦有槍有砲有戈矛之屬。其神以楊戩爲主。謂之太老師。其次則孫臏、馬武、張飛、孫悟空等。神之所附謂之馬子。馬子之年率二十上下。其術有符有咒。符加於頂。或佩身畔。則若風若顛。力大尋常數倍。其說則謂明年^{光緒二十六年}爲劫年。玉皇大帝命諸神下降。其黨相呼以師兄。呼其渠爲大師兄。

渠姓名爲朱紅燈。或曰在平人。或曰長清之李家莊人。其號謂之天龍。……朱紅燈戴大紅風帽。著紅褲。頭目各執兩紅旗。槍刀之屬。以紅布爲飾。蓋其色尙紅。託南方火色。以別於它卦。其初出。向東南叩頭。其令以鼓。其黨有和尙、有道士。其隊以四人爲一團。輪伏輪起。輪退輪進。（蔣楷平原拳匪紀事）

其學拳者。稱大師兄、二師兄、三師兄。其管事者。稱大先生、二先生、三先生。其教師皆由山東來。隱其姓名。行蹤詭祕。其學法畫符請神附體。一夜即成。能避火槍刀矛。小試輒驗。臨戰則否。其神則封神演義、三國演義、水滸等書。（艾聲拳匪紀略）

吾城中（定興縣城）見拳民。由東南兩門整隊而來。或十數人一起。或二三十人一起。壯丁幼童皆有。持長槍者十之七八。持腰刀雙手袋者十之二三。持鳥槍者甚少。或腰紅帶。或蒙紅巾。目不旁視。魚貫而行。（艾聲拳匪紀略）

每傳拳法一處。必須招集二十五人。是謂一團。每團立一團首。一團之人聚散。皆從其令。（拳匪紀事卷六）

取十八歲以下至十二歲以上之閨女。身穿紅布衣履。手執紅巾。一手持一小紅燈籠者。名曰紅燈照。言能上法後。用扇一煽。便能起空駕雲至半空。若大紅星者。或一煽而大砲自閉不響。或一煽而輪船在海中自燒。或一煽而城樓堅固石室俱焚。祇見有此種人。從未見其一上法。（袁昶亂中日記殘稿）

女童習紅燈照。婦人習藍燈照。降體之神。多半小說所云樊梨花、劉金定之類。（拳匪紀事卷六）

總匪首李來中。陝西人。京城匪首韓八。曾充吏部經承。……山東匪首徐天吉。或云總匪首係王覺一。現在四川。該匪係離卦教。色尙紅。故紅巾紅帶。間有黃帶藍帶者。……紅燈照大頭目曰黃蓮聖母。曰二仙姑。（拳匪紀事卷六）

最著則爲乾門。首曰張得誠。次曹福田。張乃靜海人。……妄言聯軍敗北。捏奏邀功者。即是人也。後爲村人所戮。在北京者曰李來中。亦稱乾門。陝西通民。占踞涿州城。剛中堂奉命查勘。揭之去。侮大臣。攻使館。稱兵都下。焚大柵欄。皆李匪所爲。事後乃逸。別有女匪黑兒。幼故繩伎。美其術曰紅燈照。拳門之別派也。乘綠輿出入督轅。制府與之抗禮。（支碧湖續義和拳源流考）

伏查義和拳。卽離卦教中所稱之義和門。與白蓮教同出一源。止有拳會之名。本無鄉團之目。嘉慶年間。……捕治……甚嚴。……日久……防範稍疏。……上年遂復公然傳習。入其教者。雖名爲習拳練技。實乃演誦符咒。詭稱神靈附體。舞槍操棍。……其附體則託以王禪、楊戩、武松、黃飛虎、羅吒諸名號。其魁桀則加以老祖師、大師兄、二師兄諸稱謂。分設拳廠。……入廠者並須輸貲。又以輸貲之多寡。入廠之先後。定其名稱之尊卑。如

欲赴某村訛搶。則送分傳單。先期徵召。迨齊集後。逐一吞符誦咒。焚香降神。雜遝跳舞。爲首者指揮部署。附會神語。以誑其衆。至臨陣對敵。各插一小黃旗。又以紅黃巾帶裹頭束腰。胸際佩黃紙符。其頭目手執黃旗。或身著黃袍。背負神像。其徒衆分持槍刀及鳥槍抬礮。羣向東南叩頭。喃喃作法。起而赴門。自謂無前。會中簿冊以紅布爲之。分別登載。有總辦、統領、打探、巡營、前敵、催陣。及分編哨隊各名目。其充總辦、統領者。皆險驚教師。充前敵、催陣者。皆兇橫匪類。騎馬當先。往來督戰。其名隸哨隊者。皆丁壯少年。……部勒頗嚴。……會中如有期約。雖在數百里外。亦須徵徒往應。沿途令村店供給食物。去不償值。……其用以惑人者。謂能避槍礮。然迭與鄉團教民兵役格鬥。一遇槍礮。輒傷斃多人。瓦解鼠竄。……每至棄其神像旗幟簿冊。（袁世凱奏壽園奏議輯要卷四）

（乙）民教之相仇

義和團之起。由於民教相仇。固爲事實。自江寧和約有傳教專條。教堂例由各國保護。每藉教案以索權利。因貴州田興恕殺開州教民。而勒令革職永不敘用。遣戍新疆。後來成都高密教案。皆沿例要求。天津教案。至殺四十人以抵一法領事之命。府縣由論抵而減爲遣戍。統兵之陳國瑞亦幾不免。曹州教案。德人藉此強佔膠州灣。索膠濟鐵路及沿路礦權。以致各國效尤。強佔海港。劃勢力範圍。幾肇瓜分。國幾不

國。而教民恃教士爲護符。縣官竟不能執法。民教訴訟。例必袒教。教民不信神佛。常詆毀人家神主牌位。尤惡拳民所奉諸神。故民教相仇。拳民教民尤相水火。義和團起。人民無不信之。士大夫能文章。講氣節。專精元史。稱爲學人。如湘中曾廉輩亦信之。蓋自鴉片戰爭橫遭屈辱。人思雪恥。乃有維新之事。至於維新失敗。外患更甚。人心憤激。乃不計成敗利鈍。與之并命。是則屬於全國人心。不僅義和團而已。故維新不成。乃有義和團。又不成。乃有辛亥革命。其事不同。而抗強權則實一貫。

毓中丞賢。於光緒二十五年

一八九九年

令義和拳民教授兵勇拳藝。在按察司街設廠。……中丞赴兗州時。途次

拳匪持槍刀出迎。中丞賞以銀兩。諭善習法術。以期大用。隨即密奏朝廷。謂拳民具神力。能避槍砲。力勝洋兵。……是時省城內外多設拳廠。……有名朱紅燈者。……與在平城北三里堂僧人法號心誠者爲拳首。……在新甸祠聚衆督拳。燒在博平等縣教堂。……在平張莊洋式教堂。價逾萬金。頓成焦土。……北京總署以法使之請。行文到魯。毓賢視爲具文。……萃縣民人劉日清、劉玉清、劉義清、劉甬清。與子姪思南、惟南、糾匪二百餘。擎紅白四旗。上書保清滅洋四字。將梨園莊教民于貴等二十五家。搶劫盡淨。……毓命……各處刀匪。改稱民團。……十月初五日。在平刀匪樹毓撫黃旗。至李韶武莊搶教友兩家。……（李扶增補拳匪禍教記）伏查東省民教。積不相能。推究本原。實由地方州縣各官。平時爲傳教洋人挾制。不能按照約章。持平辦案。遇

有交涉之案。但憑教民一訴。或教士一言。即籤票傳人。縱役勒索。到案復又不分曲直。往往抑制良民。希圖易結。而教民轉得藉官吏之勢力。肆其欺凌。良民上訴。亦難伸理。積怨成仇。有由然也。……良民鬱極思逞。乃起而與教士教民爲難。官正苦於無如教何也。亦思藉民力以報復。有仇教者。不但不肯查禁。或對衆諷煽。不啻潛導而陰驅之。迨教案既成。強鄰執約以相詰責。則又張皇失措。聽其所爲。……東省自德人因教案構釁。租割膠澳。輸償鉅貲。……而本年^{光緒二十五年}春間。沂屬教案。償款十萬餘金。夏間曹濟各屬教案。德教士安治泰擬索償六七萬金。迄今尚未議結。秋冬來。濟東各屬。焚劫大小教堂十處。搶掠教民三百二十八家。擄害教民二十三名。蔓延十數州縣。較之沂曹兩案。滋擾彌甚。將來索償。更不知幾何。……是則官吏不能持平辦案。致使良民激於一逞。而重則割地。輕亦輸金。……適有不逞之徒。乘間滋事。結夥聚徒。習知良民之爲教民欺凌也。輒誑誘鄉愚。勾引報復。焚燬教堂。劫掠教民。繼因各處著名教堂。如禹城之韓莊、恩縣之龐莊、平陰之白雲峪。皆設備固守。屢攻弗克。轉遭殺傷。（袁世凱養壽園奏議輯要卷二）

光緒二十五年己亥^{一八九九年}二月癸卯^{廿五日}……諭。……有人奏。近來山東民教不和。屢屢滋釁。……著該撫

諄飭各州縣。……遇有詞訟。無論教不教。地方官總應一律持平辦理。……尋毓賢奏。東省民教不和。由來已久。從前平民賤視教民。迨後彼強我弱。教民日見鴟張。橫行鄉里。魚肉良民。斷無虐待教民之事。（清德宗實錄卷四三九）

上年^{光緒二十五年}十二月初一日。據平陰縣知縣梁石甫稟稱。有寄居該縣之英教士卜克斯。由泰安府城轉回平

陰。十一月二十八日。經過肥城張家店地方。突遇頭纏紅布匪徒三十餘人。各持刀械。毆傷卜克斯頭額。架赴肥城境內隱匿等情。……初二日。據肥城縣知縣金猷稟稱。卜克斯已於二十八日。又遇騎馬賊匪。擄架戕害。（袁世凱奏壽園奏議輯要卷三）

（丙）義和團之起兵

膠澳之事。魯人目擊心傷。故義和團先起於山東。卽無教民買米以致互鬩。官吏屠殺教民之事。亦必起兵無疑。既起之後。外人責難魯撫毓賢仇教。清廷命袁世凱署山東巡撫。兼率新練陸軍入魯。先勦後撫。世凱揣知執政者意不在勦。乃逼義和團入直隸境。今河北省

歐陽熙己亥冬月十八日與書李盛鐸云。……山東平原因教民買米。義和拳出而相阻。并抗官抗捕。團總入城調停。官誤以投之監。以致地方鼓譟。乃捏詞請兵。東撫卽派首府盧昌詒及候補知府袁世廉率兵往彈壓。袁先至。不分皂白。槍斃四五百人。德州、臨邑。萬姓譁然。東撫據實參奏。請將袁交袁世凱隨營學習。特旨嚴斥。將袁革職。初四。上諭。命毓賢來京。以袁世凱署理東撫。聞係命其將所部八千人帶往。再添募萬二千人。訓練備用。並聞其請訓時。慈聖有先剿後撫之諭。（松堪小記）

自光緒二十五年秋。拳匪擾平原、禹城、在平、恩縣等邑。東昌十屬教民。盡遭荼毒。二十六年春夏。拳匪蔓延三

四十州縣。幾徧濟東。泰、武、臨所屬地方。焚拆教堂數百座。燒燬教民屋二千餘家。殺教友二百九十餘。其因難病故者又有百餘人。受勒受傷。不勝屈指。總計教堂教民所失物件。約值銀一百六十萬。（李扶增補拳匪禍教記）

毓賢撫山東。縱匪。匪散入河間、深、冀……已而毓賢去。袁世凱代之。自與兵疾擊。以故匪不敢近山東。而紛紛入畿疆矣。（清史稿列傳二五二裕祿傳）

（丁）直隸境內之蔓延

「涑水案」

時裕祿爲直督。初頗袒教。後乃事團甚謹。庚子四月。有涑水之事。教民有被殺者。楊福同率兵往勘。擊斃團衆數十。楊福同亦遭團衆襲殺。遂拆路。毀教堂。響應者遍於近畿。

光緒二十六年 庚子一九〇〇年 四月十一日。席教士來函……高洛村閻洛福請來義和拳匪。現今聚人太衆。口稱殺害教民與奉教者。放火……懇祈閣下多費心神。速加護佑。（祝芾庚子剿辦涑水拳匪始末摘要）

本年二月間。新城拳匪滋事……四月……聚集千人。各持器械……焚燒教民房屋數十間。戕斃多命。（祝芾庚子剿辦涑水拳匪始末摘要）

四月十六日。院委……前往查勘。計焚教民房屋八十二間。……拏獲要犯蔡培、楊大柱兩名。又因其設伏邀擊官兵。當格殺匪首一名。擊斃數十名。擒獲四十名。並槍械、牌位、符袋、傳帖等件。……餘衆均各散回房。涿、定與各老團。……而教民屍身。亦先後起獲十具。……二十四日卯刻。楊分統（福同）即帶馬隊三十步隊四十。馳往查辦。行近石亭左近之兩狼溝地方。……不意溝內聚伏多匪。約有二三千之數。羣起突出。致將楊分統坐馬扎傷。驚蹶而墮。鋒刃交集。分統……力竭殞命。（祝芾庚子剿辦涑水拳匪始末摘要）

四月二十七日。據探報稱。匪尙團聚陳家庄、石亭一帶。衆約數千。領隊者爲房、涑拳師密熹和尙。並道士兩名。曾在石亭左右亮隊操演。……二十九日。散回房、涑一帶。既焚燬涑州鐵橋。又放燒高碑店、長辛店鐵路車站。……聞燒高碑店時。左近村民。皆按戶出給秫秸一束。外糊黃紙。蘸以火油。每人手持一把。點火飛傳。故令東西明滅。閃爍無定。詭託神燈。以炫人目。……（祝芾庚子剿辦涑水拳匪始末摘要）

「剛趙之查辦」

清廷聞警。一面派聶士成率軍彈壓。一面命趙舒翹、剛毅往涑州查辦。實覘團衆可用與否。剛毅自命仇洋。力言團衆可恃。團衆入都者三萬人。先設壇于莊王府。教民懷懷自危。各使館遂各調兵自保。

二十六年五月庚戌。諭……近畿一帶拳民聚衆。昨已派令趙舒翹馳往剴切曉諭。著再派剛毅前赴保定一

帶地方。開誠布公。諭以拳民教民皆朝廷赤子。務宜仰體皇仁。即日解散。各安本業。（清德宗實錄卷四六三）
本月初九日。該拳會復在高碑店撲攻防營。十二日。又在北河焚燒鐵路。……十一日。剛相趙兼尹先後到
涿查辦。該拳會始將紅布紅帶等件藏過。……十八日。即聞該匪復聚數千。隨即率衆至高碑店。拆毀鐵路。……
近聞順天、保定、天津、河間各屬。遍地皆匪。（祝芾庚子剿辦涿水拳匪始末摘要）

剛毅還朝。密陳拳民志在拒敵。非叛逆可比。今已俯首受約。不如因而用之。太后默然。……剛、趙既還。拳匪相繼入城。借廟宇設壇。練習拳勇。已乃盤踞民房。暨保清滅洋大旗。（胡思敬鹽背集卷一）

（2）義和團之抗戰

（甲）使館及教堂之圍攻

是時。榮祿爲軍機大臣。兼掌武衛五軍。最得西后寵信。首調董福祥甘軍入衛。而端王載漪。以大阿哥之父。援醇王故事。得與聞軍機重要事件。兼管虎神營。權勢薰灼無比。極力主戰。附之者莊王載勛、剛毅、徐桐。廷臣中。自命老成、實圖苟安者比比。皆言拳不可恃。釁不可啓。西后頗徇端、莊。而不能驟決。榮祿視西后爲從違。徘徊二者間。故雖命董軍攻使館教堂。迨德使克林德、殺克林德者神機營隊長恩海後自首慷慨就死日館書記官杉山彬。先後被戕。而仍命總理衙門與各使通殷勤。蓋攻使館爲清內顧之憂。而又不肯負殺

公使之名。但欲令其自行撤退而已。故攻使館教堂五十日。不能下。

上曾有諭捉拏拳匪。命董福祥以甘軍平之。董復以不能殺此老百姓苦娃娃爲辭。內外交訌。而後有失和攻打使館事。董福祥軍其西。武衛中軍軍其東。自五月十九起。至今將議和。槍聲絡繹不絕。（袁昶亂中日記殘稿。）

光緒二十六年庚子

一九〇〇年

五月己未。

十九日

諭。昨因拳匪滋擾京城。曾諭令步軍統領衙門。嚴拏首要。認真梭

巡。……乃昨夜間。城內各處焚燒如舊。……並著派慶親王奕劻、端郡王載漪、貝勒載瀛、大學士榮祿。督飭派出各員。及馬步各營。並地方文武。實力遵行。（光緒東華錄卷一六〇）

北京使館被圍。實自六月八號始。……自六月二十號。德公使被戕後。是日下午。所有西人悉入英館。而所有水師兵。則仍守奧、法、德、美各館。奧館旋以不可守棄去。而意大利、荷蘭二館亦爲華人所焚。隨後法館東面經華兵佔據。餘如德、日、西班牙、俄羅斯及洋客棧等處。均守至八月十四號。未爲華人所奪。（拳匪紀事卷二）五月二十二日。又召見大學士、六部、九卿。載漪請攻使館。太后許之。（李希聖庚子國變記）

廿四日下午四點鐘。甘軍在王府大街長安牌樓北。與奧使署洋兵開仗。……聞是役係榮中堂發令。飭董軍開仗。當議發令時。皇上痛哭曰。如此則數千萬生靈。必遭塗炭。三百年宗社。必致不守。（拳匪紀事卷二）

二十四日。遂令董福祥及武衛中軍。圍攻交民巷。榮祿自持檄督之。欲盡殺諸使臣。砲聲日夜不絕。屋瓦自騰。城中皆哭。拳匪助之。巫步披髮。升屋而號者數萬人。聲動天地。夷兵纔四百。四面爲營壘。穿地道。令教民分守。

之人自爲必死。皆奮。圍攻五十餘日。晝夜番戰。苦相持。董軍及武衛中軍。死者無慮四千人。拳匪亦多有傷亡。皆引退。（李希聖庚子國變記）

庚子五月十二日。京都教民奏稿……拳匪仇教……於四月二十日。焚燒固安縣公村之教堂。殺斃教士二人。繼於二十七日。又焚燒霸州之善來營村。殺斃教民男女十三人。又於五月初十日。通州東路焚燒教堂。教民住房數處。殺斃教民四十餘人。其他永清、武清等處。殺斃英教士二人。教民死亡無從稽考。其數不可得知。教堂教民房產均焚掠一空。現在四外教民。攜男抱女。逃難到京者。多至數百人。（鹿完天庚子北京事變紀略）

十二日晚八點鐘。城外人聲鼎沸。從東便門至西便門。衆口一詞。僉云。燒香磕頭。潑凉水。殺洋鬼子。即時火起。或云。是順治門外本會南堂。……十七日。……忽報拳匪擁進孝順胡同。美兵迎戰。喊聲振地。拳匪……敗北。向大街行。……至本會外堂。舉火焚燒。又北行至施醫院。延燒倫敦會教堂。燈市口公理會教堂。二條胡同長老會教堂。東華門八面槽天主教堂。折而西。連燒鴨兒胡同教堂。驢肉胡同教堂。缸瓦市福音堂。順治門內天主堂。（鹿完天庚子北京事變紀略）

十七日。拳匪於右安門內。火教民居。無老幼婦女皆殺之。一僧爲之長。十八日。往宣武門內。火教堂。又連燒他教堂甚衆。（李希聖庚子國變記）

二十四日。拳匪既不得志於交民巷。乃往攻西什庫教堂。副都統阿克達春爲前鋒。戰不利。載漪大怒。立斬之。

而教民皆堅壁以待攻。剛毅帕首鞭刀請督戰。張左右翼而前。拳匪死者數百人。剛毅跳而免。忿發罵曰。公等在涿州時。皆言何如。今若此。天下事不足言。吾與之俱受其戮矣。其後崇綺又三往攻之。訖不能入。（李希聖庚子國變記）

西什庫則虎神營與義和團合打。亦一月未攻開。則詭云。鎮物太多。有光腴女人無數。在樓上者云。而洋人用鎗擊殺義和團不出。則云爲穢物所冲。（袁昶亂中日記殘稿）

（乙）對外之宣戰

「宣戰之詔書」

庚子五月。外兵業已進攻大沽口。情勢愈急。江蘇糧道羅嘉杰。撫拾浮言。密稟榮祿。謂外人要挾四端。一。光緒帝親政。二。西太后不得干預政事。三。全國之兵歸外人統率訓練。四。全國之財歸外人整頓管理。榮祿不能祕。以呈西后。主戰之意遂決。五月二十一、二、三三日。在儀鸞殿東煖閣連叫大起。每日兩次。召見王、公、貝勒、軍機、內閣、六部、九卿。商和戰。許景澄、袁昶力陳不可戰。不聽。五月二十五日。下詔宣戰。有云。我國赤子仇怨鬱結。人人欲得而甘心。此義勇焚燒教堂、屠殺教民所由來也。又云。與其苟且圖存。貽譏萬古。何若大張撻伐。一決雌雄。其辭甚壯。軍機章京連文冲所草。

七月初三日。殺許景澄、袁昶。後又殺徐用儀、立山、聯元。以離間爲名。蓋疑其招外兵以謀復辟也。

二十日……午正。有旨命王、貝勒、大臣、六部、九卿傳牌子。預備叫起。……申初。隨班召見。慈聖再三諭。爾等各抒所見。臣昶力言。莫急於先自治亂民。示各夷使以形勢。俾折服其心。然後可以商阻夷使添調外兵。辦法須有次第。佛諭。現在民心已變。總以順民心爲最要。汝所奏不合。臣復奏。變者但左道惑人心之拳匪耳。以辟止辟。捕殺爲首要匪數十人。亂黨烏合之衆。必可望風解散。我自辦亂民。免致夷人調兵代辦。交閩轂輦之下。則大局糜爛。不可收拾。佛不納。（袁昶亂中日記殘稿）

二十一日。召對時。諸王、貝勒及崇綺等二十餘人。痛哭合詞面奏云。非戰不可。皆主張端邸之說。……決戰之機。由羅糧道嘉杰上略園（榮祿）相書。稱夷人要挾有四條。……致觸宮闈之怒。端邸、徐相、剛相、啓秀等。又力主懲治外人。推枰之幾遂決。推原禍本。蘇糧道羅嘉杰密稟大學士榮祿。所稱夷人要挾四條。多悖逆語云云。……然羅嘉杰所稱。既非各國提督照會裕祿。亦非天津各領事揚言。又李鴻章、劉坤一等。前後電奏各國外部語。絕無此說。各外部僉言。此次調兵。係爲保護使臣。助剿亂民。斷不干預中國國家政治家法。當時戰未交綏。何所施其要挾。可知羅語妄誕不根。荒唐無據。輕率密稟。實爲罪魁。（袁昶亂中日記殘稿）

二十三日。到署。始知朝議今晨決戰。命署照會各國公使。因彼水師提督塞我大沽口門。佔我砲台。飭各使限二十四點鐘內。下旗出京回國。已成決裂之局。無可挽回矣。上對廷臣言。可惜十八省數萬萬之生靈。將遭塗

炭。臨朝太息久之。……二十四日。……大叫起。上詢許景澄。手絜其右袂。言。天下數萬萬生靈。立見塗炭。汝不可不切言之。御容感然。許對以似宜保全公使。令其下旂生還。上首肯。舉朝皆怒許之失言。（袁昶亂中日記殘稿）

七月初四日。奉硃諭。吏部左侍郎許景澄、太常寺卿袁昶。屢次被人奏參。聲名惡劣。平日辦理洋務。各存私心。每遇召見時。任意妄奏。莠言亂政。且語多離間。有不忍言者。實屬大不敬。若不嚴行懲辦。何以整肅羣僚。許景澄、袁昶。均着即行正法。（松堪小記）

七月丙辰。^{日十七}諭。……兵部尙書徐用儀。屢次被人參奏。聲名甚劣。辦理洋務。貽患甚深。內閣學士聯元。召見時。任意妄奏。語涉離間。與許景澄等厥罪惟均。已革戶部尙書立山。平日語多曖昧。動輒離間。該大臣受恩深重。尤爲喪盡天良。若不嚴行懲辦。何以整飭朝綱。徐用儀、聯元、立山。均著即行正法。（松堪小記）

上諭。我朝二百數十年。深仁厚澤。凡遠人來中國者。列祖列宗。罔不待以懷柔。迨道光、咸豐年間。俯准彼等互市。並乞在我國傳教。朝廷以其勸人爲善。勉允所請。初亦就我範圍。遵我約束。詎三十年來。恃我國仁厚。一意拊循。乃益肆鴟張。欺凌我國家。侵犯我土地。蹂躪我民人。勒索我財物。朝廷稍加遷就。彼等負其凶橫。日甚一日。無所不至。小則欺壓平民。大則侮慢神聖。我國赤子。仇怨鬱結。人人欲得而甘心。此義勇焚燒教堂、屠殺教民所由來也。朝廷仍不開釁。如前保護者。恐傷我人民耳。故再降旨申禁。保衛使館。加恤教民。故前日有教民拳民皆我赤子之諭。原爲民教解釋宿嫌。朝廷柔服遠人至矣盡矣。乃彼等不知感激。反肆要挾。昨日公然有

杜士蘭照會。令我退出大沽口砲臺。歸彼看管。否則以力襲取。危詞恫嚇。意在肆其猖獗。震動畿輔。平日交鄰之道。我未嘗失禮於彼。彼自稱教化之國。乃無禮橫行。專恃兵堅器利。自取決裂如此乎。朕臨御將三十年。待百姓如子孫。百姓亦戴朕如天帝。況慈聖中興宇宙。恩德所被。渙髓淪肌。祖宗憑依。神祇感格。人人忠憤。曠代所無。朕今涕泣以告先廟。慷慨以誓師徒。與其苟且圖存。貽羞萬古。孰若大張撻伐。一決雌雄。連日召見大小臣工。詢謀僉同。近畿及山東等省義兵。同日不期而集者。不下數十萬人。下至五尺童子。亦能執干戈以衛社稷。彼尙詐謀。我恃天理。彼憑悍力。我恃人心。無論我國忠信甲冑。禮義干櫓。人人敢死。卽土地廣有二十餘省。人民多至四百餘兆。何難翦彼兇饑。張國之威。其有同仇敵愾。陷陣衝鋒。抑或仗義捐貲。助益餉項。朝廷不惜破格懋賞。獎勵忠勛。苟其自外生成。臨陣退縮。甘心從逆。竟作漢奸。卽刻嚴誅。決無寬貸。爾普天臣庶。其各懷忠義之心。共洩神人之憤。朕實有厚望焉。欽此。（松堪小記）

「軍民之苦戰」

聯軍既奪大沽砲臺。守將羅榮光死之。聶士成扼天津。喋血八晝夜。中礮死。李秉衡率軍入援。敗於楊村。秉衡自殺。七月二十一日。京師陷。先一日。西后挾光緒帝倉猝出懷來。奔大同。經太原以至西安。由馬玉崑殘衆護之。榮祿率董部退保定。京津之戰。敵軍多屬日本。我固損折。敵亦死傷甚衆。尤以團衆肉搏陷陣。殺敵致果。爲敵所

畏兵民合而抗敵。民之死綏。更多於兵也。

光緒二十六年^{（一九〇〇年）}五月。聯軍攻我大沽口砲臺。陷之。大沽砲臺在白河口之南。北驢田之東。其北岸曰北砲臺。南岸曰南砲臺。聚於南部者曰新砲臺。築以泥土。圍以石牆。其口岸距京四百八十餘里。天津二百餘里。洵爲天然要隘。先是各國以得其使臣急電。調其水師艦隊。駐泊於此。每欲入據砲臺而無其名。遂各互相聚議。於是月二十日。往見守將羅榮光。勸其讓於各國屯兵。榮光不許。遂備戰事。是晚彼此開砲轟擊。互有死傷。次日味爽。砲臺旁火藥庫中敵砲。兵丁受傷甚衆。各敵艦即乘勢駛至港口。未幾。各臺均被佔據。此爲中外開戰之始。（沈桐生光緒政要卷二六）

大沽一役。列國軍艦之受傷者。計德艦惹蘆崎號。受彈八枚。艦長肢下被傷。兵弁斃者一名。兵卒斃者六名。重傷一名。輕傷八名。俄艦吉利鼓號。受彈四枚。兵弁傷者二名。兵卒傷者四十六名。廓烈號受彈未詳。右舷側約受五枚。船中被焚斃者十名。傷者二十名。波蒲蘆號傷者一名。法艦利安號受彈一枚。船中被焚傷者三名。英艦鴉舌玲號。受彈一枚。士卒無恙。（拳匪紀事卷四）

羅榮光。湖南乾州人。初隸曾國藩麾下。補把總。……光緒二十六年。擢喀什噶爾提督。未之官。而拳亂起。八國兵艦入寇。榮光守大沽礮臺。大沽水深廣。河道縈曲。有臺備險奧。外兵懾其勢。弗敢進。榮光備益嚴。迺佯就款。使人言於裕祿。謂第得四五艘入口。護僑商。無他意。裕祿許之。榮光聞而大驚。力阻。而敵艦已踵入。將及臺。遽出礮仰擊。榮光再謁裕祿乞發戰令。諜者已報臺燬。榮光憤極。歸拔刀殺眷屬。曰。毋令辱外人手。遂出赴難。一

僕隨之。不知所終。他日得其尸臺下。僕尸亦在焉。（清史稿列傳二五四羅榮光傳）

六月丁亥。^{日十七}各國聯軍攻天津。……戊子。^{日十八}各國聯軍佔據天津。宋慶、馬玉崑、裕祿退守北倉。（光緒東

華錄卷一六〇）

聶士成。字功亭。安徽合肥人。……光緒二十六年。拳匪亂。戕總兵楊福同。命士成相機剿辦。匪焚黃村、郎坊、鐵軌。士成阻止之。弗應。擊殺數十人。其黨大恨。訴諸朝。朝旨訶責士成。時匪麇集天津。可二萬。遇武衛軍輒詬辱。士成檢勒部下。毋妄動。榮祿慮激變。馳書慰解。士成覆書曰。匪害民。必至害國。身爲提督。境有匪不能剿。如職何。迺鬱鬱駐楊村觀變。會英法諸聯軍至。士成三分其軍。一護鐵路。一留蘆臺。而自率兵守天津。連奪陳家溝、跑馬廠、八里臺。徑攻紫竹林。喋血八晝夜。敵來益衆。燃毒烟礮。我軍稍却。士成立橋上。手刃退卒。顧諸將曰。此吾致命之所也。踰此一步。非夫矣。遂殞於陣。腸胃洞流。（清史稿列傳二五四聶士成傳）

七月。……敵軍英水師督西摩爾督軍轉戰而前。兵勢屢挫。及初十日。敵軍聯合一氣。分路大舉入犯。我軍迎敵拒戰。至十一日。洋兵麇集猛攻。北倉被佔。裕祿、宋慶退駐楊村。越二日。洋兵進攻楊村。裕祿拒之。正酣戰間。忽受飛砲。傷胸陣亡。（沈桐生光緒政要卷二六）

裕祿字壽山。喜塔臘氏。滿洲正白旗人。……光緒二十四年。……督直隸。義和拳起山東。入直境。……裕祿初頗持正論。主剿。……居無何。……承風指。忽主撫。……匪愈橫。張德成居獨流。稱舉國第一壇。曹福田爲津匪魁。二人者。炫神術爲妄。妖言相煽誘。裕祿不之問。已復致書。請饒二十萬。自任滅外人。裕祿馳檄召之。於是二

人出入節署。與裕祿亢禮。當是時。津城拳匪。至可三萬人。呼嘯周衢市。又以紅燈照焚衆。每入夜。家家懸紅燈。謂迎仙姑。頃之各國兵艦大集。匪猶羣聚督轅。求槍礮。裕祿命詣軍械所。任自擇。盡攫以去。而聯軍絡繹登岸。索大沽礮臺。裕祿懼。疏告急。請救董福祥來援。聯軍索益堅。提督羅榮光不允。戰失利。而裕祿且上天津團民殺敵狀。於是朝廷以團民爲可恃。宣戰詔書遂下。而不知大沽已先數日失矣。裕祿又報大捷。盛張拳匪功。發帑金十萬犒團。更薦德成、福田於朝。飭戰狀。獲賞頭品秩。花翎黃馬褂。事急。官軍戰車站。敗績。裕祿退保北倉。閱三日城陷。德成、福田挾貨走。卒繫而罪之。裕祿飛章自劾。詔革職留任。踰月。北倉失。裕祿又退楊村。遂自殺。（清史稿列傳二五二裕祿傳）

七月十二日。夜雨。東方未明。洋兵乘舟易裝。潛襲韓家樹營。我軍辨認未清。猝不及防。死傷大半。此處不支。大隊亦遂搖動。以致北倉失守。（津西誌記上冊）

七月壬子。^{日十三}各國聯軍據我蔡村。……癸丑。^{日十四}李秉衡率夏辛酉、陳澤霖、張春發。合攻蔡村。不克。各國聯軍進據河西塢。……丙辰。^{日十七}……李秉衡督師。規取河西塢。至武清縣馬頭地方。遇敵敗績。死之。^{日十八}丁巳。各國

聯軍進據通州。（光緒東華錄卷一六〇）

李秉衡。字鑑堂。奉天海城人。初入貲爲縣丞。遷知縣。……光緒二十年。^{一八九四年}東事棘。召爲山東巡撫。……其

時大刀會起。主仇教。勢漸張。二十三年。會衆戕德國教士。德使海靖要褫秉衡職。編修王廷相力爭之。徙督四川。海靖請益堅。迺罷免。……保東南約。秉衡與焉。無何又請募師入衛。至京入覲太后。力主戰。遂命統張春發、

陳澤霖、夏辛酉、萬本華四軍出屯楊村、河西塢。戰纔合，張、萬二軍先潰。澤霖自武清移壁，聞礮聲，軍皆走。秉衡不得已，退通州。疾書致將領，述諸軍畏葸狀，飲金死。（清史稿列傳二五四李秉衡傳）

七月丁巳。^{日十八}各國聯軍進據通州。（光緒東華錄卷一六〇）

七月，聯軍進逼京師。敵軍既獲勝於河西務，迅速進兵。與我軍在通州一帶者接仗三次。守將先鋒後營幫帶楊長清，後哨哨官馬占元，各受傷死。是月十九日，敵軍至京城外，遂以巨木爲架，升砲其上，向城開放。毀壞房屋人民，不可勝計。……旋經某提督傳令，分地紮營，互相會議，定於翌晨，各認地段進攻。（沈桐生光緒政要卷二六）

庚申。^{日廿一}上奉慈禧……皇太后啓鑾出德勝門駐園。^{日廿三}上奉慈禧……皇太后至懷來縣駐蹕。（光緒

東華錄卷一六〇）

董福祥，字星五，甘肅固原人。同治初，回亂作。……福祥亦起安化。……嗣爲劉松山所敗，其父世猷降。福祥亦率衆乞歸款，迺簡其精銳者，編爲董字三營。……光緒二十三年。^{一八九七年}入覲，命領武衛後軍。召對。福祥曰：臣無他能，唯能殺外人耳。榮祿頗信仗之。拳亂起。……董軍圍東交民巷，攻月餘不下。敵自廣渠門入，福祥走彰儀門，縱兵大掠而西。兩宮西幸，充隨扈大臣。和議成，外人堅欲誅福祥。李鴻章曰：彼綰西陲軍，寄久，慮激回變。當緩圖之。迺褫職錮於家。榮祿在西安綜大政，福祥移書讓之。（清史稿列傳二四二董福祥傳）

王懿榮，字正儒，山東福山人。……二十六年，聯軍入寇，與侍郎李端遇同拜命。充團練大臣。懿榮面陳拳民不

可恃。當聯商民。備守禦。然事已不可爲。七月。聯軍攻東便門。猶率勇拒之。俄衆潰。不可復成軍。迺歸語家人曰。吾義不可苟生。家人環跪泣勸。厲斥之。仰藥未卽死。題絕命詞壁上。曰。主憂臣辱。主辱臣死。於止知其所止。此爲近之。擲筆赴井死。（清史稿列傳二五五王懿榮傳）

（丙）京津之淪陷

「天津之外人管理」

聯軍陷天津。城垣及大沽砲臺等。凡被認爲可以妨礙外國軍隊經過者。咸拆除之。又拆民房以建馬路。聯軍往來四鄉。皆由人民供應。自庚子至壬寅。始交還中國。二年之中。民力竭矣。

聞津城未陷之前。各國聯軍會議。有主張得城後卽屠戮無遺者。有主張嚴行殺法者。獨日本兵官主張剿捕亂匪。保護商民。英兵官及俄提督均贊成。議遂定。及城破後。各國議定。分據地方。無分城內外。以鼓樓爲中心。共分四隅。西南隅屬英。西北隅屬法。東南隅屬美。東北隅及河北屬日本。河東及鐵路並北土牆內外屬俄。後鐵路又改歸英國管理。德國兵到津最晚。故後始分一地以屬之。（劉孟揚天津拳匪變亂紀事卷下）

七月初間。洋人就督署內設立衙署。辦理地方事務。其官由英、德、美、日、法、俄六國。各派一人。名爲暫行管理津郡城廂內外地方事務都統。發出安民告示數張。凡一切搶劫犯法之事。一經告發。拿獲該犯。立用洋槍擊死。

並諭令逃走人民。仍回本籍。照常安處。（劉孟揚天津拳匪變亂紀事卷下）

七月十八日。天津城廂內外已設立華巡捕。共劃各地方爲八段。每段公舉紳商六名。相助爲理。其華巡捕仍由洋巡捕作爲領袖。統爲都統衙門巡捕官管轄。（劉孟揚天津拳匪變亂紀事卷下）

八月……都統衙門已開辦各捐。在鍋店街慶善銀號內設立官銀號。爲收捐處所。（劉孟揚天津拳匪變亂紀事卷下）

九月。駐津日本軍於某日諭。令自閘口至南門外。橋子迤東。所有居民舖戶。速行遷徙。其房間令各房主自爲拆毀。卽以其地修築馬路一條。以寬六丈爲度。十月某日。日本人又諭。令自閘口至鐵橋。所有房屋。皆須自行拆毀。沿河堤開築馬路一條。其寬亦以六丈爲度。十一月某日。都統衙門出示。諭令北門外至河濱。所有被焚之房屋。均不准起蓋。卽在此地修築馬路一條。其寬亦以六丈爲度。（劉孟揚天津拳匪變亂紀事卷下）十二月初二日。都統衙門出示。將天津城垣全行拆去。實從十一月中旬。業已動工。每日作工者數百人。其中曾充拳匪者甚多。（劉孟揚天津拳匪變亂紀事卷下）

「北京之八國分佔」

北京既破。由八國分段管理。德軍以其使臣之死。恣爲報復。殺掠最慘。餘亦紀律不嚴。惟日本極力示好。德軍官占中海。法軍官占南海。美占先農壇。日則賃屋而居。日人多謁孔廟者。懲於庚申英法聯軍劫掠圓明園古物。以致世人譏笑。守護清宮惟

謹。而公私財物。則盡取之。蕩然一空。巨室多半傾家。部院大臣每被驅役。毆辱婦女。死者甚衆。

各國以前門爲界。外城前門東爲俄、法。西爲英、美。內城東爲德國。西爲日本。英、美政寬。俄、法政暴。故西城尙有完善之區。東城已寂無人迹。（葉昌熾綠簪廬日記鈔卷八）

日本初入城。即分兵防守宮禁。宮中死亡逃逸外。食指尙千人。皆日軍供給之。（胡思敬驢背集卷三）

日本、義、俄、法、美、德、英七國而分列都城也。由朝陽門內。以大街分中。大街之北。西至地安門。東北皆至城根。皆屬日本管轄也。朝陽門內。大街之南。西至東四牌樓。仍以大街分中。大街之東。南至崇文門城根。皆屬俄國管轄也。東四牌樓南大街之西。西至西大街之東。南至南城根。皆屬德國管轄也。馬市之南。大街之西。西至東皇城根。南至東長安街。皆屬義國管轄也。此東城之分界也。西直門內。以大街分中。大街之北。至城根。東至新街口之南。至毛家灣北。莊王府爲界。大街東西。皆屬日本。東北亦至地安門。亦日本管轄也。西直門大街之南。阜城門內大街之北。當街廟之南。至西四牌樓。北大街之西。至西城根。皆屬義國管轄也。當街廟大街之東。南至西單牌樓北。東至西皇城根。皆屬法國管轄也。西四牌樓大街。西至阜城門城根。踰路之南。西四牌樓大街。南至宣武門城根。踰路之西。皆屬英國管轄也。西單牌樓之南。踰路之東。南至宣武門城根。東至前門。內至西長安街。西交民巷。皆屬美國管轄也。此西城之分界也。東安門內。以大街分中。南者乃英國佔領也。北者至東三座門。乃日本佔領也。東三座門之北。至地安門內之東。乃德國佔領也。西華門外之南。乃美國佔領也。西華門

外之北。至西板橋。乃義國佔領也。西安門內之南。乃法國佔領也。西安門內之北。至地安門內之西。乃俄國佔領也。此皇城內之分界也。正陽門外。以大街分中。由珠市口至廣安門。亦以大街分中。其路南者屬美也。其路北者德國也。正陽門外大街之東。東至崇文門外之西。南北皆至城根。屬法國也。崇文門外大街之東。至東城根。南北亦至城根。屬英國也。此外城之分界也。朝陽門外大關之北。西直門外關廂之北。及德勝、安定、東直各城外。皆屬日本所管也。其餘各城外。余不知屬何國管轄也。……其後亦有日本相讓。德與俄改換者矣。

（洪壽山時事誌略）

七月二十五日。……日本出示曉諭。而搶掠漸息。……仍有不遵新法者。照前搶奪。……被日本捉拿。審問確實。立刻明正典刑而誅之。由光緒二十六年七月下旬。至今二十七年二月中旬。出安定門而誅之者。已六百二十餘人矣。其亦有出東直、西直、德勝者。余不知其數也。（洪壽山時事誌略）

日本出示曉諭。爾等商賈知悉。自出示之後。爾等運販貨物。務須先至安民公所。領取保險執照。然後運貨入城。則洋兵不能阻當耳。惟軍器不許運販也。亦不收國課、厘金、稅務等費。其華洋交易。務要公平。勿許欺壓強買強賣。如有交易不公者。稟報安民公所。即行拿問。從嚴治罪。絕不寬貸。爲此持示。（洪壽山時事誌略）

各國出示曉諭。爾等知悉。自出示之後。大小街巷皆宜掃除乾淨。不許門前堆積髒土。各處須擇空閒處。公議砌壘廁所。以免街市巷口之小解出恭耳。如再有門前堆積糞土者。罰做一天苦工。如仍在路途巷口小解出恭者。罰錢四百。或罰做兩天苦工。禁止鬭毆、強爭、詞訟、煙館、賭局。如有前項情弊。即行嚴拏治罪。絕不寬貸。如

實有冤屈者。呈報順天府。或安民公所。或附近分廳。從公審問。爲此特示。（洪壽山時事誌略）

日本、美、英、俄、德各國佔領之處。皆設土管所。爲住戶舖戶之髑土。倒於筐內。另設官車。各國約有三五百輛。及五七百輛不等。以車載髑土而運於城之外也。……大小街巷潑水。以免颺塵矣。各處夜內點燈者。所爲照看夜內賊盜之行跡也。……美國之處。小兒臉要洗淨。……日本佔領之處。添設牌頭。街長者。所爲稽查附近戶口人名。恐有容留不明之人也。如有不法之人。以街長牌頭是問。設立巡捕處及步營。協尉官廳改爲日本分廳也。所爲緝捕匪徒。以清賊源而息盜風也。（洪壽山時事誌略）

美提督戴麗生。用副都御史曾廣驤。侍讀學士黃思永。侍講學士惲毓鼎。道員王瑾爲理事官。四人惟毓鼎最專。夷酋亦傾心倚任。（胡思敬驢背集卷三）

抗戰各軍簡表

軍號	統領	戰蹟	備註
武衛後軍	董福祥	光緒二十六年。殺日本書記杉山彬。圍東交民巷。攻月餘未下。敵軍至京。福祥大敗於廣渠門外。敵入廣渠門。福祥走彰儀門。兩宮西狩。八月初四日至陽高。福祥至。充隨扈大臣。	清史稿卷四五五 庚子國變記
武衛前軍	聶士成	庚子五月。裕祿調士成至津。連奪陳家溝、跑馬廠、八里台。徑攻紫竹林。喋血八晝夜。卒殞於陣。腸胃洞流。	清史稿卷四六七 天津拳匪變亂紀事 卷上

武衛左軍	宋慶	六月十四日。援天津。大敗。退北倉、楊村。楊村陷。退蔡村。走通州之于家圩。通州失。召守京師。駐南苑。	天津拳匪變亂紀事卷上庚子國變記
武衛左軍	馬玉崑	庚子聯軍入侵。六月初三日。玉崑至津應援。敗於紫竹林。繼戰北倉。相持月餘。卒以無援敗退。兩宮西狩。七月二十二日。至延慶州。玉崑至。命隨扈。	清史稿卷四六一 天津拳匪變亂紀事卷上庚子國變記
天津鎮兵	羅榮光	庚子八國兵艦入寇。總兵羅榮光守大沽礮臺。砲臺失。他日得其尸臺下。	清史稿卷四六七
練勇	王懿榮	七月聯軍攻東便門。團練大臣王懿榮。率勇拒之。衆潰。赴井死。	清史稿卷四六八
勤王軍	夏辛酉	袁世凱聞天津失。乃遣夏辛酉以嵩武軍六營勤王。	驢背集卷四
勤王軍	李秉衡	庚子事起。長江水師大臣李秉衡。請募師入衛。太后命統張春發、陳澤霖、夏辛酉、萬本華四軍。出屯楊村河西塢。潰敗。走通州。飲金死。	清史稿卷四六七
勤王軍	程文炳	詔福建提督程文炳。節度福建（二營）江南浙江（四營）安徽（五營）江西（四營）勤王軍。赴彰（德）衛（輝）懷（慶）備守禦。	清史稿卷四五七 拳匪紀事卷二
勤王軍	岑春煊	甘肅藩司岑春煊。統甘軍五營入衛。自陳新募之兵。不能當前敵。詔令駐張家口防俄。兩宮過南口。率所部二千人赴之。尋簡爲陝西巡撫。	驢背集卷四

勤王軍	鹿傳霖	江蘇巡撫鹿傳霖。募三營入衛。至山東境。逡巡不前。聞京師陷。奔山西。八月十五日。兩宮至忻州。傳霖至。伏奏痛哭。自言赴援不力。即日還兩廣總督。	清史稿卷四三八 駱晉集卷四 庚子國變記
勤王軍	錫良	庚子京師危急。湖廣總督、湖北、湖南巡撫。會委立授巡撫。使錫良。統率鄂湘軍隊入衛。迎駕山西。嚴行防守。	清史稿卷四四九

入侵聯軍簡表

國名	兵數	統帶	戰事	經過	備註
德國	二萬二千五百人	瓦德西	途四百餘人參加西摩爾由津去京救使館中 人參回之戰。倚而的砲艦及上岸兵五百 加解天津大沽砲臺之戰。二千二百五十人 天津附近之攻守。兩隊兵參加攻奪天津 津城。約三百人參加進攻北倉楊村。攻奪 即回津。約三四千人參加侵奪保定戰。下	法來人佛甫愛加 劉施米程同洛 劉翹翰庚子中 外戰紀第四、 五、六 章 八國聯軍志 瓦德西拳亂筆 記	瓦德西拳亂筆 記
英國	二萬人	蓋斯里	九百餘人隨其提督西摩爾去京師救使 館。中途退回。灰丁、發雷、亞爾舍林三艦 及上岸兵二百五十人參加奪天津駐軍之圍 戰。約二百餘人參加天津附近之攻守。七 百一千九百餘人參加天津附近之攻守。七 百人及軍輪砲大砲各四尊參加攻奪天津	庚子中外戰紀 第四、五、六 章 八國聯軍志 瓦德西拳亂筆 記	瓦德西拳亂筆 記

美國	法國	俄國	日本	
五千八百人	一萬五千六百人	一萬八千人	二萬二千人	
沙飛	福里		山口素臣	
<p>一百餘人參加西摩爾救使隊。毛拿加西駐軍之圍。三百五十人參加天津附近攻守。六百人參加進攻北倉、楊村至京師。砲六尊參加進攻北倉、楊村至京師。</p>	<p>一百五十餘人參加西摩爾救使隊。力勇砲艦參加奪大沽砲臺戰。四百餘人參加天津附近攻守。砲兵一中隊參加進攻北倉、楊村。即暫駐楊村。約三四千人參加侵奪保定。</p>	<p>三百餘人參加西摩爾救使隊。日愛立亞克、保布二砲船、稿烈巡洋艦參加奪大沽砲臺之戰。二千一百人解津駐兵之圍。五千八百餘人參加天津附近攻守。二千六百八人攻奪天津城。三千五百人、大砲十六尊參加進攻北倉、楊村至京師。</p>	<p>五十二人參加西摩爾救使隊。亞打告砲艦及上岸兵三百人參加奪大沽砲臺。三千八百餘人參加天津附近攻守。二千四百人奪下天津城。九千人大砲二十四尊進攻北倉至京師。</p>	<p>城。一千五百人、大砲十二尊進攻北倉、楊村至京師之戰。約三千人參加侵奪保定之戰。</p>
<p>庚子中外戰紀 第四、五、六 章 瓦德西拳亂筆記</p>	<p>庚子中外戰紀 第四、五、六 章 瓦德西拳亂筆記</p>	<p>庚子中外戰紀 第四、五、六 章</p>	<p>庚子中外戰紀 第四、五、六 章 瓦德西拳亂筆記</p>	

意國	二千數百人		四十人參加西摩爾救使隊。一百三十八人參加津城附近攻守。數十人參加進攻北倉、楊村。克即回津。約千人參加奪保定。	
奧國	四五百人		二十五人參加西摩爾救使隊。一百三十人參加天津附近攻守。數十人（意、奧共百人）參加進攻北倉、楊村。攻下即回津。	
總計 八國	十萬五千餘人	總司令 瓦德西	戰事所及之地。南至青縣、河間、肅寧、蠡縣、祁州、新樂、行唐。西至阜平、及西山一帶。東至海口、永平、山海關。北至赤峯、長城、張家口。凡此數百里內。多爲洋兵所蹂躪。	拳匪紀事卷四 八國聯軍志

（丁）東南自保

京津抗戰。而東南乃成自保之局。英視上海商務爲性命。甲申、甲午兩次戰役。英與法日兩國要約。不使戰事波及上海。庚子肇衅。由英美領事示意華官。自保東南。勿使戰事波及長江。于是劉坤一與上海外國領事。簽訂東南自保之約。同時。東南督撫由李秉衡領銜。電達京師。不奉矯詔。世多以此歸功劉坤一、張之洞。文人若張謇輩。各以首倡奇謀自詡。其實聽外人頤使。辱則有之。何功之有。

東南互保之議。……予既爲發議之人。更從事其間。……應撮其大要記之。自五月初良鄉車站拳匪發難。……上海遠隔海洋。忽傳城內已有拳匪千人。飛渡而至。……其時南北消息頓阻。……各國兵艦連檣浦江。……英水師提督西摩擬入長江。倘外艦到後。與各地方一有衝突。大局瓦解。……憂思至再。即訪何梅生老友商之云。……予意欲與西摩商。各國兵艦勿入長江內地。在各省各埠之僑商教士。由各省督撫聯合立約。負責保護。上海租界保護。外人任之。華界保護。華人任之。總以租界內無一華兵。租界外無一外兵。力杜衝突。雖各擔責任。而仍互相保護。東南各省。一律合訂中外互保之約。梅生極許可。惟須有任樞紐之人。盛杏生地位最宜。……旋杏生約予往晤。尙慮端。剛用事。已無中樞。今特與外人訂此約。何以爲繼。予謂……可由各省督撫。派候補道員來滬。隨滬道經與各國駐滬領事訂約簽字。公不過暫爲樞紐。非負責之人。……後來自免關係。即定議由其分電沿江海各督撫。最要在劉、張兩督。……旋得各省復電。派員來滬。盛即擬約八條。予爲酌改。並爲加漢口租界及各口岸兩條。共成十條。並迅定中外會議簽約之日。其會議之所。即在新建會審公廨。盛既不在簽約之列。對外即不便發言。又慮滬道余聯沅向拙於應對。即定爲中外會議座次。外人以總領事在前。以次各領事。中則以滬道在前。盛以太常寺卿爲紳士居次。與余道坐近。再次各省派來道員。先與余約。倘領事有問。難於置答者。即自與盛商後再答之。……議時。領袖係美國古納總領事。果因五月二十五日上諭飭全國與外人啓釁。開口即云。今日各督撫派員與各國訂互保之約。倘貴國大皇帝又有旨來殺洋人。遵辦否。此語頗難答。遵辦則此約不須訂。不遵辦即係逆命。逆命即無外交。焉能訂約。余道即轉向盛踟躕。盛告

余即答以今日訂約。係奏明辦理。此四字本公牘恆言。古領向亦解之。意謂已荷俞允。即諾諾。而兩方簽約散會……自此互保簽約後。西摩及各外艦停止入江。（惜陰東南互保之紀實）

札江漢關照會各領事。力任保護洋人。

光緒二十六年五月二十二日

……合亟札飭該關道。即便遵照。照會英國領事。告以兩

湖地方。本部堂力任保護。當不致痞匪滋生事端。即使偶有生事。猝防不及者。烏合之衆。官兵威力亦可立時彈壓撲滅。斷斷不能任其滋蔓。長江下游一帶。有兩江總督部堂劉。昨與電商。亦已嚴密布置防範。意見相同。力任保護下游。請英領事轉達英政府。此時長江一帶彈壓痞匪。尙不須外人相助。若英水師遽進長江相助。不惟無益。且內恐百姓驚擾。外恐他國效尤。更致不可收拾。至若恐他國先進干預。吳淞有英國水師。儘可攔阻。英不先入。他國斷不敢入。可請放心。一面囑其將凡有該教士之教堂。及有洋人在內地地方。迅速開單前來。以便分飭加意保護。如有洋人攜眷入內地者。務須勸令暫行帶回漢口。洋人如無要事。戒飭暫勿外出游玩打鳥。免爲小事致生枝節。（張文襄公全集卷一〇三）

盛京堂來電。並致江、鄂督、蘇、皖撫。

光緒二十六年六月初一日

卅會議章程呈核。一、上海道臺余。現奉南洋大臣劉、兩湖督憲

張電示。與各國駐滬領事官會商辦法。上海租界歸各國公同保護。長江及蘇杭內地。均歸各督撫保護。兩不相擾。以保全中外商民人命產業爲主。二、上海租界公同保護章程。已另立條款。三、長江及蘇杭內地。各國商民教士產業。均歸南洋大臣劉、兩湖督憲張允認切實保護。並移知各省督撫。及嚴飭各文武官員。一體認真保護。現已出示。禁止謠言。嚴拏匪徒。四、長江內地中國兵力。已足使地方安靜。各口岸已有各國兵輪者。仍照

常停泊。惟須約束水手人等。不可登岸。五、各國以後如不待中國督撫商允。竟至多派兵輪。駛入長江等處。以致百姓懷疑。藉端啓衅。燬壞洋商教士人命產業。事後中國不認賠償。六、吳淞及長江各礮臺。各國兵輪。切不可近臺停泊。及緊對礮臺之處。兵輪水手。亦不可在礮臺附近地方操練。彼此免致誤犯。七、上海製造局火藥局一帶。各國允兵輪勿往遊弋駐泊。及派洋兵巡捕前往。以期各不相擾。此局軍火專爲防剿長江內地土匪。保護中外商民之用。設有督撫提用。各國毋庸驚疑。八、內地如有各國洋教士。及游歷各洋人。遇偏僻未經設防地方。切勿冒險前往。九、凡租界內一切設法防護之事。均須安靜辦理。切勿張皇。以搖人心云。（李文忠公全書電稿卷二三）

寄直藩轉遞軍機處譯署。光緒二十六年六月初九日頃呂使電外部覆云……各督撫既認保護西人爲己任。本部已立案。務望踐言。並請奏明中朝。速離危機。惟華兵勾結匪黨。合攻西人。德國在華應辦事宜。歸統將主裁。本部不願分其權。致掣其肘。故江鄂兩督。擬訂各章。礙難逕允。兩督美意儘能實踐。我國亦不忘情。當即轉達統將。於軍事無礙者。皆可照行。併請轉覆酌辦云。（李文忠公全書電稿卷二三）

光緒二十六年。一九〇〇年六月戊戌。廿八日劉坤一等奏……臣等於戰事初起之時。即行出示曉諭。務各相安。不必妄生疑慮。並接出洋華人電稟。請保護各國洋人。以免報復。情詞極爲迫切。臣等遂乘各領事等來商保護商教之時。會飭江海關道余聯沅。與之訂定章程。長江一帶及蘇杭內地。各國如不侵犯。我常照常保護。經各領事電商外部。臣等亦電致各使臣。向各國切實聲明。德因戕殺使臣。頗持異議。嗣因各國牽制。亦帖然就範。

……上諭。……朝廷本意。原不欲輕開邊釁。曾致書各國。並電諭各疆臣。復屢次明降諭旨。以保護使臣及各口岸商民。爲盡其在我之實。與該督等意見。正復相同。（光緒東華錄卷一六〇）

（3）辛丑議和

（甲）辛丑和約

聯軍既破北京。急欲謀和。首由總稅務司赫德示意總理衙門舊人。商由留京大員。具奏大同。請派講和全權大臣。清廷乃令李鴻章、慶王爲全權大臣。日本軍遂往懷來。迎慶王回京。鴻章先已受命北來。旋調補直隸總督北洋大臣。而遲疑未啓行。久之始至上海。七月杪。由俄船返之北來。世皆以鴻章有聲望。擅長外交。能收拾時局。實則聯軍急欲結束軍事。英在出兵時。卽已宣布速和之意。而和約條款苛酷。只有承認。并無磋商。唯清廷命榮祿參預和議。爲外人所拒。鴻章令之速赴西安。促成和局。兩人皆自以爲功。自今觀之。如苟且圖成爲非。則端、剛諸人堅主遷蜀之議。未嘗不足。惜西后與端、剛。皆非真能抗戰到底之人。縱使言戰。亦不過空談而已。

庚子七月廿一日。兩宮西行。各國軍隊入京。慶邸隨扈。因病留滯懷來縣。適奉全權之命。八月初十入京。合肥

李文忠。早經奉命來京議約。甫卸粵督任。權寓滬上。直至閏八月十八日始到京。先行傳見總稅務司赫德。徧拜各國公使。各國統兵大臣尙未能接見也。此爲議和之始步。各公使與各軍官先行商酌條款。有此國以爲是。他國以爲非者。有各公使以爲然。而各軍官否認者。類如駐兵及防護使館。拓充守衛使館汛地。並營建炮臺兵房等事。均由軍官主議者。各使不得干預。紛紛擾擾。三月有餘。迨議款粗有成局。各使遣員來告。並出示草案。謂向各軍官苦口商酌。竭力爭執。始允如此定議。明知條款之酷虐。但中國鑄此大錯。亦實無可如何。現有一言奉告。將來條款送到中國政府。萬不可一字駁復。須知我等公使責任。在重修舊好。各軍官則窮兵黷武。意在直搗西安。中國政府若允照款議。自奉旨之日起。戰事卽爲結束。各軍官但辦交地退兵等事。軍費大宗卽於此日截止。隨時再由中政府與各使妥商節目。徐圖補救大綱之所不及。豈非輕而易舉。若一時嫌條款酷烈。不允照辦。各軍官聞之羣相起鬨。誠恐兵事一起。動員令一發。爲害胡可勝言。彼時各公使竭盡能力。重訂議款。原有各條款。自難刪去。不知又增出幾許條件。試問中國尙能領受乎。卽幸而仍照原款定議。但經此波折。不知又費幾許時日。卽以兵費一項而論。恐又加增數百萬以上。兩全權以各使所論各節。意在關切而非恫喝。爰卽密電行在備案。（陳夔龍夢蕉亭雜記卷一）

開議之日。先期由領袖日斯巴尼亞公使來照。謂該使館廨宇狹隘。坐位無多。來賓請以十人爲限。意極驕蹇。維時李文忠公病臥賢良寺寓所。不能蒞會。慶邸約余及那琴軒相國。時官戶部侍郎並法、英、俄、德、日五繙譯。偕赴日館。各公使與參隨各員咸集。首由領銜日使。將約文節略朗誦一過。面交慶邸。邸答以今日承各公使面交和

約一件。容即電奏西安行在。俟奉有電旨。即行恭錄知照。隨將來件交余收存。辭各公使出。……慶邸謂余曰。……爾速將各使交來條約。送請中堂閱看。即日會銜電奏行在。冀邀俞允。此事今日必須辦竣。電奏稿不必送我酌定。但於發電後。抄稿送閱可耳。……余隻身往賈良寺。始知文忠病迄未愈。不能見客。當以此事緊要。詎能延誤。商之楊蓮府同年。先將條件呈文忠一閱。再行請示方略。蓮府笑謂余曰。……不如由老憲台代擬電奏稿。呈中堂閱定。即行電發。較爲便捷。……余正躊躇如何下筆。始能動兩宮之聽。文忠之四公子季高世兄出。謂余曰。家君昨日曾經說過。此次奏件。須用重筆。余笑答曰。如用重筆。祇好請出宗廟社稷。方可壓倒一切。爰即本此意擬一電奏稿。交季高送入臥內。請文忠閱定。即刻電發。（陳夔龍夢蕉亭雜記卷一）

當和約電奏寄到西安。兩宮逐一閱視。以償款數目太鉅。懲辦罪魁太重。德使克林德建碑京師。有關體制。防護使館。將六部翰林院劃入界內。堂子祀天重地。亦須遷移。其他各款。種種苛求。堅不允行。榮文忠公婉言力陳。以事機迫切。非俯允不能弭患。慈禧愠甚。謂請皇上斟酌。我不能管。次日北京全權電催。以各使專俟准駁確信。以定師行進止。文忠復據以上陳。慈禧謂兩全權但知責難於君父。不肯向各使據情據理力與爭辯。我既不管。皇上亦不管。由你們管去罷。言畢將電稿擲地。文忠皇恐萬狀。不敢再陳。惟有伏地碰頭。皇上徐曰。爾等勿庸著急。明日再說。文忠回邸私議。視此情狀。明日上午。亦無結果。惟時全權電信又到。情形迫切。文忠喟然歎曰。此事責任在我。惟有淡中著筆。從權辦理。庶幾有濟。默視慈禧之意。未嘗不知非允不可。不過允之一字。難以當面說出。越日入見。此事暫不提及。先將他事請旨訖。繼云。前日兩全權電奏之件。已閱數日。刻間又

有電來催。前已面請聖旨。可否由奴才等下去。酌擬一稿。呈請改定。再行電發。慈禧默然。繼而曰。如此亦好。文忠退出。即與樞府諸公。查照來電之意。大致以宗廟社稷爲言。姑爲允准。擬具電旨。不敢再請起面呈。即交內奏事處總監。呈請睿鑒。旋傳旨知道了。文忠得旨後。即行電發。京中即日接到。知照各國公使。和議遂由此定局。此係庚子十二月杪之事。……文忠爲余縷述之。（陳夔龍夢蕉亭雜記卷一）

「懲辦罪魁」

和約將成。唯罪魁一項。西后意尙躊躇。令鴻章商免。鴻章密電榮祿。微示只有其上更無其次之意。西后大懼。乃一一照辦。後來下母子一心維新之詔。即在表明并非頑固。廢大阿哥亦是爲己洗刷。庚子以後。對外事事退讓。皆由懼之一念而起。

和約第二次開議。懲辦禍首。各公使訂期在英館齊集。……維時李文忠公病愈。與慶邸同入坐。隨往者仍那相與余。及繙譯各員。與上次相埒。全權中坐。各使環坐。余與那相坐於全權之後。……英使首先發言。謂今日特議嚴辦禍首一條。有名單一紙在此。但某意。此案罪魁。確係端王一人。若能將端王從嚴處置。其餘均可不論。不知全權之意如何。慶邸謂端王係皇室懿親。萬難重辦。各國亦有議親議貴之條。此事斷不能行。我前日於私邸曾對諸君說過。諸君亦無他議。何以今日又復申此說。英使笑曰。我亦知其辦不到也。言次。將單開各員名。及所擬罪名。逐一朗誦。請中國照辦。單內人多。難以備錄。中如莊王載勛、右翼總兵英年、刑部尙書趙舒

翹、山西巡撫統賢。均請從重論。餘以次遞減。全權告以莊王、統賢誠有罪。總兵英年當時並無仇洋實權。不過聯銜出有告示。原難辭咎。但詎能正法。至重不過斬監候罪名。至趙尙書舒翹。僅隨剛相往近畿調查情形一次。所居地位。亦無仇洋之舉。更無罪之可科。即謂其不應附和剛相。革其任亦足蔽辜。詎可重論。各公使亦唯唯。文忠復謂前數日諸位所言罪翹。並無啓尙書秀、徐侍郎承煜在內。今日忽將二人加入。此是何意。詞未畢。義公使起而言曰。某前日謁中堂於賢良寺。曾問徐侍郎爲人如何。中堂告余曰。此人不好。七月初三。監斬許侍郎景澄、袁太常昶。即是他。十七。監斬徐尙書用儀等。也是他。二十一日。兩宮西狩。逼令其父徐相國桐自盡者。又是他。此種人中國不辦。各國祇好代辦。至啓秀之罪。日公使亦獲有憑據。文忠愕然曰。我不過隨便一句話。爾竟據爲實錄。慶邸以他語亂之。義使始無詞。時已傍夕。各使謂……請先散會。明日再具照會……越日。各使聯銜照會送到。堅執如故。不能絲毫末減。而德使復慫恿其統帥瓦德西。以急下動員令相恫喝。厥後均如來照辦理。（陳夔龍夢蕉亭雜記卷一）

十二月壬戌。廿五日諭。京師自五月以來。拳匪倡亂。開釁友邦。現經奕劻、李鴻章與各國使臣在京議和。大綱草約業已畫押。追思肇禍之始。實由諸王大臣等昏謬無知。囂張跋扈。深信邪術。挾制朝廷。於剿辦拳匪之諭。抗不遵行。反縱信拳匪。妄行攻戰。以致邪焰大張。聚數萬匪徒於肘腋之下。勢不可遏。復主令鹵莽將卒圍攻使館。竟至數月之間。釀成奇禍。社稷阽危。陵廟震驚。地方蹂躪。生民塗炭。朕與皇太后危險情形。不堪言狀。至今痛心疾首。悲憤交深。是諸王大臣等信邪縱匪。上危宗社。下禍黎元。自問當得何罪。前經兩降諭旨。尙覺法輕。

情重。不足蔽辜。應再分別等差。加以懲處。已革莊親王載勛。縱容拳匪。圍攻使館。擅出違約告示。又輕信匪言。枉殺多命。實屬愚暴冥頑。著賜令自盡。派署左都御史葛寶華前往監視。已革端郡王載漪。倡率諸王貝勒。輕信拳匪。妄言主戰。致肇釁端。罪實難辭。降調輔國公載瀾。隨同載勛。妄出違約告示。答亦應得。著革去爵職。惟念俱屬懿親。特予加恩。均著發往新疆。永遠監禁。先行派員看管。已革巡撫毓賢。前在山東巡撫任內。妄信拳匪邪術。至京爲之揄揚。以致諸王大臣受其煽惑。及在山西巡撫任。復戕害教士。致民多命。尤屬昏謬凶殘。罪魁禍首。前已遣發新疆。計行抵甘肅。著傳旨即行正法。並派按察使何福堃監視行刑。前協辦大學士吏部尚書剛毅。袒庇拳匪。釀成巨禍。並會出違約告示。本應置之重典。惟現已病故。著追奪原官。即行革職。革職留任甘肅提督董福祥。統兵入衛。紀律不嚴。又不諳交涉。率意鹵莽。雖圍攻使館。係由該革王等指使。究難辭咎。本應重懲。姑念在甘肅素著勞績。回漢悅服。格外從寬。著即行革職。降調都察院左都御史英年。於載勛擅出違約告示。曾經阻止。情尙可原。惟未能力爭。究難辭咎。著加恩革職。定爲斬監候罪名。革職留任刑部尚書趙舒翹。平日尙無嫉視外交之意。前查辦拳匪。亦無庇縱之詞。惟究屬草率貽誤。著加恩定爲斬監候罪名。英年、趙舒翹兩人。均著先行在陝西省監禁。大學士徐桐。降調前四川總督李秉衡。均已殉難身故。惟貽人口實。均著革職。並將卹典撤銷。經此次降旨以後。凡我友邦。當共諒拳匪肇禍。實由禍首激迫而成。決非朝廷本意。朕懲辦禍首諸人。並無輕縱。即天下臣民。亦曉然於此案之關繫重大也。（光緒東華錄卷一六四）

光緒二十七年辛丑一九〇一年正月庚午。初三諭。此案首禍諸臣。昨已降旨。分別嚴行懲辦。茲據奕劻、李鴻章電

奏。按照各國全權大臣照會。尙須加重。懇請酌奪等語。除載勛已賜令自盡。毓賢已飭即行正法。均各派員前往監視外。載漪、載瀾均定爲斬監候罪名。惟念誼屬懿親。特予加恩。發往極邊新疆。永遠監禁。即日派員押解起程。剛毅罪情較重。應定爲斬立決。業經病故。免其置議。英年、趙舒翹。昨已定爲斬監候。著即賜令自盡。派陝西巡撫岑春煊前往監視。啓秀、徐承煜。各國指稱力庇拳匪。專與洋人爲難。昨已革職。著奕劻、李鴻章照會各國交回。即行正法。派刑部堂官監視。徐桐輕信拳匪。貽誤大局。李秉衡好爲高論。固執釀禍。均應定爲斬監候。惟念臨難自盡。業經革職。撤銷卹典。應免再議。（光緒東華錄卷一六五）

「賠款」

庚子賠款四億五千萬兩。俄得一億三千萬。德九千萬。英七千萬。法、美、日、意、奧、荷、比。以次遞減。分三十九年還清。本利共九億八千餘萬兩。庚子以前。歲計不敷六百萬兩。至是由各省攤派。百計羅掘。正雜各款之外。始有附加捐。而民困極矣。

光緒二十七年辛丑^{一九〇一年}三月辛巳^{十五日}奕劻、李鴻章電致行在軍機處……月朔。法、英、德、日本四使。約那

桐、徐壽朋、周馥。赴德館討論賠償抵款。稱賠款須四萬五千萬兩。答以太多。則稱各國祇索實用之數。並無虛開。旋問中國究有何款可以作抵。答以賠款數目太鉅。甚難籌畫。海關稅因鎊價今昔懸殊。擬按鎊價加收。以作抵款。於洋商無損。於中國有益。各使稱伊等亦有此意。但驟難商定。須另籌切實抵款。隨徧問鹽課、常稅、折

漕、土藥、並開辦印花稅、房捐等項。答以舊有之款，均有要用。新籌之款，驟難辦成。惟賠款總不可不籌。竭力騰挪，連海關加收，每年至多能籌一千五百萬兩。各使稱如此，則須六十年方能攤完。伊等擬請每年籌付三十萬兩，三十年可完。按借債週息五釐，二十年本利相平，四百五十兆，三十年成九百兆。計週息三釐，三毫有零，利息尚不爲重。答以分三十年攤畢，款實難籌。各使又稱，內中尚有一二國願得現銀者，可否商借現銀付給。答以中國情願攤還，不願借債。是日各使相約，因赫德前曾分送節略，臚列京外各進款，及改章辦法，該使等願借面談考證，並非與那桐等議事。及告以累年入不敷出，暨一切改章爲難情形，各使稱俟再商而散。……臣奕劻面詢赫德，據稱各使意見不一，有願聽攤還者，有願索現銀者。如付現銀，必須借債，付四百五十兆之款，必須借六百兆，方能敷用。以週息四釐計之，三十年須加息七百二十兆，大不合算。又稱斷不可以抵款難籌推託，恐各國藉口，佔地自籌，爲害尤大。各使約須至四月底方與全權會議。莫如及此閒暇，先與政府戶部各督撫通盤籌畫，速定大計。總期能指有的款作抵，先辦撤兵，是爲要著。……若俟會議時，再行往覆籌商，各督撫意見不同，多煩商酌，恐議論未定，而賠款又增數千萬矣。（光緒東華錄卷一六六）

四月乙巳。初十日奕劻、李鴻章電致行在軍機處，賠款一事。……頃聞各使會議，已有照會。適德穆使過晤，與談減數。彼云……必以四萬五千萬爲定數。若遲則兵費須加。我們可先密商，倘貴國允定賠四萬五千萬，加息四釐。但有諒旨爲憑，德國必撤兵。各國亦必隨撤。……現議撤兵，節令正好。若交炎暑，便不能撤。須遲至九月以後，又須多添兵費，爲中國計，實不合算。……鴻等昨晤瓦帥，亦盼賠款速定，可速撤兵。……今兩宮急盼

撤兵。方議回鑾。若不速定見。瓦帥暨德兵不肯先撤。各國必更觀望。遲一日則多費百萬。至秋後須多賠一百餘兆。……上諭軍機大臣等。陽電悉。償款四萬五千萬。各國既不允減。尙可照准。惟前奏聞索息一倍。計合三釐三毫零。仍照此商減爲要。……並請展寬年限。方能勉籌。（光緒東華錄卷一六七）

四月丙午。^{日十一}奕劻、李鴻章電致行在軍機處。……今午派徐壽朋往見德穆使。遵旨與商減息。穆稱按現在各國借債四釐。已減讓到家。萬難再減。……又稱瓦帥已奉本國政府訓條。料理撤兵。專候中國認利準信。以定行止。伊亦奉到訓條。四釐息一毫不能減。……刻下撤兵之事。最關緊要。一言可決。在四釐允與不允而已。……上諭……電悉。各國償款四百五十兆。四釐息。應准照辦。（光緒東華錄卷一六七）

「駐兵」

北京之東交民巷。劃爲使館專用區域。華人不得居住。且駐重兵以守之。自北京經天津至山海關。設專站十二。分駐外兵。共約萬人。海口及沿途皆不得設防。以礙暢行。此世界所無之苛例。屈辱極矣。

光緒二十七年辛丑。^{一九〇〇年}四月丁巳。^{廿二日}電諭。……現已定期回鑾。京師各使館酌留兵隊。前據奏各國統計不過數百名。究竟確留若干。使館租界逼近禁城。聞有築城設砲臺之說。擬飭電詢。並令設法商阻。……津京沿途。洋卡洋兵。酌留數目。以少爲妥。（光緒東華錄卷一六七）

寄西安行在軍機處。

光緒二十七年六月初十日

語電旨謹悉。京城地面。各國已陸續交出。俄、美兵除留護使館外。餘早撤淨。

英、德、日本亦撤過半。保定僅有法兵未撤。聞各國現存在京兵隊。望後可再撤三分之一。俟西安啓蹕。再撤二分之一。俟由河南回鑾。即全數撤退。彼等撤兵。向不知照撤去若干。即問亦不以實告。總稱看運船多寡。陸續撤去。其各使館留兵。現無確數。聞統計約在二千內外。天津及沿途洋卡。亦無確數。聞天津約留六千或八千。沿途洋卡。每卡約三百。共計不逾二千。屢經訪詢。均稱回鑾早則撤兵速。遲則更多觀望。請代奏。劄鴻。（李文忠公全書電稿卷三九）

黃村、郎坊、楊村、天津、軍糧城、唐沽、蘆台、唐山、灤州、昌黎、秦皇島、山海關皆駐兵。兵八千人。而京師守使館兵二千餘人不與焉。（李希聖庚子國變記）

「謝罪」

因德使及日書記被害之故。分派使節謝罪德、日。使德者醇親王。爲光緒帝胞弟。德卿舊隙。必欲副使跪拜。交涉數四。乃得免。使日者那桐。如禮而已。

寄西安行在軍機處。

光緒二十七年正月十五日

……先是德使派參贊來詢。專使赴德。擬派何人。答以未定。伊詢醇親王何

如。答尙謹慎。何不往來晤談。醇遂與穆使、瓦帥相見。該使電知國王。均以爲然。旋又照稱本國皇帝提明。俟中國照各國公案各款。全行照允。方願接待專使等語。查醇王年歲雖輕。志趣尙好。上年拳匪內訌。莫贊一詞。尙守家教。惟交涉向未閱歷。伊已約定張翼偕往贊助。記名副都統蔭昌。前駐德年久。熟悉情形。擬請派該員等

並充參贊。庶無隕越。……此事應俟公約畫押時。再行降旨。請先代奏。勅鴻。（李文忠公全書電稿卷三二）
光緒二十七年一九〇一年四月癸丑。十八奕劻、李鴻章電致行在軍機處。醇親王赴德一事。正月咸電已詳陳。昨德穆使因賠款息銀議定。欲催早去。頃接呂使覃電。德君以專使現可舉行。屆時當優禮接待。應請降旨。特派醇親王爲頭等出使大臣。並令前內閣侍讀學士張翼、副都統廕昌隨往。贊助一切。臣等猶慮該員等情形未熟。與瓦帥商酌。添派德員隨行。德君性急。醇去恐難遲緩。可否令其不必遠赴行在請訓。致需時日。國書禮物即代豫備。……上諭。醇親王載灃著授爲頭等專使大臣。前赴大德國敬謹將命。前內閣侍讀學士張翼、副都統廕昌均著隨同前往。參贊一切。（光緒東華錄卷一六七）

四月丙辰。廿一奕劻、李鴻章電致行在軍機處。巧電旨到。遵擬國書一通。請代呈御覽酌定。候覆即繕。恭擬國書全文如下。大清國大皇帝敬致書於大德國大皇帝陛下。朕維中國與貴國訂約以來。信使往還。輯睦無間。前歲貴國親王來京。朕疊次接見。情誼尤爲款洽。乃上年五月。義和拳匪闖入京師。兵民交鬭。貴國使臣克林德。竟至被戕殞命。該使臣銜命來華。辦理交涉事件。悉臻妥協。朕甚嘉許。不意變生倉猝。遽爾捐軀。朕自維薄德。未能先事預防。保護多疏。疚心曷極。已於該使臣死事地方。勒建銘誌之坊。用以旌善殫惡。昭示後來。茲派醇親王載灃爲欽差頭等專使大臣。親齎國書。前往貴國呈遞。該親王分屬近支。誼同休戚。特令竭誠將命。以表朕慙悔之意。又此次貴國勞師遠涉。戢匪安民。和議早成。生靈無恙。尤徵大皇帝顧全大局。并令該親王代表朕達謝忱。惟望大皇帝盡棄前嫌。益敦夙好。從此我兩國共享昇平之福。永聯玉帛之歡。惟大皇帝鑒察焉。

軍機大臣奉旨。所擬國書。准其照辦。（光緒東華錄卷一六七）

五月丁卯。初三日奕劻、李鴻章電致行在軍機處。昨據德穆使照稱。奉本國電諭。德皇擬乘本年華歷七月二十日。大閱駐紮德國京師御林軍之便。堪以接待醇親王。並諭達知妥爲豫備。俾得趲程及時到柏林。不誤等因。現商令醇王整裝豫備一切。國書禮物均趕辦。穆使面稱。六月初五日。有德公司船自滬開行。可搭坐。約五月廿六七由京起程。請代奏。軍機大臣奉旨。奕劻等電悉。醇親王載灃初次出洋。一切言動。諸宜謹慎。飲食起居。隨時調護。並著張翼等悉心照料。妥慎贊襄。禮畢即行回國。仍將外洋風土人情。隨地留心體察。而資閱歷。（光緒東華錄卷一六七）

五月甲申。十九日諭軍機大臣等。奕劻、李鴻章效電悉。日使函稱醇親王使德回路。經美暨日本。政府望旌節抵日。藉伸同洲和好之誼等語。著照所請。以重邦交。英、比如有此意。函請亦可准行。即由該王大臣隨時知照辦理。仍一面電聞。（光緒東華錄卷一六七）

柏林呂使來電。光緒二十七年七月初八日……醇邸遞書禮節……於禮官處得悉。廿七。德皇在白廳坐見。王爺行三鞠躬禮。遞書致頌。其參贊該同入見者。均照中國臣下覲君禮叩首。據云此次係賠禮。非尋常聘使可比。不知曾與穆使商及否。惟大局攸關。時甚迫切。海現力爭。能否挽回。未敢預必。（李文忠公全書電稿卷四〇）

接廣參贊來電云。跪叩一節。迄無更改。廕昌仍以參贊看待。亦不能免。頃德皇遣內務官來。並交所定禮節單圖。十四午刻在柏林宮內接見。坐受專使三鞠躬禮。參隨三跪禮。並跪聽宣讀頌詞。此爲西國向無之禮。大體

攸關。萬難遷就。（李文忠公全書電稿卷四〇）

坐受國書一節。鴻章丙申使俄。德皇派員邀請赴德。即係坐受國書。其傲慢性生。不足計較。惟參贊跪拜。有傷國體。茲擬折中定斷。遞書時。祇帶金楷理、賡晉泰等傳譯。張翼、蔭昌等。仍照前電。或託病。或暫避他處。以免跪拜受辱。已電醇王酌辦。呂使擬交各使持平訂定禮節。各使皆助德抑華。斷乎無益。（李文忠公全書電稿卷四〇）

據艾領事來稱。頃得外部電。命詢王爺何時起身。以速爲宜。我皇必見。跪禮已免。遞書祇帶蔭昌一人。餘在別殿伺候等語。……廿一三點。到坡思丹。德皇又遣朝車並頭等提督接澧等。均至舊皇宮居住。供應優渥。隨商訂次日進見。並送故德后花園禮節。廿二已刻。親至故德后墓如禮。十二點。復遣朝車提督迎至新行宮。澧隨帶蔭昌進見內殿。遞書。宣讀頌詞。張翼六人在外殿侍立。禮成。德皇遣馬隊送歸舊行宮。兩點。德皇親來答拜。意極殷勤。坐談良久。並命備舟車。遊覽哈芳湖孔雀島。廿三早看操。午後仍至新行宮進見德皇。並留多。在柏林居住。看各廠院。又面屬前赴丹西。會晤亨利親王。看其水師。澧未便拂卻。現擬見德后後。即赴柏林另住客寓。（李文忠公全書電稿卷四〇）

八月己亥。（初六）……醇王柏林江電。澧奉命本爲德國專使。自遞書後。雖德皇款接優渥。但因前節。未免猶有介懷。屢晤外部。據稱除美。日與彼無涉。若往歐洲英、意、比。有違專誠之旨。該皇深不謂然。收禮至今尙在游移未定。澧今日前往丹溪閱大操。五日可回柏林。仍須看各廠院。約計八月廿。在德即可竣事。……澧此番

遠涉風濤。到德後歷觀各廠。精神勞頓。飲食減少。兼有水土不服之證。務懇與駐京英、意、比公使。設法託辭婉商。萬勿宣示該外部阻行之意。現擬德事畢後。即行前赴美、日。順道回國。……伏乞代奏請旨示遵云。上諭：……載灃……在德使事既畢。著即啓程回華。……美、日、意、比各國使事。暫從緩議。（光緒東華錄卷一六九）

灃於初三隨帶翼、昌赴丹溪。次與德皇、亨利親王晤面。禮接甚優。頗爲篤念邦交。閱操三日。並邀灃同翼、昌在兵船與宴。贈灃紅鷹寶星。宴畢辭行。於初八回柏林。禮物已收。接懿旨告知該外部。極爲欽悅。現在克虜伯各廠看視製造畢。遵即於本月十九日。仍由折奴阿乘輪回華。九月內抵滬。（李文忠公全書電稿卷四〇）

西安來電。光緒二十七年五月初三日

奉旨戶部右侍郎那桐。著賞給頭品頂戴。授爲專使大臣。前往大日本國敬謹將命。（李

文忠公全書電稿卷三八）

光緒二十七年。一九〇一年

五月癸酉。初九日。奕劻、李鴻章電致行在軍機處。那桐出使日本。應有國書。該國向例索

觀敕諭。茲謹擬就國書敕諭。照錄於下。國書文曰。大清國大皇帝敬致書於大日本國大皇帝陛下。朕維中國與貴國同在亞洲。海程密邇。彼此遣使駐紮以來。誠信相孚。情誼彌摯。乃上年五月。京師猝遭拳匪之亂。兵民交訌。貴國使館書記生杉山彬。竟致被戕殞命。該書記生隨使來華。應獲保護之益。不意變生倉猝。遽爾捐軀。朕自維薄德。未能先事預防。致令友邦官員慘遭不測。有傷睦誼。彌切疚心。業派大臣致祭。並頒發內帑。以示優卹。茲派頭品頂戴戶部右侍郎那桐爲欽差專使大臣。親齎國書。前往貴國呈遞。該大臣忠誠素著。朕所深信。特令敬謹將事。表明惋惜之懷。藉達優榮之典。此次大皇帝遣師遠涉。到京之日。首先安民。又於和議要端。

盡力維持。特伸公論。東方大局。賴以保全。義聞仁聲。昭布遐邇。朕心尤爲欣感。並令該大臣代達謝忱。惟望大皇帝盡棄前嫌。益敦夙好。脣齒輔車之誼。歷久彌親。從此海宇乂安。昇平同享。惟大皇帝察焉。敕諭文曰。皇帝敕諭頭品頂戴戶部右侍郎那桐。朕維交鄰之道。詳於古經。遣使之文。著爲令典。矧在同洲之國。尤切輔車之依。茲因大日本國使館書記生杉山彬。在京被戕。朕心惋惜。宜示優榮。特授爾爲欽差專使大臣。親齎國書。前往呈遞。務宜殫竭忠誠。敬謹將事。於一切交際儀文。悉心經理。勉副皇華之選。益聯與國之歡。爾其欽承朕命。無負委任。特諭。請代奏。軍機大臣奉旨。所有國書敕諭。著准其照辦。（光緒東華錄卷一六七）

那侍郎自日本來電。

光緒二十七年七月二十四日

桐等今午安抵東京。俟定有遞書日期再電達。（李文忠公全書電稿卷四〇）

日本李使來電。

光緒二十七年七月三十日

外部定初一日那使呈遞國書。接待儀注。與駐使相同。謹聞。（李文忠公全書電稿卷四〇）

寄西安行在軍機處。

光緒二十七年八月初二日

頃接那使朔電。桐已於本日覲見。呈遞國書。一切禮儀。均照接待專使向章。

請轉樞垣代奏云。慶、李。（李文忠公全書電稿卷四〇）

「和約」

七月戊子。

廿五日

全權大臣奕劻、李鴻章與十一國駐京公使議訂和約十二款成。其文曰。大德欽差駐紮中華

便宜行事大臣穆默。大奧欽差駐紮中華便宜行事全權大臣齊幹。大比欽差駐紮中華便宜行事全權大臣

姚士登。大日欽差駐紮中華全權大臣葛絡幹。大美國欽差特辦議和事宜全權大臣柔克義。大法欽差全權大臣駐紮中國京都總理本國事務便宜行事鮑渥。大英欽差便宜行事全權大臣薩道義。大義欽差駐紮中華大臣世襲侯爵薩爾瓦葛。大日本國欽差全權大臣小村壽太郎。大和欽差駐紮中華便宜行事全權大臣克羅伯。大俄欽命全權大臣內廷大夫格爾思。大清欽命全權大臣便宜行事總理外務部事務和碩慶親王。大清欽差全權大臣便宜行事太子太傅文華殿大學士北洋大臣直隸總督部堂一等肅毅伯李鴻章。今日會同聲明。核定大清國按西歷一千九百年十二月二十二日。即中歷光緒二十六年十一月初一日。文內各款。當經大清國大皇帝於西歷一千九百年十二月二十七日。即中歷光緒二十六年十一月初六日。降旨全行照允。足適諸國之意。妥辦第一款。一、大德國欽差男爵克大臣被戕害一事。前於西歷本年六月初九日即中歷四月二十三日。奉諭旨。欽派醇親王載灃爲頭等專使大臣。赴大德國大皇帝前。代表大清國大皇帝暨國家惋惜之意。醇親王已遵旨於西歷本年七月十二日。即中歷五月二十七日。自北京起程。二、大清國國家業已聲明。在遇害處所。樹立銘誌之碑。與克大臣品位相配。列敍大清國大皇帝惋惜兇事之旨。書以辣丁、德、漢各文。前於西歷本年七月二十二日。即中歷六月初七日。經大清國欽差全權大臣。文致大德國欽差全權大臣。現於遇害處所建立牌坊一座。足滿街衢。已由西歷本年六月二十五日。即中歷五月初十日興工。第二款。一、懲辦傷害諸國國家及人民之首禍諸臣。將西歷本年二月十三、二十一等日。即中歷上年十二月二十五、本年正月初三等日。先後降旨。所定罪名。開列於後。端郡王載漪、輔國公載瀾。均定斬監候罪名。又約定如

皇上以爲應加恩貸其一死。即發往新疆永遠監禁。永不減免。莊親王載勛、都察院左都御史英年、刑部尙書趙舒翹。均定爲賜令自盡。山西巡撫毓賢、禮部尙書啓秀、刑部左侍郎徐承煜。定爲即行正法。協辦大學士吏部尙書剛毅、大學士徐桐、前四川總督李秉衡。均已身故。追奪原官。即行革職。又兵部尙書徐用儀、戶部尙書立山、吏部左郎許景澄、內閣學士兼吏部侍郎銜聯元、太常寺卿袁昶。因上年力駁殊悖諸國義法極惡之罪。被害於西歷本年二月十三日。即中歷上年十二月二十五日。奉上諭開復原官。以示昭雪。……又西歷本年二月十三日。即中歷上年十二月二十五日。上諭將甘肅提督董福祥革職。俟應得罪名定讞懲辦。西歷本年四月二十九、六月初三、八月十九等日。即中歷三月十一、四月十七、七月初六等日。先後降旨。將上年夏間兇慘案內。所有承認獲咎之各外省官員。分別懲辦。二、西歷本年八月十九日。即中歷二十七年七月初六日。上諭將諸人民遇害被虐之城鎮。停止文武各等考試五年。第三款。因大日本國使館書記生杉山彬被害。大清國大皇帝從優榮之典。已於西歷本年六月十八日。即中歷五月初三日。降旨簡派戶部侍郎那桐爲專使大臣。赴大日本國大皇帝前。代表大清國大皇帝及國家惋惜之意。第四款。大清國國家允定。在於諸國被污瀆及挖掘各墳塋。建立滌垢雪侮之碑。已與諸國全權大臣會同商定。其碑由各該國使館督建。並由中國國家付給估算各費銀兩。京師一帶每處一萬兩。外省每處五千兩。此項銀兩業已付清。……第五款。大清國國家允定。不准將軍火暨專爲製造軍火各種器料運入中國境內。已於西歷本年八月二十五日。即中歷二十七年七月十二日。降旨禁止進口二年。嗣後諸國以爲有仍應續禁之處。亦可降旨將二年之限續展。第六款。按

照西歷本年五月二十九日。即中歷四月十二日上諭。大清國大皇帝允定付諸國債款海關銀四百五十兆兩。此款係西歷一千九百年十二月二十二日。即中歷光緒二十六年十一月初一日。條款內第二款所載之各國各會各人及中國人民之賠償總數。……第七款。大清國國家允定。各使館境界以爲專與住用之處。並獨由使館管理。中國人民概不准在界內居住。亦可自行防守。……中國國家應允諸國分應自主。常留兵隊分保使館。第八款。大清國國家應允。將大沽礮臺及有礙京師至海通道之各礮臺。一律削平。現已設法照辦。第九款。按照西歷一千九百零一年正月十六日。即中歷上年十一月二十六日。文內後附之條款。中國國家應允由諸國分應主辦。會同酌定數處。留兵駐守。以保京師至海通道無斷絕之虞。今諸國駐守之處。係黃村、郎坊、楊村、天津、軍糧城、塘沽、蘆臺、唐山、灤州、昌黎、秦皇島、山海關。第十款。大清國國家允定。兩年之久。在各府廳州縣。將以後所述之上諭頒行布告。一、西歷本年二月初一日。即中歷上年十二月十三日。上諭以永禁或設或入與諸國仇敵之會。違者皆斬。二、西歷本年二月十三、二十一、四月二十九、八月十九等日。即中歷上年十二月二十五、本年正月初三、三月十一、七月初六等日。上諭一道。犯罪之人。如何懲辦之處。均一一載明。三、西歷本年八月十九日。即中歷七月初六日。上諭以諸國人民遇害被虐各城鎮。停止文武各等考試。四、西歷本年二月初一日。即中歷上年十二月十三日。上諭以各省督撫文武大吏暨有司各官。於所屬境內。均有保平安之責。如復滋傷害諸國人民之事。或再有違約之行。必須立時彈壓懲辦。否則該管之員。即行革職。永不敘用。亦不得開脫。別給獎敘。以上諭旨。現於中國全境漸次張貼。第十一款。大清國國家允定。將通商行船各

條約內。諸國現爲應行商改之處。及有關通商各項事宜。均行議商。以期妥善簡易。現按照第六款賠償事宜。約定中國國家應允襄辦。改善北河、黃浦兩水路。……第十二款。西歷本年七月二十四日。即中歷六月初九日。降旨將總理各國事務衙門。按照諸國酌定。改爲外務部。班列六部之前。此上諭內。已簡派外務部各王大臣矣。且變通諸國欽差大臣覲見禮節。均已商定。由中國全權大臣屢次照會在案。……茲特爲議明。以上所述各語。及後附諸國全權大臣所發之文牘。均係以法文爲憑。大清國家既如此按以上所述……足適諸國之意妥辦。則中國願將一千九百年夏間變亂所生之局勢完結。中國亦照允隨行。自以諸國全權大臣。現奉各本國政府之命。代爲聲明。除第七款所述之防守使館兵隊外。諸國兵隊即於西歷一千九百零一年九月十七日。即中歷光緒二十七年八月初五日。全由京城撤退。並除第九款所述各處外。亦由西歷一千九百零一年九月二十二日。即中歷光緒二十七年八月初十日。由直隸省撤退。今將以上條款繕定同文十二份。由中國全權大臣畫押。諸國全權大臣各存一份。中國全權大臣收存一份。（光緒東華錄卷一六八）

（乙）東北俄約

各國撤兵。俄獨不撤東三省之兵。且誘將軍增祺訂約。以東三省權利讓俄。約成。各國大譁。清廷乃命楊儒與俄再議。俄卒因各國干涉勉允退還東三省。分期撤兵。既而延宕不行。遂啓日俄戰爭。

光緒二十六年庚子一九〇一年六月初海蘭泡有俄兵數千。欲假道於齊齊哈爾。至哈爾濱保鐵路。俄將固畢乃脫爾。先以公文告黑龍江將軍壽山。壽山不允。因之開釁。十五日。壽將軍電致愛琿副都統鳳翔令戒備。十七日晨。有俄兵艦五艘及拖帶駁船載兵下駛。壽山著愛琿所練靖邊各軍。開沿江各溝駐防。次日。俄將裝載軍火至江。我統兵官發炮攻之。俄兵官二人殲焉。二十一日。俄派馬隊至愛琿恣焚掠。鳳翔派統領王仲良率馬隊三百渡江。驅逐俄兵。疊獲小勝。二十六日。有俄馬步兵六千名。從黑河上游五道河偷渡。登岸後。始知爲俄兵。倉皇退至愛琿。次日。俄兵即由西山陸路直撲攻城。鳳翔率軍退至兜溝子。是日。俄軍遂入愛琿城。……七月初四日。率兵進攻。用開花炸彈遙擊我軍。鳳翔以兜溝子地勢平衍。難資扼守。軍士忍饑露宿。咸有怨言。遂以情形電稟軍帥。結陳退守北大嶺。徐圖後計。（沈桐生光緒政要卷二六）

北大嶺爲愛琿之後路。齊齊哈爾之門戶。最爲險要。……俄兵見我兵退守。即亦跟蹤而入。十六日。全軍進逼北大嶺。……十七日晨。俄軍在山下架開花礮。向我軍猛攻。鳳翔傳令全軍出隊迎敵。徇師而誓曰。有退後者斬。……我軍勇氣百倍。大敗俄軍。……而鳳副都統……左腿右臂受鎗子兩傷。……回營。至晚嘔血數升而死。士氣燿焉。……壽（山）聞信。……欲即將將軍印信交副都統薩保護理。而自赴前敵督戰。薩不允。乃派程雪樓太守爲總統。飭令前赴北大嶺迎戰。程至軍。即照會俄國統兵官。停戰議和。……於是程率隊先行。爲俄軍前驅。……八月初二日。程太守先至下奎。即齊齊哈爾城即入見壽將軍。面陳與俄軍停戰議和事宜。且言俄統兵官已率師前來。必欲親見將軍。壽將軍聞之。自度終不能親見。俄將與議和事。又不欲使城中居民無端罹禍。

又自念世受國恩。宜闔門殉節。遂決計誓死報國。……乃先令其妻及婦子速自殺。……初四日晨。……俄將必欲入城見將軍。將軍聞之。卽作遺書。致俄將。請勿殺居民。書畢。……朝衣朝冠從容臥柩中。……命其子開鎗擊之。其子手戰不忍發。誤中左脅不死。又命其家將繼之。一鎗中小腹猶不死。……再開一鎗洞胸而亡。……是日。俄軍遂入卜奎城。（王彥威西巡大事記卷首）

九月初三日。盛京將軍增祺奏。自本年拳匪肇禍。中外失和。吉江兩省。相繼淪陷。奉省自六月上旬。拳匪猝起。焚掠洋局。殺害教民。萑苻遍地。洋人護路平匪來兵幾千。……營口、復州、蓋平、熊岳、金州、海城、遼陽等處。以次失陷。閏八月初六日。謹護聖容出省。晉昌、壽長均先後逃出。初九日。俄兵四百入省城。十一日。日本兵三百繼至。把守各門。並有日兵分守福陵、昭陵。（王彥威西巡大事記卷三）

十月二十九日。盛京將軍增祺片。……南路日逼日近。鴨綠江東岸亦有倭兵數千分布。……自江省失。吉林又約定。俄兵所至。我兵手執白旗。各不開槍。而彼北路之兵。隨由伯都訥、長春南下。……統將只晉昌、訥欽、壽張三人。現餉僅贍兩月有餘。……戰則兵已潰散。和則彼不肯聽。守則人心不固。到處以白旗相逐。現在吉林通省及奉天、牛莊、遼陽、田莊、臺、懷德、奉化等縣。莫不皆然。如黑龍江。……進城時。卽將糧餉三十餘萬兩。以及軍火等項。全行運走。……要馬三百匹。……並令將庫存及各營兵丁現用軍械。全行繳出。……吉林將軍長順。……與俄總監工茹格維志。商議停戰。俄兵到處。我兵手執白旗。……令兵團呈繳軍械。並將銀庫軍械派人看守。卽電局亦把守。不令與各處通電。……（王彥威西巡大事記卷三）

十月二十九日。奉旨寄增祺。覽奏均悉。東三省俄國已許交還。……與俄員晤商接收。……（王彥威西巡大事記卷三）

十一月十二日。……旨電。出使俄國大臣楊儒。著充全權大臣。與俄外部商議東三省接收事宜。……（王彥威西巡大事記卷四）

十一月二十六日電。楊儒電所稱。增祺……與俄擅立奉天交地暫行約章九條。畫押之語。……增祺並未奏知。……着交部嚴加議處。（王彥威西巡大事記卷四）

李盛鐸電奏。頃日外部言。此次議款。中國萬不可割地。如允割地與一國。或雖未明割。而允其設官置兵。亦是暗讓。一經允定。他國羣起效尤。大局當不可問。財政各種利權亦然。設有一國要挾太重。中國似可答以此項事變。關繫各國。宜歸入各國公約併議。庶免受虧。……（王彥威西巡大事記卷四）

光緒二十七年^{一九〇一年}正月初七日。張之洞電。……楊使電。約稿十二款。……大致仍與（增祺約）相仿。去臘英領事面言。力陳此約萬不可允。近日日本外部屢次來電云。日本力勸各國。阻止此約。英、德、美政府。意見皆同。各國之意。皆暗助中國。拒絕俄國要求。……（王彥威西巡大事記卷五）

美國分致英、法、俄、德、義、奧、日本諸國。滿洲約議。……當各國之派兵赴華也。均曾明認願保中國土地不使有傷。……倘中國并不預商各國。遽立專約。讓人財土。則既缺於理。而復無所益。……美廷向主關門共利之說。滿洲亦在其例。……茲者美廷擬盡良言。……以阻此約之成。……（呂海寰庚子海外紀事卷四）

二月辛丑^{初五}電諭……俄約關繫太重……不遽畫押。僅祇激怒於俄。畫則羣起效尤分據。其禍尤速……著楊儒婉告俄外部……格外見諒。（光緒東華錄卷一六六）

光緒二十八年^{一九〇二年}三月辛酉朔。慶親王奕劻、大學士王文韶與俄國駐京公使雷薩爾議訂交收東三省條約四款成。其文曰。大清國大皇帝與大俄國大皇帝。願將於華歷光緒二十六年。即俄歷一千九百年。在中國生出之變亂。所傷鄰交。復行敦固。茲爲商議東三省各事。大清國大皇帝將派總理外務部事務和碩慶親王、軍機大臣文淵閣大學士外務部會辦大臣王文韶爲全權大臣。便宜行事。大俄國大皇帝特派駐華全權大臣正參政大臣雷薩爾爲全權大臣。便宜行事……會同議訂各條款。開列於左。第一款。大俄國大皇帝願彰明與大清國大皇帝和睦及交誼之新證據。而不顧由東三省與俄國交界各處開仗攻打俄國安分鄉民各情。允在東三省各地歸復中國權勢。並將該地方一如俄軍未經佔據以前。仍歸中國版圖及中國官治理。第二款。大清國國家。今自接收東三省自行治理之際。申明與華俄銀行。於華歷光緒二十二年八月初二日。即俄歷一千八百九十六年八月二十七日。所立合同年限。及各條款。實力遵守。並按照該合同第五款。承認極力保護鐵路。暨在該鐵路職事各人。並分應保護在東三省所有俄國所屬各人。及該人各事業。大俄國國家因有大清國國家所認以上各情。允認如果再無變亂。並他國之舉動亦無牽制。即將東三省俄國所駐各軍陸續撤退。其如何撤退。開列於後。由簽字畫押後。限六箇月。撤退盛京省西南段至遼河所駐俄國各官軍。並將各鐵路交還中國。再六箇月。撤退盛京其餘各段之官軍。暨吉林省內官軍。再六箇月。撤退其餘之黑龍

江省所駐俄國各官軍。第三款。大清國國家暨大俄國國家。爲免華歷光緒二十六年即俄歷一千九百年變亂。後來再行復熾。且此變亂。皆屬中國駐劄於俄國交界各省之官兵所爲。今令各將軍與俄國兵官會同籌定。俄兵未退之際。駐劄東三省中國兵隊之數目。及駐劄處所。中國允認除將軍與俄國兵官籌定必須敷剿辦賊匪彈壓地方之用兵數。中國不另添練兵。惟在俄國各軍全行撤退後。仍由中國酌核。東三省所駐兵數。應添應減。隨時知照俄國國家。蓋因中國如在各該省多養兵隊。俄國在交界各處亦自不免加添兵隊。以致兩國無益。而加增養兵各費也。至於東三省安設巡捕。及綏靖地方等事。除指給中國東省鐵路公司各地段外。各省將軍教練專用中國馬步捕隊。以充巡捕之職。第四款。大俄國國家允准。將自俄歷一千九百年九月底。即華歷光緒二十六年閏八月間起。被俄兵所佔據並保護之山海關、營口、新民廳各鐵路。交還本主。大清國國家允許。一、設有應行保護該鐵路情節。則專責成中國保護。毋庸請他國保護修養。並不可准他國佔據俄國所退各地段。二、修完並養各該鐵路各節。必確照俄國與英國一千八百九十九年四月十六日。即華歷光緒二十五年三月十九日。所定和約。及按照一千八百九十八年九月二十八日。即華歷光緒二十四年八月二十五日。與公司所立修該鐵路借款合同辦理。且該公司應遵照所出各結。不得佔據。或藉端經理山海關、營口、新民廳鐵路。三、至日後在東三省南段續修鐵路或修枝路。並在營口建造橋梁。遷移鐵路盡頭等事。應彼此商辦。四、應將大俄國國家交還山海關、營口、新民廳各鐵路。所有重修及其養路各費。由中國國家與俄國國家商酌賠償。俄國因此項未入大賠款內。兩國從前所定條約。未經此約更改之款。應仍舊照行。此約

自兩國全權大臣彼此簽押蓋印之日起施行。並御筆批准之本。限三箇月內。在森彼得堡互換。茲兩國全權大臣。將此約備漢、俄、法三國文字。各二份。畫押蓋印。以昭信守。三國文字校對相符。惟辯解之時。以法文爲本。訂於北京。繕就二份。（光緒東華錄卷一七二）

（十五） 清末之時局

（1）庚子以後之維新

（甲）維新詔書

庚子十二月下詔維新。稱母子一心。以示悔禍決意。因集衆議。於是有江督劉坤一、楚督張之洞變法會奏。其第一摺興學四端。曰設文武學堂。曰酌改文科。曰停罷武科。曰獎勵游學。第二摺整頓中法十二端。曰崇節儉。曰破常格。曰停捐納。曰重官祿。曰去書吏。曰去差役。曰恤刑獄。曰改選法。曰籌八旗生計。曰裁屯衛。曰裁綠營。曰簡文法。第三摺採用西法十一端。曰廣派游歷。曰練外國操。曰廣軍實。曰修農政。曰勸工藝。曰定鑛律、路律、商律、交涉、刑律。曰用銀元。曰行印花稅。曰推行郵政。曰官收洋

藥曰多譯東西各國書。以後改革。多依此次第。而以練兵興學爲要政。京師先後設政務處、財政處、練兵處、學務處。以重臣司其事。

光緒二十六年庚子^{一九〇〇年}十二月丁未^諭……自播遷以來。皇太后宵旰焦勞。朕尤痛自刻責。深念近數十年積敝相仍。因循粉飾。以致釀成大釁。現正議和。一切政事尤須切實整頓。以期漸致富強。懿訓以爲取外國之長。乃可去中國之短。懲前事之失。乃可作後事之師。自丁、戊以還。僞辯縱橫。妄分新舊。康逆之禍。殆更甚於紅巾。迄今海外逋逃。尙以富有貴爲等票誘人謀逆。更藉保皇保種之奸謀。爲離間宮廷之計。殊不知康逆之講新法。乃亂法也。非變法也。該逆等乘朕躬不豫。潛謀不軌。朕籲懇皇太后訓政。乃得救朕於瀕危。而鋤奸於一旦。實則剪除叛逆。皇太后何嘗不許更新。損益科條。朕何嘗概行除舊。酌中以御。擇善而從。母子一心。臣民共觀。今者恭承慈命。壹意振興。嚴祛新舊之名。渾融中外之跡。……晚近之學西法者。語言文字製造器械而已。此西藝之皮毛。而非西學之本源也。……法令不更。鋼習不破。欲求振作。須議更張。著軍機大臣、大學士、六部、九卿、出使各國大臣、各省督撫。各就現在情弊。參酌中西政治。舉凡朝章、國政、吏治、民生、學校、科舉、軍制、財政。當因、當革、當省、當併。如何而國勢始興。如何而人才始盛。如何而度支始裕。如何而武備始精。各舉所知。各抒所見。通限兩箇月內。悉條議以聞。再行上稟慈謨。斟酌盡善。切實施行。……朕與皇太后久蓄於中。物窮則變。轉弱爲強。全繫於斯。……（光緒東華錄卷一六四）

二十七年辛丑^{一九〇一年}三月己巳^諭……設立督辦政務處。派慶親王奕劻、大學士李鴻章、榮祿、崑岡、王文韶、

戶部尙書鹿傳霖爲督辦政務大臣。劉坤一、張之洞亦著遙爲參預。各該王大臣等。於一切因革事宜。務當和衷商榷。悉心評議。次第奏聞。俟朕上稟慈謨。隨時擇定。俟回鑾後。切實頒行。示天下以必信必果。無黨無偏之意。其政務處提調各官。該王大臣等。務擇心術純正。通達時務之員。奏請簡派。勿稍率忽。此事予限兩箇月。現已過期。其未經陳奏者。著迅速彙議具奏。勿稍遲延觀望。將此通諭知之。（光緒東華錄卷一六六）

丙午諭……六部則例本極詳明。行之既久。書吏窟穴其中。漁財舞文。往往舍例引案。上下其手。當今變通政治之初。亟應首先整頓部務。爲正本清源之道。非盡去蠹吏。掃除案卷。專用司員辦公不可。茲值京師兵燹之後。各部署案卷不過十存四五。著即一併銷毀。（光緒東華錄卷一六七）

七月壬辰諭……嗣後無論何項事例。均著不准報捐實官。（光緒東華錄卷一六八）

十二月乙卯諭……滿漢臣民。朝廷從無歧視。惟舊例不通婚姻。原因入關之初。風俗語言或多未喻。是以著爲禁令。今則風同道一。已歷二百餘年。自應俯順人情。開除此禁。所有滿漢官民人等。著准其彼此結婚……至漢人婦女率多纏足……嗣後搢紳之家。務當婉切勸導。使之家喻戶曉。以期漸除積習……（光緒東華錄卷一七一）

（乙）練兵

清代經制之兵。曰八旗。曰綠營。嘉慶時川楚教軍起。始有募勇。太平天國興。清所倚者湘淮軍也。後皆改用洋式槍礮。甲午之役。命胡燏芬用德國操法。練定武五千人。

後歸袁世凱。稱爲新建陸軍。庚子後設練軍處。命袁世凱專任其事。由各省攤解經費。先後成立六鎮。各省亦相繼編練。預計全國成立新軍三十六鎮。期盡裁綠營巡防營。因之新舊軍意見極深。而新軍下級軍官多學生出身。入伍者亦多士人。皆倡言革命。辛亥革命振臂而起者。皆新軍也。

二十七年^{一九〇一年}。辛丑七月丙子。諭……所有各省原有之綠營防勇。均限於本年內。裁去十之二三。及上年有事時添募之勇營。亦一併酌量裁撤。以免虛糜。（光緒東華錄卷一六八）

壬辰諭。現在整頓兵制。停止武科。亟應於各直省會建立武備學堂。以期培養將才。練成勁旅。查北洋、湖北所設武備學堂。及山東所設隨營學堂。均已辦有規模。應即責成李鴻章、劉坤一、張之洞、袁世凱等。酌量擴充。認真訓練……其餘各省。即著該督撫設法籌建。一體仿照辦理……（光緒東華錄卷一六八）

癸巳諭……著各省將軍督撫。將原有各營嚴行裁汰。精選若干營。分爲常備、續備、巡警等軍。一律操習新式槍礮。認真訓練。以成勁旅。（光緒東華錄卷一六八）

二十九年癸卯^{一九〇三年}。十一月己丑。諭……商部左丞徐世昌。著開缺。以內閣學士候補。充練兵處提調。直隸即補道劉永慶。著充軍政司正使。直隸補用道段祺瑞。著充軍令司正使。候選道王士珍。著充軍學司正使。均著賞給副都統銜。（光緒東華錄卷一八四）

……庚子亂後。各省皆起練新軍。或就防軍改編。或用新式招練。至光緒三十年。畫定軍制。京師設練兵處。各省設督練公所。改定新軍區爲三十六鎮。新軍制始畫一。三十三年。京外新練陸軍。除禁衛軍外。統計近畿第一鎮駐京北仰山窪。……第六鎮駐南苑。……直隸第二鎮駐保定永平等府。……第四鎮駐馬廠。……山東第五鎮駐省城、濰縣、昌邑等處。……江蘇第二十三混成協駐蘇州等處。……江北第十三混成協駐清江浦。……安徽部隊二標、馬隊一營、礮隊一隊駐省城。……江南第九鎮部隊一營、馬隊二隊駐省城等處。……江西部隊一協、馬隊二隊駐省城。……河南第二十九混成協駐省城。……部隊一協、馬隊各一營調駐京城。……湖南部隊一協、礮隊一營駐省城。……湖北第八鎮駐省城。……第二十一混成協駐武昌、漢陽及京漢鐵路。……浙江部隊一協駐省城。……福建第十鎮駐省城及福寧、延平等處。……雲南部隊一協、礮隊一營駐省城及臨安。……貴州部隊一標、礮隊一隊駐省城。……四川部隊一協駐省城。……山西部隊二標、馬隊各一營駐省城。……陝西部隊一協、礮隊一隊駐省城。……甘肅部隊二標、礮隊一營駐省城、河州、固原、西寧。……新疆部隊一協、馬隊一標、礮隊一營駐省城。……東三省第三鎮駐吉林省城、長春、寧安、延吉及奉天、錦州等處。……第一混成協駐奉天省城。……第二混成協駐奉天、新民等處。……部隊一協一標、礮隊一營駐吉林。……宣統三年。統計除前列外。……雲南成第十九鎮。……奉天成第二十鎮。……而三十六鎮卒未全立云。(清史稿兵志九)

(丙)興學

京師初設管學大臣。後改學部。各省設提學使。擴充京師大學堂。擬建七科。而以仕學館、譯學館隸之。又設農、工、醫、法政、師範各高等專科。復設女學。各直省遍設高等學堂。兩級師範學堂及中小學。廣聘日本教習。增築校舍。天津有北洋大學。各國教會皆辦學堂。亦有大學。科舉既廢。乃以進士舉人名目。移爲學堂出身。且授實官。出洋學生考試後有授翰林院編修者。獎勵極優。而學生則多談革命。

二十七年^{一九〇}七月己卯諭……著自明年爲始。嗣後鄉會試。頭場試中國政治史事論五篇。二場試各國政治藝學策五道。三場試四書義二篇。五經義一篇。考官評卷。合校三場以定去取。不得全重一場。生童歲科兩考。仍先試經古一場。專試中國政治史事。及各國政治藝學策論。正場試四書義、五經義各一篇。考試、試差、庶吉士、散館。均用論一篇、策一道。進士朝考、論疏、殿試策問。均以中國政治史事及各國政治藝學命題。以上一切考試。凡四書五經義均不准用八股文程式。策論均應切實敷陳。不得仍前空衍剽竊……（光緒東華錄卷一六八）

諭……嗣後武生童考試及武科鄉會試。著即一律永遠停止。所有武舉人、進士。均令投標學習。其精壯之幼生及向來所學之童生。均准其應試入伍。俟各省設立武備學堂後。再行酌定挑選……（光緒東華錄卷一六八）

八月乙未諭……除京師已設大學堂應行切實整頓外。著各省所有書院。於省城均改設大學堂。各府及直隸州均改設中學堂。各州縣均改設小學堂。並多設蒙養學堂。其教法當以四書五經綱常大義爲主。以歷代史鑑及中外政治藝學爲輔。務使心術純正。文行交修。博通時務。講求實學……著各該督撫學政切實通飭認真興辦……（光緒東華錄一六九）

戊戌諭……前據江南、湖北、四川等省。選派學生出洋肄業。著各省督撫一律仿照辦理。務擇心術端正文理明通之士。遣往學習。將一切專門藝學認真肄業。竭力講求。學成頗有憑照回華。卽由該督撫學政按其所學。分門考驗。如果學有成效。卽行出具切實考語。咨送外務部覆加考驗。據實奏請獎勵。其遊學經費。著各直省妥籌發給。准其作正開銷。如有自備旅資出洋遊學者。著各該省督撫咨明該出使大臣。隨時照料。如果學成得有優等憑照回華。准照派出學生一體考驗獎勵。候旨分別賞給進士、舉人、各項出身。以備任用而資鼓舞……（光緒東華錄卷一六九）

三十一年乙巳一九〇五年八月甲辰……上諭……自丙午科爲始。所有鄉會試一律停止。各省歲科考試亦卽停止。其以前之舉貢生員。分別量予出路……嚴飭府廳州縣趕緊於城鄉各處。徧設蒙小學堂。慎擇師資。廣開民智……（光緒東華錄卷一九五）

（丁）改官制

首改總理衙門爲外務部。巍然爲各部之首。增設農工商部、郵傳部、巡警部、學部。裁

中外冗官。五大臣出洋後。復有更改。唯軍機處仍舊。至宣統三年四月始設內閣。地方官制。唯增設交涉、提學二使。勸業、巡警二道。其餘終無定議。

二十七年^{一九〇一年}。六月癸卯。諭……總理各國事務衙門著改爲外務部。班列六部之前。簡派和碩慶親王奕劻總理外務部事務。體仁閣大學士王文韶著授爲會辦外務大臣。工部尚書瞿鴻禨著調補外務部尚書。授爲會辦大臣。太僕寺卿徐壽朋。候補三四品京堂聯芳。著補授外務部左右侍郎……（光緒東華錄卷一六七）

二十九年^{一九〇三年}。七月戊戌。諭……設立商部衙門。商部尚書著載振補授。伍廷芳著補授商部左侍郎。陳璧著補授商部右侍郎……（光緒東華錄卷一八一）

三十一年^{一九〇五年}。九月庚辰。諭……設立巡警部。署兵部左侍郎徐世昌。著補授該部尚書。內閣學士毓朗。著補授該部左侍郎。直隸候補道趙秉鈞。著賞給三品京堂。署理該部右侍郎。所有京城內外工巡事務。均歸管理。以專責成。其各省巡警。並著該部督飭辦理……（光緒東華錄卷一九六）

十一月己卯……上諭……設立學部。榮慶著調補學部尚書。學部左侍郎著熙瑛補授。翰林院編修嚴修著以三品京堂候補。署理學部右侍郎。國子監即古之成均。本係大學。所有該監事務。著即歸併學部……（光緒東華錄卷一九七）

三十二年^{一九〇六年}。九月乙卯……上諭……內閣軍機處一切規制。著照舊行。其各部尚書。均著充參預政務

大臣輪班值日。聽候召對。外務部吏部均著照舊。巡警爲民政之一端。著改爲民政部。戶部著改爲度支部。以財政處稅務處併入。禮部著以太常、光祿、鴻臚三寺併入。學部仍舊。兵部著改爲陸軍部。以練兵處太僕寺併入。應行設立之海軍部及軍諮府。未設以前。均暫歸陸軍部辦理。刑部著改爲法部。責任司法。大理寺著改爲大理院。專掌審判。工部著改併入商部。改爲農工商部。輪船、鐵路、電綫、郵政。應設專司。著改爲郵傳部。理藩院著改爲理藩部。除外務部堂官員缺照舊外。各部堂官均改設尙書一員侍郎二員。不分滿漢。都察院本糾察行政之官。職在指陳闕失。伸理冤滯。著改爲都御史一員。副都御史二員。六科給事中著改爲給事中。與御史各員缺仍暫如舊。其應行增設者。資政院爲博採羣言。審計院爲核查經費。均著以次設立。其餘宗人府、內閣、翰林院、欽天監、鑾儀衛、內務府、太醫院、各旗營侍衛處、步軍統領衙門、順天府、倉場衙門。均毋庸更改。……此次斟酌損益。原爲立憲始基。實行預備。如有未盡合宜之處。仍著……隨時修改。（光緒東華錄卷二〇二）

諭。此次改定官制。除民政部、學部、農工商部尙書、侍郎均毋庸更換外。吏部尙書仍著鹿傳霖補授。左侍郎著陳邦瑞、右侍郎著唐景崇調補。度支部尙書著溥頤補授。左侍郎著紹英補授。右侍郎仍著陳璧補授。禮部尙書仍著溥良補授。左侍郎著張嘉亨調補。右侍郎仍著景厚補授。陸軍部尙書著鐵良補授。左侍郎仍著壽勳補授。右侍郎仍著蔭昌補授。法部尙書著戴鴻慈補授。左侍郎仍著紹昌補授。右侍郎著張仁黴補授。郵傳部尙書著張百熙補授。左侍郎著唐紹儀補授。右侍郎著胡燏棻補授。理藩院尙書著壽耆補授。右侍郎著恩順補授。都察院都御史仍著陸寶忠補授。副都御史仍著伊克坦、陳名侃補授。（光緒東華錄卷二〇二）

丁巳……改政務處爲會議政務處。（光緒東華錄卷二〇二）

光緒三十三年歸併會議政務處於內閣。

（戊）改革幣制

自對日賠款規定。付款時應以銀兩折合當時鎊價。庚子賠款因之。每至付款時。外國銀行高擡匯價。每年多耗七百萬兩。謂之鎊虧。以金銀比價不定。乃倡爲改革幣制之說。設貨幣制度調查所。聘美國貨幣專家精琦來華。計議主買外匯。時論以爲喪權。多主張用金本位。而黃金儲備非易。久之。始定議改兩爲圓。鑄大清銀幣。輔幣各以十進。然各省競鑄銀圓、銅圓。以圖餘利。迄未統一。自使用銅圓後。制錢不行。物價驟漲。清廷但欲假改革之名。以借外款。本意不在改革也。

宣統二年^{一九一〇年}四月己丑諭……中國國幣單位。著即定名曰圓。暫就銀爲本位。以一圓爲主幣。重庫平七

錢二分。另以五角、二角五分、一角三種銀幣。及五分、二分、一分、五釐、一釐四種銅幣爲輔幣。圓、角、分、釐各以十進。永爲定價。不得任意低昂。著度支部一面責成造幣廠迅即按照所擬各項重量、成色、花紋鑄造新幣。積有成數。次第施行。所有賦稅課釐。必用制幣交納。放款亦然。並責成大清銀行。會同造幣廠。將新舊交換機關。籌備完密。一面通行各省。將現鑄之大小銀銅圓一律停鑄。並知照京外各衙門。按照單開折合標準。及改

換計數名稱各條。依限妥辦。將來新幣發行。地方所有生銀。及從前鑄造各項銀銅圓。准其暫照市價行用。由部飭幣廠銀行逐漸收換。並酌定期限。停止行用。迨新幣通行以後。無論官私各款。均以大清銀幣收發交易。不得拒不受。亦不准強行折扣。（宣統政紀卷三五）

（己）預備立憲

立憲之名。始于戊戌。梁啓超往日本。漸知憲法。鼓吹君憲。流傳內地。結社者甚衆。其著者。鄭孝胥、湯壽潛、張謇。結預備立憲公會。梁啓超徒黨結政聞社。專主民權。較維新又進一步。以與革命爲敵。

鄭孝胥同議設預備立憲公會。會成。主急主緩。議論極分駁。余謂立憲大本在政府。人民則宜各任實業。教育爲自治基礎。與其多言。不如人人實行。得尺則尺。得寸則寸。公推孝胥爲會長。（湯）壽潛與余副之。……

（張謇齋翁自訂年譜卷下）

光緒三十四年^{一九〇八年}七月庚子。諭。近聞沿江沿海暨南北各省。設有政聞社名目。內多悖逆要犯。廣斂資財。糾結黨類。託名研究時務。陰圖煽亂。擾害治安。若不嚴行查禁。恐將敗壞大局。著民政部、各省督撫、步軍統領、順天府。嚴密查訪。認真禁止。遇有此項社夥。即行嚴拏懲辦。勿稍疏縱。致釀巨患。（光緒東華錄卷二一八）若夫政聞社所持之主義。欲以求同情於天下者。則有四綱焉。一曰。實行國會制度。建設責任政府。……二曰。

釐訂法律。鞏固司法權之獨立。……三曰。確立地方自治。正中央地方之權限。……四曰。慎重外交。保持對等權利。……以上所舉。雖寥寥四綱。竊謂中國前途之安危存亡。蓋繫於是矣。（梁啓超飲冰室文集卷四四政聞社宣言書）

清室爲萬世一系之說所動。方苦于革命排滿者之多。欲姑借立憲以緩之。乃派五大臣出洋考察。回國後。倡議先改官制。藉口國民程度不足。久之始定爲九年預備立憲。先設資政院。而其議員則宗室王公世爵佔十四名。滿漢世爵十二名。外藩王公世爵十四名。宗室覺羅六名。各衙門官三十二名。所謂碩學通儒者佔十名。概由欽派。其餘議員亦非真正民選。

光緒三十一年六月丙辰。諭……茲特簡載澤、戴鴻慈、徐世昌、端方等。隨帶人員。分赴東西洋各國。考求一切政治。以期擇善而從。……（光緒東華錄卷一九四）

七月乙酉。續派商部右丞紹英。爲出洋考察政治大臣。（光緒東華錄卷一九五）

……中國講自強者。謂必須立憲。並成立責任內閣。故朝廷派鎮國公載澤、戶部侍郎戴鴻慈、軍機大臣徐世昌、湖南巡撫端方、前山東布政使尙其亨、商部右丞紹英。並奏調京外知名之士。隨同出洋。考查歐美及日本憲政。在前門登車時。爲吳樾混入五大臣車內。吳驚惶無措。致觸及所懷之炸彈。遂炸破自身。血染澤公褂袖。

飛片傷及車外在站送行之外務部侍郎伍廷芳。及隨員薩蔭圖之家眷。並車內之紹英。當由軍事隨員丁士源。搶護澤、徐、端、尙四人。至站長室。並用陸軍担架送紹英至交民巷法國醫院。越兩日。京師設巡警部。……並由政府賞格萬金。購緝吳之同黨。徐世昌遂停止出洋。……吳爲保定師範學生。犯案綦重。然並不澈底追求。

（丁士源梅楞章京筆記）

八月戊辰。諭載澤等奏。二十六日乘坐火車出京。正擬開行。陡聞轟震之聲。查係炸彈猝發。載澤、紹英均受微傷。除車旁傷斃三人外。其餘隨員僕從亦有被傷者。車內轟斃一人。驗有炸彈毀裂痕迹等語。……責成步軍統領衙門。順天府工巡局。督辦鐵路大臣等。嚴切查拏。……（光緒東華錄卷一九五）

九月戊戌。命尙其亨、李盛鐸會同載澤、戴鴻慈、端方。前往各國考察政治。（光緒東華錄卷一九六）

十月戊辰。諭……派政務處王大臣設立考察政治館。延攬通才。悉心研究。擇各國政法之與中國體治相宜者。斟酌損益。纂訂成書。隨時進呈。候旨裁定。……（光緒東華錄卷一九七）

光緒三十二年^{一九〇六年}七月戊申。諭……前簡派大臣分赴各國考查政治。現載澤等回國陳奏。深以國勢不振。實由於上下相睽。內外隔閡。……而各國之所以富強者。實由於實行憲法。取決公論。……時處今日。惟有及時詳晰甄核。仿行憲政。大權統於朝廷。庶政公諸輿論。以立國家萬年有道之基。但目前規制未備。民智未開。若操切從事。徒飾空文。何以對國民而昭大信。……亟應先將官制分別議定。次第更張。並將各項法律詳慎釐訂。而又廣興教育。清釐財政。整頓武備。普設巡警。使紳民明悉國政。以預備立憲基礎。著內外臣工。切實

振興。力求成效。俟數年後。規模粗具。查看情形。參用各國成法。妥議立憲實行期限。再行宣布天下。視進步之遲速。定期限之遠近。（光緒東華錄卷二〇二）

三十三年^{一九〇七年}。七月甲午。奕劻等奏。……預備立憲。……入手辦法。總以研究爲主。研究之要。不外編譯東

西洋各國憲法。以爲借鏡之資。調查中國各行省政治。以爲更張之漸。……擬請旨將考察政治館改爲憲政編查館。……上諭。……從前設立考察政治館。原爲辦理憲政。……著即改爲憲政編查館。……（光緒東華

錄卷二〇八）

八月壬申。諭。……立憲政體。取決公論。上下議院實爲行政之本。中國上下議院一時未能成立。亟宜設資政院。以立議院基礎。著派溥倫孫家鼐充該院總裁。……（光緒東華錄卷二〇九）

元年^{一九〇九年}。七月乙卯。諭。……資政院奏續擬院章並將前奏各章改訂開單呈覽一摺。朕詳加披覽。該院自職掌以下八章。與現訂諮議局章程。實相表裏。即爲將來上下議院法之始基。所擬尙屬周妥。著京外各衙門一體遵行。其各項細則章程。仍著迅速籌擬。奏請宣布。（宣統政紀卷一七）

九月辛丑。諭。……今當開院會集之初。朕特命軍機大臣暨參預政務大臣。將各項案件妥慎籌擬。照章交議。

（宣統政紀卷二一）

又設地方諮議局。選用議員。由督撫監督。

三十三年^{一九〇七年}。八月壬午。諭。……上年降旨。宣布憲政。業經明白申諭。視進步之遲速。定期限之遠近。朝廷

虛懷憲政。盼望至殷。近已降旨先設資政院。以立議院基礎。顧議院言論之得失。全視議員程度之高下。非教育普及。則民智何由啓發。非地方自治。則人才無從歷練。至教育宗旨。必以忠君愛國屏除邪說爲歸。自治法規。必以選舉賢能力謀公益爲主。著學部通籌普及善法。編輯精要課本。以便通行。並著民政部妥擬自治章程。請旨飭下各省督撫。擇地依次試辦。……務使議員資格日進高明。庶議院早日成立。憲政可期實行。……

…（光緒東華錄卷二〇九）

九月辛丑諭。……著各省督撫均在省會速設諮議局。慎選公正明達官紳。創辦其事。……公舉賢能作爲該局議員。……凡地方應興應革事宜。議員共同集議。候本省大吏裁奪施行。……將來資政院選舉議員。可由該局公推遞升。……其各府州縣議事會一併預爲籌畫。務期……庶政公諸輿論。與實相符。（光緒東華錄

卷二一〇）

宣統元年^{一九〇九年}正月戊申諭。……本年各省均應舉行諮議局選舉。及籌辦各州縣地方自治。設立自治研

究所。並頒佈資政院章程等事。……著各省督撫及管理地方之將軍都統等。督率所屬。選用公正明慎之員紳。一律依限成立。（宣統政紀卷七）

八月丙午諭。……茲屆九月初一日。各省招集議員開議之期。用特重申誥誡。各該諮議局議員。於地方利弊情形。均當切實陳指。……勿挾私心。以妨公益。勿逞意氣。以紊成規。勿見事太易。而議論稍涉囂張。勿權限不明。而定法致滋侵越。各該督撫亦當虛公採納。裁度施行。……至開局以後。各該督撫尤應欽遵定章。實行監

督。務使議決事件不得踰越權限。違背法律。……著將此諭敬謹繕錄。懸挂各省諮議局議場。一體欽遵。……

（宣統政紀卷二〇）

以立憲須從辦自治始。多以劣紳充任自治局員。著手地方應行興辦事業者少。而干預詞訟爭公款者多。

光緒三十四年一九〇八年十二月戊寅諭。……地方自治爲立憲之根本。城鎮鄉又爲自治之初基。誠非首先開

辦不可。著民政部及各省督撫督飭所屬地方官。選擇正紳。按照此次所定章程。將城鎮鄉自治各事宜。迅即籌辦。實力奉行。不准稍有延誤。（宣統政紀卷五）

十二月壬寅諭。……本日憲政編查館奏。覆覈府廳州縣地方自治章程並府廳州縣議事會議員選舉章程繕單呈覽一摺。朕詳加披覽。尙屬周妥。……即著民政部會同各督撫。按照定章。督飭各該地方官切實施行。

（宣統政紀卷二八）

光緒三十四年八月。始奏頒立憲大綱。及議院法、選舉法要領。並預備立憲九年期間逐年應行籌備事宜。限六個月呈報一次。國人見其過度尊崇君權。又逐年應辦之事。無一實行。故請願縮短年限。速開國會者。接踵而起。

光緒三十四年一九〇八年八月甲寅。憲政編查館奏政院會奏。……夫憲法者國家之根本法也。……其最精之

大義不外數端。一曰。君主神聖不可侵犯。二曰。君主總攬統治權。按照憲法行之。三曰。臣民按照法律。有應得應盡之權利義務而已。……故一言以蔽之。憲法者所以鞏固君權。兼以保護臣民者也。……臣等公同商酌。擬自本年光緒三十四年起。至光緒四十二年止。限定九年。將預備各事一律辦齊。……謹將遵擬憲法大綱。暨議院法。選舉法要領。繕具清單。恭呈御覽。……謹按君主立憲政體。君上有統治國家之大權。凡立法。行政。司法。皆歸總攬。而以議院協贊立法。以政府輔弼行政。以法院遵律司法。上自朝廷。下至臣庶。均守欽定憲法。以期永遠率循。罔有踰越。謹本斯義。恭擬如左。君上大權。一。大清皇帝統治大清帝國。萬世一系。永永尊戴。一。君上神聖尊嚴。不可侵犯。一。欽定頒行法律及發交議案之權。凡法律雖經議院議決。而未奉詔命批准頒布者。不能見諸施行。一。召集。開閉。停展及解散議院之權。解散之時。即令國民重行選舉新議員。其被解散之舊議員。即與齊民無異。倘有抗違。量其情節。以相當之法律處治。一。設官制祿及黜陟百司之權。用人之權。操之君上。而大臣輔弼之。議院不得干預。一。統率陸海軍及編定軍制之權。君上調遣全國軍隊。制定常備兵額。得以全權執行。凡一切軍事。皆非議院所干預。一。宣戰講和訂立條約及派遣使臣與認受使臣之權。國交之事。由君上親裁。不付議院議決。一。宣告戒嚴之權。當緊急時。得以詔令限制臣民之自由。一。爵賞及恩赦之權。恩出自君上。非臣下所得擅專。一。總攬司法權。委任審判衙門。遵欽定法律行之。不以詔令隨時更改。司法之權。操諸君上。審判官本由君上委任。代行司法。不以詔令隨時更改者。案件關係至重。故必以已經欽定法律為準。免涉紛歧。一。發命令及使發命令之權。惟已定之法律。非交議院協贊奏經欽定時。不以命令更改廢止。

法律爲君上實行司法權之用。命令爲君上實行行政權之用。兩權分立。故不以命令改廢法律。一。在議院閉會時。遇有緊急之事。得發代法律之詔令。並得以詔令籌借必需之財用。惟至次年會期。須交議院協議。一。皇室經費。應由君上制定常額。自國庫提支。議院不得置議。一。皇室大典。應由君上督率皇族及特派大臣議定。議院不得干預。附。臣民權利義務。其細目當於憲法起草時酌定。一。臣民中有合於法律命令所定資格者。得爲文武官吏及議員。一。臣民於法律範圍以內。所有言論著作出版及集會結社等事。均准其自由。一。臣民非按照法律所定。不加以逮捕監禁處罰。一。臣民可以請法官審判其呈訴之案件。一。臣民應遵守法律所定審判衙門之審判。一。臣民之財產及居住。無故不加侵擾。一。臣民按照法律所定。有納稅當兵之義務。一。臣民現完之賦稅。非經新定法律更改。悉仍照舊輸納。一。臣民有遵守國家法律之義務。附。議院法要領。其細目當於釐定議院法時酌定。一。議院祇有建議之權。並無行政之責。所有決議事件。應恭候欽定後。政府方得奉行。一。議院提議事件。須關乎全國公同利害者。不得以一省尋常地方之事提議。一。君上大權所定及法律上必需之一切歲出。非與政府協議。議院不得廢除刪削。其細目另於會計法內定之。一。國家之歲入歲出每年預算。應由議院之協贊。一。行政大臣如有違法情事。議院祇可指實彈劾。其用舍之權。仍操之君上。不得干預朝廷黜陟之權。一。議院所議事件。必須上下議院彼此決議後。方可奏請欽定施行。一。議院有上奏事件。由議長出名具奏。一。議員言論。不得對朝廷有不敬之語。及誣讒毀辱他人情事。違者分別懲罰。一。議院開會之際。議長有指揮警察整飭議場之權。如有違議院法律規則者。議長得禁止其發言。或令退出議場。一。議員如有不合

選舉資格者。由議長審查得實。隨時立予除名。一。各省士紳所設研究議會之會社。須遵照政治結會集社律辦理。不准藉此歛派銀錢。擾累地方。違者由地方官封禁懲治。附。選舉法要領。其細目當於釐定選舉法時酌定。一。議院舉行選舉事宜。俱由府廳州縣各官實行監督。一。不合於選舉資格者。不得有選舉權及被選舉權。如品行悖謬。營私武斷者。曾處監禁以上之刑者。營業不正者。失財產上之信用。被人控實尚未清結者。吸食鴉片者。有心疾者。身家不清白者。不識文義者等項。違者立即撤銷。一。舉行選舉之期。應設管理員監察員。於投票開票時。嚴加省視。以防舞弊。一。違背選舉章程者。如以詐術獲登選舉人名冊者等項。另定罰則。分別科以監禁罰金。一。選舉用投票之法。以得票多數而合例者。方准當選。向來地方公舉紳董之事。名爲公舉。或由官長授意。或由三數有力之紳推薦。不免有瞻徇情面。不孚衆望之處。今用投票法層層節制。期於力矯前項情弊。一。凡人民於選舉之前。非在原籍地方住居滿一年以上者。暫停其選舉及被選舉權。（光緒東華錄卷二一九）

宣統三年四月。頒佈內閣官制。成立內閣。世稱皇族內閣。自載灃爲監國攝政王。倚溥倫。載澤爲腹心。參預密勿。皆妻黨也。其弟載洵。載濤。又各用事。奕劻老而務得。善者。毓朗。房分較遠。皇族之中。派別各異。庸碌則同。

諭內閣。上年降旨。飭將官制釐訂提前頒布試辦。並即組織內閣。……經朕定爲宣統三年頒佈內閣官制。設立內閣。所以統一政治。確定方針。用符立憲政體。……所擬內閣官制十九條。採取各國君主立憲之制。參酌

現在時勢之宜。審慎規定。尙屬周妥。……著將內閣官制頒布。遵照此項欽定閣制。設立內閣。……附錄內閣官制。第一條。內閣以國務大臣組織之。第二條。國務大臣以內閣總理及左列各部大臣爲之。外務部大臣。民政大臣。度支大臣。學務大臣。陸軍大臣。海軍大臣。司法大臣。農工商大臣。郵傳大臣。理藩大臣。第三條。國務大臣輔弼皇帝。擔負責任。第四條。內閣總理大臣一人。爲國務大臣之領袖。秉承宸謨。定政治之方針。保持行政之統一。第五條。內閣總理大臣於各部大臣之命令或其處分。視爲實有妨礙者。得暫令停止。奏請聖裁。第六條。內閣總理大臣就所管事務。對於各省長官及各藩屬長官。得發訓示。第七條。內閣總理大臣就所管事務。監督指揮各省長官及各藩屬長官。於其命令或處分。如有認爲違背法令或逾越權限。得暫令停止。奏請聖裁。第八條。內閣總理大臣依其職掌或特別之委任。得奏請頒發閣令。第九條。內閣總理大臣得隨時入對。各部大臣就所管事務。得隨時會同內閣總理大臣入對。或請旨自行入對。除國務大臣外。凡例應召見人員。於國務有所陳述者。由國務大臣帶領入對。其蒙特旨召見。及法令有特別規定者。不在此限。第十條。關於國務之具奏事件。其涉及各部全體者。由國務大臣會同具奏。專涉一部或數部者。由內閣總理大臣會同該部大臣具奏。除國務大臣外。凡例應奏事人員。於國務有所陳奏者。由國務大臣代遞。其法令有特別規定者。不在此限。第十一條。法律敕令及其他關於國務之諭旨。其涉各部全體者。由國務大臣會同署名。專涉一部或數部者。由內閣總理大臣會同該部大臣署名。第十二條。左列事件應經內閣會議。一。法律案及敕令案。並官制。二。豫算案及決算案。三。豫算外之支出。四。條約及重要交涉。五。奏任以上各官之進退。六。各部權限之爭議。七。

特旨發交及議院移送之人民陳請事件。八。各部重要行政事件。九。按照法令應經閣議事件。十。內閣總理大臣或各部大臣認爲經閣議事件。第十三條。內閣會議以國務大臣之同意議定之。會議以內閣總理大臣爲議長。第十四條。關繫軍機軍令事件。除特旨交閣議外。由陸軍大臣海軍大臣自行具奏。承旨辦理後。報告於內閣總理大臣。第十五條。內閣總理大臣臨時遇有事故。得奏請於國務大臣內特派一人代理。第十六條。各部大臣臨時遇有事故。得奏明以他部大臣代理。第十七條。本官制第二條所列國務大臣外。有因臨時重要事件。奉特旨列入內閣者。爲特任國務大臣。但不在常設之例。第十八條。特任國務大臣所有入對具奏署名。均以臨時事件爲限。仍依本官制第九條第十條第十一條之例。會同內閣總理大臣辦理。附則。第十九條。本官制奉旨頒布之後。如有應行變通之處。隨時恭候特旨裁奪。或經內閣奏明。仍恭候特旨裁奪。（宣統政紀卷五二）

宣統三年一九一一年四月……戊寅……又諭。慶親王奕劻。皇族著授爲內閣總理大臣。大學士那桐。八旗徐世昌均著授爲內閣協理大臣。……內閣總協理大臣。業經簡授。其各部行政長官。……應卽同時簡授。梁敦彥著授爲外務大臣。善著。皇族著授爲民政大臣。載澤。皇族著授爲度支大臣。唐景崇著授爲學務大臣。蔭昌。八旗著授爲陸軍大臣。載洵。皇族著授爲海軍大臣。紹昌。八旗著授爲司法大臣。溥倫。皇族著授爲農工商大臣。盛宣懷著授爲郵傳大臣。壽耆。八旗著授爲理藩大臣。所有內閣總協理大臣。及各該大臣。均爲國務大臣。……內閣總理大臣慶親王奕劻。著仍管理外務部。……內閣總理大臣。協理大臣。均著兼充憲政編查館大臣。……又諭。郡王銜貝

勸載濤、皇族貝勒毓朗、皇族均著授爲軍諮大臣。（宣統政紀卷五二）

國人鑒於皇族專政。賄賂公行。故欲速開國會。督撫苦於中央集權。亦多和之。於是各省人民數次請願速開國會者。悉遭嚴斥。而人心盡失。

光緒三十四年一九〇八年六月辛卯諭。政聞社法部主事陳景仁等電奏。請定三年內開國會。革于式枚謝天下

等語。朝廷預備立憲。將來開設議院。自爲必辦之事。……該主事等何得臆度率請。于式枚爲卿武大員。又豈該主事等所得擅行請革。聞政聞社內諸人。良莠不齊。且多曾犯重案之人。陳景仁身爲職官。竟敢附和。……著卽行革職。由所在地方官查傳管束。以示薄懲。（光緒東華錄卷二一七）

宣統元年一九〇九年二月乙丑諭。……國家豫備憲政。變法維新。輿奉先朝明諭。分年豫備。切實施行。朕登極後。

復行申諭。依限籌辦。毋得延緩。今特將朝廷一定實行豫備立憲維新圖治之宗旨。再行明白宣示。總之國是已定。期在必成。嗣後大小臣工。皆當共體此意。翊贊新猷。（宣統政紀卷八）

十二月乙未諭。……據都察院奏。代遞直隸各省諮議局議員孫洪伊等呈請速開國會一摺。披覽均悉。具見愛國惻忱。朝廷深爲嘉悅。朕仰承先朝付託之重。於豫備立憲之要政。當御極之初。卽布告內外。仍以宣統八年爲限。……我國幅員遼闊。籌備既未完全。國民智識程度又未盡一。如一時遽開議院。恐反致紛擾不安。適足爲憲政前程之累。……朕開誠布公。無所隱飾。總之憲政必立。議院必開。……俟將來九年豫備業已完全。國民教育普及。屆時朕必毅然降旨。定期召集議院。（宣統政紀卷二八）

二年。^{○一九一}五月癸亥。諭……諮議局議員孫洪伊等並直省旗籍各代表等呈請速開國會……俟九年豫備完全。國民程度普及。必毅然降旨定期召集……毋得再行瀆請。（宣統政紀卷三六）

十一月庚申。諭……電寄直隸總督陳夔龍。據電奏順直諮議局議長等呈請於明年即開國會等語。開設議院縮改於宣統五年。期限不爲不近。所有提前應行豫備事宜。至爲繁賾。已慮趕辦不及。各督撫陳奏。亦多見於此。豈能再議更張。著該督懷遵上次諭旨。剴切宣示。不准再行聯名要求瀆奏。（宣統政紀卷四五）

壬戌……諭。電寄……陳夔龍。據電奏二十日諭旨遵即恭錄出示曉諭。飭巡警道偵查。不准聚衆集議。請願同志會亦飭解散等語。辦理尙屬認真。著陳夔龍嚴飭各員。開導彈壓。如有不服勸諭。糾衆違抗。著仍即懷遵十月初三日諭旨。查拏嚴辦。以保治安。（宣統政紀卷四五）

癸亥。諭內閣。前據錫良代奏。奉天紳民呈請明年即開國會。當經批示……開設議院。縮改於宣統五年。乃係廷臣協議……萬不能再議更張……今又有以東三省代表名詞來京遞呈。一再瀆擾。實屬不成事體。著民政部。步軍統領衙門立即派員。將此項人等。迅速送回原籍。各安生業。不准在京逗遛……各省如再有聚衆滋鬧情事。即非安分良民。該督撫等均有地方之責。著即懷遵十月初三日諭旨。查拏嚴辦。毋稍縱容。以安民生而防隱患。（宣統政紀卷四五）

十二月壬申。諭……不安本分之徒。藉速開國會爲名。仍復到處鼓惑。各學堂學生多係年幼無知。血氣未定。往往被其愚弄。輕發傳單。紛紛停課。聚衆要求。開奉天、直隸、四川等省。均有此項情事。恐他省亦在所不免。

……前已面諭學部尙書唐景崇。通飭各省。嚴行禁止。著各省督撫再行剴切曉諭。隨時彈壓。……從嚴懲辦。
(宣統政紀卷四六)

己卯。諭內閣。陳夔龍電奏。查拏著名無賴出身微賤之溫世霖。即溫子英。原名溫昱。曾充長隨多年。聲名惡劣。久爲衣冠不齒。此次在津。竟敢假請願國會爲名。結衆歛錢。已屬有害地方。又復擅捏通國學界同志會名義。妄稱會長。遍電各省。廣肆要結。同時罷課。意圖煽惑。居心實不可問。請嚴行懲儆等語。溫世霖著即發往新疆。交地方官嚴加管束。以遏亂萌而弭隱患。(宣統政紀卷四六)

宣統三年辛亥^{一九二一年}五月……乙卯……諭。本日朕覽山東巡撫孫寶琦摺一件。所陳宗支不宜豫政。……不知朝廷因時制宜之苦衷。且摺中頗有措詞失當之處。著傳旨申飭。原摺留中。(宣統政紀卷五四)

六月丙子……都察院代奏。直省諮議局議員呈稱。皇族內閣不合君主立憲公例。失臣民立憲之希望。仍請另行組織。以重憲政而固國本。得旨。黜陟百司係君上大權。載在先朝欽定憲法大綱。並註明議員不得干預。……乃該議員等一再陳請。議論漸近囂張。若不亟爲申明。日久恐滋流弊。朝廷用人審時度勢。一秉大公。爾

臣民等均當懷遵欽定憲法大綱。不得率行干請。以符君主立憲之本旨。(宣統政紀卷五五)

蓋袁世凱謀起廢。請願之事袁實與聞。俟國會召集。即推袁爲內閣總理。清廷知之。愈靳不予。世本疑清廷非真欲立憲。自此清雖指天誓日。人愈以爲欺飾。及不得已而縮短立憲期限爲五年。人亦以爲五年之期決難實踐。武昌兵起。漢州兵諫後。始

有太廟宣誓十九條信約之事。人竟漠然視之。

宣統二年^{一九一〇年}九月丙寅諭……本日資政院具奏。據順直各省諮議局及各省人民代表等陳請速開國

會一摺。又據錫良等及陳夔龍、恩壽電奏。組織內閣、欽頒憲法、開設議院等語。著將原摺電交會議政務處王大臣公同閱看。豫備召見。（宣統政紀卷四二）

十月癸酉諭內閣。前據各省督撫等先後電奏。以欽頒憲法、組織內閣、開設議院爲請。又據資政院奏稱。據順直各省諮議局及各省人民代表等陳請速開國會等語……著縮改於宣統五年。實行開設議院。先將官制釐訂。提前頒布試辦。預卽組織內閣。迅速遵照欽定憲法大綱。編定憲法條款。並將議院法。上下議院議員選舉法。及有關於憲法範圍以內。必須提前趕辦事項。均著同時並舉。於召集議院之前。一律完備。奏請欽定頒行。不得少有延誤。（宣統政紀卷四三）

又諭。現經降旨。以宣統五年爲開設議院之期。所有各省代表人等。著民政部及各省督撫。剴切曉諭。令其卽日散歸。各安職業。靜候朝廷詳定一切。次第施行。（宣統政紀卷四三）

十二月丁亥。憲政編查館奏。遵擬修正逐年籌備事宜。繕單呈覽……原單列在第六年以後者。茲均擬酌改年限。一律提前。以期無誤。（宣統政紀卷四七）

三年^{一九一一年}九月癸酉諭……茲特布告天下。誓與我國軍民維新更始。實行政。凡法制之損益。利病之興革。皆博採輿論。定其從違。以前舊制舊法。有不合於憲法者。悉皆除罷。（宣統政紀卷六二）

丙子。諭……第二十鎮統制張紹曾等電奏。奉初九日上諭。仰見朝廷實行立憲。以與天下更始。三軍感泣。惟內閣一日不成立。即內亂一日不平息。並憲法由議院制定等語。係爲維皇室靖亂源起見。覽奏具見愛國之誠。實深嘉許。內閣總協理大臣及各國務大臣。昨已具奏辭職。均經降旨允准。並另簡袁世凱爲內閣總理大臣。組織完全內閣。所有大清帝國憲法。均著交資政院起草。奏請裁奪施行。用示朝廷好惡同民。大公無私之至意。（宣統政紀卷六三）

丁丑。又諭。資政院奏。採用君主立憲主義。並先擬具重大信條十九條。繕單呈覽。懇請宣誓太廟。布告臣民。以固邦本而維皇室一摺。……著即照准。一面擇期宣誓太廟。將重要信條立即頒布。刊刻謄黃。宣示天下。將來該院草擬憲法。即以此爲標準。（宣統政紀卷六三）

十月庚子。告祭太廟宣誓憲法信條。監國攝政王代詣行禮。誓詞曰……茲由資政院諸臣。博採列邦君主最良之憲法。上體親貴不與政事之成規。先撰重大信條十九條。其餘未盡事宜。一併歸入憲法。迅速編纂。並速開國會。以符立憲政體。……所有重大信條。開列於後。謹誓。第一條。大清帝國皇統萬世不易。第二條。皇帝神聖不可侵犯。第三條。皇帝之權。以憲法所規定者爲限。第四條。皇位繼承順序。於憲法規定之。第五條。憲法由資政院起草議決。由皇帝頒布之。第六條。憲法改正提案權。屬於國會。第七條。上院議員。由國民於有法定特別資格者公選之。第八條。總理大臣。由國會公舉。皇帝任命。其他國務大臣。由總理大臣推舉。皇帝任命。皇族不得爲總理大臣及其他國務大臣。並各省行政長官。第九條。總理大臣受國會彈劾時。非國會解散即內閣

辭職。但一次內閣不得爲兩次國會之解散。第十條。陸海軍直接皇帝統率。但對內使用時。應依國會議決之特別條件。此外不得調遣。第十一條。不得以命令代法律。除緊急命令應特定條件外。以執行法律及法律所委任者爲限。第十二條。國際條約。非經國會議決不得締結。但媾和宣戰。不在國會開會期中者。由國會追認。第十三條。官制官規。以法律定之。第十四條。本年度預算未經國會議決者。不得照前年度預算開支。又預算案內。不得有既定之歲出。預算案外。不得爲非常財政之處分。第十五條。皇室經費之制定及增減。由國會議決。第十六條。皇室大典。不得與憲法相抵觸。第十七條。國務裁判機關。由兩院組織之。第十八條。國會議決事項。由皇帝頒布之。第十九條。以上第八、第九、第十二、第十三、第十四、第十五、第十八各條。國會未開以前。資政院適用之。（宣統政紀卷六五）

（2）庚子以後之外交

是時外交情勢。日俄角逐於東三省。英法爭長於雲南。情勢危急。國人懼亡。亟謀收回權利。清廷雖顧忌民意。不敢明目張胆以賣國。然十年之間。始則仇俄以親日。繼則仇日以親美。決策無定。聽人播弄。人民知其無能爲。失望乃愈甚矣。

（甲）爭路礦

海通以後。侵略者奪我利權。有索自戰勝者。有索自居間調停者。有索自借款者。及

各國規定勢力範圍。更予取予求。以索路礦。庚子之役。創深痛鉅。人始呼號收回利權。學生倡之。國人和之。民意高張。勢不可侮。外人知難而退。多半廢約。收回京漢鐵路與自辦京張鐵路兩事。尤足令人張目。

「京漢路」

京漢路由比國借款修築。而有外國股款羈雜其間。中國先已向美國贖回粵漢鐵路。至是。國人復倡議收回京漢路權。由郵傳部自辦贖路公債。並向匯豐、匯理兩銀行借款五百萬鎊。始將全路贖回。鼓勵人心。爲益不小。

郵傳部奏。爲註銷京漢鐵路借款行車各合同並接收該路情形。……竊京漢鐵路前議及時收回。當將籌辦情形歷次分別奏陳。並函照比公司聲明。俟全款還清。迭次所訂借款行車各合同。悉行作廢。各在案。嗣比公司商定一切應還款項。統在法京交付。准本年十二月初六日。即西歷一千九百零八年十二月二十八號。全數付清。當由出使比國大臣李盛鐸專辦此項交款事宜。隨時將所籌各款。督飭交通銀行分起陸續籌匯等情。茲據李盛鐸電稱。所有應交本息經手費各項。共法金二萬二千七百四十萬零一千零四十一佛郎三十三生丁。業已如數交清。又照合同應交回比公司蘆保三年官息二成。共銀圓二十四萬零一百二十九圓九角。亦已由臣部付訖。當於十二月初十日。即西歷一千九百零九年正月一號。派令鐵路局長梁士詒、京漢鐵

路監督鄭清濂。將比公司經手各項文卷、賬目、款項、材料一併點收。將抵押卷據悉數收回。迭次合同全行作廢。卽於是日爲臣部收回京漢全路管理權之始。惟比公司於京漢一路。久據利權。一日拱手授人。中情似難允願。故於收款交路各事。要求挾制。迭發難端。經臣部加派委員葉恭綽、袁長坤、李大受、盧學孟等。隨時隨事。峻拒婉商。始克就範。迨本年十月間。比公司尙藉口比政府從前墊交該路賠款之擔保。另歸外務部與比國駐京使臣公斷。各事均未了結。聲言西明年正月一號。不能交回該路管理權。復經臣等援據合同辯駁。至於再三。直至十二月初九日。比國駐京使臣始照會外務部。定於初十日先將管理權交出。註銷各項合同。其餘爭執諸節。隨時再行議結。竊思此路借債逾四千萬兩。比人干涉已越十年。……得以完全收贖。此後工程行車各項應行布置之事方多。容臣等隨時妥籌。悉心辦理。總期路務日臻完善。藉副朝廷慎重交通之至意。

……光緒三十四年十二月十五日。奉旨。知道了。（王彥威清季外交史料卷二一八）

「蘇杭甬鐵路」

英人強修蘇杭甬鐵路。浙紳及浙路總理湯壽潛。一再力爭。以外務侍郎汪大燮與銀公司商借一百五十萬鎊爲賣鄉。至欲掘其祖墓。後雖由外部與英人訂造路借款章程。浙人終不承認。路竟未修。壽潛力攻盛宣懷不已。奉嚴旨革職。不准干預路事。宣懷起任郵傳部尙書。以幹路國有遭全國反對。實由浙路之爭。人人不滿宣懷

始。

蘇杭甬路草議並未具奏。是爲私法人之關繫。不足爲據。此不能承認者一。凡辦何省地方之事……如由地方紳民公同允許。方可議辦。此一定之公理。草議立時。全浙……人無一預聞。此不能承認者二。且原議第三款載明。當從速測勘。……事隔四年零八個月。並未議立正約興辦。是與原議從速之說。該商顯自違背。既經違背原議。……原議人亦已不承認此議。何況浙人。此不能承認者三。且銀公司代表人璧利南。親受盛侍郎二十九年四月二十八日之函。函內載明。自函訂之日起。如六個月內。再不勘辦。蘇杭甬一路。均作罷論。以前合同作廢。……二十九年九月二十八日。已滿六個月（有閏五月）之限期。……是已承認……均作罷論之確證。故自二十九年九月二十九日之後。此蘇杭甬線。即爲浙江人完全自辦之路線。……英商既默許作廢。此不能承認者四。英商無與浙江當道接議之權。所以重申前說者。藉口草議耳。及盛侍郎謂逾限作廢。該商便置原議人於不理。此議從何接起。此不能承認者五。既有此不能承認之五種原因。在浙人固萬無承認此草議之理。……倘英商必欲以強迫浙人爲事。仍催換約勘路時。難保無愚民從而生衅。固非浙人之利。恐亦非英商之利也。（蘇杭甬鐵路始末記）

光緒二十四年一八九八年英使寶納樂函請總理衙門准英商承修中國鐵路五條。一由天津至鎮江。二由河南山西兩省至長江。三由九龍至廣州。四由浦口至信陽。五由蘇州至杭州或展至寧波。經總理衙門分別行知督辦鐵路大臣盛宣懷與英商怡和洋行議辦。於是年九月間。議定蘇杭甬鐵路草合同四條。一訂立草約章

程與滬寧鐵路章程一樣。二、將來訂正約仍與嗣後商定核准之滬寧正約一樣。三、從速測勘。四、如有地方窒礙之處，即行更正。俟訂正約，即會同入奏鈔錄咨覆在案。三十一年^{一九〇五年}七月，商部具奏浙江紳士籌辦全省鐵路，並請派員總理。先行立案，奉旨允准。又是年八月，御史朱錫恩奏請將蘇杭甬草合同速與撤廢，奉上諭著責成盛宣懷趕緊磋商，務期收回自辦，並著聶緝槩會同妥速籌辦……是年九月，奉旨蘇杭甬鐵路收回自辦。業經諭令聶緝槩會同盛宣懷妥速籌備，著即移交張曾敫遵照辦理。欽此。三十二年^{一九〇六年}正月，准張曾敫電稱，銀公司擬派工程司續勘蘇杭甬路，且偕英領事來杭爭辯，拒不與議。是年二月，盛宣懷以英公司不允作廢，據實覆奏……嗣後英使迭次照會臣部，或謂浙撫縱令紳商抵制，故作難題，或謂浙省紳民無理之舉動，頗有險礙……雖經臣部照覆，由浙撫接議，而彼總謂浙撫無照辦之意，不如在京議商。逮八月間，英使朱邇典接任後，復屢來臣部面詢辦法……再三商榷，始允俟九廣路約訂定，再為接議。迨九廣路約議成，催商更為迫切……惟有仍本自辦主義，與英公司開議，力爭主權。本年七月間，臣部右侍郎汪大燮與銀公司商議，稍有端倪……復由署侍郎臣敦彥與該公司接議，擬分辦路借款為兩事，路由中國自造，除華商原有股本儘數備用，不使稍有虧損外，約仍需款英金一百五十萬鎊，即向英公司籌借。另指的款為抵押，使公司不能藉口干預路務……光緒三十三年^{一九〇七年}九月十四日，奉上諭……蘇杭甬一路……現經……汪大燮等與英議明，將借款暨造路分為兩事，權自我操……著外部即派員按此妥為議定詳細章程……兼商令英公司仍許江浙紳商分購股票，用示體恤，其原有辦路人員，由郵傳部查明，分別奏派差務，以資

熟手。（蘇杭甬鐵路始末記）

今十四日……之諭旨。與兩公司所奉之諭旨相左。且與外部之原奏亦不符。……汪大燮等……背一二年新奉之諭旨。以徇英使之要求。破商辦之成局。上欺朝廷。中欺部案。下欺商民。……而外交不可問。商辦不可爲矣。……如此已辦已成之路。……今外務部迫令借款。……合蘇浙現有之款。視外務部之飭借之一百五十萬鎊。過無不及。……夫借款之害。……昔盛大臣有言。今日路屬何國。卽他日地屬何國。明知故犯。引虎進狼。……不謂復有汪大燮等踵其後也。……外務部謂商令英公司。許江浙商民入股。倒客爲主。止許令附股四字。足使熱誠愛國之商民解體矣。外務部又謂。原有辦路人員。查明分別奏派。……豈前此商部所奏奉諭旨特派者。爲不足據。直俟外款輸入。始汲汲焉爲此鄭重分明之舉。是以借款爲未足。並用人之權。亦陰授以執持之柄也。……蘇浙多不逞之徒。……汪大燮等若猶慮此曹之無所藉口。而必別予以可搖之柄。竊爲大局危之。（王彥威清季外交史料卷二〇六）

所訂合同二十四條。名爲中國國家滬杭甬鐵路五釐利息借款。數目係英金一百五十萬鎊。按九三折扣交納。常年五釐利息。以三十年爲期。若所收此路進項不足。則由關內外鐵路餘利項下撥付。……此鐵路建造工程。以及管理一切之權。全歸中國國家。該公司代購外洋材料機器。以三萬五千鎊爲酬勞。一切用銀均包在內。選用英總工程司一人。該總工程司須聽命於總辦各等語。名爲鐵路借款。而凡屬鐵路內之事。實與該公司均毫無干涉。尙無流弊之可虞。……路線起點亦改定係由上海或附近上海。俾與滬寧鐵路一氣銜接。

凡係兩省人民所注意之處。罔不審慎推求。期於就範。謹繕具合同清單。恭呈御覽。俟奉旨允准。再行發押蓋印。……光緒三十四年一九〇八年二月初四日。奉硃批。依議。（王彥威清季外交史料卷二一一）

「福公司」

英商福公司非法攫得山西孟縣、平定、澤州、潞安、平陽等處鑛權。並由河南建築鐵路。直達浦口。經國人力爭。久之。竟由山西出資二百七十五萬兩。贖回已失權利。

為照會事。本年光緒三十三年十二月十八日。據山西商務局總辦湖南試用道劉篤敬等呈稱。晉省鑛務由晉商與

福公司商人羅沙第訂立合同。旋於光緒二十四年一八九八年復由商務局紳商與福公司改訂借款章程二十

條。嗣於三十一年一九〇五年。經盛大臣續立合同四條。至今膠轕多年。案懸不結。現經丁臬司會同商務局員紳

並全省代表各員。在京開議多次。彼此退讓。訂定贖回自辦合同十二條。繕具正合同兩分。請批准施行。並援

案蓋用關防等因前來。查山西鑛務。既經該省商務局員紳與福公司訂定贖回自辦合同。所有光緒二十四

年議定。山西開鑛製鐵以及轉運各色鑛產章程二十條。暨三十一年續定山西鑄化廠並合辦山西鐵鑛合

同四條。自應一律注銷作廢。除由本部將此項贖回自辦合同批准。蓋用本部印信以資信守外。相應鈔錄原

漢文合同。照送貴大臣查照存案。並見覆可也。須至照會者。十二月十八日山西商務局與福公司議定贖回開鑛製

鐵轉運合同。……一。現在山西商務局與福公司商議。商務局願晉省備款。將所有與福公司所定開鑛製鐵

轉運正續各章程合同。議定贖回作廢。既經會議之後。福公司因體諒晉省甚願自辦本省鑛務之至意。按其

詳細情形。應允……晉省贖回自辦。以敦友誼而維和平。一。贖款計行平化寶銀二百七十五萬兩。由山西商務局擔任。按期交清。一。此項贖款數目係晉省所擔任。交與福公司收納。認爲賠償福公司原訂合同內應索之款。並各項所損失之利益。至福公司在外省另有經營。與晉省毫無干涉。一。此項贖款准於光緒三十四年一八。正月二十日先交一半。計行平化寶銀一百三十七萬五千兩。其餘之款分三期攤還。光緒三十五年一八。四月初一日爲第一批。計行平化寶銀四十五萬八千三百三十三兩。三十六年一八。四月初一日爲第二批。計行平化寶銀四十五萬八千三百三十三兩。三十七年一八。四月初一日爲第三批。計行平化寶銀四十五萬八千三百三十四兩。一。贖款按行平化寶銀核算不折不扣。其由晉至京匯費等項。並先行借墊款項利息。均歸晉省承認。一。此案原由商務局稟奉山西巡撫批准。復經前總理衙門奏准。現既由晉省備款贖回。此項合同作廢。應請外務部咨照山西巡撫。督飭商務局按期交款。不准稍有拖欠。一。晉省礦務既係收回自辦。福公司將所有開鑛製鐵轉運正續各章程合同之權。一概退回。晉省決無借洋款之意。惟此次福公司既將所有利益退回。將來晉省鑛務製鐵轉運等事。萬一有籌借外款之事。由晉省通告福公司。果其處處較廉。再行籌議。否則另借。各無異言。一。從此合同簽字日起。三月之內。福公司應將平定州所有廠房一切交出。與所有機器等物。一併交與山西商務局。其開列於原定合同所定之五處福公司。將其已購之產。一概退還。不得再執爲業。一。福公司所聘用之人。無論工程師或他項員役。因此而失其事業。以致不得營生。向福公司要求賠款者。福公司自行擔任。一。此項贖款。由商務局先行籌借。由晉省畝捐的款項下。每年儘數撥用。：

：在未將此項贖款還清以前，不得將此畝捐稍爲更改，或減免其數。如畝捐不敷此用，則晉省之大吏，須隨時提用他款，以補不足。一、原合同議定之章程二十條，既爲前總理衙門批准，今了結此事之合同，亦爲外務部所批准，並爲大英國使臣應允，以俾彼此保其本國之人遵守一切。一、現將此合同以華英文繕具兩份，各執一份爲憑。山西商務局押，福公司梁押。大清光緒三十三年一九〇七年十二月十七日。（王彥威清季外交史料卷二〇九）

「隆興公司」

英法合資設立隆興公司。非法攫得雲南、澂江、臨安、開化、楚雄、元江、永北七府鑛山、滇學生力爭。舉國響應。終由雲南出資一百五十萬兩，取銷原訂合同。

外務部、度支部、農工商部奏，爲議結滇省隆興公司鑛案，取銷原訂合同……光緒二十八年一九〇二年五月初十日，臣部具奏遵議滇省鑛務章程一摺，奉硃批依議……由臣部派員與法員彌樂石，將議定雲南府等七處鑛務章程二十四款，於是年五月十六日，在臣部畫押，並照會法英兩國使臣在案。該章程內載法英兩國設立隆興公司，糾集資本，開採雲南、澂江、臨安、開化、楚雄、元江、永北七處鑛產。雲南大吏允奏，請國家給該公司承辦，以六十年爲期限。開鑛之股本不過關平銀五十萬兩。公司事業虧累，自行擔任，與中國國家、雲南大吏毫不干涉。倘照辦時或有爭執，應由雲南大吏、法國公使、英國公使各派一員，會議剖斷各等語。嗣該公司履勘鑛產，時啓爭端，滇省紳民數次集會，建議呈請廢約。經雲貴總督李經羲與該公司商議，承辦大宗借款。

興修滇路。即將前項鑛約作廢。意在籌邊弭患。兩益交資。……該公司代表高林士忽置借款修路於不議。專就贖約一層。要求酬款四百萬兩。滇省僅允給一百萬兩。遂致所議中輟。高林士旋即來京。經法英兩國使臣出而爭論。堅請速定鑛案辦法。即行議結。臣等公同商酌。……若仍將路款並提。彼必不肯續議。不如就鑛約一節。先與解決。……經臣部電商雲貴總督。亦以路鑛分辦爲然。當由新任雲南布政使高而謙。秉承臣部度支部籌擬應付方法。與該使臣等晤商多次。竭力磋磨。議定由中國以庫平銀一百五十萬兩。給與隆興公司。取銷原訂合同。其款分作六期歸付。每期付銀二十五萬兩。第一期一月內歸款。餘五期。每六個月交一次。所有該公司暨分公司一切產業物件。均交還中國。永與該公司無涉。款項由度支部墊給。滇省分十年陸續歸還。業經臣部照會法英兩國使臣。聲明作據。該使臣等。均先後照覆。允認備案。……宣統三年一九一一年七月十四日。奉硃批。依議。欽此。（王彥威清宣統朝外交史料卷二二）

（乙）爭界

〔西藏界〕

西藏與哲孟雄接壤。自英人攬哲爲保護國。藏哲界務。時啓糾紛。光緒二十九年。復有爭持。英兵入藏。達賴避至庫倫。翌年由班禪與英人結拉薩條約。不只正界。舉西藏一切權利。悉歸英人。中國屢向英抗議。至光緒三十一年。乃派唐紹儀爲議約全

權大臣赴印度開議。卒因上國主國之爭。不得要領而歸。翌年外部與英使薩道義續訂藏印條約。以拉薩條約作爲附款。而特立明文承認西藏爲中國領土。不准他外國干涉。然英人窺伺西藏之心。猶未已也。

英國自吞併印度後。時思窺藏。先收哲孟雄爲保護國。藏人漸覺英之逼己。並憾哲部私結英人。於是遣兵入哲。並於印哲境上建砲臺。斷英人貿易路。印度政府憤。出師敗藏軍。而置統監於哲。自是哲雖名爲英之保護國。而實無異英之領土。光緒十六年。中英藏印條約成。更明認哲部爲英屬地。十九年。締結藏印續約。開亞東爲通商市。規定交涉游牧辦法。由是游牧事藏人大受限制。通商事英人獨得其利。藏人堅執不允遵約。清廷亦置不問。藏人仇英久。隙愈深。二十九年。藏印復以爭界故。英政府命邊務專員榮赫鵬率兵入藏。藏兵屢敗。本年六月。英軍直逼拉薩。達賴喇嘛走庫倫。於是班禪喇嘛出任和局。與英締結拉薩條約。允開江孜、噶大克、亞東爲商市。承認除將來規定稅則外。概不徵收租稅。並允將所有自印度邊界至江孜、拉薩之砲臺山寨等一律削平。又西藏土地之讓賣租典。鐵路電線礦產。或別項利權。貨物金銀錢幣等抵押撥兌。非得英政府許可。不能舉辦。此約結果。實將西藏土地完全劃歸英國勢力範圍之內。外務部向英國抗議。英政府不顧。幾經交涉。始允派員會議。（梁燕孫先生年譜上）

中英續訂藏印條約正約……第一款。光緒三十年七月二十八日。英藏所立之約暨其英文漢文約本。附入現立之約。作爲附約。彼此允認。切實遵守。並將更訂批准之文據亦附入此約。如遇有應行設法之時。彼此隨

時設法。將該約內各節切實辦理。第二款。英國國家允不佔併藏境。及干涉西藏一切政治。中國國家亦應允不准他外國干涉藏境。及其一切內治。第三款。光緒三十年七月二十八日。英藏所立之約第九款內之第四節。所聲明各項權利。除中國獨能享受外。不許他國國家及他國人民享受。惟經與中國商定。在該約第二款指明之各商埠。英國應得設電線。通報印度境內之利益。第四款。所有光緒十六十九年中國與英國所定兩次藏印條約。其所載各款。如與本約及附約無違背者。概應切實施行。……（清季外交史料卷一九六）

「片馬」

滇緬界務。久未劃定。宣統二年十二月十六日。英人突以兵侵據片馬。舉世大譁。開會力爭。乃由滇督李經羲電達外部。向英國嚴辭抗議。英始退兵。而地終不反。

宣統二年。^{一九一〇年}英人以兵力據片馬。設藏台於高黎貢山。侵略小江以北茶山土司地。滇人大憤。各省人亦起應之。遂電政府請力爭。滇督李經羲亦請外務部與英使交涉。英卒不退兵。三年。^{一九一一年}復派員與英劃境。

（清史稿邦交志二）

宣統二年。^{一九一〇年}十二月二十六日。英人犯片馬。奉委辦片馬防務。並會同迤西道籌辦交涉事宜。步兵第七十六標西防巡防各營。均准電呈調遣。片馬者舊茶山長官司地。今保山縣屬等境土司轄境。距永昌府城六日程。騰越廳城五日程。居高黎貢山西麓。從行者辛丞貴、潘萬成、劉禮權、王秉鈞、聶紳文、何文麟、楊錫綬、蔡朝禮、任宗熙、景紹武等。二十八日出省。除夕日宿祿豐。……三年。^{一九一一年}元旦。……行經楚雄下關、漾濞。抵永昌。

走蓮達渡潞江。經蠻因、練地、六庫、抵等項。上至魯掌、卯照、秤憂各地。知英兵大營駐他憂、小江、片馬諸地。均駐重兵。英人先後自密只那侵入我茶山地者。數逾萬人。然皆古爾廓兵。帶兵官雖爲英人。戰鬥力至薄弱。乃踰高黎貢山。由灰坡過天近山、騰雲寺、馬面關、界頭渡、龍川江。至明光住茶山河。尤悉英兵情況。乃改裝獐獐。入大小了口。經碑地、派賴、茨竹。涉滾馬河至他憂。英人大營駐此。望扒拉大山。再西爲整冬溫冬。我里麻長官司舊地。又名江心坡。蒲羅浪獐人所居。維土人小販中。露宿英營外者二日。自獨末溜渡小江。……經干坤、癡憂、宿官寨。次日過魚洞。至上下片馬。北至古浪、岡房、板廠山一帶。視察畢。歸途沿楚余河南。出火草地。……次日過分水嶺、大竹壩。至大塘。復回茶山河。英人知余行動。下令緝捕。已無及矣。電總督李公。詳報敵情。並陳辦法。上策進兵驅逐。中策推翻五色線圖。索還侵地。提請世界各國公斷。下策由外部要求先退兵。後勘界。我總持定外部原定恩梅開江藍色界線爲據。不能退讓一步。李公卒用余下策。惟李電軍機處外務部及各省督撫文。皆本余所呈報。使國人知片馬爲中土。羣起力爭。……入騰越。會同迤西道與英領見面。英領謂未定界務。由北京解決。彼之進兵。爲巡視邊界。無他意。余曰。恩梅開邁立開兩江流域。爲未定界。本我里麻、孟養兩司舊疆。從未屬緬甸。非緬甸之地。英人不能過問。小江流域。乃我等項、明光、大塘、茨竹諸土司。累世管地。英兵更不能侵入。勒收我人民門戶錢。英領答曰。此爲界務問題。有條約及歷年兩國往來公文可據。英國極願速行勘劃云云。未一月。英兵退去。乃測勘騰屬七土司及各關隘要地。（李根源雪生年錄卷一）

「間島」

圖們江北岸。綰轂俄、韓要地。光緒二十八年。卽其地設延吉廳。舊有越墾韓民五萬餘戶。日、韓合併後。日覬覦其地。妄造間島之名。執爲韓地。希圖佔據。清派陳昭常爲邊務大臣。吳祿貞爲會辦邊務大臣。據理力爭。祿貞始終其事。據光緒十三年韓王咨文爲證。確鑿不移。日人俯首無辭。始得保全。祿貞欲盡力經營。俾成重鎮。而清廷不省。祿貞亦卸去。

圖們江北爲國朝根本重地。悉行封禁。流民入境。禁例甚嚴。……迨光緒初元。刪除舊禁。設局招墾。山東直隸移民之來此者。皆遠在數千里外。……而韓民則僅隔一江之水。攜家挈眷。朝發夕至。其故一。朝鮮沿江六鎮。地瘠民稠。生計維艱。……圖們江北。則荒原沃甸。綿亙千里。平隴高原。悉宜農業。較彼故國。判若霄壤。其故二。甲午以前。……韓民之越墾者。在朝廷存一視同仁之心。在疆吏行招撫懷遠之策。不施禁阻。反事招徠。其故三。朝鮮橫征苛斂。民不聊生。而越墾之地。定例不交荒價。不納雜項租稅。每畝地納吉錢六百六十文。此外各種租稅。一律豁免。今尙仍此舊制。以示優待。……之意。寬大之政。爲環球各國所無。遂皆適我樂郊。去其故土。其故四。有此四故。……不三十年。而韓民之生聚繁衍於此者。竟至五萬餘戶。（徐世昌東三省政略卷一韓民越墾之始末）

至光緒二十八年。一九〇二年。始以延吉爲管轄俄韓重地。廢國朝軍政舊規。建延吉廳。以民官統治之。……中韓界務。圖門國界雖已訂明。而紅土、石乙二水。數十里間。斷斷未定。自日俄戰後。朝鮮夷爲保護國。日人遂欲襲

其爭界故智。詭造間島謬說。以謀侵佔我領土。（徐世昌東三省政略卷一邊務延吉篇）

頃接吉林巡撫朱電稱。頃晤島川。探詢延吉廳事。據云。已由伊藤侯派齋藤中佐。約帶兵二十。光緒三十三年七月十二日到彼處保護韓民。渠初擬與東省督撫商允。再行派員。伊藤不聽。渠現亦不管。……特此電聞等語。……應請鈞部詰問阿代使。囑令將兵速行撤回。並告其已由我派員帶隊前往查看。如有應行保護之處。必當相機妥辦也。（王彥威清季外交史料卷二〇四東督徐世昌致外部電）

徐世昌奉命督東。諗知情勢。乃派吳祿貞馳往調查。到延之次日。日人適派員率兵入境。倉猝相遇。在日人固不料我之有備也。而我幸得竭力籌謀。以爲應付抵制之策。於是日謀稍阻。乃可從容談判。以折其方張之勢。夫圖們江北。確係我領土。爲環球所公認。即謂江源國界。間有不明。亦應由兩國政府派員會勘。若韓民越墾。夙歸我國治理。則我自當力任保護之責。乃日人不顧公法。擅率憲兵越境。以保護韓民爲詞。竊欲據延吉爲己有。……日人越境後。爲捍衛邊陲計。奏派邊務督。幫辦至延。專任一切交涉經營之責。凡可固吾圉伐敵謀者。無不力籌抵制。兩年以來。日人內制於我國之防維。外迫於世界之公論。始有解決界務之提議。今雖抗論未終。彼終不能以游移無據之詞。奪我圖們有定之界。領土所歸。即主權所屬。則其進取野心。未始不因之稍戢。（徐世昌東三省政略卷一邊務延吉篇）

日人自起界務交涉。所致外部照會十餘次。……屢經外部駁復。日人終藉詞強辯。光緒三十四年十月。日外部小村。曾向唐（紹儀）大使有解決界務之說。十二月。日使忽又照會外部。……以光緒二十八年許大臣

公文及二十九年陳作彥等與韓邊吏會訂善後章程爲據。外部以顧問官吳祿貞、周維楨於界務情形較悉，因令議覆日使來照……引證確鑿。日人無可置辯，遂不得不承認延吉爲我國完全領土。（徐世昌東三省政略卷一邊務吉韓界務）

（丙）抵制外貨

「抵制美貨」

美政府虐待華工之事。自光緒十年後，日漸加酷。如天李架埠、洛市、丙冷埠、舍路埠、倒路、粉坑、喊罷埠、尾矢、近地各慘案。殺戮華僑，焚毀財產。時有之。幾經交涉，始有華工之約。光緒三十一年，復有華工入口之禁。甚且虐及華僑。國人大憤，倡議抵制美貨。美人在無錫所設麵粉廠、紗廠，一律倒閉。美商多半回國。抵制之名，蓋始於此。

光緒三十一年

八月壬寅……諭。御史王步瀛奏。各省工商抵制美約。風潮過激。請飭加意防範。以維大局。一摺。前據

外務部王大臣面奏。美國工約一事。迭經出使大臣梁誠及外務部先後與美政府商議。美政府已允優待華商及教習學生游歷人等。並允於議院開時。盡力公平妥辦。各在案。昨據該御史奏稱。公憤既興。人衆言厲。難保無宵小生心。乘機竊發。恐誤大局等語。亟應明白宣示。以免誤會。而釋羣疑。中美兩國睦誼素敦。從無彼此牴牾之事。所有從前工約。業經美國政府允爲和平商議。自應靜候外務部切實商改。持平辦理。不應以禁用

美貨輒思抵制。既屬有礙邦交。且於華民商務亦大有損失。迭經外務部電行該省督撫。曉諭商民。剴切開導。務令照常貿易。共保安全。……倘有無知之徒。從中煽惑。滋生事端。即行從嚴查究。（光緒東華錄卷一九五）

美見國人憤不可遏。乃變計減收庚子賠款半數。以設清華留美預備學堂。每年派遣留美學生一百人。並擴充教會學堂。創設各地青年會。陽示友好以結歡心。然後倡中美聯盟。

光緒三十四年

一九〇八年

六月丙子。諭。外務部奏。美國減收賠款。請遣使致謝一摺。美國與中國立約以來。邦交素篤。此次減收賠款。尤徵友誼敦睦。允宜遣使致謝。用酬嘉意。奉天巡撫唐紹儀。著賞加尙書銜。派充專使大臣。前往美國致謝。（光緒東華錄卷二一七）

宣統元年

一九〇九年

五月。定留學生赴美名額。因美退還庚子賠款。爲中國學生赴美游學費。議自退還之年起。初四年每年遣一百名。以後每年至少須遣五十名。遂訂辦法大綱。（清史稿邦交志四）

「抵制日貨」

光緒三十四年正月。日本船二辰丸私運軍火至九洲洋中國海面卸貨。爲廣督張人駿按約扣留船貨。日領強硬交涉。人駿不理。而外務部反徇日使之請。由中國購買軍火。賠償輪船損失。並道歉了結。粵人大憤。商業自治會號召抵制日貨。全國響應。

應波及海外。初庚子以後。中國維新。取法日本。中日國交甚固。日俄戰後。日本在東三省事事橫強。抵制日貨。蓋由此而來也。以前留日學生多至萬人。自是留美學生驟增至二三千人。

頃據水師巡弁李炎山等由澳門電稟。日商船第二辰丸裝有鎗二千餘枝。碼四萬。光緒三十四年正月初四日已刻到九洲洋中國海面卸貨。經會商拱北關員見證上船查驗。並無中國軍火護照。該船主無可置辯。已將船械暫扣。請示辦理前來。查洋商私載軍火及一切違禁貨物。業經拿獲。按約應將船貨入官。係照通商條約第三款。並統共章程辦理。歷經總署咨行有案。自應按照遵辦。迭飭將船貨一併帶回黃埔。以憑照章充公按辦。謹先電聞。並請照知日使。（清季外交史料卷二一〇張人駿致外部電）

光緒三十四年二月十一日。准貴大臣面交節略。本部已經閱悉。二辰丸一案。貴國政府願和平辦結。與本部意見相同。並允此案辦結後。嗣後中國嚴禁私運軍火辦法。貴國政府亦當設法相助等因。足徵貴國政府顧念邦交。實深感綬。……中國政府允將二辰丸即行釋放。……粵省此次扣留。原為防止軍火運入內地起見。日本政府既知此事為中國官憲所掛念。允將該項軍火不再運往澳門。欲以日金二萬一千四百元。由中國自行收買。自當電知粵督。先將軍火起卸。按照此價購買。……第二辰丸損失之處。亦可允給實數。不得逾多。惟貴國政府既未查明。應由粵督酌核情形。與駐粵日本領事另行商定。……（清季外交史料卷二一二外部致日使節略）

頃據粵中紳商士民萬有餘人來轅，懇求電陳鈞部。設法將二辰丸一案伸明公理，措詞甚爲激烈，有罷市暴動之說。於賠償損失一層，尤爲鼓譟。（王芸生六十年來中國與日本第五卷張人駿致外務部電）

頃據粵省官接到該省正紳公函，稱商業自治會陳基建即陳惠甫、陳漳浦、李戒欺、羅少翔等……二月十六日……糾集千餘人，內多易服剪辮者，手持大旗三面，大書挽回國權等字樣，並在督署演說，愈聚愈衆，道途爲塞。十七日，又在自治會招白，復沿街徧貼不買日貨等條，且動言罷市……（王芸生六十年來中國與日本第五卷外務部致張人駿函）

（丁）東三省之設立

日俄之戰，中國名爲中立。其實陰助日本，事後爲應付日俄交侵之局，乃設立東三省總督，巡撫。而日人肆意，先欲清廷以東省分封親藩，爲日俄緩衝，未得如願。伊藤來游，意欲與俄人分據三省，幸遭朝鮮人安重根刺殺而止。

「日俄戰後之東北」

光緒三十一年八月，日俄和約成。日本取得旅順大連租借權，並得南滿鐵路及樺太南半。十一月，中日訂結滿洲條約，承認日俄和約中之滿洲問題。翌年四月，日本遂有南滿洲鐵道株式會社之設，其條文

第一條。政府准設南滿洲鐵道株式會社而經營鐵路運輸業於滿洲地方……第九條。社長副社長經勅裁由政府任命之。其任期爲五年……第十二條。政府置南滿洲鐵道株式會社監理官。使監視會社之業務……第十三條。政府關於會社之事業。得發監督上必要之命令。關東軍司令官對於會社之業務。有關軍事者。得爲必要之指示……上項勅令公佈後……任命參謀總長兒玉源太郎爲設立委員長……兒玉逝世……以陸軍大臣寺內正毅繼任。（王芸生六十年來中國與日本第五卷）

是年六月。日本置關東都督府。所謂關東者。即金、復、海、蓋也。

其官制法規如下。第一條。關東州置關東都督府。第二條。關東都督府置關東都督。都督管轄關東州。兼掌保護監督南滿洲鐵道線路。並監督南滿洲鐵道株式會社之業務。第三條。都督爲現任職。以陸軍大將或陸軍中將充之……第六條。都督關於軍政及屬於陸軍軍人及與陸軍相關之事。承陸軍大臣之命令。關於作戰及動員之計劃。承參謀總長之命令……第十條。都督爲保持所轄區域內安寧秩序。及警衛鐵道線路必要時。得使用兵力……勅令公佈後。以陸軍大將大島義昌爲關東都督。乃實行爲殖民地之統治。（王芸生六十年來中國與日本第五卷）

光緒三十三年三月。簽訂新奉吉長鐵路協約及借款合同。是年夏。日本於安奉鐵路沿線侵佔民房。擅自動工。並搭架鴨綠江鐵橋。三十四年。復於各處勘查測量。幾經清廷交涉。乃於宣統元年議訂安奉鐵路節略。又訂立東三省五案條款。

所謂五案。一。如築新法鐵路（新民屯至法庫門）允與日先行商議。二。認大石橋至營口支路爲南滿鐵路支路。期滿交還中國。三。認日本有開採撫順、煙台煤礦之權。四。安奉鐵路及滿洲鐵路沿線礦物。由中日合辦。五。日允京奉鐵路展造至奉天城根。（梁燕孫先生年譜上）

宣統元年九月。伊藤博文至奉天。晤東三省總督錫良。閉目仰面而言。謂日本死數十萬人。費軍費億萬元。始奪回東三省。而中國不知振作。日本當自爲計。錫良電奏云。

其語氣直隱以朝鮮視中國。而急圖進取之野心。尤流露於言表。陰謀密計。禍至無時。思之可爲悚慄……伊藤云……若說到日本人民意思。則凡事只問能力若何。如彼此能力不相當。即無所謂持平辦法。（清宣統朝外交史料卷一〇）

「東三省之措施」

東三省初設。位次在各省之前。袁世凱欲爲三省總督。西后不允。以與徐世昌。謂可共世凱商酌辦理。世凱大沮。世昌務爲鋪張。糜費無算。而實無根本至計。

光緒三十三年^{一九〇七年}三月己亥。諭。東三省吏治因循。民生困苦。亟應認真整頓。以除積弊而專責成。盛京將軍著改爲東三省總督。兼管三省將軍事務。隨時分駐三省行臺。奉天、吉林、黑龍江。各設巡撫一缺。以資治理。

徐世昌著補授東三省總督。兼管三省將軍事務。並授爲欽差大臣。奉天巡撫著唐紹儀補授。朱家寶著署理吉林巡撫。段芝貴著賞給布政使銜。署理黑龍江巡撫。……其應如何分設職司之處。即著該督等妥議具奏。
(光緒東華錄卷二〇五)

欽奉三月初八日諭旨。東三省應如何分設職司之處。著該督等妥議具奏。……臣等遵卽詳細籌商。……擬於奉天、吉林、黑龍江三省。每省各設行省公署。以總督爲長官。巡撫爲次官。皆如各部堂官。於行省公署內。分設二廳。一曰承宣廳。稟承督撫掌一省機要總匯。考核用人各事。一曰諮議廳。掌議定法令章制各事。就現有局署酌量歸併。分設七司。一曰交涉。二曰旗務。三曰民政。四曰提學。五曰度支。六曰勸業。七曰蒙務。仿國初將軍設參贊及出使大臣參贊之例。設左右參贊各一員。分領承宣、諮議兩廳事務。交涉等七司。各設司使一員。總辦司事。承宣廳及各司。均設分科。每科設僉事及一二三等科員佐之。諮議廳不設官缺。酌派議員、副議員、顧問員、額外議員。皆選明達政治者充之。以資研究。此外陸軍關係綦重。應另設督練處。以擴軍政。司法分權。宜預擬專設提法使。以理刑法。其官制另由臣等詳議具奏。他如劃分權限。酌擬補署。建立衙署。籌支廉費。皆屬更張之要務。……謹遵議章程。繕具清單。恭呈御覽。……其道府以下官制。亦擬酌定階級。以期簡捷。容俟到任後。體察三省情形。酌籌辦法。再行具奏。……再三省旗務。本歸將軍管理。今改設督撫。現總督奉特恩兼管三省將軍事務。則三省巡撫。亦有分理旗務之責。相應籲懇天恩。俯准將奉天、吉林、黑龍江三省巡撫。皆兼副都統銜。以便措置而資坐鎮。……光緒三十三年^{一九〇七年}四月十一日具奏。本日奉旨。依議。(徐世昌東三

錫良繼徐世昌爲東三省總督。密謀辦理鄉團。以清鄉爲名。由人民出資購械。官爲訓練。備緩急之用。又以辦理實業。須有資金。請款一千萬兩。先設立銀行。而清廷無以應之。

爲滙陳東三省外患交侵。生機日蹙。懇恩飭部撥款。開設銀行。以資挽救。……查東三省從前原有官銀號。官帖局。惟資本薄弱。難資推廣。僅官銀號分設三省。略有基礎。擬趕將款目清理。先就奉省設立東三省總銀行。並於各處推廣。多設分行。以期活潑流通。惟市面周轉甚寬。即本金需用甚鉅。綜計廣通匯兌。統一幣權。兼營各項實業。至少非請款一千萬兩不敷佈置。……此係專辦銀行生利事件。嗣後無論何項行政費。皆不得挪用絲毫。以防虛蝕。……宣統元年一九〇九年四月二十一日。(錫良東三省奏稿)

又欲借美款興建錦瓊鐵路。以破日俄均衡之局。事爲日所阻。錫良乃謝病去。繼之者趙爾巽。習承平吏事。不能望其挽回危局也。

遵旨密籌東省大計。籌借外債。議築鐵路。以保危局。……宣統元年一九〇九年七月初四日。奉上諭。東省介居兩強。勢成逼處。積薪厝火。隱患日滋。該督等各密陳危急情形。所慮甚是。自宜預爲籌備。迭據臣工陳奏。莫如廣闢商埠。俾外人膺至。隱杜壟斷之謀。厚集洋債。俾外款內輸。陰作牽制之計。既使各國互均勢力。兼使內地藉

以振興。似尙不爲無見。卽著該督等。斟酌事理。體察情形。按照以上所指各節。詳審熟籌。奏明辦理等因。……竊維東三省大勢。自日俄罷戰以來。權力競爭。久成南北分據之局。……東三省命脈。已懸日俄兩國之手。……我議自修。不見阻於日。卽見阻於俄。無論何路。終無讓修之日。束手待斃。可爲痛心。臣等焦慮熟籌。非借外人之財。不足以經營東省。尤非藉外人之力。不足以抵制日俄。諭旨厚集洋債。互均勢力兩言。實足拯東省今日之危。而破日俄相持之局。現美國銀行代表司戴德來奉。臣等公同接見。以籌修錦洮至瓊瑯鐵路。商議借款約三四百萬金鎊。司戴德業已允簽字。立草合同。……將來該路勘修已定。或再議修由奉天至延吉一路。以爲交通之筋絡。商墾之機關。並爲將來用軍之惟一命脈。……宣統元年八月十九日。（錫良東三省奏稿）

（戊）中美德聯盟之說

光緒末。卽盛傳中美德三國聯盟。實無其事。然美艦來華游歷。毓朗迓之于廈門。唐紹儀、溥倫先後使美。載洵、載濤出洋考察海陸軍。同時皆至柏林。一時親德親美之聲。甚囂塵上。英日側目。清之亡於此亦有關焉。

時唐紹儀奉命赴美。致謝美政府退還庚子賠款。紹儀此行。有兩大目的。一在締結中美德三國同盟。一卽接洽借款。（王芸生六十年來中國與日本第五卷）

光緒二十八年十二月癸巳。外務部奏。美國將……在散魯伊斯城開設美國博覽會……係美國立國以來

極爲重大之事。六月間。其總理會務大臣巴禮德前來中國。敦請赴會。……內可維持商務。外可聯絡邦交。雖當庫藏奇絀之時。不得不勉爲其難。力顧大局。……得旨著派溥倫爲正監督。（光緒東華錄卷一七七）

光緒三十四年

一九〇八年

九月乙酉。軍機大臣奉旨。美國海軍將於十月初間游抵廈門。著派貝勒毓朗、外務部

右侍郎梁敦彥前往勞問。（光緒東華錄卷二二〇）

是冬。美國陸軍總長迭更生來游華北。……取道西伯利亞赴歐。……路經奉天時。並下車瞻謁宮殿。長春、哈

爾濱亦下車游覽。是事頗爲英法注意。故並在歐美各報宣傳中德美將有同盟。（丁士源梅楞章京筆記）

宣統二年

一九〇九年

六月。又命載洵、薩鎮冰前往美國及日本。考查海軍。（丁士源梅楞章京筆記）

宣統二年

一九〇九年

二月。陸軍部尙書鐵良因病開缺。蔭昌繼任。以陸軍官兵服裝無半禮裝。遂制定軍官常服。

將日本之狹肩章改爲德國式之寬肩章。卽爲半禮服。因此中德美聯盟之風說更甚。（丁士源梅楞章京筆

記）

（3）宣統間之中央集權

咸同軍興以後。督撫權力驟增。維新以後各省自專兵、財。除督撫更易。尙憑廷旨外。中央與地方幾於不相聞問。宣統改元。凡度支、外交、學務、司法、軍事、鹽課皆直屬中央。謂之中央集權。以減削地方權力。未爲非是。而中央則政治昏濁。賄賂公行。欲謀

振作。反以速亡。

(甲)軍權之集中

諭……前經憲政編查館奏定憲法大綱。內載統率陸海軍之權。操之自上等語……茲特明白宣示。即依憲法大綱內所載。朕爲大清帝國統率陸海軍大元帥……並著先行專設軍諮處。贊佐朕躬。通籌全國陸海軍各事宜。即著貝勒毓朗管理軍諮處事務……（宣統政紀卷一四）

諭……籌辦海軍處。著改爲海軍部。設立海軍大臣一員。副大臣一員……至應設之海軍司令部事宜。著暫歸海軍部兼辦……（宣統政紀卷四四）

以貝勒載洵爲海軍大臣。海軍處參贊譚學衡爲副大臣。（宣統政紀卷四四）

改陸軍部尙書爲陸軍大臣。侍郎爲副大臣。以尙書廕昌爲陸軍大臣。左侍郎壽勳爲副大臣。（宣統政紀卷四四）

宣統三年四月戊寅諭。自宣統元年五月。設立軍諮處。以爲軍諮府之基礎。時閱兩年。籌辦已有端緒。參謀軍事最關重要。著即設立軍諮府。秉承詔命。襄贊軍謀……（宣統政紀卷五二）

又諭。郡王銜貝勒載濤。貝勒毓朗均著授爲軍諮大臣。（宣統政紀卷五二）

當時督撫多不滿中央集權。張人駿一奏。足以概之。

宣統三年八月丙午……兩江總督張人駿奏……竊謂今日釐訂外官制所應申明者約有數端。一曰。督撫

權限。我國疆域廣遠。疆臣奏事不能直達。必致貽誤事機。今應申明。一切具奏事件。悉仍舊制通則。所擬軍政。仍責在督撫。然有中央集權之說者。欲將外省軍政直隸內部。將領不歸督撫任用節制。一旦有事。緩不濟急。今應申明。督撫有調遣兵隊節制進退將領之權。至外交雖統屬於外部。然通商游歷傳教皆在外省。遇有事端。若在外了結。可免國際交涉。今應申明。督撫有辦理本省外交之權。……（宣統政紀卷六〇）

（乙）財權之集中

光緒甲午以降。中央財用益窘。歲虧六百萬兩。剛毅往江蘇廣東搜括。僅得歲虧之半。庚子後賠款而外。興學練兵。需款更鉅。清理財政之說以起。二十九年三月。遂命奕劻、瞿鴻禨會同戶部整頓財政。是卽財政集中之始。

二十九年^{一九〇三年}三月庚辰。諭。從來立國之道。端在理財用人。方今時局艱難。財用匱乏。國與民俱受其病。自非通盤籌畫。因時制宜。安望財政日有起色。著派慶親王奕劻、瞿鴻禨會同戶部認真整頓。將一切應辦事宜。悉心經理。……（光緒東華錄卷一七九）

九月丁酉。命外務部尚書那桐。會同慶親王奕劻、瞿鴻禨。辦理戶部財政處事務。（光緒東華錄卷一八三）

三十年^{一九〇四年}七月。復命鐵良往江蘇等省查各省進出款項。三十一年^{一九〇五年}三月。派

柯逢時管理八省土膏捐稅事宜。搜括可謂至矣。

三月內子諭。鐵良奏。湖北湖南於宜昌設立總局抽收土膏稅捐。繼又並江西安徽兩省合辦。較各省分辦之時。溢收甚鉅。兩廣蘇閩亦係雲貴川土行銷之地。若合八省爲一。收數必更可觀等語。著財政處戶部即行切實舉辦。其統捐收數。除按各省定額撥給外。溢收之數另儲候解。專作練兵經費的款。不得挪移。……合辦統捐省分爲兩湖、兩廣、江蘇、江西、安徽、福建八省。凡雲貴川土行銷該八省者。經由總局分局。均即照收土稅。無論輪船民船載運。一律預徵膏捐。……既納統捐後。運往各處。如非落地銷售。概不重徵。……所有經徵款目及支銷等項。由總局按季冊報戶部查覈。……派柯逢時管理八省土膏統捐事宜。（光緒東華錄卷一九二）
光緒三十四年^{一九〇八年}十一月庚戌。……度支部奏。……清理財政要義有二。曰統一。曰分明。本此二義。於分年籌辦之初。而爲臣部職權所應及與現在急當整理者。有六。外債之借還。宜歸臣部經理。在京各衙門所籌款項。宜統歸臣部管理。各省官銀號。宜由臣部隨時稽核。各省關涉財政之事宜。隨時咨部。以便考核。直省官制未改以前。各省藩司宜由部直接考核。造報逾限。宜實行懲處。綜此六端。雖不足盡財政奧蘊。實爲九年中分年籌辦初基所託。明知辦理之難。不敢不竭力圖維。期以必行。……（宣統政紀卷三）

是年十二月頒佈清理財政章程。宣統元年二月命設財政監理官。各省就地籌款。自籌自用之風始止。

諭。……清理財政爲豫備立憲第一要政。各省監理官又爲清理財政第一關鍵。所有正監理官著該部自丞參以下開單請簡。俾昭慎重。其副監理官即由該部奏派。（宣統政紀卷八）

中央款無可籌。始注意及鹽。宣統改元。載澤遂以度支部尙書兼督辦鹽政大臣。而以督撫爲會辦。蓋欲以鹽稅抵借外債。

諭……著派貝子銜鎮國公載澤爲督辦鹽政大臣。凡鹽務一切事宜。統歸該督辦大臣管理。以專責成。其產鹽省分。各督撫本有兼管鹽政之責。均著授爲會辦鹽政大臣。……（宣統政紀卷二六）

鹽務既歸中央。督撫不平。藉口章程窒礙難行。以爭權限。實則各省不得擅加鹽價。以歸省用。乃起爭執。宣統二年四月。均傳旨申飭。命仍照章辦理。

諭內閣。督辦鹽政大臣載澤奏。遵旨會商一摺。朝廷慎重鹽政。特派大臣督辦。原令直接管理。以一事權而資整頓。惟因疏銷緝私。關涉地方。故命各督撫會同辦理。前據錫良等電奏。鹽政章程諸多窒礙。當經諭令該大臣會商各督撫詳議具奏。茲據覆陳會商各節。朕詳加披覽。該督等擬將用人行政悉歸會辦之督撫。是與從前督撫兼管鹽政無異。朝廷何貴有此特舉耶。且於前兩次諭旨。毫未仰體。至該督辦大臣受國重寄。應如何力任其難。認真籌辦。乃此次僅據該督等覆電具奏。意存諉卸。殊負委任。均著傳旨申飭。所有鹽務用人行政一切事宜。仍著照奏定章程辦理。……鹽務關係重要。自此次嚴切申諭後。務各懷遵前兩次諭旨。和衷共濟。相與有成。若各懷挾成見。因循積習。斷斷權限。貽誤要政。惟該大臣與各督撫等是問。（宣統政紀卷三四）

鹽務歸中央二年有餘。稅收未見起色。而各省爭執不已。乃改設鹽政院。盡罷督撫。

會辦之名。以一事權。其爭甚苦。足以見其時財政之窘。

……今日鹽務難於整理者。其故有二。一在各省自爲風氣。不能祛官與商弊蠹。一由各省自保藩籬。不能謀國與民公益。是以銷數則彼此懸殊。引地則動成爭執。自非改定鹽政官制。設立專員不可。……竊思國家歲徵鹽稅。同治以前。不過一千一二百萬兩。光緒季年。增至二千八百萬兩。及試辦宣統三年豫算。各省鹽務收入。乃增至四千餘萬兩。與地丁錢糧相埒。夫丁糧則有二十餘藩司督徵於上。千數百州縣經徵於下。而鹽務官乃散漫至此。自非酌定官制。特設京外鹽務專官。統一事權。明定責任。不爲功。臣等共同酌議。擬請將督辦鹽政處改爲鹽政院。設鹽政大臣一員。管理全國鹽政。統轄鹽務各官。設鹽政丞以襄理。鹽政廳長以承宣政令。參議參事以佐擬法制。僉事錄事以執行事務。其在外省則於產鹽區域設正監督。於行鹽區域設副監督。各置屬官分司權政。……凡關於鹽務用人行政。均屬鹽政大臣專責。各省督撫毋庸再兼會辦鹽政大臣。及會辦鹽政大臣銜。惟鹽務與地方關繫事件。仍由各省督撫飭屬辦理。……得旨。前因各省鹽務疲敝。特派大臣督辦。以資整頓。惟事體重大。頭緒紛繁。非設立專官。無以收挈領提綱之効。著即將鹽政院官制頒布。以鹽政處改爲鹽政院。全國鹽務均歸管理。以一事權而重責成。（宣統政紀卷六一）

命度支大臣載澤。兼任鹽政院鹽政大臣。（宣統政紀卷六一）

（十六）辛亥革命

(1) 孫中山之倡導

(甲) 十次之失敗

孫中山決意覆清。始於乙酉。自後乙未。有廣州之役。庚子。有惠州之役。皆由外患激成。在倫敦爲龔照瑗所執。得英國政治保護而免。游日本。識宮崎寅藏。平山周。深與犬養毅。大隈重信相結納。始爲世界注目。革命之名。始於鄒容革命軍一書。章炳麟所定也。共和爲容閔主張。自同盟會成立。而內地學堂與新軍。悉爲革命策源地。其勢驟張。十次起兵。雖曰失敗。而顛覆清室成功之速。實基於此。

予自乙酉中法戰敗之年。始決傾覆清廷。創建民國之志。由是以學堂爲鼓吹之地。借醫術爲入世之媒。十年如一日。當予肄業於廣州博濟醫學校也。於同學中物識有鄧士良號弼臣者。……與之談革命。士良一聞而悅服。並告以彼曾投入會黨。如他日有事。彼可爲我羅致會黨以聽指揮云。……一年。聞香港有英文醫校開設。可以鼓吹革命。故投香港學校肄業。數年之間。……常往來於香港澳門之間。……聞而附和者。在香港祇陳少白。尤少統。楊鶴齡三人。而上海歸客則陸皓東而已。……此爲予革命言論之時代也。及予卒業之後。懸壺於澳門。羊城兩地以問世。而實則爲革命運動之開始也。……至甲午中東戰起。以爲時機可乘。乃赴檀島美洲創立興中會。欲糾合海外華僑以收臂助。……數月。應者寥寥。僅得鄧蔭南與胞兄德彰二人。願傾家相

助及其他親友數十人之贊同而已。時適清兵屢敗……遂與鄧蔭南及三五同志返國……開乾亨行於香港爲幹部。設農學會於羊城爲機關。當時贊襄幹部事務者。有鄧蔭南、楊衢雲、黃詠商、陳少白等。而助運籌於羊城機關者。則陸皓東、鄭士良並歐美技師及將校數人也。予則常往來廣州、香港之間……乃以運械不慎。致海關搜獲手槍六百餘桿。事機乃洩。而吾黨健將陸皓東殉焉……同時被株連而死者。則有丘四、朱貴全二人。被捕者七十餘人。而廣東水師統帶程奎光與焉。後竟病死獄中……此乙未九月九日。爲予第一次革命之失敗也。敗後……乃得由間道脫險出。至香港。隨與鄭士良、陳少白同渡日本。略住橫濱……斷髮改裝。重遊檀島……復集合同志以推廣興中會……由太平洋東岸之三藩市登陸。橫過美洲大陸。至大西洋西岸之紐約市……於甫抵倫敦之時。即遭使館之陷。幾致不測。幸得吾師康德黎竭力營救。始能脫險……暫留歐洲。以實行考察其政治風俗。並結交其朝野賢豪。兩年之中。所見所聞。殊多心得……予欲爲一勞永逸之計。乃採取民生主義。以與民族、民權問題同時解決。此三民主義之主張所由完成也……遂往日本……其民黨領袖犬養毅。遣宮崎寅藏、平山周二人來橫濱歡迎。乃引至東京相會。一見如舊識。抵掌談天下事……此爲予與日本政界人物交際之始也……各志士之對於中國革命事業。先後多有資助……日本有華僑萬餘人……吾黨同人有往返於橫濱、神戶之間。鼓吹革命主義者。數年之中。而慕義來歸者。不過百數十人而已……由乙未初敗。以至於庚子。此五年之間。實爲革命進行最艱難困苦之時代也……予乃命陳少白回香港。創辦中國報。以鼓吹革命。命史堅如入長江。以聯絡會黨。命鄭士良在香港設立機關。招待會黨。於

是乃有長江會黨及兩廣、福建會黨并合於興中會之事也。旋遇清廷有排外之舉。……因而八國聯軍之禍起矣。予以爲時機不可失。乃命鄭士良入惠州招集同志。以謀發動。而命史堅如入羊城。招集同志。以謀響應。……予乃與外國軍官數人。繞道至香港。……不期中途爲奸人告密。船一抵港。即被香港政府監視。不得登岸。……乃將惠州發動之責。委之鄭士良。而命楊衢雲、李紀堂、陳少白等在香港爲之接濟。予則折回日本。轉渡臺灣。……時臺灣總督兒玉。頗贊中國之革命。……許以起事之後。可以相助。予於是一面擴充原有計畫。就地加聘軍官。……而一面令士良即日發動。並改原定計畫。不直逼省城。而先佔領沿海一帶地點。多集黨衆。以候予來。……士良得令。即日入內地。親率已集合於三洲田之衆。出而攻撲新安、深圳之清兵。盡奪其械。隨而轉戰於龍岡、淡水、永湖、梁化、白芒花、三多祝等處。所向皆捷。清兵無敢當其鋒者。遂佔領新安、大鵬至惠州、平海一帶沿海之地。以待予與幹部人員之入。及武器之接濟。不圖惠州義師發動旬日。而日本政府忽而更換新內閣。總理伊藤氏對中國方鍼。與前內閣大異。乃禁制臺灣總督。不許與中國革命黨接洽。又禁武器出口。及禁日本軍官投效革命軍者。而予潛渡之計畫。乃爲破壞。遂遣山田良政與同志數人。往鄭營報告一切情形。並令之相機便宜行事。……士良連戰月餘。彈藥已盡。而集合之衆已有萬餘人。渴望幹部軍官及武器之至甚切。而忽得山田所報消息。遂立令解散。而率其原有之數百人。間道出香港。……當鄭士良之在惠州苦戰也。史堅如在廣州屢謀響應。皆不得當。遂決意自行用炸藥。攻燬兩廣總督德壽之署而殲之。炸發不中。而史堅如被擒遇害。……庚子之役。爲予第二次革命之失敗也。……時適各省派留學生至日本之初。

：東京留學界之思想言論，皆集中於革命問題。劉成禺在學生新年會大演說革命排滿，被清公使逐出學校。而戢元成、沈虬齋、張溥泉等，則發起國民報，以鼓吹革命。……在上海則有章太炎、吳稚暉、鄒容等，借蘇報以鼓吹革命。……鄒容著有革命軍一書，爲排滿最激烈之言論。華僑極爲歡迎，其開導華僑風氣，力甚大。此則革命風潮初盛時代也。壬寅、癸卯之交，……河內開博覽會，因往一行。……在河內時，識有華商黃龍生、甄吉亭、甄璧、楊壽彭、曾齊等，後結爲同志。於欽廉、河口等役，盡力甚多。河內博覽會告終之後，予再作環球漫遊。取道日本、檀島而赴歐美。過日本時，有廖仲愷夫婦、馬君武、胡毅生、黎仲實等多人來會，表示贊成革命。予乃託以在東物色有志學生，結爲團體，以任國事。後同盟會之成立，多有力焉。自惠州失敗以至同盟會成立之間，其受革命風潮所感，興起而圖舉義者，在粵則有李紀堂、洪全福之事，在湘則有黃克強、馬福益之事。其事雖不成，人多壯之。……乙巳春間，予重至歐洲，則其地之留學生已多數贊成革命。……予於是乃揭櫫吾生平所懷抱之三民主義、五權憲法以號召之，而組織革命團體焉。於是開第一會於比京，加盟者三十餘人。開第二會於柏林，加盟者二十餘人。開第三會於巴黎，加盟者亦十餘人。開第四會於東京，加盟者數百人。中國十七省之人皆與焉。惟甘肅尙無留學生到日本故闕之也。此爲革命同盟會成立之始。因當時尙多諱言革命二字，故祇以同盟會見稱。後亦以此名著焉。自革命同盟會成立之後，……吾始信革命大業可及身而成矣。於是乃敢定立中華民國之名稱，而公布於黨員，使之各回本省，鼓吹革命主義，而傳布中華民國之思想焉。不期年而加盟者已逾萬人。支部則亦先後成立於各省。從此革命風潮，一日千丈。……同盟會成立未

久。發刊民報。鼓吹三民主義。遂使革命思潮瀰漫全國。自有雜誌以來。可謂成功最著者。其時慕義之士。聞風興起。……其最著者。如徐錫麟、熊成基、秋瑾等是也。丙午萍醴之役。則同盟會會員自動之義師也。……本部於事前一無所知。故臨時無所備。然而會員之紛紛回國從軍者。已相望於道矣。尋而萍醴之師敗。而禹之謨、劉道一、甯調元、胡英等。竟被清吏拏獲。或囚或殺者多人。此爲革命同盟會會員第一次之流血也。……時清廷亦大起恐慌。屢向日本政府交涉。將予逐出日本境外。予乃離日本而與漢民、精衛二人同行。而之安南。設機關部於河內。以籌畫進行。旋發動潮州、黃岡之師。不得利。此爲予第三次之失敗也。繼又命鄧子瑜發難於惠州。亦不利。此爲予第四次之失敗也。時適欽廉兩府有抗捐之事發生。清吏派郭人漳、趙伯先二人。各帶新軍三四千人往平之。予乃命黃克強隨郭人漳營。命胡毅生隨趙伯先營。而遊說之以贊成革命。二人皆首肯。許以若有堂堂正正之革命軍起。彼等必反戈相應。於是一面派人往約欽廉各屬紳士鄉團。爲一致行動。一面派蒼野長知帶款回日本購械。並在安南招集同志。並聘就法國退伍軍官多人。擬器械一到。則佔據防城至東興一帶沿海之地。爲組織軍隊之用。東興與法屬之芒街。僅隔一河。有橋可達。……吾黨可成正式軍隊二千餘人。然後集合欽州各鄉團勇六七千人。而後要約郭人漳、趙伯先二人所帶之新軍。約六千餘人。……則兩廣可收入掌握之中。而後出長江以合南京、武昌之新軍。則破竹之勢可成。而革命可收完全之效果矣。乃不期東京本部之黨員忽起風潮。而武器購買運輸之計畫爲之破壞。……攻防城之同志。至時不見武器之來。乃轉而逼欽州。冀郭軍之響應。郭見我軍之薄弱。加以他軍爲之制。故不敢來。我軍遂進圍靈山。冀趙軍

之響應。趙見郭尙未來。彼亦不敢來。我軍以力薄難進。遂退入十萬大山。此爲予第五次之失敗也。欽廉計畫不成之後。予乃親率黃克強、胡漢民。並法國軍官。與安南同志百數十人。襲取鎮南關。占領三要塞。收其降卒。擬由此集合十萬大山之衆。而會攻龍州。不圖十萬大山之衆。以道遠不能至。遂以百餘衆。握據三砲臺。而與龍濟光、陸榮廷等數千之衆。連戰七晝夜。乃退入安南。予過諒山時。爲清偵探所察悉。報告清吏。後清廷與法國政府交涉。將予放逐出安南。此爲予第六次之失敗也。予於離河內之際。一面令黃克強籌備再入欽廉。以圖集合該地同志。一面令黃明堂窺取河口。以圖進取雲南。以爲吾黨根據之地。後克強乃以二百餘人出安南。橫行於欽、廉、上思一帶。轉戰數月。……克強之威名因以大著。後以彈盡援絕而退出。此爲予第七次之失敗也。予抵星州數月之後。黃明堂乃以百數十人襲得河口。誅邊防督辦。收其降衆千有餘人。守之以待幹部人員前往指揮。時予遠在南洋。又不能再過法境。故難以親臨前敵以指揮之。乃電令黃克強前往指揮。不期克強行至半途。被法官疑爲日本人。遂截留之而送之回河內。爲清吏所悉。與法政府交涉。乃解之出境。而河口之衆。以指揮無人。失機進取。……黃明堂守候月餘。人自爲戰。散漫無紀。而虜四集。其數約十倍於我新集之衆。河口遂不守。而明堂率衆六百餘人退入安南。此爲予第八次之失敗也。……由黃岡至河口等役。乃同盟會幹部由予直接發動。先後六次失敗。經此六次之失敗。精衛頗爲失望。遂約合同志數人入北京。與虜會拚命。一擊不中。與黃復生同時被執繫獄。至武昌起義後。乃釋之。……予自連遭失敗之後。安南、日本、香港等地。與中國密邇者。皆不能自由居處。則予對於中國之活動地盤。已完全失却矣。于是將國內一切計畫。委託

於黃克強、胡漢民二人。而予乃再作漫遊。專任籌款。以接濟革命之進行。後克強、漢民回香港。設南方統籌機關。與趙伯先、倪映典、朱執信、陳炯明、姚雨平等。謀以廣州新軍舉事。運動既熟。擬於庚戌年正月某日發難。乃新軍中有熱度過甚之士。先一日因小事生起風潮。于是倪映典倉卒入營。親率一部分。從沙河進攻省城。至橫枝岡。爲敵截擊。映典中彈被擒死。軍中無主。遂以潰散。此吾黨第九次之失敗也。時予適從美東行。至三藩市。聞敗而後。則取道檀島。日本而回東方。過日本時。曾潛行登陸。隨爲警察探悉。不准留居。遂由橫濱渡檳榔嶼。約伯先、克強、漢民等來會。以商捲土重來之計畫。……時各人親見檳城同志之窮。……予乃招集當地華僑同志會議。勸以大義。一夕之間。則釀資八千有奇。再令各同志擔任到各埠分頭勸募。數日之內。已達五六萬元。……既有頭批的款。已可分頭進行。計畫既定。予本擬徧遊南洋英荷各屬。乃荷屬則拒絕不許予往。而英屬及暹羅亦先後逐予出境。……予遂不得不遠赴歐美矣。到美之日。徧遊各地。勸華僑捐資。以助革命。則多有樂從者矣。於是乃有辛亥三月二十九廣州之舉。是役也。集各省革命黨之精英。與彼虜爲最後之一搏。事雖不成。而黃花岡七十二烈士轟轟烈烈之概。已震動全球。而國內革命之時勢。實以之造成矣。此爲吾黨第十次之失敗也。（孫文學說第八章有志竟成）

（乙）同盟會

光緒三十一年七月成立同盟會。推孫中山爲總理。黃興爲總務。實主持革命事。留日學生多入會。士官學生加盟者尤衆。後來新軍起義。卽由於此。同盟支會遂遍設

於內地各省海外亦多有之。

是年光緒三十一年六月。孫總理自南洋抵日本。邀集全國各省留日有志者。於是月二十八日開會於東京麴町區檜町內田良平寓所。到會者有總理、黃興、陳天華、宋教仁、馮自由、張繼、梁慕光、吳春陽、程家樑、黎勇錫、胡毅生、朱少穆、但燾、時功玖、田桐、曹亞伯、馬君武、董修武、鄧家彥、張我華、何天炯、康寶忠、謝良牧、劉道一、蔣尊簋、張伯喬、汪兆銘、朱大符、古應芬、金章、杜之秋、姚栗若、魯魚、柳聘儼、孫元、李四光、宮崎寅藏、內田良平等六十餘人。除甘肅一省外。餘十七省人皆有到者。首由總理說明開會理由。並提議定名為中國革命同盟會。衆以本會爲秘密組織。恐爲實行之阻礙。卒以討論結果。簡稱中國同盟會。時有主張對滿同盟會者。總理謂革命黨宗旨。不專在排滿。當與廢除專制、創造共和。並行不悖。衆贊成。次提議以驅除韃虜、恢復中華、創立民國、平均地權。十六字爲誓辭。某某數人於平均地權有疑義。要求取消。總理乃起而詳細解釋。卒以大多數通過。次由黃興提議。請贊成者書立誓約。於是會衆由總理執行舉手宣誓式。宣誓之外。總理並授以秘密口號。漢人、中國物、天下事三事。隨與各會員一一行新握手禮。繼復由衆公議各會員盟書。於幹事部未成立前。暫付托總理保管。而總理盟書。則衆推黃興保管。……衆復推舉馬君武、汪兆銘、陳天華等爲會章起草員。十日後。復假赤阪區霞關子爵阪本金彌邸。開第二次成立會。……是日通過會章後。投票選舉孫公爲總理。黃興爲庶務。陳天華爲書記。宋教仁、程家樑等爲交際。謝良牧爲會計。鄧家彥爲執法部長。馮自由、汪兆銘等爲評議員。（馮自由中國革命運動二十六年組織史）

同盟會爲興中會、光復會、華興會合組而成。興中由孫中山主之。多粵人及海外華僑。光復由蔡元培、章炳麟主之。多江浙文士。徐錫麟發難于安慶。最足振動人心。華興由黃興主之。多兩湖人士。屢起兵湖湘間。

民國紀元前二十年

上辰一八九二年

總理創設興中會於澳門。（鄒魯中國國民黨史稿）

甲午。中山在檀島已極力籌餉爲革命進行之需。及歸香港。即與鄧士良、陸皓東、黃詠襄、陳少白、楊鶴齡、尤烈諸人擬聯絡全省革命同志。擴大興中會之組織。以利進行。因聞楊衢雲、謝讚泰等所設輔仁文社。宗旨相同。於是孫楊兩派。遂於乙未正月廿七日合併爲一。仍定名曰興中會。設總機關於士丹賴街十三號。榜其名曰乾亨行。凡入會者須一律宣誓。其誓詞曰。驅除韃虜。恢復中國。創立合衆政府。倘有貳心。神明鑒察。（馮自由中華民國開國前革命史）

興中會自乙未敗後數年。會長一職。仍由楊衢雲肩任。並未改選。惟在楊南遊期間。與各省會黨及日本志士之交際。概由中山任之。故中山已不啻爲事實上之會長。及己亥冬。畢永年與哥老會龍頭李雲彪、楊鴻鈞、張堯卿、辜天祐等。有聯合各秘密會黨。奉中山爲首領之議。遂有人諷楊辭職讓孫。期免黨內糾紛。適楊於是年十二月廿四日乘日輪鎌倉丸至香港。遂以此徵求謝讚泰同意。謝亦贊同。楊於是提出辭職。並薦中山自代。未幾。興中、三合、哥老三會代表。在香港開會。同舉中山爲總會長。並特製總會長印章。由日人宮崎寅藏賁往。

橫濱。上諸中山。其所以特稱總會長。即明示中山之被舉。由於三會之公意。與普通會長不同也。（馮自由中華民國開國前革命史）

余年十三四。始讀蔣氏東華錄。見呂留良。曾靜事。悵然不怡。輒言有清代明。寧與張李也。弱冠觀全祖望文所述南田。臺灣諸事甚詳。益奮然欲爲浙父老雪恥。次又得王夫之黃書。志行益定。而光復會初立。實余與蔡元培爲之魁。陶成章、李燮和繼之。總之不離呂、全、王、曾之舊域也。（章炳麟光復軍志序）

癸卯年

光緒二十九年

秋。軍國民教育會實行員龔寶銓自日歸國。是冬。與同志組織光復會。爲進行機關。羣推蔡元

培爲會長。會址暫設愛國女學堂。徐錫麟、呂熊祥、趙卓、蔡元康、秋瑾、陳伯平、馬宗漢、劉光漢、吳春陽等先後訂盟。入會者以皖湘兩省志士爲多。（馮自由中國革命運動二十六年組織史）

甲辰

光緒三十年

年春。湘人黃軫（後改名興）劉揆一、陳天華、楊守仁等。在日本發起華興會。……夏秋間。自日

返長沙。由劉揆一介紹哥老龍頭馬福益合作。更由同志陳天華、章行嚴、譚人鳳、劉道一、蕭堃、柳繼貞、鄒永成、宋教仁、胡瑛、柳聘農諸人。各分途進行。楊守仁則駐上海。策應一切。會員先後加盟者四五百人。多屬學界分子。因聯絡秘密會黨。頗不便利。黃、劉等乃于華興會外。另設同仇會。專爲聯絡會黨機關。……黃、劉、馬等之大計劃。預定於甲辰九月。清太后萬壽節日。在長沙、岳州、衡州、寶慶、常德等處。分五路起事。……有會黨何少卿、郭鶴卿二人。以機事不密。在湘潭縣城被縣吏逮捕。其大體計劃。亦被探悉。……未幾。湘撫派兵查緝各黨人寓所。全城騷擾。黃乃避居吉祥巷耶教聖公會。由牧師黃吉廷、同志曹亞伯保護出險。劉亦繞道赴漢口。得免

於難。馬福益由湘潭逃桂。次年返湘。欲圖再舉。爲湘撫端方擒殺。（馮自由中華革命運動二十六年組織史）

同盟會既成立。首發布三民主義。

予維歐美之進化。凡以三大主義。曰民族。曰民權。曰民生。羅馬之亡。民族主義興。而歐美各國以獨立。專制仆而立憲政體殖焉。世界開化。人智益蒸。物質發舒。百年銳於千載。經濟問題。繼政治問題之後。則民生主義躍躍然動。二十世紀。不得不爲民生主義之擅場時代也。是三大主義。皆基本於民。遞嬗變易。而歐美之人種。胥治化焉。其他施維於小己大羣之間。而成爲故說者。皆此三者之充滿發揮而旁及者耳。今者中國。以千年專制之毒而不解。異種殘之。外邦逼之。民族主義。民權主義。殆不可以須臾緩。而民生主義。歐美所慮積重難返者。中國獨受病未深而去之易。是故或於人爲既往之陳迹。或於我爲方來之大患。要爲繕吾羣所有事。則不可不並時而弛張之。嗟夫。所陟卑者。其所視不遠。游五都之市。見美服而求之。忘其身之未稱也。又但以當前者爲至美。近時志士。舌敝唇枯。惟企強中國以比歐美。然而歐美強矣。其民實困。觀大同罷工。與無政府黨。社會黨之日熾。社會革命。其將不遠。吾國縱能媲美於歐美。猶不能免於第二次之革命。而況追逐於人已然之末軌者之終無成耶。夫歐美社會之禍。伏之數十年。及今而後發見之。又不能使之遽去。吾國治民生主義者。發達最先。觀其禍害之未萌。誠舉政治革命。社會革命。畢其功於一役。還視歐美。彼且瞠乎後也。（孫文民報發刊詞）

民報撰著人曰章炳麟、汪兆銘、胡衍鴻、陳天華、朱大符、劉師培、湯增璧、甯調元、宋教仁、黃侃、汪東。而自外投稿。

則有馬君武、呂占東、白逾桓、景定成、雷昭性、田桐、仇式匡等若干人。經理始爲董修五。繼爲黃樹中。陶成章則出名向日政府立案。（李根源雪生年錄卷一）

（丙）黃花岡

黃花岡死事者百餘人。皆一時俊彥。當時有以爲革命無法進展。乃爲最後之一擊者。又有以爲此種類似暴動之舉。絕無成功之希望者。後來武昌起義。其始亦不過一二百人。所不同者。武昌能得內應。而黃花岡則否。然黃花岡之事。激動全國人心。影響至鉅。人人皆以爲清廷旦夕將亡。宣傳上之成功。視攻城得地者。相去不可以道里計。清之亡。雖由英與袁世凱交構於其間。若人心未去。交構者亦無所施其伎倆也。

原議三月十五日爲發難期。繼而不能不緩者。一則美屬款未到齊。二則溫生才事件發生。省會戒嚴。欲待防稍弛。三則日本之械。其大數尚未到。……然早知四月初有二標退伍之確耗。則時期亦祇能盡三月底。……省中已預定二十九舉事。……詎二十七張鳴岐、李準調巡防二營回省。以三哨助守龍王廟高地。殺生即提議改緩時期。陳炯明和之。宋健侯（宋伯先在省之代表也）亦以爲然。姚雨平則反對。……後林時爽、喻雲紀到克處言。不特不能改期。且須速發。方可自救。以巡警早四五日已有搜索戶口之札。旦夕必發也。克以二

兄之決心。則欲集三四十人攻督署。以殺張鳴岐。議亦決。……二十八日。陳炯明、姚雨平偕到報告云。調來順德三營。內多同志。其哨官十人中。八爲同志。……克仍攻督署。姚雨平任攻小北門。占飛來廟。並迎巡防營及新軍。炯明攻巡警教練所。殺生以二十餘人守大南門。約定二十九午後五點半鐘同發。……臨時克與所部由小東營出。槍殺巡警於道。疾行而前。……入督署。……克與林時爽、朱鰲仲、李文甫、嚴驥君等。親行遍搜。無一要人。……（二十六七。殺生已疑陳鏡波爲偵探。）……初入督署時。僅死三人。已出。則林時爽於東轅門招撫李準之先鋒隊。（以伯先部常言。李準部下已運動多人。）突攻。腦中槍而死。克中傷右手。斷兩指。他同志亦有數人死於衛隊門首者。時就所餘部。分爲三路。克與十人出大南門。欲與巡防營接應。徐維揚以花縣四十人。欲出小北門。與新軍接應。餘則川、閩同志及安南、南洋同志。往攻督練公所。福建方聲洞與克出。行最先。遇巡防營於雙門底。見其並無相應之號。且舉槍相向。方乃發手槍殺其哨弁一人。敵槍環攻方。死之。克且戰且前。……以肩撞破一小店門。入之。從內發槍。中七八人。……克乃易衣而出。入河南女同志家。初二始返港。（後乃知同時朱執信、鄧坤、何克夫三人得生還。餘則死矣。）喻雲紀兄與衆攻督練公所。途遇防勇。繞路攻龍王廟。一人當先。拋擲炸彈。防勇爲之披靡。後失手遇害。李文甫攻督署時。非常猛烈。已出。傷其右足。後爲虜獲。從容談笑而死。其餘殉國而死者。粵同志則有羅則軍、李子奎、李羣、周華、王鶴明、杜君、馬昌、羅坤、韋雲卿。四川同志則有饒國樑、秦柄。閩同志則有林覺民、陳可欽、陳與新、劉六湖、劉元棟、陳更新、吳任之、馮郁莊、林尹民、郭炎利、郭鈿官、郭天財、翁長祥、陳孝文、陳大發、林茂增、王文達、曾顯、劉藩、虞全鼎、周團生、吳順利、吳炎妹、吳

七妹。尙有不知姓名一人。徐維揚（花縣人）部下之衆。死者二十四人。被捉在監者六八。負傷生還者十六人。朱執信攻督署。奮勇爭先。迥非平日文弱之態。在二門爲後列。誤傷肩際。仍與克偕行至雙門底。遇敵相失。後入其門生家。易服出險。何克夫與防營亦力戰。負傷出大南門。過至戚家。匿三日而後出。鄧坤負傷出大南門。入一店。……四川熊克武、福建王以通、嚴驥。皆負重傷而出。克同攻督署者百三十人。內徐維揚四十人。劉古香十四人。此二部稍弱。餘則雖以朱執信、李文甫、陳與新之溫文。均敢先當敵。無絲毫怯懦之態。蓋義理之勇爲之也。林時爽本同林覺民。陳與新在東籌有的款。將歸閩舉事。已來港則同死於廣東。閩同志者多畢業高等專門學生。年少才美。傷心俱盡。……喻雲紀藥學畢業。能製炸彈炸藥。精衛北京事件。喻同謀。炸藥發見。再歸日本合藥。……羅則軍本有十八人。任毀電信局。……李文甫任五十人。攻石馬槽。……而二人再知定期二十九。則隻身赴難。殉戰而死。……王鶴明、杜某某、李文楷。事事勤慎。……倉猝戰死。……戰之翌日。海防同志李德山等數人。走入米店。據米爲壘。拋擲炸彈。營勇不敢近。張鳴岐下令焚燒。惟羅穩一人走免。伯先之代表宋健侯。亦輕裘緩帶之士。既已遣散其部下。獨與數人合克部攻督署。後不知如何被捉。各報登有宋玉琳。供詞慷慨。可以見其平生矣。龐越爲高州吳川人。素運動廣州灣方面。此次亦遇害。石經武留宋健侯機關遇害。其餘江、皖、湘、粵之士。雖未與戰。而陷在城內。因無辦被害者不少。（曹亞伯武昌革命真史前編黃興胡漢民海外報告書）

是役黨人死者。莫知其確數。檢收遺骸則得七十二人。潘達微叢葬於廣州之紅花

岡。改紅花爲黃花。曰黃花岡七十二烈士墓。

方聲洞福建閩侯。林盛初廣西平南。徐佩旒廣東花縣。韋樹模廣西平南。徐禮明廣東花縣。徐日培廣東花縣。李炳輝廣東肇慶。李晚廣東東安。郭繼枚廣東增城。徐廣滔廣東花縣。游壽廣東南海。徐臨端廣東花縣。李文楷廣東清遠。周華廣東南海。陳春廣東南海。徐茂煊廣東花縣。徐松根廣東花縣。徐滿淩廣東花縣。龐雄廣東吳川。馮超驤福建南平。韋榮初廣西平南。江繼復廣東花縣。徐昭良廣東花縣。徐培添廣東花縣。陳更新福建閩侯。秦炳四川廣安。徐應安廣東花縣。勞培廣東開平。曾日全廣東花縣。徐燭成廣東花縣。杜鳳書廣東南海。陳與榮福建閩侯。余東雄廣東南海。徐保生廣東花縣。徐廉輝廣東花縣。陳文褒廣東大埔。韋統鈴廣西平南。李文甫廣東東莞。韋統淮廣西平南。徐容九廣東花縣。徐進始廣東花縣。程良安徽懷遠。林覺民福建閩侯。宋玉琳安徽懷遠。馬侶廣東番禺。陳潮廣東海豐。陳清疇福建連江。羅乃琳福建連江。李德山廣西羅城。喻培倫四川內江。羅仲霍廣東惠州。卓秋元福建連江。胡應昇福建連江。羅坤廣東南海。饒國樑四川大足。林尹民福建閩侯。黃鶴鳴廣東南海。黃忠炳福建連江。王燦登福建連江。林西惠福建連江。饒輔廷廣東梅縣。李雁南廣東開平。陳可鈞福建閩侯。石德寬安徽壽縣。陳發炎福建連江。周增廣東梅縣。林文福福建閩侯。劉六符福建連江。劉元棟福建閩侯。林修明廣東蕉嶺。魏金龍福建連江。張學齡廣東興寧。（黃花岡七十二烈士碑）

辛亥以前革命軍起義簡表

地點	時間	起義經過	附註
羊城 (廣州)	光緒二十一年九月九日	海關搜獲手槍。事洩。陸皓東等三人被害。	第一次革命失敗
惠州	光緒二十六年	鄭士良率衆佔領新安、大鵬至惠州、平海一帶之地。以無械接濟。解散。	第二次革命失敗
湘潭	光緒三十年	未及起義。因何少卿、郭鶴卿被捕而事洩。	
萍瀏醴	光緒三十二年	會黨首領李經其。被追溺斃。蕭克昌被誘殺。龔春台、姜守旦、王勝、蔡紹南舉義。衆至數萬。萍鄉以礦工爲中堅。醴陵以防營爲中堅。瀏陽以會黨爲中堅。清軍圍攻。敗退。	被殺萬餘人。同盟會會員亦有回國參加者。
黃岡	光緒三十三年四月十一日	許雪秋、陳湧波、陳宏生。衆千餘佔黃岡、石林等地。退散時。遺下黨籍。被捕殺二百餘人。	第三次失敗
惠州	光緒三十三年四月二十二日	鄧子瑜舉兵。所向無敵。西江震動。以無接濟退散。	第四次失敗
欽、廉	光緒三十三年七月二十四日	舉義於欽州王光山。佔防城縣。又破南寧府屬之橫州、永淳。退入十萬大山。	第五次失敗
鎮南關	光緒三十三年十月廿六日	黃明堂率鄉團百餘人。攻佔砲台。孫中山、黃興、胡漢民皆參加。以無接濟。退。	第六次失敗

(2) 川路風潮

明清下 辛亥革命

廣州	廣州	北京	廣州	安慶	雲南河口	安慶	欽廉、上思
宣統三年三月廿九日	宣統三年三月十日	宣統二年二月二十一日	宣統二年正月初三日	光緒三十四年十月二十六日	光緒三十四年三月二十九日	光緒三十三年五月二十六日	光緒三十三年十月後
黃興率衆攻督署失敗。死者甚多。遺骸七十二人。葬於黃花岡。	溫生才刺殺將軍孚琦。生才亦被害。	汪兆銘謀刺攝政王。被捕。	倪映典率兵三千餘攻教會山。敗。被害。	熊成基奪菱湖嘴子彈庫。還攻北門。不入。乃散出。	黃明堂襲得河口。殺邊防督辦王玉藩。進攻蒙自。月餘。因無人指揮。率六萬餘人退入安南。	徐錫麟殺巡撫恩銘。攻據軍械局。陳伯平戰死。錫麟被害。	黃興以二百餘人轉戰數月。無援而退。
即黃花岡之役。革命第十次失敗。第		革命軍起。始出獄。	第九次失敗	宣統元年。熊至哈爾濱。欲暗殺載洵。事洩。被害。	第八次失敗		第七次失敗

自收回權利之風盛行於時。而後收回京漢鐵路。且定粵漢、川漢爲商辦。隨糧徵股。久未興工。鄭孝胥獨創幹路國有之議。介陳寶琛以投盛宣懷。宣懷復由瑞澂以達於載澤。爲三人起用之基。清廷遂定議以盛宣懷爲郵傳部尙書。收回粵漢、川漢兩路爲國有。命端方爲督辦。借外款興修。實則度支告匱。在借日本及四國銀行團外款外。尙欲大借外款。苦無抵押。意在覓抵押品。而不在修路。故人心大憤。

宣統三年二月壬辰……郵傳部會奏。京漢路鐵路贖回時。借用度支部官款銀五百萬兩。今借日本正金銀行一千萬元。訂立合同。以二十五年歸還。此項借款除還清度支部外。作爲各路還本還利之用……得旨。著郵傳部尙書簽字。（宣統政紀卷四九）

宣統三年三月乙卯。度支部會奏。擬定英、美、德、法四國銀行借款合同二十一款……爲畫一幣制及興辦擴充東三省實業事務之用。總數一千萬鎊。利息五釐。折扣九五。還本以四十五年爲期……指定以東三省菸酒稅、出產稅、銷場稅、各省鹽斤新加價四項。每年共庫平銀五百萬兩。爲頭次抵押……扣支七萬五千鎊。以作酬費……得旨。著度支部堂官簽字。（宣統政紀卷五一）

四月甲戌。諭……飭部特借英、美、德、法四國銀行一千萬鎊。日本橫濱銀行一千萬元。專備改定幣制、振興實業以及推廣鐵路之用。該管衙門自應竭力慎節。不得移作別用……（宣統政紀卷五二）

盛宣懷爲郵傳部尙書。宣懷外授意四品京堂鄭孝胥條議鐵路國有利益。揭之報紙。以回視聽。內與度支部尙書載澤相結。極言鐵路商辦有百害無一利。且恐終不成。應仿外國制。收歸國有。一事權。時載澤方用事。陰助之。更風給事中石長信奏言。鐵路有幹路。支路可許商修。幹路必歸國有。（尙秉和辛壬春秋第二四川）

己卯諭……中國幅員廣闊……全國路政。錯亂紛歧。不分枝幹。不量民力。一紙呈請。輒行批准商辦。乃數年以來。粵則收股及半。造路無多。川則倒帳甚鉅。參追無著。湘鄂則開局多年。徒資坐耗。竭萬民之膏脂。或以虛糜。或以侵蝕。恐曠時愈久。民累愈深。上下交受其害。貽誤何堪設想。用特明白曉諭。昭示天下。幹路均歸國有。定爲政策……各省分設公司集股商辦之幹路……應即由國家收回。趕緊興築。除枝路仍准商民量力酌行外。其從前批准幹路各案。一律取銷……（宣統政紀卷五二）

郵傳部奏。粵漢鐵路鄂境川漢鐵路借款正合同簽字。勢難久延。請將該部批准前案。先行取銷。從之。（宣統政紀卷五二）

戊子。諭內閣。端方著以侍郎候補。充督辦粵漢、川漢鐵路大臣。迅速前往。（宣統政紀卷五三）
庚寅。郵傳部會奏。粵漢、川漢鐵路接議英、德、美、法各銀行借款合同。計二十五款。繕單呈進。並請旨簽字蓋印。得旨。著郵傳大臣簽字。（宣統政紀卷五三）

七月甲申。御史陳善同奏……今盛宣懷事前毫無預備。徒仰仗借款。突然將批准各案。奏請一律取銷。各該

路以十餘年之經營，千數百萬之籌集。一旦盡取諸其懷而奪之。而所訂借款合同，利率之高，虛折之多，抵押之鉅，債權之重。又著著失敗。予人口實。各該省人民痛念前勞，忧心後禍，宜其奔走駭告，岌岌若不終日也。查給事中石長信之請定幹路枝路辦法，在四月初七日。郵傳部之覆奏宣布國有政策，在十一日。而借款合同之簽押，在二十二日。一似政策之改定，實緣借款而發生也。……（宣統政紀卷五九）

川鄂湘粵同持異議。鄂湘粵先已由郵部收股，出立借據，並付息二釐了結。而川股二千萬兩內，由川路公司竊用至四百萬兩。政府不肯承認，以至由爭論而請願。請願而設立爭路同志會，罷市罷學。

五月辛丑諭……楊文鼎奏，湖南諮議局呈奏，湘路力能自辦，不甘借債，據情代奏一摺。鐵路幹路收歸國有，業經定為政策。楊文鼎身任地方……竟率行代為覆奏，殊屬不合。著傳旨嚴行申飭。（宣統政紀卷五四）

癸卯，又諭，王人文電奏，據四川諮議局呈稱，川省紳民自奉鐵路改為國有之命，紛紛函電，請飭暫緩接收，並請緩刊謄黃等語。覽奏殊堪詫異。鐵道改歸國有，乃以商民集款艱難，路工無告成之望。川省較湘省為尤甚，且有虧倒鉅款情事，腴割脂膏，徒歸中飽，殃民誤國，人所共知。朝廷是以毅然收為國有，並停收租股，以恤民艱。既經定為政策，決無反汗之理。該省諮議局不明此意，輒肆要求，並有緩刊謄黃之請，是必所收路款侵蝕已多，有不可告人之處。一經宣布，此中底蘊恐不能始終掩飾。難保該局非受經手劣紳之請託，希圖蒙混。為延宕時期，接續抽收之計。……王人文著傳旨嚴行申飭。（宣統政紀卷五四）

丙辰……諭……此次粵省因收回路事，突然倡議不用官發紙幣，紛紛持票取銀……著張鳴岐嚴飭地方文武，隨時防範，認真彈壓，或有不法行爲，立予拏辦，儻敢糾衆作亂，准如該督所請，格殺勿論。（宣統政紀卷五四）

戊午。諭……度支部會奏……請將川、粵、湘、鄂四省所抽所招之公司股票，盡數驗明收回，由度支部郵傳部特出國家鐵路股票，常年六釐給息，嗣後如有餘利，按股分給，儘願抽本，五年後亦可分十五年抽本，未到期者，並准將此次股票向大清交通銀行照行規隨時抵押，其不願換國家鐵路股票者，均准分別辦理，以昭平允。粵路全係商股，因路工遲滯，糜費太甚，票價不及五成，現每股從優先發還六成，其餘虧耗之四成，並准格外體恤，發給國家無利股票，路成獲利之日，准在本路餘利項下分十年攤給。湘路商股照本發還，其餘米捐租股等款，准其發給國家保利股票，鄂路商股並准一律照本發還，其因路動用賑糶捐款，准照湖南米捐辦理。川路宜昌實用工料之款四百數十萬兩，准給國家保利股票，其現存七百餘萬兩，願否入股，或歸本省興辦實業，仍聽其便等語，籌畫尙屬妥協，著督辦粵漢、川漢鐵路大臣迅速前往，會同各該省督撫，遵照所擬辦法……實力奉行……（宣統政紀卷五四）

六月壬辰……護理四川總督王人文代奏，四川紳民羅綸等二千四百餘人呈稱，疊讀收路國有諭旨，並盛端兩大臣會同度支部酌定辦法，不敢從命。查盛端兩大臣電稱，川股由部籌還，必借洋債，必照湖北以川省部有之財政作抵等語，是意在挾持川人，不還股款可知。又度支部會議細則，謂公司股票如願領保息股票。

除倒帳准不折扣等語。是倒款固永不歸還。路本亦必折扣又可知。又度支部會奏。謂湘粵商股一律照本發還。川路用款准給保路股票。其存款或令入股。或歸本省舉辦實業等語。是川路雖有商股。不得如湘鄂商股照本發還又可知。部臣對待川民。種種均以威力從事。毫不持平。敢同聲籲於我皇上之前。惟裁察焉。得旨。鐵路國有政策。早經宣示。借款合同。係有旨諭令籤押。決無反汗之理。該護督一再瀆奏。殊爲不合。……（宣統政紀卷五六）

川路總理李稷勳。効忠於清廷。於是川事乃益亟。李稷勳者。川漢鐵路駐宜總理。自鐵道國有政策頒布。李曾具呈郵部。謂該路即收歸國有。應俟從前支出各款。妥定歸結辦法。始由官局訂期接收。恐非倉卒所能完竣。嗣後關於工程材料。及工程司去留各事項。應如何辦理。統候裁奪。旋又進京面呈。宜、夔工程照常辦理。所有工項仍由川款開支。郵部因以宜夔路工。責成李稷勳悉心主持。即由郵部咨行川督。轉飭川路總公司。川人以李稷勳並無總公司之知會。股東之議決。四川總督之命令。擅自達部。郵部亦不問股東願否。輒定宜、夔工程。仍由川款開支。因具呈請川督代奏。嚴劾郵部。一面發傳單通告全川。罷市罷課。一切釐稅雜捐。概行不納。扣抵股息。時七月初一日事也。（郭孝成中國革命紀事本末第二編）

宣統三年七月丁卯。……又諭。電寄趙爾豐。據電奏。四川股東會議論激昂。正在傳集勸誡。街市忽有匿名傳單。鼓動罷市罷課情形等語。此次該省激動情形。有無匪徒從中煽惑。著趙爾豐確切查明。嚴行彈壓。……

（宣統政紀卷五八）

省中各街衢皆搭蓋席棚。供設德宗景皇帝萬歲牌。輿馬皆不得過。……更有頭頂萬歲牌爲護符。（文獻叢編第二十三輯清宣統朝四川鐵路案）

時袁世凱雖退居彰德。而與內閣徐世昌日由電報通消息。四川爭路事起。世凱授意世昌力主嚴辦。欲使時局敗壞。已得以乘機出山。

七月丁丑。……又諭。……趙爾豐、玉崑等。……仍以交院議決暫歸商辦爲請。……著傳旨申飭。……（宣統政紀卷五八）

川人爭路之焰。至於極點。皆由郭孝可、羅綸、顏楷、張瀾等鼓吹而成。而蒲殿俊復暗中爲之主謀。以爲後援。……藉口保路。……不納釐稅。實行抗糧抗捐。至七月十三。而逆書見。十六日。而起事之說已確。因於十五日。將該逆紳等誘入署中。一並拘留。在蒲殿俊家。搜得該逆黨寄羅綸信。有倡舉大義、資助槍彈等語。更屬憑證確鑿。當日午間。同志會黨聚集萬人。闖入督署。禁之不可。將及堂。不得已飭令開槍。斃數人。始行退去。（文獻叢編第二十三輯清宣統朝四川鐵路案趙爾豐電）

七月十五日。……九鐘。鐵路公司開股東會。先時督院開列名單。來傳股東會會長及同志會各部長共十九人到院。稱北京來電。有好消息。立待磋商。登時往者有張表坊、羅子卿、江緒倫、鄧慕魯、葉炳成等五人。于是公司一時不能開會。專候回音。交午後一鐘。突有兵到公司。將大門封閉。衆人於是驚惶不知所。聞之隊官。稱由督院派來。保護公司。……於是人心生疑。請伊將門打開。當即派人出街探聽。果見各街口均駐巡兵。南院

及各司道衙門尤多。巡兵圍守。四城門已閉。出入杜絕。又見趙督告示。嚴厲異常。其一中云。此次所拿首要。均係煽亂之人。又一示云。只拿首要。不問平民。首要諸人。業已就擒。議會解散。謠言勿聽。兵隊保護。匪徒難侵。擁擠上院。格殺勿論。等字樣。於是人心大憤。鬼哭神號。各街坊傳告各鋪家坐戶。無論老幼男女。各出一人。均頭頂先皇神位紙條。奔往南院請罪。被各處巡兵阻止。不聽。巡兵竟放槍擊斃商民數人。而人心猶不畏死。直投南院。又被趙督及軍官田徵夔。立命親兵隊同巡兵。擊斃數十餘人。受傷者較多。（渤海壽臣氏辛亥革命始末記）

七月辛巳。諭……趙爾豐……前奏川人抗糧抗捐等情。已屬目無法紀。茲復倡言自保。意在獨立。尤屬罪無可逭。著趙爾豐迅速查拏。如得有狂悖不法確據。實係形同叛逆。無論是否職官。即將首要人犯先行正法。並妥速解散脅從。毋任蔓延爲患。（宣統政紀卷五九）

壬午……又諭。電寄趙爾豐。電奏悉。川省逆黨藉爭路爲名。鼓動愚民。意圖獨立。竟於十五日兇撲督署。肆行燒殺。並砍傷哨弁等數人。實屬兇惡已極。該署督力飭兵隊。將該逆黨分頭擊退。並先將首要蒲殿俊等。設法誘擒。辦理尙屬迅速。該署督以該省兵分力弱。請撥得力兵隊數千人來川一節。著瑞澂就近遴派得力統將。酌帶營隊。迅即開拔赴川……（宣統政紀卷五九）

代表劉聲元、阮岷等既入都。上書郵傳部、都察院請代奏。並哭訴於慶王府。均不得要領。攝政王入朝。聲元等復攔輿哀訴。王大怒。命遞解聲元等回籍。（四川諮議局副議長）蕭湘亦懼禍南歸。載澤恐湘歸煽亂。電瑞

逮捕之，囚於武昌。（尙秉和辛壬春秋第二四川）

七月甲申……又諭……四川……旅京紳商學界屢次開會，聚集多人，投遞呈詞……著學部嚴飭各學堂管理各員，認真約束學生，照常上課，不准隨意出堂，干預外事，並著民政部、步軍統領衙門，嚴行禁止聚衆開會，多派兵警加意彈壓……勸阻解散，儻或不遵，即行分別拏辦，並將自稱四川代表劉聲元，嚴密查拏，押解回籍，交地方官嚴加管束……（宣統政紀卷五九）

清廷命岑春煊赴川查辦，復命端方率兵入川，春煊負氣返滬，川人爭路愈烈，川路事起僅三月，而武漢起義，又三月而清以亡。

七月乙酉諭……自鐵路幹路收歸國有，凡從前商股民股，均經飭部妥定辦法，明白宣示……乃川人未明此意，開會演說，藉端爭執……本月十五日，竟有數千人兇撲督署，肆行燒殺，並斃弁兵，似此目無法紀，顯係逆黨勾結爲亂，於路事已不相涉，萬難再予姑容，已電飭趙爾豐相機分別剿辦……勿任蔓延……至該省商民一切路股，仍著郵傳部、督辦會辦鐵路大臣，遵旨妥速辦理。（宣統政紀卷五九）

癸巳諭……趙爾豐電奏，自十五日亂民圍攻督署之後，是夜即有大麵鋪牛市口民團數千人，麇集城下，連日又到有溫江、郫縣、崇慶州、灌縣、成都、華陽、雙流、新津、邛州、蒲江、大邑十餘州縣民團，每縣數起，每起數千人，或至萬人，所到之處，搶掠燒切，無所不爲，附近居民紛紛逃徙，當經調派陸軍及巡防軍衛隊迎剿，乃各該團恃其勢衆，分四路圍城，並放槍礮，傷亡軍士，迨經回擊，猶敢抵死抗拒，及勢難支，始行敗退，嗣有大股匪團數

千人。盤踞距省城五十里之龍泉驛山頂。扼守險要。密列礮械。揚言進攻省城。迨官軍馳往勦擊。匪即開礮轟打。經軍隊於黑夜猛撲山上。佔據山頂。奪獲大礮數十具。槍彈刀矛無算。匪遂下山紛竄。而西路犀浦中和場等處匪徒。亦經擊退。匪復分股圍攻雙流縣城。焚燒關廂街寺。官軍與之相持一晝夜。城圍始稍鬆解。竄擾犀浦中和場。並竄竄唐家寺之匪。亦先後敗退。自十六日至今。連戰七日。擒斬甚多。奪獲刀矛旗幟約二千餘件。各路電線悉被砍斷。驛遞文件皆被截阻搜殺。現在各處仍復警報頻聞。擬俟城守稍固。即抽隊迎勦。先後陣擒被脅愚民。均開導寬免等語。辦理尙合機宜。該匪等先期散有調兵木籤。足見謀逆已非一日。及至逆謀敗露。立時四處響應。……亟宜早圖廓清。現在鄂軍已經行抵川境。黔省援軍亦經開拔。仍著趙爾豐嚴飭各軍分路勦辦。……（宣統政紀卷五九）

八月戊戌。……又諭。電寄趙爾豐。電奏雙流防軍已將彭家場攻開。斃匪甚衆。溫江崇慶之匪佔踞要隘。新津彭山兩縣已爲匪踞。地方官皆被幽禁。成屬各縣。幾於無地不匪。各州縣亦紛紛告警。……著趙爾豐飭知田振邦。嚴飭軍隊節節進行。迅速撲滅。毋任蔓延。（宣統政紀卷六〇）

壬子。……又諭。電寄趙爾豐。端方電奏嘉定失守。……著該署督嚴飭各軍。迅將失守地方克復。不得少有延緩。……（宣統政紀卷六一）

七月二十七日奉旨。沈秉堃電奏川省變亂。請飭郵傳部分備銀兩。散還零星民股。其川路虧倒股本。並飭部墊認。按股散還。追繳歸款等語。……二十九日又奉旨。岑春煊電。……陳川省路股辦法。……著郵傳部速議。

具奏。……凡持有商辦股票者。准赴各省路局清理股票處掛號。……到局支取現銀。並換領國路股票。……本（八）月初八日奉諭。……依議。（盛宣懷愚齋存稿卷一八遵旨議覆川省路股辦法摺）

川省風潮極急時。黨人龍鳴劍勸蒲殿俊以舉大事。蒲不可。龍鳴劍遂歸榮縣。蒲等於罷市後。猶復刊布光緒牌位。令人遍貼門首。焚香致敬。以明非反抗清廷意也。黨人固羞之。亦有少數黨人。不惜貶損個人名譽。藉以鼓動民心。如龍鳴劍、李朝甫、陳孔伯、方朝楨、陳子玉、王世杰諸人。皆外以同志會之名。內行革命之事。極言國有巨弊。政府惡劣。使人人知清之不可恃。非改革不可。故八月鄂省革命事起。四川省城未克。而各屬州縣已恢復數十處矣。（郭孝成中國革命紀事本末第二編）

九月己巳。又諭。資政院奏。……稱。禍亂之源。皆郵傳大臣盛宣懷欺蒙朝廷。違法斂怨。有以致之。……此次川亂之起。大半原因。即以該部奏定僅給實用工料之款。以國家保利股票。不能與鄂路商股一律照本發還。又將施典章等所虧倒數百萬。棄置不顧。怨苦鬱結。上下爭持。川亂既作。人心浮動。革黨叛軍乘機竊發。該大臣實爲誤國首惡等語。……盛宣懷著即行革職。永不敘用。（宣統政紀卷六二）

又諭。……查得川中罷市罷課。不戢官吏。不刦倉庫。絕非逆黨勾結爲亂。其七月十五日民居失火。僅係南打金街民人自行失慎。人民因蒲殿俊、羅綸等被拘。赴轅請釋。統領田徵葵擅行槍斃街正商民數十人。附近居民聞知。遂首裹白巾。奔赴城下求情。又爲槍斃數十人。以致衆情憤激。其所傳告之自保商權書。並無獨立字樣。亦無保路同志會及股東會圖記。其中且有皇基萬世等語。並非出自蒲、羅等之手。又有搜獲之木牌血書。

皆匪徒假託。非士人所爲。川中官吏周善培、王揆、饒鳳瑛等。復挾諮議局糾舉之嫌。搆成冤獄。不納捐糧一說。係官紳聯合會內提倡。有緩辦捐輸以請息扣糧之議。並非股東實行徵收國家租稅等語。此次川事糜爛。既據端方查明。實由官民交關而成。所有辦理不善之地方官。自應分別懲治。……王人文、趙爾豐均著交內閣議處。署松潘鎮總兵營務處總辦候補道田徵葵。貪功妄舉。擅斃平民。著即行革職。發往巴藏。責令戴罪圖功。署提法使勸業道周善培。輕躁喜事。變詐無常。候補道王揆、王梓。結怨紳商。聲名素劣。均著即行革職。候補道饒鳳瑛。資輕望淺。輿論不孚。著以同知候補。以昭炯戒。四川諮議局議長法部主事蒲殿俊。副議長舉人羅綸。度支部主事鄧孝可。翰林院編修顏楷。貢生張瀾。民政部主事胡燏。舉人江三乘、葉秉誠、王銘新。對於匪事絕無干涉。均著即行釋放。法部主事蕭湘。前被拘留。著一併免其置議。（宣統政紀卷六二）

（3）革命之成功

（甲）武昌起義

武漢居全國之中。唐才常亟欲據之。以號召四方。惜其事敗。自後謀革命者。無不以漢口租界爲策源地。張之洞時。得告密之書。立即焚之。亦幸無事。瑞澂恃妻舅載澤用事。數年之間。由九江道而總督兩湖。時總督多加宮保。瑞澂亦欲得之。商于載澤。載澤告以惟捕革命黨。可以論功陞賞。故瑞澂偵察革命黨最嚴。欲借以立功。時謀

革命者多立會名。一二人倡之。數人和之。會名無定。人之數亦無定。會與會之間。亦不甚關照。知有孫中山、黃興而已。未嘗有約。然各省學堂軍隊中。此類結合。多至不可紀極。

光緒甲辰

一九〇四年

春。武漢志士劉靜菴、呂槐廷、朱元成、時功璧、劉熙卿、時功玖、何季達、胡瑛、歐陽瑞驊等。常會

集於武昌多寶寺街時宅。討論革命進行方略。夏五月。月。……組科學補習所於武昌多寶寺街。……十月。月。十一

……張之洞派軍警圍搜。……科學補習所遭受破壞。未幾。黨人曹亞伯歸自日本。商之劉靜菴。圖再舉。……

以聖公會之日知會爲革命機關。藉避耳目。而從事鼓吹革命。湖北軍學界參加者甚衆。……日知會自己已

春組成以來。兩易寒暑。成績昭著。至丙午。……有沔陽郭瑤階者。因留日識胡瑛。偵知秘密。勒索不遂。乃報巡

警道馮啓鈞。馮與外人交涉。封日知會。捕黨人胡瑛。……張難先。……劉靜菴。均下武昌獄中。……戊申冬十

月。……楊王鵬邀唐義友、郭撫宸、鄒毓琳、鍾畸、章裕昆。討論團體名義。磋商至再。始定名爲羣治學社。外避目

標。內策自治。……金臺茶館。……在武昌小東門外三里許。……地較僻靜。行人稀少。……十一月二十日。

十二月。於此開成立大會。……各發起人即盡力聯絡。未幾四十一標姚鈞、廖湘芸、王守愚、蔡大輔、陸國其。三十

一標李鑫、謝鵠臣諸同志。均先後加入。……嗣後派鄒潤猷往安徽。鄧剛往奉天。楊王巽往上海。社內同志漸

分布他處矣。四十二標祝制六。……與黃景賢等。秘密聯絡同志。鼓動革命。……章裕昆亦以羣治學社組織

情形相告。祝聞之喜。章即白衆意。擬以四十二標事相屬。祝諾。……先後加入者踵相接。羣治學社勢力日見雄厚。……庚戌一九〇一年。湘飢。四月五月。黨人鼓動飢民。以閉糶事。縱火焚撫署。……黃紳鄉在鄂。聯合羣治學社。

發動響應。……風聲所播。羣治學社之名於焉益著。鄂督瑞澂遂飭軍中嚴密搜檢。……工作進行。大感困難。

……不能沿用羣治學社名義。……決議易名爲振武學社。擴大組織。各營標均設代表。……八月秋節。九月十八日

在黃土坡開一天酒館。舉行成立大會。……由楊王鵬主席。宣讀簡章。共推楊爲社長。李六如任庶務兼文書。

……施化龍到差。……即將楊王鵬撤差。李六如。……開除。……楊王鵬、李六如出營後。……將社務交蔣翊

武主持。……振武學社經施化龍破壞。停頓兩月餘。風潮略靜。各標同志力促恢復。時已季冬。蔣翊武約詹大

悲、劉復基、章裕昆等。開會於閱馬廠集賢酒館。討論名稱及進行策略。詹主改爲文學社。從之。……辛亥年元

旦。一九一一年一月三十日。開文學社成立大會於黃鶴樓之風度樓。……遂推蔣翊武爲文學社正社長。詹大悲爲文書部

長。劉復基爲評議部長。蔡大輔、王守愚爲文書員。鄒毓琳爲會計兼庶務。……均以擴大範圍爲要。號召同志。

盡力介紹新同志入社。……時胡瑛在獄。蔣翊武輒往問策。故文學社之成功。胡贊勳之力實多。文學社成立

僅月餘。而聲勢幾達湖北全軍。……決議在小朝街八十五號設立機關。推劉復基住社辦公。並增設總務部。

推張廷輔任部長。時辛亥四月十二日。一九一一年五月十日。也。（章裕昆文學社武昌首義紀實）

共進會發起於日本東京。先是中國同盟會於丁未新設十部。中有聯絡部。專以聯絡各省秘密會黨爲職志。

……一部分同盟會會員。組織共進會。專司此項聯絡任務。……此事進行異常秘密。其編制三等九級。一如

同盟會。……鄂人居正、孫武、楊時傑、彭漢遺、劉英、劉鐵、向壽蔭等皆與焉。……己酉三月，乃設總機關於漢口法租界長清里。……辛亥正月。……會務進展極速。……而武昌軍學界同志，接談集會非常便利，愈見活躍。……文學社更和衷共濟，等於仲昆。乃於八月初三日，在胭脂巷機關，開聯合大會，出席者有孫武、劉堯激、胡祖舜、蔡大輔、鄧玉麟、李濟臣、蔡漢卿、彭楚藩、熊秉坤、馬榮、楊宏勝、蔡濟民、杜武庫、林翼友等。時蔣翊武赴岳未返，公推孫武主席。主席報告共進會、文學社聯合經過後，即討論首義方略及日期，決議乘八月十五中秋節日起事。（張難先湖北革命知之錄共進會始末）

各營既先後出發（入川）。文學社與共進會。……擬定辛亥八月二十日一九一一年十月十一日舉事。……辛亥八月三

日。九月二日砲隊盛發城等爲入川同志餞行。至晚酒酣，忽拖砲出，謀舉事。管帶江明經制止，開除數人。外間風

聲益緊。清吏慮中秋有變，特令各標營於十四日十月五日提前舉行中秋節，在營休息，不准外出，不准過量飲酒。

十五日。十月六日特別戒嚴，派軍隊逡巡，如臨大敵。（章裕昆文學社武昌首義紀實）

八月十九日，武昌起義之初，軍隊參與者不過二三百人，而喧傳張彪所部第九鎮全軍皆變，故瑞澂倉皇逃於兵輪。張彪所部一二千人尙與義師相持一二日，始退歸漢口。

八月甲寅，諭。……電寄瑞澂，據電奏，探知革黨潛匿武昌，定期十九日夜間起事，正飭防擊，旋據齊耀珊電

稱。於漢口拏獲要匪劉耀璋一名。起獲偽印偽示偽照會等多件。遂與統制張彪等督派弁兵。在省城內先後拏獲匪目匪黨三十二名。並起獲軍火炸彈多件。內有劉汝璣開槍拒捕。楊宏勝私藏軍械。彭楚藩語尤狂悖。當將該三犯訊明正法等語。該革匪在鄂創亂。意圖大舉。實屬目無法紀。……即著嚴行研鞫。盡法懲治。……

（宣統政紀卷六一）

是晚八月十七日。工程營後隊排長陶啓勝。查有該排兵士程正瀛。槍內裝有子彈。又查有該排副目金兆龍。亦擦槍裝彈。遂傳諭金兆龍。爲何如此。……程正瀛……即用槍柄向陶啓勝頭腦猛力一擊。……立時倒地。同時該營左隊兵士方興潛。在營外。向營房擲一炸彈。響聲大震。……後隊正目熊炳坤借此一轟。羣起譁變。該營督隊官阮榮發及右隊隊官黃坤榮。司務長張文濤。拔刀阻止。均爲兵士所殺。……衆兵士即將營內子彈。搬取一空。……左隊司書生周定原。謂爾輩……當速到楚王臺集合。衆兵士聞之。……一哄而出。……少頃即至。他營尙無動靜。……共計工程第八營不到三百人。又慮瑞澂來襲。危險萬狀。……於是衆兵士舉左隊隊官吳兆麟爲總指揮。（曹亞伯武昌革命真史正編辛亥八月十九日武昌起義）

當是時。駐紮武勝門外之第二十一混成協工程輜重等隊兵士李鵬升等。於自動發難後。……率領七十餘人。繞道通湘門。以集中楚望臺。中和門內步隊第二十九標二營排長蔡濟民。亦於發難後率領兵士二十餘人。與方興所領測繪學生八十人。先後向楚望臺集合。（胡鄂公辛亥革命北方實錄）

城內工程第八營起義後。響應者僅砲隊第八標城外輜重工程兩隊。測繪學堂學生及步隊二十九標約一

排。共約二千餘人。（曹亞伯武昌革命真史正編辛亥八月十九日武昌起義）

是晚

八月十九日

十二時。天微雨。各處電線均已割斷。……革命軍之砲隊迷於方向。礙難描準。各路進攻督署之

隊伍。亦因督署教練隊在牆內鑿有槍眼。防禦極嚴。甚難前進。……吳兆麟……傳令。各隊伍均在原地準備

進攻。……將在楚王臺之預備隊。挑選勇敢者百人。派周定原、曹飛龍、黃楚楠各帶兵一排。親自督率前進。楚

王臺之軍械局。暫令方興、李鵬升嚴守。吳兆麟行至工程營後街。……經王府口。到督署後側。即命衆兵士縱

火。……猛烈射擊。……令砲隊向火光附近射擊。……吳兆麟因巷戰傷人太多。……專令砲隊猛烈向督署

火光施放。又命砲隊分班向未響應之各營射擊。少頃風益猛。火益烈。革命軍士氣愈久愈振。……捕獲督署

摺差馬某。……據稱。瑞制台一開砲隊全體變了。即由督署後牆穿洞逃走。……出文昌門。到兵船上躲避。……

吳兆麟……即將瑞澂潛逃出城之事。傳知各隊。……前進將督署佔領。（曹亞伯武昌革命真史正編辛

亥八月十九日武昌起義）

八月二十日拂曉。革命軍遂將督署佔領。革命軍佔領督署之後。中和門外陸軍中學堂陸軍學生約千名。遂

自動整隊荷槍進城。到楚望臺集合。城內外各協標營留守士兵。亦先後齊集楚望臺。步隊二十九標一二兩

營亦同時來歸。但所來隊伍均無長官。咸由其目兵率領。集合楚望臺。聽候指揮者。兆麟乃將全城各門劃定

區域。命各部隊分區防守。（辛亥革命北方實錄）

先是。各省諮議局屢請開國會。湖北諮議局議長湯化龍爲衆人所注目。至是羣推

化龍爲都督。化龍以不習兵事。推協統黎元洪。成立湖北都督府。各省先後獨立者。皆稱都督。無所統一。久乃議先統一外交。

馬榮、程正瀛等。帶隊至黃土坡劉吉文家。……請黎協統。……直至臥室搜查。斯時黎元洪……問何事。馬榮曰。特請統領到楚王臺。奉總指揮吳兆麟命令。即有要事相商。黎無可如何。隨帶其執事官王安瀾。同馬榮等向楚王臺。……與吳兆麟晤面時。即謂兆麟曰。你爲甚麼要革命。這是要全家誅戮的事。你學問很好。資格很深。你萬不該與革命黨共同革命。你若不革命。你在軍隊進級很易。請你快叫大眾各回各營。事情太鬧大了。更不得了。馬榮……即拔刀向黎元洪來斫。吳兆麟喝止之。……吳當向……黎云。……今聞瑞澂與張統制等均已出走。僅統領一人在武昌城內。統領素愛軍人。甚得軍心。事已至此。實屬天意。只好請統領出來維持大計。……黎亦無語。……少頃。吳兆麟即請黎元洪到諮議局會議。……派人敦請之同志父老。……有湯化龍、胡瑞霖、張振武、李作棟、陳磊、陳宏誥、邢伯謙、李翊東、趙學魁、楊玉如、蘇成章、畢鍾、向鈇謨、劉公、蔡濟民、徐達明、王文錦、吳醒漢、鄧玉麟、高尚志、周定原、高振霄、方定國、李國鏞等。齊到諮議局會議廳。公推湯化龍主席。……於是大衆在諮議局商議進行各事宜。……一。以諮議局爲軍政府。二。稱中國爲中華民國。三。改政體爲五族共和。四。規定國旗爲五色。以紅、黃、藍、白、黑代表漢、滿、蒙、回、藏爲一家。五。稱中華年號爲黃帝紀元四千六百零九年。六。當以黎元洪爲都督。佈告地方。七。移檄各省。並照會各國領事。宣布滿清罪狀。八。佈告全國國民。並軍民長官。九。佈告湖北各府州縣。十。軍政府緊要諭令。十一。致書滿清政府。十二。佈告漢族同胞之爲滿洲

將士者。促其覺悟。十三。軍政府暫設四部。(甲)參謀部。(乙)軍務部。(丙)政務部。(丁)外交部。十四。設立招賢館。(曹亞伯武昌革命真史正編辛亥八月十九日武昌起義)

(乙)漢陽戰事

八月十九起義之事。爲清廷所知。時軍機大臣載瀉方在灤州。舉辦秋操。聞報倉卒停操。遽命陸軍大臣蔭昌率馮國璋之師。編爲第一軍。南下平亂。而將士不甚用命。乃起用袁世凱爲湖廣總督督師。命海軍提督薩鎮冰率海軍助之。鎮冰遂舉義。

八月乙卯。諭……瑞澂電奏。十八夜革匪創亂……正在提訊覈辦。革匪餘黨勾結工程營輜重營。突於十九夜八鐘響應……瑞澂退登楚豫兵輪。移往漢口……瑞澂……著卽行革職。帶罪圖功……並著軍諮府陸軍部迅派陸軍兩鎮。陸續開拔。赴鄂勦辦。一面由海軍部加派兵輪。飭薩鎮冰督率前進。並飭程允和率長江水師卽日赴援。陸軍大臣蔭昌著督兵迅速前往。所有湖北各軍及赴援軍隊。均歸節制調遣。並著瑞澂會同妥速籌辦。(宣統政紀卷六一)

丁巳……諭。湖廣總督著袁世凱補授。並督辦勦撫事宜……又諭。袁世凱現簡授湖廣總督。所有該省軍隊暨各路援軍。均歸該督節制調遣。蔭昌、薩鎮冰所帶水陸各軍。並著袁世凱會同調遣。迅赴事機。以期早日戡定。(宣統政紀卷六一)

九月庚午。諭湖廣總督袁世凱著授爲欽差大臣。……凡關於該省剿撫事宜。由袁世凱相機因應。妥速辦理。軍情瞬息萬變。此次湖北軍務。軍諮府陸軍部不爲遙制。以一事權而期迅奏成功。（宣統政紀卷六二）

黃興自日本馳歸。被推爲總司令。與清軍相持。馮國璋亦一戰而克漢陽。幸江蘇第八鎮舉義。會聯軍攻克南京。得失相抵。黃興被推爲大元帥。往上海組織北伐軍。

八月二十一日正午。漢口光復。……命何錫藩繼任防禦漢口。……張彪、張錫元。……在劉家廟以南佔領陣地防禦民軍。……二十五日。……我軍步砲隊齊向敵還擊。……齊喊殺敵。聲震如雷。清軍潰退。我軍追殺益猛。……敵軍大敗。我軍追躡至三道橋停止。清軍退至澚口。……二十七日。張景良奉命爲漢口指揮官。所有軍隊悉歸節制。……司令部設劉家廟車站。……二十九日拂曉。第二協令謝元愷之一標。潛由三道橋。陸續赴澚口。滿軍步哨已發覺。鳴槍。謝標隊伍猛進。……敵用機槍掃射。……死傷甚重。……仍退回原地。兩軍在三道橋兩端。各用砲射擊。……九月初五日。陽邏海軍乘拂曉天黑。偷入譙家磯。逕抵造紙廠江岸。向我軍防禦陣地側面猛擊。將我散兵壕內及附近之兵擊死五百餘名。劉家廟亦無端起火。彈械糧秣盡遭焚如。軍心由是搖動退却。而澚口敵軍。……復用機槍掃射。水陸夾攻。我軍無力抵禦。造紙廠遂爲敵軍佔領。……我軍不得已退至大智門。始佔領陣地。劉家廟亦爲敵有。……是日正午。我軍誓圖報復。……於午後一時開始進攻。……齊向劉家廟攻擊。士氣極盛。清軍在劉家廟。用機關槍及步砲隊頑強抵抗。彈如雨注。我軍冒彈猛進。……與敵肉搏。……奪回劉家廟。復向造紙廠追擊。……初六日拂曉。清軍乘我軍未前進時。一由造紙廠。一由

姑嫂樹。分兩路……攻擊我軍……兩軍相持一日……戰至天晚。我軍終向大智門新停車場附近退却。清軍復佔領劉家廟一帶。時軍政分府得同志報告。謂指揮張景良已通敵……旋奉命將張景良、劉錫祺、羅家炎三人正法。景良誅後。都督即委派姜明經爲漢口指揮官……初七日……我軍在大智門新停車場一帶防禦清軍……敵軍進……我軍猛撲追殺……其時黃興……自滬抵漢……乃公推黃興爲總司令……至漢則以歐生路滿春茶園爲總司令部……正部署間。敵酋王占元、陳光遠、鮑貴卿等。已帶隊侵至六渡橋……初十日……兩軍仍在歐生路附近。以砲火戰鬥。皆未前進……十一日午前十時。敵藉歐生路附近房屋掩護。用機關槍猛射……敵乘機放火。燒歐生路房屋。使我軍失所依託。復用重砲猛擊……午後二時……下令各部隊退防玉帶門。敵卽節節縱火燒市街商店。燒一段卽佔據一段……十二日……漢口被敵軍縱火延燒。市民遷徙淨盡。糧秣給養極其困難。我軍因陸續向漢陽退却。（張難先湖北革命知之錄漢口戰事始末）

九月十三日下午。總司令黃興赴漢陽。組織總司令部……李書城……爲參謀長……二十四日午前九時。總司令集合各部隊長官。在司令部開軍事會議。規定攻擊計劃……二十六日……我砲隊及兵工廠附近一帶之步兵。並武昌鳳凰山砲隊。俱開始射擊漢口。滿軍砲隊亦向我砲隊還擊。五時。橋梁架設完竣……午後十時。部隊陸續前進……渡河……滿軍聞我軍渡河。射擊甚烈……我軍各部隊死傷甚衆。仍勇往直前……二十七日午前三時……我軍前進佔領玉帶門一帶……午後二時……滿軍……復佔玉帶門……

我軍死傷頗衆……是日決定固守漢陽……（十月）初二日午前七時。滿軍在三眼橋附近。與我軍戰鬥甚烈……午後六時……滿軍則進據仙女山……山地勢高。一可瞰制漢陽。一能側擊大別山。漢陽極形危險。非速驅逐。漢陽難保……初三日午前五時。我步隊第七標由花園開始進攻……午後二時。滿軍逐漸增加。火力益猛……我軍因火力不支。退佔大吳灣西北高地及扁担山湯家山之線……於是敵軍將出全力以攻漢陽……初四日……午前六時三十分。滿軍機關槍向我軍開始射擊……是夜……滿軍已進扁担山花園之線……初五日……我軍在十里舖一帶防禦……同時。滿軍在漢口砲隊亦向十里舖注射。我軍傷亡甚重……目下軍無鬥志……漢陽更形危迫……是日兩軍在十里舖相持。彼此無進展……初六日午前六時。滿軍在漢陽兵力逐漸增加。由花園以北向我十里舖繞攻……彈下如雨……（我）軍心渙散。午前十一時。滿軍漸漸前進。火力益猛……初七日晨。總司令亦退回昭忠祠。十里舖遂失……午前十時。總司令已渡江。滿軍節節搜索前進。漢陽城被敵軍佔領。（張難先湖北革命知之錄漢陽戰事始末）

（丙）各省獨立

自武昌起義後。浹月之間。各省先後起義。惟山東起義旋復取消。東三省改稱保安。吳祿貞舉義於石家莊。張紹曾舉義於灤州。皆不成。清廷所擁爲直隸、東三省、山東、山西、河南之地而已。南方則湖南、貴州、四川都督皆有更易。江浙兩省。府縣亦有稱

都督者。而上海一隅則有吳淞、上海兩都督焉。

各省獨立表

省名(地名)	獨立年月	都督 (主持人)	獨 立 經 過
湖南 長沙	九月初一日	焦達峯	焦達峯、陳作新於九月初一日拂曉起事。佔領長沙。清巡撫余誠格逸。翌日。各界集議。推焦爲都督。陳副之。九月初十日。焦、陳爲亂兵所殺。譚延闓繼爲都督。
陝西 西安	九月初一日	張鳳翽	張鳳翽、張益謙、錢鼎。各率所部。於九月初一日起事。推張鳳翽爲都督。錢鼎副之。清將軍文瑞投井死。
江西 九江	九月初二日	馬毓寶	九月初二日夜十時。馬率所部起事。初三日。成立九江軍政府。舉馬爲都督。蔣羣爲參謀長。
南昌	九月初十日	吳介璋	初十日夜。起事。十二日。成立江西軍政府。舉吳介璋爲都督。清巡撫馮汝驤逸。由九江辭職。由彭程繼任。將九江軍政府取消。改爲都督。次年三月廿一日。李烈鈞由皖歸贛。代馬毓寶爲都督。
雲南 騰越	九月初六日	張文光	九月初六日。張文光糾合成騰越之陸軍起事。初八日。稱滇西軍都督。省城光復後。乃歸之。

昆明	九月初九日	蔡鐸	九月初九日。光復軍起事。十一日。公推蔡鐸爲都督。
山西 太原	九月初八日	閻錫山	九月初七日夜。姚以价等起事。攻陷撫署。槍殺巡撫陸鍾琦。初八日。推閻錫山爲都督。溫靜安副之。姚以价爲行軍總司令。清廷復以吳祿貞爲山西巡撫。吳被刺殺後。又以張錫鑾代撫。並命曹錕、盧永祥率軍入晉。閻錫山退守河津。迨議和告成後。始設都督府於太原。以閻錫山任之。
上海	九月十四日	陳其美	九月十三日。陳其美等進攻製造局。十四日。衆推陳爲都督。海軍亦宣布獨立。同日。吳淞亦光復。
浙江 杭州	九月十四日	湯壽潛	九月十四日。清晨。杭州起事。以周承蒞爲總司令。童伯吹爲臨時都督。十五日。清軍均降。時湯壽潛由滬達杭。十七日。衆推湯爲都督。十八日。就任。繼而浙東各地亦皆光復。
貴州 貴陽	九月十四日	楊蔭誠	九月十四日。清晨。張百麟、黃澤霖率新軍起事。巡撫沈瑜慶派兵鎮壓。楊蔭誠等率新軍往救。沈瑜慶乃請和。十五日。推楊蔭誠爲都督。趙純誠副之。沈瑜次年二月。楊辭職。趙繼任。後劉顯世殺趙。自爲都督。
江蘇 蘇州	九月十五日	程德全	九月十四日。上海都督陳其美派章梓等至蘇州。籌劃舉事。十五日。各新軍皆獨立。清巡撫程德全亦允獨立。成立江蘇軍政府。推程爲都督。
松江	九月十六日	鈕永建	松江開蘇州獨立。乃於九月十六日。舉鈕永建爲軍政長。宣布獨立。

鎮江	九月十八日	林述慶	鎮江新軍於九月十七日夜起事。十八日。克鎮江城。推林述慶爲都督。揚州亦獨立。受鎮江管轄。
清江浦	九月十五日	蔣雁行	清江浦新軍於九月十四日夜起事。蔣雁行率軍響應。十五日。佔領清江浦。舉蔣雁行爲都督。
安徽 壽州	九月十五日	王慶雲	王慶雲等率鄉團。於九月十五日攻壽州。不戰而克。乃公推王爲總司令。再克潁州。與清軍倪嗣冲戰。又克鳳陽。平定淮南。
安徽	九月二十一日	孫毓筠	九月初九日。安徽各軍舉事。未成。清巡撫朱家寶陽示反正。以待時變。各軍遂於九月二十一日。推王天培爲都督。宣布獨立。後黃煥章之潯軍入皖。與皖軍不合。由李烈鈞調停。十一月下旬。而王天培亦往。遂推孫毓筠爲都督。十一月下旬。而王天培伐。安徽統一。
廣西 桂林	九月十六日	陸榮廷	武昌起義後。劉古香等於廣西各地起事。清巡撫沈秉堃與王芝祥。陸榮廷。於九月十六日。聯名通電獨立。二十日。陸榮廷製造兵變。沈秉堃走湖南。陸榮廷遂爲都督。
廣東 廣州	九月十九日	胡漢民	九月十一日。陳炯明起義於東江。繼而黃明堂等亦皆起事。十八日。紳商各界集議獨立。舉清督張鳴岐爲都督。而張已遁。龍濟光亦拒副都督之職。十九日。乃舉胡漢民爲都督。宣布獨立。
福建 福州	九月二十一日	孫道仁	九月十八日。許崇智任革命軍總司令。向旗籍官兵

	東三省 奉天九月二十二日	趙爾巽	攻擊。十九日晨。雙方激戰。清總督松壽自殺。將軍樸壽陣亡。福州光復。二十一日。各軍推孫道仁為都督。許崇智為海陸軍總司令。
四川 蜀北	十月初一日	曾省齋	武昌起義後。藍天蔚、吳景濂擬於奉天成立保安會。逐清督趙爾巽。九月二十二日。召開保安大會。趙爾巽利用張作霖、袁金鎧等。以武力威脅會場。重組保安會。自任保安會長。各地黨人乃陸續發難。顧振邦、楊大寶起莊河與復縣。劉雍等起鳳凰城。商霽等起遼陽。趙中鵠等起海城。孫祥英等起鐵嶺。段右軍等起遼原。先後皆敗。藍天蔚走煙台。自任關外都督。
重慶	十月初二日	張培爵	九月初六日。曾省齋等起事墊江縣。日夜練軍。於九月二十一日出征。連克大竹、渠縣、鄰水、廣安、岳池、蓬溪、射洪、營山諸縣。十月初一日。開全民代表大會。舉曾省齋為蜀北都督。
成都	十月初七日	尹昌衡	九月初五日。夏之時等於龍泉驛起事。率兵抵重慶。趣之獨立。於是張培爵等於十月初二日起事。執知府鈕傳善。宣布獨立。衆推張為都督。夏副之。
			十月初七日。四川宣布地方自治。蒲殿俊為都督。慶瀾副之。仍以川督趙爾巽主邊務。十八日。兵變。蒲、慶逃走。乃公推尹昌衡為都督。羅綸副之。趙爾巽密召邊兵至川。乃誅爾巽。川局始定。次年二月。併成渝兩軍政府為四川軍政府。尹昌衡為正都督。張培爵副之。

灤州	十月初三日	王金銘	十月初三日。王金銘、張建功、施從雲、孫諫聲、白玉崑等起事於灤州。成立北伐軍政府。王金銘爲都督。十月十七日。清軍王懷慶來攻灤州。二十日。張建功等內叛。北伐軍乃退走昌黎。王金銘、孫諫聲、施從雲等。皆戰歿。起義失敗。
張家口	十月初		張雨岑、南琴軒、李飛遷等謀起事於張家口。爲清吏所捕。李飛遷等死之。遂失敗。
南京	十月初十日	程德全	九月底。蘇浙兩省聯軍組成。以徐紹楨爲總司令。浙軍司令朱瑞、滬軍司令洪承點、鎮軍司令林述慶、城軍司令黎天才。合攻南京。十月初十日攻入南京。清督張人駿、將軍鐵良、統領張勳敗走。林述慶乃稱寧軍都督。聯軍不服。後迎程德全入南京爲都督。
山東 濟南	九月二十一日	孫寶琦	九月二十一日。山東宣布獨立。舉清巡撫孫寶琦爲都督。十月初四日。因袁世凱之破壞。復取消獨立。
煙台	十月二十二日	胡瑛	十月二十二日。王耀東等起事於煙台。道員徐世光逸。公舉王傳炯爲司令。王昭通孫寶琦。王耀東等至上海求援。陳其美乃派胡瑛爲魯軍都督。率軍三千。由海道抵煙台。杜潛暫代胡瑛。王傳炯逃。煙台光復。
河南 開封	十一月初三日	張鍾瑞	張鍾瑞等定十一月初三日起事於開封。自任革命軍總司令。謀洩。張等二十一人被捕死。起義失敗。

新疆	伊犁	十一月十九日	廣福	馮特民、李輔黃等十一月十九日起事於伊犁。攻陷將軍署。推將軍廣福爲都督。楊繼緒爲總司令。殺將軍志銳。與巡撫袁大化相持於精河、西湖之間。
甘肅	秦州	壬子年正月十一日	黃鉞	黃鉞等起事於秦州。辰刻入城。衆推黃爲都督。向榮副之。

(丁)各國中立

八月二十一日民軍光復漢口後。即通告各領事。承認中外條約及外債賠款。旋各領事覆文。認民軍爲交戰團體。各國保守中立。

佈告嚴守中立事。現值中國政府與中國民軍互起戰爭。查國際公法。無論何國政府與其國民開戰。該國之內治管轄之事。其駐在該國之外國人。無干涉權。並應嚴守中立。不得藏匿兩有關係之職守者。亦不得有輔助何方面之狀態。據此。本領事等自應嚴守中立。並照租界規則。不准攜帶軍械之武裝人在租界發現。及在租界內儲匿各式軍械及炸藥等事。此係本領事遵守公法敦結交誼上應盡之天職。爲此剴切佈告。希望中國無論何項官民。輔助本領事等遵守達其目的。則本領事等幸甚。中國幸甚。謹此佈告。(郭孝成中國革命紀事本末第一編漢口領事團佈告中立文)

頃准貴各領事佈告。嚴守中立。一遵國際公法辦理。具見貴領事深明法理。篤愛友邦。本軍政府不勝感戴。本軍政府此次起義之由。全係民族奮興。改革立憲假面。建立中華民國。維持世界和平。凡有欲限制本軍政府

之意思不能獨立自由者。本軍政府縱恣意如何損壞之手段。亦是我民族應有之天職。貴各領事既經嚴守中立。本軍政府凡有能盡保護之責。本軍政府必竭盡義務。以表敬愛友邦之微忱。（郭孝成中國革命紀事本末第一編鄂軍政府致漢口領事團照會）

爲照會事。我軍政府自廣州之役團體潰後。乃轉而向西。遂得志於四川。在昔各友邦未遽認我爲與國者。以惟有人民主權而無土地故耳。今既取得四川屬之土地。國家之三要於是乎備矣。軍政府復祖國之情切。憤滿奴之無狀。復命本都督起兵武昌。共圖討賊。推倒滿洲政府。建立民國。同時對於各友邦益敦睦誼。以期維持世界之和平。增進人類之幸福。所有國民軍對外之行動。特先知照。免致誤會。一。所有清國前此與各國締結之條約。皆繼續有效。一。賠款外債照舊担任。仍由各省按期如數攤還。一。居留軍政府佔領地域內之各國人民財產。均一律保護。一。所有各國之既得權利。亦一體保護。一。清政府與各國所立條約所許之權利所供之國債。其事件成立於此次知照後者。軍政府概不承認。一。各國如有助清政府以妨害軍政府者。概以敵人視之。一。各國如有接濟清政府以可爲戰事用之物品者。搜獲一概收沒。以上七條。特行通告各友邦。俾知師以義動。並無絲毫排外之性質。參雜於其間也。相應照會貴領事轉呈貴國政府查照。須至照會者。（郭孝成中國革命紀事本末第一編鄂軍政府照會各領事文）

（4）清之亡

（甲）南北議和

武昌革命之始。首先承認對外條約。保護外人權利。是爲革命不徹底之原因。不數日。漢口英美諸國領事即承認革命軍爲交戰團體。是爲南北議和之張本。自是以後。英人一手操縱時局。袁世凱之督師至爲內閣總理大臣。南北之議和。南京政府之成立。皆由英人直接間接參預其事。

九月乙亥。諭……袁世凱著授爲內閣總理大臣。該大臣現已前赴湖北督師。著將應辦各事略爲佈置。即行來京。組織完全內閣。迅即籌畫改良政治一切事宜……又諭……所有派赴湖北陸海各軍及長江水師。仍歸袁世凱節制調遣。（宣統政紀卷六三）

辛亥。江蘇獨立時。作者正從程都督於南京。一日。某國領事來謁程。屏左右言。是夕。都督密語余。明日將往滬。請黃大元帥。余曰。何也。答曰。今日某國領事以某公使密電示余。謂南方非另立政府。不能推倒滿清。故余必自往。促克強來滬。次日。都督即行。以劉君之潔爲參謀長。劉君語余。近日北方軍官某來言。北軍要求以項城爲大總統。南方先立政府而後讓與項城。暨余次年入京。聞某使以清廷親貴不足與謀。故勸項城自爲之。合前後所聞。則民國成立。由南京政府讓與項城爲元首。則某國全權公使某爲之也。（張一麐心太平室集卷一五十年來國事叢談）

袁世凱遣蔡廷幹。先與黎元洪通音訊。元洪等利於革命速成。只要求清廷退位而

已。蔡卽奔走朱爾典之門者也。

二十日。袁世凱復派蔡廷幹、劉承恩。因漢口英國領事葛福來武昌。奉書都督。開列四條。(一)下罪己之詔。(二)實行立憲。(三)赦開黨禁。(四)皇族不問國政。與我軍議和。據稱如能承認君主立憲。兩軍卽息戰。都督召集居正、湯化龍、胡瑛、胡瑞霖等商議。一面招待蔡、劉二使。一面通知各機關高級職員。齊集都督府。開歡迎會。並請宣布來意。……兩人演說畢。羣推湯化龍致答詞。……胡瑛、胡瑞霖等亦相繼演說。大意俱勸蔡、劉二使。轉達項城。犧牲君主立憲。贊助共和。蔡等當答以諸君之意。二人已領教矣。一俟返漢。卽當轉達。能否收効。則不敢必。因我們所受意旨。是君主立憲。如項城能犧牲已見。免除戰禍。亦屬幸事。演說畢。都督在府歡宴二使。並爲書交二使返漢。轉達袁氏。(張難先湖北革命知之錄漢陽戰事始末)

南北和議開於上海。清廷代表唐紹儀。革命軍代表伍廷芳。建議停戰。餘尙未決。世凱遽撤紹儀。自與南軍以電報商議。

十月初十日。駐漢英領事葛福出爲介紹。兩方商議停戰。(張難先湖北革命知之錄中華民國政府成立)十月辛亥。又讞。現在南北停戰。應派員討論大局。著袁世凱爲全權大臣。由該大臣委託代表人馳赴南方。切實討論。以定大局。(宣統政紀卷六六)

英公使續議停戰事宜。三日停戰期滿。續停十五日。北軍不遣兵向南。南軍亦不遣兵向北。總理大臣派北方居留各省代表人前往。與南軍各代表討論大局。唐紹儀(儀)充總理大臣之代表。與黎元洪或其代表人

討論大局。（宣統政紀卷六五附錄）

至十五日。清內閣電開停戰條件至漢口。有停戰三日期滿。續停戰十五日。及唐紹儀充袁代表。與黎都督或其代表討論大局等語。是日代表會討論議和綱要。一。推倒滿清政府。二。主張共和政體。三。禮遇舊皇室。四。以人道主義待滿人。並決議。以漢口爲議和地點。黎大都督代表爲伍廷芳。與唐紹儀對待。十月二十一日。唐紹儀抵漢口。伍廷芳在滬任外交。不能遽之漢。唐允赴滬就伍。於是改以上海爲議和地點。唐於十月二十七至上海。伍之參贊爲溫宗堯、王寵惠、鈕永建、胡瑛、王正廷。唐之參贊爲楊士琦。（張難先湖北革命知之錄中華民國政府成立）

十一月壬申。諭內閣……代遞唐紹怡（儀）電奏。民軍代表伍廷芳。堅稱人民志願以改建共和政體爲目的等語。此次武昌變起。朝廷俯從資政院之請。頒布憲法信條十九條。告廟宣誓。原冀早息干戈。與國民同享和平之福。徒以大信未孚。政爭疊起。予惟我國今日。於君主立憲、共和立憲二者以何爲宜。此爲對內對外實際利害問題。固非一部分人民所得而私。亦非朝廷一方面所能專決。自應召集臨時國會。付之公決。茲據國務大臣等奏。請召集近支王公會議。面加詢問。皆無異詞。著內閣卽以此意電令唐紹怡（儀）轉告民軍代表。豫爲宣示。一面由內閣迅將選舉法妥擬協定施行。剋期召集國會。並妥商伍廷芳。彼此先行罷兵。以冀羣生而弭大難……（宣統政紀卷六七）

一九二二年一月一日。革命軍成立政府於南京。十七省代表推孫文爲大總統。於

南京組織政府。黃興爲陸軍參謀兩總長。事多決於興。定議南北成和。清室退位。推袁世凱爲臨時大總統。赴南京就職。當孫中山就任之初。採美國總統制。及和議之成。乃草定約法。改行內閣制。二月十二日。隆裕遜位詔下。故以是日爲南北統一紀念日。

中華民國元年 一九一二年 正月一日。總理就臨時大總統職。行宣誓禮。詞曰。傾覆滿清專制政府。鞏固中華民國。圖謀民生幸福。國民之公意。文實遵之。以忠於國。爲衆服務。至專制政府既倒。國內無變亂。民國卓立於世界。爲列邦公認。文當解臨時大總統之職。謹以此誓於國民。（張難先湖北革命知之錄中華民國政府成立）此次變亂。各省擾攘。本政府不忍生靈塗炭。特備文委託唐代表赴滬。作爲總理大臣全權代表。專爲討論大局之利害。其權限所在。祇以切實討論爲範圍。乃迭接唐代表電開與貴代表會議各條。均未先與本大臣商明。遽行簽定。本大臣以其中有必須聲明及礙難實行各節。電請唐代表轉致。嗣據唐代表一再來電。請辭代表之任。未可強留。現經請旨准其辭任。至另委代表接議。一時尙難其人。且南行需時。嗣後應商事件。先由本大臣與貴代表直接往返電商。以期簡捷。冀可早日和平解決。特此電達。謹聞。內閣鹽一。（郭孝成中國革命紀事本末第三編袁世凱致伍廷芳電）

北京袁總理鑒。文前日抵滬。諸同志皆以組織臨時政府之責任相屬。問其理由。蓋以東南諸省久缺統一之

機關行動非常困難。故以組織臨時政府爲生存之必要條件。文既審艱虞。義不容辭。祇得暫時担任。公方以旋轉乾坤自任。即知億兆屬望。而目前之地位。尙不能不引嫌自避。故文雖暫時承乏。而虛位以待之心。終可大白於將來。望早定大計。以慰四萬萬人之渴望。孫文。蒸。（郭孝成中國革命紀事本末第三編）

孫逸仙君鑒。蒸電悉。君主共和問題。現方付之國民公決。所決如何。無從預揣。臨時政府之說。未敢與聞。謬承獎誘。慚悚至不敢當。惟希諒鑒爲幸。凱。鹽。（郭孝成中國革命紀事本末第三編）

袁慰亭君鑒。鹽電悉。文不忍南北戰爭。生靈塗炭。故於議和之舉。並不反對。雖民主君主。不待再計。而君之苦心。自有人諒之。倘由君之力。不勞戰爭。達國民之志願。保民族之調和。清室亦得安樂。一舉數善。推功讓能。自是公論。文承各省推舉。誓詞具在。區區此心。天日鑒之。若以文爲有誘致之意。則誤會矣。孫文叩。（郭孝成中國革命紀事本末第三編）

（乙）清室退位

袁世凱既爲內閣總理大臣。廢除監國攝政王。先收回禁衛軍。以保護爲名。遍布守軍於邸第。然後遣胡惟德、趙秉鈞、梁士詒入宮。力說隆裕退位。訂優待條件。清室王公及蒙古王公仍保舊時爵位。與清室歲費四百萬元。而愛新覺羅入主中國二百六十八年之局遂以遜位告終。

九月庚寅。^{二十}諭……袁世凱面奏組織內閣。推舉國務大臣。著命梁敦彥爲外務大臣。趙秉鈞爲民政大臣。嚴修爲度支大臣。唐景崇爲學務大臣。王士珍爲陸軍大臣。薩鎮冰爲海軍大臣。沈家本爲司法大臣。張謇爲農工商大臣。楊士琦署郵傳大臣。達壽爲理藩大臣。梁敦彥、嚴修、王士珍、薩鎮冰、張謇未到任以前。外務大臣著胡惟德暫行署理。度支大臣著紹英暫時署理。陸軍大臣著壽勳暫行署理。海軍大臣著譚學衡暫行兼署。農工商大臣著熙彥暫行署理。（宣統政紀卷六四）

一九二一年
一月十六日 上午十一時三刻頃。（袁）世凱乘雙馬車。擁大隊騎兵於前後。出東華門。以過東華門大街。（張）先培自三義茶葉店樓上。擲下一彈。……彈發車覆。……世凱出覆車後。……遂於馬上下令還擊搜捕。適先培追襲至。世凱衛弁槍擊先培頭。先培踏地。……被捕。（辛亥革命北方實錄）

一月二十二日^{辛亥十二月十四日}我大總統始提出最後協議五條。交由民國政府伍廷芳轉告清內閣總理大臣袁世凱。一。清帝退位。由袁同時知照駐京各國公使。請轉知民國政府。現在清帝已經退位。或轉飭旅滬領事轉達亦可。二。同時。袁須布政見。絕對贊成共和主義。三。文接到外交團或領事團通知清帝退位布告後。即行辭職。四。由參議院舉袁爲臨時總統。五。袁被舉爲臨時總統後。誓守參議院所定之憲法。乃能授受事權。（辛亥革命北方實錄）

一月二十六日 彭家珍假得崇恭名刺。謁良弼於北京紅羅廠。適良弼由外歸。甫下車。家珍投以彈。彈發。爆下馬石。良弼應聲騰空而起。斷一足。家珍當被碎石裂腦以殉。良弼亦以重傷繼家珍而死。（辛亥革命北方實錄）

十二月己酉。諭……前據岑春煊、袁樹勛等。暨出使大臣陸徵祥等。統兵大員段祺瑞等。電請速定共和國體。以免生靈塗炭等語。現在時局阡危。四民失業。朝廷亦何忍因一姓之尊榮。貽萬民以實禍。惟是宗廟陵寢。關繫重要。以及皇室之優禮。皇族之安全。八旗之生計。蒙古回藏之待遇。均應豫爲籌畫。著授袁世凱以全權。研究一切辦法。先行迅速與民軍商酌條件。奏明請旨。（宣統政紀卷七〇）

乙巳。太后復召集王公。特開御前會議。各王公仍唯諾無決詞。太后曰。爾等反復推求。遷延不定。疑義繁生。將來必演出同室操戈塗炭生靈之慘劇。此後茲事由我一人担承耳。辭色甚厲。罷會。召袁內閣。撰擬宣布共和詔旨。（尙秉和辛壬春秋第二六清室禪政記）

參議院乃於二月十二日辛亥年十二月二十五日議決。如三日內不依約退位。即收回優待條件。（張難先湖北革命知之錄中華民國政府成立）

戊午。二月十日……諭……欽奉隆裕皇太后懿旨。前因民軍起事。各省響應。九夏沸騰。生靈塗炭。特命袁世凱遣員與民軍代表討論大局。議開國會。公決政體。兩月以來。尙無確當辦法。南北睽隔。彼此相持。商輟於塗。士露於野。徒以國體一日不決。故民生一日不安。今全國人民心理。多傾向共和。南中各省既倡議於前。北方諸將亦主張於後。人心所嚮。天命可知。予亦何忍因一姓之尊榮。拂兆民之好惡。是用外觀大勢。內審輿情。特率皇帝將統治權公諸全國。定爲立憲共和國體。近慰海內厭亂望治之心。遠協古聖天下爲公之義。袁世凱前經資政院選爲總理大臣。當茲新舊代謝之際。宜有南北統一之方。即由袁世凱以全權組織臨時共和政府。

與民軍協商統一辦法。總期人民安堵。海宇乂安。仍合滿、蒙、回、藏五族完全領土。爲一大中華民國。予與皇帝得以退處寬閒。優游歲月。長受國民之優禮。親見鄧治之告成。豈不懿歟。（宣統政紀卷七〇）

又奉懿旨。前以大局阽危。兆民困苦。特飭內閣與民軍商酌優待皇室各條件。以期和平解決。茲據覆奏。民軍所開優禮條件。於宗廟陵寢永遠奉祀。先皇陵制如舊。妥修各節。均已一律擔承。皇帝但卸政權。不廢尊號。並議定優待皇室八條。待遇皇族四條。待遇滿、蒙、回、藏七條。寬奏尙爲周至。特行宣示皇族暨滿、蒙、回、藏人等。此後務當化除畛域。共保治安。重視世界之昇平。胥享共和之幸福。予有厚望焉。附錄優待條件。甲。關於大清皇帝宣布贊成共和國體。中華民國於大清皇帝辭位之後。優待條件如左。第一款。大清皇帝辭位之後。尊號仍存不廢。中華民國以待各外國君主之禮相待。第二款。大清皇帝辭位之後。歲用四百萬兩。俟改鑄新幣後。改爲四百萬圓。此款由中華民國撥用。第三款。大清皇帝辭位之後。暫居宮禁。日後移居頤和園。侍衛人等照常留用。第四款。大清皇帝辭位之後。其宗廟陵寢永遠奉祀。由中華民國酌設衛兵。妥慎保護。第五款。德宗崇陵未完工程。如制妥修。其奉安典禮。仍如舊制。所有實用經費。均由中華民國支出。第六款。以前宮內所用各項執事人員。可照常留用。惟以後不得再招閹人。第七款。大清皇帝辭位之後。原有之私產。由中華民國特別保護。第八款。原有之禁衛軍。歸中華民國陸軍部編制。額數俸饌仍如其舊。乙。關於清族待遇之條件。一。清王公世爵概仍其舊。二。清皇族對於中華民國國家之公權及私權。與國民同等。三。清皇族私產一體保護。四。清皇族免當兵之義務。丙。關於滿、蒙、回、藏各族待遇之條件。今因滿、蒙、回、藏各民族贊同共和。中華民國所以待遇

者如左。一。與漢人平等。二。保護其原有之私產。三。王公世爵概仍其舊。四。王公中有生計過艱者。設法代籌生計。五。先籌八旗生計。於未籌定之前。八旗兵弁俸饌仍舊支放。六。從前營業居住等限制。一律蠲除。各州縣聽其自由入籍。七。滿、蒙、回、藏原有之宗教。聽其自由信仰。以上條件。列於正式公文。由兩方代表照會各國駐北京公使。轉達各該政府。（宣統政紀卷七〇）

清廷因即日退位。袁世凱亦電臨時政府。宣布政見。絕對贊成共和主義。總理乃按各省代表會之原議。於二月十三日。提出辭職書於參議院。十四日。可決。十五日。參議院開臨時大總統選舉會。袁世凱當選爲中華民國臨時大總統。二十日。參議院開臨時副總統選舉會。黎元洪當選爲臨時副總統。自袁世凱當選臨時大總統後。臨時政府即派教育總長蔡元培。外交次長魏宸組。海軍顧問劉冠雄。參謀次長鈕永建。法制局總裁宋教仁。及汪精衛、戴傳賢、萬廷獻等爲專使。迎袁世凱來南京就職。二月二十六日。抵北京。袁從之不願。拒之不可。乃喚第三鎮統制曹錕所部兵變。二十九日晚八時。東安門外及前門外一帶。火光燭天。土匪乘之。搶掠達旦。商民被害者數千家。蔡等住政法學堂。亂兵持槍闖入。魏宸組越牆走。蔡元培、汪精衛匿於隱室。局戶息燈。僅免於難。袁復故作謠言。謂係反對於彼等。等風說。以淆視聽。蔡等爲所欺。三月二日。電臨時政府及參議院。略謂北京兵變。外人極爲激昂。日本已派兵入京。設使再有此等事發生。外人自由行動。恐不可免。培等睹此情形。集議以爲速建統一政府。爲今日最要問題。餘儘可遷就。以定大局。於是三月初六日。參議院議決辦法六條。允袁世凱在北京就職。惟須電參議院宣誓。袁世凱乃在北京就臨時大總統職。並電傳誓詞於參議院。

……袁世凱就職後。擬派唐紹儀爲國務總理。經參議院通過任命。三月二十五日。唐來寧組織新內閣。增爲十一部。提出參議院通過。陸軍總長段祺瑞。海軍總長劉冠雄。外交總長陸徵祥。司法總長王寵惠。財政總長熊希齡。內務總長趙秉鈞。教育總長蔡元培。實業總長張謇。交通總長施肇基。農林總長宋教仁。工商總長陳其美。大總統就職。國務員議定臨時約法。參議院於二月初六日起。開至三月初八日。全案告終。即日宣布。三月十一日。臨時大總統公布之。中華民國之雛形。可謂完全告成矣。（張難先湖北革命知之錄中華民國政府成立）

明清兩代社會生活

(一) 制度

(1) 田制

(甲) 田之種類

明

明初嚴覈田數。設魚鱗冊以盡田形。設黃冊以稽戶役。豪猾無所隱其姦。又召民開墾荒地。天下田數達八百餘萬頃。

國初兩浙富民。畏避徭役。往往以田產詭託親鄰佃僕。謂之鐵腳詭寄。久之相沿成風。鄉里欺州縣。州縣欺府。奸弊百出。謂之通天詭寄。上素知其弊。及卽位乃遣國子生武淳等。往各處集里甲耆民。躬歷田畝以量度之。圖其田之方圓。次其字號。書其主名。及田丈尺四至。類編爲冊。以所繪若魚鱗然。故號魚鱗圖冊。(徐學聚國朝典彙卷九〇)

明太祖卽帝位。遣周鑄等百六十四人。覈浙西田畝。定其賦稅。復命戶部覈實天下土田。……先是詔天下編黃冊。以戶爲主。詳具舊管、新收、開除、實在之數爲四柱。而魚鱗圖冊以土田爲主。諸原坂、墳衍、下隰、沃瘠、沙鹵之別畢具。魚鱗冊爲經。土田之訟質焉。黃冊爲緯。賦役之法定焉。（明史卷七七食貨志）

又以中原田多蕪。命省臣議。計民授田。設司農司。開治河南掌其事。臨濠之田。驗其丁力。計畝給之。毋許兼并。北方近城地多不治。召民耕。人給十五畝。蔬地二畝。免租三年。每歲中書省奏天下墾田數。少者畝以千計。多者至二十餘萬。官給牛及農具者。乃收其稅。額外墾荒者。永不起科。二十六年。覈天下土田。總八百五十萬七千六百二十三頃。蓋駸駸無棄土矣。（明史卷七七食貨志）

「民田」

田有官田有民田。中葉以後。民田多奪於官。圖冊混亂。田數僅及明初之半。萬曆時。通丈全國之田。七百萬頃。終不能復原數。

明時土田二等。曰官田。曰民田。民所自占得買賣之田。曰民田。官田爲皇莊、還官田、沒官田、斷入官田、牧馬草場、城墻、苜蓿地、牲地、園陵、墳地、公占隙地、學田、諸王公主勳戚大臣內監寺觀賜乞莊田、職田、邊臣養廉田、軍民商屯田。國初。官田未廣。率皆前代公田及無主者。厥後上貪下僭。漸占民業。若沒官田全戶抄筭。有一沒、二沒、三沒者。斷入官田。因訟爭律應入官者。固皆民業也。若所屯之田。半屬逃亡絕戶之遺。亦民業也。降自中葉。官莊軍屯多而民田日寡矣。（王原深明食貨志卷三）

凡田以近郭爲上地。迤遠爲中地。下地。五尺爲步。步二百四十爲畝。畝百爲頃。太祖仍元里社制。河北諸州縣土著者。以社分里甲。遷民分屯之地。以屯分里甲。社民先占畝廣。屯民新占畝狹。故屯地謂之小畝。社地謂之廣畝。至宣德間。墾荒田永不起科。及洿下斥鹵無糧者。皆覈入賦額。數溢於舊。有司乃以大畝當小畝。以符舊額。有數畝當一畝者。步尺參差不一。人得以意贏縮。土地不均。未有如北方者。貴州田無頃畝尺籍。悉徵之土官。而諸處土田。日久頗淆亂。與黃冊不符。弘治十五年。天下土田。止四百二十二萬八千五十八頃。官田視民田得七之一。……其後福建諸州縣爲經緯二冊。其法頗詳。然率以地爲主。田多者猶得上下其手。神宗初。建昌知府許孚遠。爲歸戶冊。則以田從人。法簡而密矣。萬曆六年。帝用大學士張居正議。天下田畝。通行丈量。限三載竣事。用開方法。以徑圍乘除。畸零截補。於是豪猾不得欺隱。里甲免賠累。而小民無虛糧。總計田數七百一萬三千九百七十六頃。視弘治時贏三百萬頃。（明史卷七七食貨志）

「軍屯」

屯田有軍屯。有民屯。有商屯。邊軍自耕以給餉。曰軍屯。邊地祁寒。軍屯漸廢。萬曆時遼東寬甸等六堡。農田甚盛。然民所自墾。非軍屯也。

太祖初。立民兵萬戶府。寓兵於農。其法最善。又令諸將屯兵龍江諸處。惟康茂才績最。乃下令褒之。因以申飭將士。洪武三年。中書省請稅太原朔州屯卒。命勿徵。明年。中書省言。河南山東北平陝西山西及直隸淮安諸府屯田。凡官給牛種者十稅五。自備者十稅三。詔且勿徵。三年後畝收租一斗。……而軍屯則領之衛所。邊地

三分守城。七分屯種。內地二分守城。八分屯種。每軍受田五十畝……初畝稅一斗。三十五年定科。則軍田一分。正糧十二石。貯屯倉。聽本軍自支。餘糧爲本衛所官軍俸糧。永樂初。定屯田官軍賞罰例。歲食米十二石外。餘六石爲率。多者賞鈔。缺者罰俸。又以田肥瘠不同。法宜有別。命軍官各種樣田。以其歲收之數相考較……又更定屯守之數。臨邊險要。守多於屯。地僻處及輸糧艱者。屯多於守。屯兵百名委百戶。三百名委千戶。五百名以上。指揮提督之。屯設紅牌。列則例於上。年六十與殘疾及幼者。耕以自食。不限於例。屯軍以公事妨農務者。免徵子粒。且禁衛所差撥。（明史卷七七食貨志）

惟我太祖。加意於此。視古最詳。考其迹。則往所有閑地。卽分軍以立屯。考其制。則三分守城。七分屯種。以言其數。則外而遼東一萬一千三百八十六頃。內而極安如浙江者。亦有二千二百七十四頃。一十九畝六分六絲六忽。推之於南北二京衛所。陝西、山西諸省。尤極備焉。（徐學聚國朝典彙卷二五六屯田）

「民屯」

荒地召民開墾。其編入什伍。設長以督者。曰民屯。官予牛種。收所入以給軍。日久。民或逃亡。其留者多起科。

四年。洪武命工部遣官往廣西買耕牛。以給中原屯種之民。五年正月。詔今後犯罪當戍兩廣者。發臨濠屯田。（徐學聚國朝典彙卷二五六屯田）

六年。洪武太僕丞梁楚僊帖木爾言寧夏境內及四川西南至船城東北至塔灘相去八百里。土膏沃。宜招集流亡屯田。從之。是時遣鄧愈、湯和諸將屯陝西、彰德、汝寧、北平、永平。徙山西、真定民屯鳳陽。又因海運餉遼。有溺死者。遂益講屯政。天下衛所州縣軍民。皆事墾闢矣。其制移民就寬鄉。或召募。或罪徙者爲民屯。皆領之有司。

（明史卷七七食貨志）

嘉靖十年五月。陝西巡按御史陳世輔言。本鎮沿邊一帶。宜行鎮巡官。同守巡官。遍歷邊地。逐一閱視城塹墩堡。宜修設者。以時興舉。堡塞修。始議耕種。量其土宜。設立大小屯堡。大者百人。立屯長副。小者五十人。立屯長。令督責耕種。缺種者官給秋還。舊納糧者收稅。不納糧者三年後起科。近墩設小教場。暇則習射其間。……

（徐學聚國朝典彙卷二五六屯田）

「商屯」

明仿宋制。使商納糧於邊。而償以池鹽。曰商屯。亦曰開中。及鹽法壞。商納糧而鹽不時得。商屯遂廢。

明初。募鹽商於各邊開中。謂之商屯。迨弘治中。葉淇變法。而開中始壞。諸淮南悉撤業歸。西北商亦多徙家於淮。邊地爲墟。米石直銀五兩。而邊儲枵然矣。世宗時。楊一清復請召商開中。又謂倣古募民實塞下之意。招徠隴右。關西民以屯邊。其後周澤、王崇古、林富、陳世輔、王畿、王朝用、唐順之、吳桂芳等。爭言屯政。而龐尙鵬總理江北鹽屯。尋移九邊。與總督王崇古先後區畫屯政甚詳。然是時因循日久。卒鮮實效。（明史卷七七食貨志）

「莊田」

自官田沒入者曰皇莊。

天順八年十月。憲宗初立宮中莊田。順義縣安樂里板橋村原額地一十頃十三畝。初太監曹吉祥佔軍地二十四頃八十四畝。共三十五頃沒入官。至是撥爲宮中莊田。皇莊之名始此。（徐學聚國朝典彙卷一九）

弘治二年。戶部尙書李敏等。以災異上言。畿內皇莊有五。共地萬二千八百餘頃。……武宗卽位。踰月卽建皇莊七。其後增至三百餘處。……世宗初。……戶部尙書孫交造皇莊新冊。額減於舊。帝命覈先年頃畝數以聞。

改稱官地。不復名皇莊。詔所司徵銀解部。然多爲官寺中飽。積逋至數十萬以爲常。（明史卷七七食貨志）

正德八年八月。立皇莊五處。一昌平州樓子村。一靜海衛河兩岸。一青縣孫兒莊。一安州驢馬廟。一清苑閻社。

……嘉靖元年十月。勅覈畿內皇莊。……已而言（夏言）等。會同順天、保定各巡按孟春、周季鳳。巡撫王琳、

宋越等。勘出各項田莊。共計二十萬九百一十九頃二十八畝。其侵佔民田二萬二百二十九頃二十八畝。俱

令還民。言等又以原勅係皇莊者。解部類進。猶非國體。復疏詳述皇莊創立之始。及莊甲培植之害。因及皇店

皇鹽罔利之非。乞併掃除。以洗累朝之弊。垂百代之休。從之。改皇莊爲官地云。（徐學聚國朝典彙卷一九）

賜田。王曰王府莊。勳戚曰勳戚莊。皆不納國賦。多者至數萬頃。

太祖賜勳臣公侯丞相以下莊田。多者百頃。親王莊田千頃。又賜公侯暨武臣公田。又賜百官公田。以其租入充祿。指揮沒於陣者。皆賜公田。勳臣莊佃。多倚威扞禁。帝召諸臣戒諭之。其後公侯復歲祿。歸賜田於官。……

初洪熙時。有仁壽宮莊。其後又有清寧、未央宮莊。天順三年。以諸王未出閣。供用浩繁。立東宮、德王、秀王莊田。二王之濟。地仍歸官。……神宗寶予過侈。求無不獲。潞王、壽陽公主恩最渥。而福王分封。括河南、山東、湖廣田爲王莊。至四萬頃。羣臣力爭。乃減其半。（明史卷七七食貨志）

……正德二年十月。賜皇親沈傳、吳讓靜海縣莊田六千五百餘頃。讓妻厲氏奏河間靜海莊田一處。係河淤退灘田土。乞照皇親夏儒事例給與管業。蓋奸民李良等捏稱投獻也。事下戶部。查河間莊田冊。並無靜海河淤退灘地。及差官勘前地頃畝數。多見有軍民管業。難便定擬。覆奏。上不從。卒賜二家爲莊田永業。（徐學聚國朝典彙卷一九）

弘治二年。戶部尙書李敏等。以災異上言。畿內……勳戚中官莊田三百三十有二。共地三萬三千餘頃。（明史卷七七食貨志）

徵、興、岐、衡四王。田多至七千餘頃。會昌、建昌、慶雲三侯爭田。帝輒賜之。（明史卷七七食貨志）

奏乞者多。莊田日濫。

……嘉靖四年。玉田伯蔣輪請故宜興大長公主田千頃。言官部臣。皆執不可。上特許割其半畀之。詔至今但係先朝給賜戚畹田土。不許妄爭。以傷朝廷大義。（徐學聚國朝典彙卷一九）

成化三年。慶雲伯周壽受奸民李政等投獻。奏乞慶都、清苑、清河地。共五千四百餘頃。長寧伯周或受奸民魏忠等投獻。奏乞景州、東光地一千九百餘頃作莊田。（徐學聚國朝典彙卷一九）

嘉靖又革王府所請山場湖陂。德王請齊、漢二庶人所遺東昌、袁州閒田。又請白雲等湖。山東巡撫邵錫按新令却之。語甚切。德王爭之數四。帝乃從部議。但存藩封初請莊田。其後有奏請者不聽。……（明史卷七七食貨志）

占奪民田者尤衆。

永樂七年。隆平侯張信強占練湖八十餘里。又占江陰縣官田七十餘頃。爲都御史陳瑛所劾。……命法司雜治之。（徐學聚國朝典彙卷一九）

至英宗時。諸王、外戚、中官所在占官私田。或反誣民占。請案治。比案間得實。帝命還之民者非一。乃下詔禁奪民田。及奏請畿內地。然權貴宗室莊田墳塋。或賜或請。不可勝計。（明史卷七七食貨志）

正德十六年七月。戶部覆巡按御史范永鑾奏言。靜海縣瀕海地多閒曠。小民自行墾闢納稅。百有餘年。近皇親沈傳、吳讓。受奸民投獻冒奪之。因蠶食延袤百里。履畝而稅。貧民採捕魚蛤者。皆令輸租。不堪其擾。又天津諸衛。逆瑾受獻爲莊田者。不下千頃。瑾敗入官。而諸內臣又一切傳奏。號爲皇莊。雖屢奉詔查覈。而不令主者得還。故產日流移。宜令撫按查勘。二皇親係冒占者。即以予民。諸勳戚莊田皆宜如例。禁勿多取。遇災則蠲之。不奉詔者罪如律。上曰可。（徐學聚國朝典彙卷一九）

嘉靖三十九年。遣御史沈陽清奪隱冒莊田萬六千餘頃。（明史卷七七食貨志）

後乃議限以頃數。然卒不能行。

先是戶部奉旨酌議裁革勦戚冒濫莊田。勦臣傳派五世者限田百頃。戚畹限田七百頃。宗支已絕及失爵者。奪之。奸民影射者。徵租。至是。……上曰。傳派五世勦臣。及公主見在駙馬各莊田。仍會同屯田御史議定。應留頃數規則以聞。部又更議元勦世裔限以百頃。勦戚半者限田五十頃。駙馬李和子原議七百頃外。益以三百頃。以足千頃之數。詔如議。（徐學聚國朝典彙卷一九）

穆宗從御史王廷瞻言。復定世次遞減之限。勦臣五世限田二百頃。戚畹七百頃至七十頃有差。……熹宗時。桂、惠、瑞三王。及遂平、寧國二公主。莊田動以萬計。而魏忠賢一門。橫賜尤甚。（明史卷七七食貨志）

清

「民田」

清初經明季之亂。逃亡未復。土地荒蕪。田數僅五百餘萬頃。至乾隆之末。遂達七百萬頃。幾與明季相埒。百餘年間。日以勸農爲事。至以實官獎勵墾荒。並以此爲官吏考成。熟荒固易恢復。而生荒若關外奉、吉、黑之地。亦得以開發。

順治元年。一六四四年定開墾荒地之例。州縣衛所荒地。分給流民及官兵屯種。有主者令原主開墾。官給牛種。三

年起科。……六年。一六五一年始定州縣以上官以勸墾爲考成。凡地方官招徠各處逃民。不論原籍別籍。編入保

甲。開墾荒田。給以印信執照。永準爲業。三年後有司親察成熟畝數。撫按勘實。奏請徵糧。不得預徵私派。州縣

以勸墾之多寡爲優劣。道府以督催之勤惰爲殿最。每歲終載入考成。至十五年。一六五定督撫一年內開墾

荒地二千頃至八千頃以上。道府開墾千頃至六千頃以上。州縣開墾百頃至六百頃以上。衛所開墾五十頃至二百頃以上。分別議敘。不準以二三年墾數合算。（皇朝文獻通考卷一田賦考）

康熙二年。一六六申明地方官開墾勸懲之例。凡督撫、道府、州縣開墾多者。照順治十五年議敘之例。州縣、衛

所荒地一年內全無開墾者。令督撫提參。其已墾而復荒者。削去各官開墾時所得加級紀錄。仍限一年督令開墾。限內不完者分別降罰。前任官墾過熟地。後任官復荒者。亦照此例議處。又以各省開墾甚多。自康熙二

年爲始。限五年墾完。如六年之後。蔡出荒蕪尙多。將督撫以下分別議處。至三年。一六六以布政使亦有督墾

之責。照督撫例議敘。府同知通判不與知府同城。自勸民開墾者。照州縣例議敘。四年。一六六以限年墾荒。恐

州縣捏報攤派。令停止。六年。一六六定勸墾各官。俟三年起科。錢糧如數全完。取具里老無包賠荒地甘結到

部。始準議敘。（皇朝文獻通考卷二田賦考）

康熙十年。一六七準貢監生員民人墾地二十頃以上。試其文義通者。以縣丞用。不能通曉者。以百總用。一百

頃以上。文義通順者。以知縣用。不能通曉者。以守備用。凡招民墾荒。督撫具題。戶部核明起科果實。送吏兵二部照例分敘。其招民不足額。墾地錢糧未經起解。假捏出結具題者。捏報州縣官革職。轉報司道府降四級調

用。題報督撫降二級調用。（皇朝文獻通考卷二田賦考）

乾隆五年。一七四有零星土地永免升科之諭。初猶限以畝數。至十一年。一七四以廣東高、雷、廉等府。所墾荒

地。本非沃壤。一七五十八年。一七五以瓊州海外瘠區。一七六三十一年。一七六以滇省山頭地角尙有曠土。皆聽民耕種。不限畝數。概免升科。（王慶雲熙朝紀政卷四紀勸墾）

授時通考之頒行。亦足見其重視勸農。

乾隆二年。一七三諭。……朕思爲耒耜教樹藝。皆始於上古聖人。其播種之方。耕耨之節。與夫備旱驅蝗之術。散見經籍。至詳且備。後世農家者流。其說亦各有可取。所當薈萃成書。頒布中外。庶三農九穀。各得其宜。望杏瞻蒲。無失其候。著南書房翰林。同武英殿翰林編纂。至六年。一七四書成。凡七十五卷。名曰授時通考。（皇朝

文獻通考卷四田賦考）

其次則爲清丈。所以杜隱匿也。

順治十一年。一六五定丈量規制。州縣地用步弓。各旗莊屯地用繩。如有民地缺額。督撫詳查開除。至十二年。

一六五頒部鑄步弓尺於天下。廣一步縱二百四十步爲畝。方廣十五步。縱十六步。有司於農隙時。親率里甲。履畝丈勘。以

定疆界。杜占爭。均畝賦。凡丈量之制。州縣冊籍。原載坵段四至不清者丈。欺隱牽累。有地無糧者。有糧無地者丈。畝步不符。賦則或浮者丈。熟荒相間。旗民鹽竈。以及邊地民番相錯者丈。壤界相接。畛域不分者丈。荒蕪召墾。寄糧分隸者丈。水衝沙壓。公占應抵應豁者丈。瀕江瀕海之區。五年一丈。視其或漲或坍。分別升免。（皇朝文獻通考卷一田賦考）

康熙二十九年。一六九清丈蘆洲田畝。……三十三年。一六九清丈福建沿海地。……三十四年。一六九定雲

南清浪衛業經清丈田地。每十畝科糧一石。（皇朝文獻通考卷二田賦考）

雍正元年。^{一七二三年}又以瀕江近海之區。定制十年清丈一次。恐未至十年。有坍漲者。令各州縣衛所官。不時清查。坍者卽行豁免。漲者卽行升科。……六年。^{一七二八年}定沿江濱海地畝五年一丈。新墾者升科。坍場者除賦。

（皇朝文獻通考卷三田賦考）

明清兩代墾田數比較表

朝	年	號	墾	田	數
明	洪武二十六年		八百五十萬七千六百二十三頃		
明	弘治十五年		四百二十二萬八千五十八頃		
明	萬曆六年		七百一萬三千九百七十六頃		
清	順治十八年		五百四十九萬三千五百七十六頃四十畝		
清	康熙二十四年		六百七萬八千四百三十頃一畝有奇		
清	雍正二年		六百八十三萬七千九百十四頃二十七畝有奇		
清	乾隆十八年		七百八萬一千一百四十二頃八十八畝		
清	乾隆三十一年		七百四十一萬四千四百九十五頃五十畝有奇		
清	嘉慶十七年		七百九十一萬五千二百五十一頃有奇		

「屯田」

清初以黔、蜀人少。大興屯田。漸及甘、新。乾隆時。各省屯田合計達二十九萬餘頃。

前明衛所之設。以屯養軍。以軍隸衛。唐府兵遺法也。自軍政廢弛。始募民爲兵。於是屯軍專職漕運。無漕之軍。受役不得休息。屯戶始大困矣。國初因明之舊。衛所屯田。給軍分佃。罷其雜徭。尋裁指揮。設守備。改衛軍爲屯丁。令無運。屯田同民田一體起科。順治十三年。令浙江各衛。有屯無運與無屯有運者。均徵撥帖。而屯困稍蘇。雍正二年。從廷臣請。以內地屯衛。悉歸併州縣管轄。裁都司以下官。惟帶運之屯。與邊衛無州縣可歸者。仍舊。初屯丁賣產。有司利其稅入。給契令得賣買。既而禁之。屯丁貧不能贖。民間執業已久。於是有加津貼運之令。自國初以來。屢減免各省重額屯糧與其耗羨。而屯田之利病。實與漕運相終始云。若夫墾荒與屯之令。定於世祖入關之始。康熙五年。御史肅震疏請黔蜀屯田。略曰。國用不敷之故。由於養兵。以歲費言之。兵餉居其八。以兵餉言之。綠旗又居其八。今黔蜀地多人少。誠行屯田之制。駐一郡之兵。即耕其郡之地。駐一縣之兵。即耕其縣之地。養兵之費既省。荒田亦可漸闢。下部議行。雍正初。令安西兵丁試行屯墾。後又招民於淵泉縣之柳溝、玉門縣之赤金等處。承種屯田。又設甘肅柳林湖屯田。屬涼州鎮番縣乾隆初。黔苗底定。以絕產給兵屯糧種。又於直隸口外、八溝、塔子溝及甘肅瓜州等處興屯。今案乾隆三十一年。各省屯田三十九萬餘頃。屯賦銀七十八萬五千兩。屯糧九百萬七千石有奇。新疆屯田。自準夷四部。悉隸版圖。邊防與屯政相爲表裏。東自巴里坤。西至伊犁。北至科布多。南至哈喇沙爾。天山左右。水土沃饒。前後墾闢十數萬畝。邊民永無餽餉之勞。其各城回

民。納糧以帕特瑪。每一帕特瑪合官石五石三斗納普爾錢以騰格。每五十普爾爲一騰格。每二騰格爲一兩疆里及於戎索。而計冊待夫重譯。尤古所未聞。暨金川既平。留兵屯戍。償拉美諸之降番亦給地。俾安耕鑿焉。（王慶雲熙朝紀政卷四紀屯田）

清因明舊衛屯。給軍分佃。罷其雜徭。順治元年。遣御史巡視屯田。三年。定屯田官制。衛設守備一。兼管屯田。又千總、百總分理衛事。改衛軍爲屯丁。六年。定直隸屯地輸租例。其時裁屯田御史。繼裁巡按。由巡撫主之。十三年。定屯軍貼運例。……康熙十五年。以各衛荒田。在州縣轄境。軍地民田多影射。令檄所司清釐。雍正二年。從廷臣請。併內地屯衛於州縣。裁都司以下官。惟帶運之屯與邊衛無州縣可歸者如故。九年。令屯衛田畝。可典於軍戶。不得私典與民。乾隆元年。豁免廣東屯田羨餘。因除各省軍田額外加增例。……五十四年。畢沅等奏各省屯丁。四年一編審。止稽戶口之數。其田產或有漏匿。以時覈之。百餘年來。屯田利病與漕運終始。……光緒二十四年。太常卿袁昶奏理屯田。因有改衛爲屯之論。令天下覈衛田畝數。詳定租章。而江西以租充餉。與他省贍運者不同。額仍舊貫。……明年（廿八年）諭各省勘實屯地。檄屯戶稅契執業。改屯餉爲丁糧。歸州徵解。除屯丁運軍名目。裁衛官。是時綜計各省屯田。約二十五萬餘頃。……宣統元年。浙撫增韞更請令承田者。但刻期報明。統不納價。部議即允占業。屯價不妨量收。蓋屯衛嬗變。時勢然也。（清史稿食貨志一田制）

「旗田」

清代官田。有旗田、官田之分。旗田之屬於內務府者。曰內務府官莊。所轄有糧莊。有莊頭。清初。隨入關者。圈地以耕。或近畿人民帶田來投者。皆曰莊頭。

初設官莊。以近畿民來歸者爲莊頭。給繩地。一繩四十二畝。其後編第各莊頭田土分四等。十年一編定。（清史稿食貨志一田制）

順治元年。設立官莊。是時近畿百姓帶地來投。設爲納銀莊頭。願領入官地畝者。亦爲納銀莊頭。各給繩地。：康熙八年。編各莊頭等第。以其田土編爲四等。至二十三年。題准每十年編定一次。（皇朝文獻通考卷五田賦考八旗田制）

乾隆十年十一月。奏准本司所屬大糧莊頭。共五百名。定例整分莊頭。各給地十八頃。半分莊頭。各給地九頃。內有自盛京隨從來京園地充當莊頭者。原園地畝自二三十頃至四五十頃不等。嗣後凡原園地畝。莊頭之缺。如伊子孫兄弟近族承替。仍照舊充當。無庸撤減。（總管內務府現行則例會計司卷一安設糧莊）

其園地百餘頃設壯丁十人以耕者。曰糧莊。

國初設近畿官莊百三十二所。每莊給田三百晌。每六畝爲一晌莊頭各給繩地。每四十二畝爲一繩隸內務府而徵其賦。（王慶

雲熙朝紀政卷六）

設糧莊。莊給地三百晌。晌約地六畝。莊地坐落順、保、永、宣各屬。奉天、山海關、古北口、喜峯口亦立之。皆領於內務府。此外有部、寺官莊。分隸禮部、光祿寺。又設園地。植瓜果蔬菜。選壯丁爲園頭。世宗初。設總理專官。司口外報糧編審。（清史稿食貨志一田制）

康熙二十四年。設立糧莊。每莊各給地千八百畝。舊例每莊壯丁十名。選一人爲莊頭。給田一百三十晌。場園

馬館。另給田四晌。莊丁蕃衍則留於本莊。缺則補足。給牛八頭。量給房屋、田種、口糧、器皿。免第一年錢糧。至是設糧莊。每莊地三百晌。其頭等二等莊頭。不准給牛。又山海關內、古北口、喜峯口外。糧莊每一所納糧百石。倉合石三百。山海關外。糧莊每一所納糧百二十石。倉合石四百三十二石至二十六年。題准於交納銀二百兩之莊頭內。改爲糧莊。增壯丁爲十五名。（皇朝文獻通考卷五田賦考八旗田制）

宗室官員及兵丁。圈地爲莊田。不屬內務府。圈地惟入關之初有之。雖以他處之地償還人民。然以斥鹵而納膏腴之賦。受害無窮。

順治元年。諭戶部曰。我朝定都燕京。期於久遠。凡近京各州縣無主荒田。爾部清釐。分給東來諸王勳臣兵丁人等。蓋非利其土地。以無處安置。故不得已而取之。可令滿漢分居。各理疆界。以杜爭端。於是巡按御史柳寅東條上滿漢分居五便。二年。令民地爲旗人指圈者。速以他處補給。美惡務令均平。十年。停止圈撥。然旗下退出荒地。與遊牧投來人丁。皆復行圈補。又有因圈補而並圈接壤民地者。康熙初。鼐拜當國。欲以正白旗屯莊給鑲黃旗。而另圈民地給正白旗。戶部尙書蘇納海。以撥地遲延罪死。總督朱昌祚。巡撫王登聯。以撥換地畝。旗民困苦上聞。亦逮死。及聖主親政。乃昭雪之。八年。諭。比年以來。復將民間房地。圈給旗下。以致民生失業。流離困苦。以後著停。今年所圈房地。俱著退還。並飭部將張家口、山海關等處曠土。換撥各旗耕種。並令新滿洲以官莊餘地撥給。其指圈之地歸民。是爲旗區地畝。旗人不習耕作。又以生齒日繁。始稍稍典賣矣。雍正初。清查旗地。動內帑贖回。凡不自首與定例後復私賣買者。皆入官爲公產旗地。嘉慶十七年額徵入官旗地三萬七千三百餘頃……凡贖入

官地。並抵帑、籍沒等田。皆徵其租。謂之旗租。嘉慶十一年徵收旗租銀四十萬三千餘兩。自旗人生計。日以不足。旗租歲充。飭賜。謹按會典。近畿之地。各旗王公宗室莊田。以頃計者一萬三千三百有奇。各旗官兵分撥莊田。以頃計者十四萬九百有奇。（王慶雲熙朝紀政卷四紀園地）

旗地典賣與民人者。乾隆時。由公家出價代爲取贖。謂之二次地。

乾隆四年。諭……其時旗人所得地畝。原足以資養贍。嗣因生齒日繁。恒產漸少。或因事急需。將地畝漸次典與民家爲業。閱久輾轉相授。已成民產。今欲典出旗地。陸續贖回……可將此旨。行文直隸總督詳悉妥議。五年。議定取贖民典旗地及旗人下鄉種地之例……九年。定民典旗地減價取贖之令。凡民典旗地。不論契載年限。總以十年爲率。在十年之內者。照原價。十年以外者。減原價十分之一。二十年以外減十之二。三十年以外減十之三。四十年以外減十之四。五十年以外者。半價取贖。至十一年。復定取贖旗地。自十年以外。每年遞減。至五十年以外。仍以半價取贖。又令八旗官兵承買公產地者。亦照官贖減價……十八年。令嗣後旗下奴僕及開戶人典買旗地。定限一年內自首。官爲回贖。照民典旗地例。分年限價取贖。如係其主之地。十年以內。即減原價十分之一。十年以外。減十之二。以次遞減。若原主不能贖。即交八旗內務府作爲公產。官爲收租。歲終將收過租息數目奏聞。請旨賞給貧乏旗人。以資養贍……二十一年。諭。八旗另記檔案及養子開戶人等。俱准其出旗爲民……伊本身田產。應遵旨准其帶往爲業。至於老圈並典買八旗地畝。不便將旗地帶入民籍。應查明動官帑贖回……二十二年。准民奴典賣旗地。分別減價。先行發帑贖回。照旗地旗租之例收租……

二十八年。諭。上年因八旗回贖旗地。積至一萬餘頃之多。降旨令戶部會同內務府八旗大臣定議。以三千頃安設莊頭。俱賞給八旗作爲恒產。（皇朝文獻通考卷五田賦考八旗田制）

乾隆五年。部議准直隸督臣奏。一取贖民典旗地。百姓不苦於得價還地。實懼其奪田別佃。應令地方官於贖地之時。將見在佃戶及見出之租數。造冊備案。嗣後無論何人承買。仍令原佃承種。其租銀照舊。如莊頭土豪無故增租奪佃者。罪之。……二十三年。諭。出旗爲民之漢軍內。所有向日承種井田、屯田者。俱久賴地畝爲生。一旦將此項地畝撤出。未免失其生業。著將伊等現在承種地畝。加恩卽行賞給耕種。至四月。直隸總督方觀承言。漢軍出旗爲民人等。內有原領井田並屯種官地。蒙恩賞給耕種。帶入民籍。請將此項地畝。勘明村莊段落。填給印照註明。（皇朝文獻通考卷五田賦考八旗田制）

盛京莊田設於鐵嶺、承德、漸及喜峯口、黑龍江、呼蘭等地。每丁分地數十至百餘畝。給口糧籽種。科租以充兵餉。

順治五年。定八旗莊屯地界。國初按旗分處。各有定界。繼因邊內地瘠。糧不足支。展邊開墾。移兩黃旗於鐵嶺。兩白旗於安平。兩紅旗於石城。兩藍旗所分張義站、靖遠堡地瘠。以城地與之。至是復定官員莊屯。兩黃旗設於承德縣沙河所。兩白旗設於寧遠。兩紅旗設於承德縣塔山。兩藍旗設於錦州。又准沙河以外。錦州以內。八旗官員家丁。每名給地三十六畝。……康熙十八年。……更定兩便之法。奉天所屬。東自撫順起。西至寧遠州老天屯。南至蓋平縣攔石起。北至開原縣。除馬廠羊草地外。實丈出三十二萬九千四十九頃三十畝。定旗地

二十七萬六千三百二十二頃八十畝。新滿洲遷來。若撥種豆地。每六畝給地種一半。撥種穀米、黏米、高糧地。每六畝給各種六升。二十五年。以錦州、鳳城等八處荒地。分給旗民開墾。給以耕牛及口糧農器。……雍正十一年。喜峯口駐防兵丁一百名。以鐵門關外大屯地分給。每名給地一頃十有五畝七分。菜園四分有奇。令其耕種。照民例分別科則租銀。留充兵餉。乾隆二年。設立黑龍江屯莊。黑龍江湖蘭地方。設莊四十所。每十丁編爲一莊。令盛京將軍等。選八旗開戶壯丁四百名。各給地六十畝。房二間。并給口糧、籽種。六年。增設呼蘭莊屯。又擇閒丁五十名。增設莊五所。七年。設莊屯於溫得亭山及都爾圖地方。……選壯丁五十名。增設莊五所。各給牛種、器具、口糧。（皇朝文獻通考卷五田賦考八旗田制）

駐防莊田。則給各省駐防旗丁。自三十畝至二百餘畝不等。

順治四年。給江寧、西安駐防旗員園地。江寧六十畝至一百八十畝不等。西安二百四十畝或二百十有五畝不等。惟浙江駐防官兵。不給田。俸餉照經制支領。……七年。駐防官員等給園地。兵及壯丁。每名給地三十畝。臨清、太原。以無主地並官地撥給。保定、河間、滄州。以八旗退出地撥給。康熙三十一年。以山西陽曲、太原二縣屯地。給與駐防滿洲官兵。三十二年。令八旗駐防各省官兵。俱於所住之處。給與地畝。（皇朝文獻通考卷五田賦考八旗田制）

八旗莊田數簡表

旗別	莊園數	畝數	坐落地點
正黃旗	整莊五所。半莊十二所。莊四所。園三所。	共地百有六頃五十六畝。	大興、宛平、三河、寶坻、順義、涿州、房山、雄縣、易州、任邱、各州縣。
鑲黃旗	整莊四所。半莊一所。園一所。	共地三十六頃六十畝	大興、通州、武清、平谷、河間各州縣。
正白旗	整莊四所。半莊一所。園二所。	共地三十六頃。	順天、香河、通州、寶坻、房山及沙河所等處。
鑲白旗	整莊一百七十六所。半莊五所。莊八所。整園八所。園二十所。果地、靛地、網戶、獵戶等地七十六處。	共地千七百一十七頃十有四畝有奇。	大興、宛平、良鄉、固安、永清、東安、香河、通州、三河、武清、寶坻、昌平、密雲、懷柔、房山、霸州、薊州、玉田、平谷、遵化、豐潤、遷安、灤州、樂亭、保定、易州、河間、任邱、滄州、保安及遼陽、海城、蓋平、鐵嶺、山海關外等處。
正紅旗	整莊一百四十五所。半莊三所。整園五十所。半園十一所。	共地一千二百四十四頃十六畝。	順天、宛平、昌平、涿州、文安、保定、定興、涞水及遼陽、海城、蓋平各州縣。
鑲紅旗	整莊二百九十八所。半莊二十三所。莊五所。整園一百一十一所。半園二所。	共地二千六百三十頃一畝。	大興、宛平、永清、香河、通州、寶坻、昌平、涿州、房山、霸州、灤州、新城、河間、肅寧、滄州、延慶及張家口外等處。

<p>正藍旗</p> <p>整莊五百四十四所。 半莊一百五十一所。 莊二十二所。整園一百三十三所。半園十九所。園七十三所。果菜牧地五處。</p>	<p>共地五千三百十有三頃二十四畝有奇。</p>	<p>大興、宛平、良鄉、永清、東安、香河、通州、武清、昌平、順義、懷柔、涿州、房山、霸州、玉田、平谷、遵化、豐潤、永平、昌黎、灤州、樂亭、新城、易州、青縣、無極、保安及承德、遼陽、開原、錦州、寧遠、廣寧、開平、冷口外等處。</p>
<p>鑲藍旗</p> <p>整莊二百三十一所。 半莊六十三所。莊九所。整園一百二所。半園二所。園三所。</p>	<p>共地二千二百五十四頃七十畝。</p>	<p>大興、宛平、固安、永清、東安、昌平、懷柔、灤州、蠡縣、安州、高陽及遼陽、海城、蓋平、錦州、開平等處。</p>

「官田」

清初承舊制。有藉田千餘畝。康熙時。命各省皆設藉田。

順治十一年。耕藉於南郊。藉田在正陽門外之西。中爲先農壇。壇內地一千七百畝。其二百畝。給壇戶種五穀蔬菜。以給祭祀之需。餘千五百畝。收租銀三百兩。以備修理壇牆。凡藉田歲收黍一石二斗二升一合八勺。穀一石五斗五升七合八勺。大麥五斗七升九合七勺。小麥一石三斗五升三合。藏之神倉。康熙四年。諭曰。天子爲藉千畝。諸侯百畝。……朕意欲令地方守土之官。行耕藉之禮。……著九卿詳議具奏。九卿會議請通行奉天。直隸各省。於該地方擇地爲藉田。每歲仲春。行九推之禮。明年。頒耕藉儀於直省。令擇東郊官地潔淨豐腴者。立爲藉田。如無官地。則置買民田。以四畝九分爲藉田。後立先農壇。令守壇之農夫。灌漑藉田。所收穀數。造

冊報部。（皇朝文獻通考卷一二田賦考官田）

藉田行於首都先農壇。壇地凡千七百畝。雍正間。令疆吏飭所屬置藉田。（清史稿食貨志一田制）

又有陵地。

東西陵地。紅椿以內。例絕耕樵。東陵白椿界外。初聽民耕。道光朝。乃嚴其禁。青椿以外。遵、薊、密、承諸界內。兵民私墾。至地萬餘區。久益增廓。光緒末。定爲計區勘丈。將熟地分則升科。儲學堂之用焉。（清史稿食貨志一田制）

學田。

凡京師壇壝官地。及天下社稷、山川、厲壇、文廟、祠墓、寺觀、祭田、公地。一切免徵。國初賜聖賢裔祭田。其孔林地、四氏學學田、墓田地、墳地。咸除租賦。學田專資建學。及贍卹貧士。佃耕租而租率不齊。舊無常額。乾隆中。都天下學田。萬一千五百八十餘頃。光緒變法。直省徧興學堂。需費無藝。則又撥所在荒地。劃留學田。以補劑之。（清史稿食貨志一田制）

井田。

先是以新城、固安官地二百四十頃。制井田。選旗民百戶。戶授百畝。公百畝。共力養公田。嗣更於霸州、永清仿行。然成效卒鮮。乾隆初。屯莊擇勤敏者充屯戶。按畝科糧。是爲井田改屯地。（清史稿食貨志一田制）

雍正二年。以新城、固安官地三百四十一頃。制爲井田。令無業旗民往耕。自十六歲以上。六十歲以下。各授田

百畝。外八分爲私田。中百畝爲公田。造廬舍。給口糧。牛種。農具咸備。又設管理勸教以董之。而願往者卒少。五年議將欠糧及犯法官兵。發往井田效力。則視爲徒作之地。操耒耜者。皆非安分食力之人。乾隆元年。遂改屯田爲屯莊。乾隆會典井田每戶原給田百二十五畝。以十二畝五分爲公田。十二畝五分爲寧廬場圃。以百畝爲私田。（王慶雲熙朝紀政卷四紀屯田附記井田）

凡牧地。皆爲官田。無所科徵。

牧馬草廠在畿輔者。順治二年。以近畿墾荒餘地。斥爲牧場。於順天、津、保各處。分旗置之。自御馬廠以下。各按其旗地牧養。親王方二里。郡王一里。亦圈地也。曰屯墾。康熙中。招墾天津兩翼牧地。計畝二萬一千五百餘。乾隆時。丈直隸馬廠地。振業貧民。命曰恩賞地。在盛京者。奉天屯衛各地。八旗分作牧廠。……大凌河東廠西廠荒地。三十一萬八百餘畝。養息牧餘地。萬四千六百晌。乾、嘉中。陸續放墾。後又綜各城旗馬廠可墾地。三十八萬九千餘畝。悉歸城旗承種。……同治二年。變通錦州、廣寧、義州廠荒。西廠留牧。東廠招佃。其東北隅之高山子地數萬畝。義州教場閒地萬餘畝。並行租佃。以爲城兵伍田。……彰武本官牧。旋亦勸墾議科。於是養息牧生熟地。共放六十一萬八千八百餘畝。其餘荒八萬九千六百餘畝。餘地三萬五千三百餘畝。即以爲蒙漢雜居牧佃。兼拊畜窮黎。吉林之烏拉。康熙時。於五屯分莊丁地。遂爲五官牧場。頗富零荒。宣統時。撥充學田。放墾二千三百餘晌。……至荆防馬廠。……光緒末。釐出廠地二萬餘畝。俱令招墾。以租息濟警政小學。宣統初。寧夏滿營牧地餘界。開渠墾地畝可二十一萬。旗民各半之。……安徽萬頃湖牧場。改墾放田八萬二千七百餘畝。其流民占耕及民間認荒者。皆名曰佃民。其留旗丁田二萬畝。亦招民佃歲輸穀麥。是爲官佃。……口外牧

場隸獨石者。爲御馬廠。此外禮部、太僕寺左右翼及八旗。均有牧場。在張家口外……其後密雲、熱河。同時放荒。熱河寬曠。於留牧外。得地千四百頃。更以三一留牧。餘咸招墾。（清史稿食貨志一田制）

（乙）賦役

明

「正賦」

明時。田分上中下三等。九則曰等則。租分夏稅、秋糧二等。納米麥曰本色。折銀絹雜物者曰折色。官田既多。賦獨在民。自正統折收金花銀兩後。民間納賦。除南漕外。多以銀不以米麥矣。

十四年。洪武創編賦役黃冊。以一百爲里。推丁糧多者十人爲里長。餘百戶分爲十甲。歲役里長一人。管攝一里之事。城中曰坊。近城曰廂。鄉都曰里。十年一周。每里編爲一冊。冊首總爲一圖。鰥寡孤獨不任役者。則帶管於一百一十戶之外。而列於圖後。名曰畸零冊。一本進戶部。各布政司及府州縣各存一本。十年攢造一次。遂爲定制。（徐學聚國朝典彙卷九〇）

太祖爲吳王。賦稅十取一。役法計田出夫。縣上中下三等。以賦十萬、六萬、三萬石下爲差。府三等。以賦二十萬、上、十萬石下爲差。即位之初。定賦役法。一以黃冊爲準。冊有丁有田。丁有役。田有租。租曰夏稅。曰秋糧。凡二

等。夏稅無過八月。秋糧無過明年二月。（明史卷七八食貨志）

洪武初。令官田起科。每畝五升三合五勺。民田每畝三升三合五勺。重租田每畝八升五合五勺。蘆地每畝五合三勺四抄。草場地每畝三合一勺。沒官田每畝一斗二升。……二十六年。定凡各州縣田土。必須開豁各戶若干。及條段四至。係官田者照依官田則例起科。係民田者照依民田則例徵歛。務要編入黃冊。以憑徵收稅糧。如有出賣。其買者聽令增收。賣者即當過割。不許灑派詭寄。（王圻續文獻通考卷三）

洪武九年。天下稅糧。令民以銀錢絹代輸。銀一兩。錢千文。鈔十貫。皆折輸米一石。小麥則減值十之二。棉苧一疋。折米六斗。麥七斗。麻布一疋。折米四斗。麥五斗。絲絹等各以輕重爲損益。願入粟者聽。十七年。雲南以金、銀、貝、布、漆、丹砂、水銀代秋租。於是謂米麥爲本色。而諸折納稅糧者謂之折色。（明史卷七八食貨志）

國初天下田土。總計八百四十九萬六千五百二十三頃。令徵科之數。制爲兩次。夏稅則納米麥四百七十一萬二千九百石。外此復輸錢三萬九千八百錠。絹三十八萬八千七百。秋糧則納米二千四百七十三萬四百石。外此復輸錢五千七百三十錠。絹五千九百。（徐學聚國朝典彙卷九〇）

雖歲貢銀三十萬兩有奇。而民間交易用銀。仍有厲禁。至正統元年。副都御史周銓言。行在各官俸支米。南京道遠費多。輒以米易貨。貴買賤售。十不及一。朝廷虛糜廩祿。各官不得實惠。請於南畿、浙江、江西、湖廣不通舟楫地。折收布絹、白金。解京充俸。江西巡撫趙新亦以爲言。戶部尙書黃福復條以請。帝以問行在尙書胡濙。濙對以太祖嘗折納稅糧於陝西、浙江。民以爲便。遂倣其制。米麥一石。折銀二錢五分。南畿、浙江、江西、湖廣、福建、

廣東、廣西米麥共四百餘萬石。折銀百萬餘兩入內承運庫。謂之金花銀。其後概行於天下。自起運兌運外。糧四石折銀一兩。解京以爲永例。……諸方賦入折銀。……而倉廩之積漸少矣。（明史卷七八食貨志二）

東南之賦特重。

初太祖定天下官民田賦。凡官田畝稅五升三合。民田減二升。重租田八升五合五勺。沒官田一斗二升。惟蘇、松、嘉、湖。怒其爲張士誠守。乃籍諸豪族及富民田。以爲官田。按私租爲稅額。而司農卿楊憲又以浙西地膏腴。增其賦。畝加二倍。故浙西官民田。視他方倍蓰。畝稅有二三石者。大抵蘇最重。嘉、湖次之。杭又次之。……建文二年。詔曰。江浙賦獨重。而蘇、松準私租起科。特以懲一時頑民。豈可爲定則。以重困一方。宜悉與減免。畝不得過一斗。成祖盡革建文之政。浙西之賦復重。宣宗即位。廣西布政使周幹。巡視蘇、常、嘉、湖諸府。還言諸府民多逃亡。詢之耆老。皆云賦重所致。……嘉靖。……越數年。乃從應天巡撫侯位奏。免蘇州埧海田糧九萬餘石。然那移飛灑之弊。相沿不改。至十八年。鼎臣（顧）爲大學士。復言蘇、松、常、鎮、嘉、湖、杭七府。供輸甲天下。而里胥豪右蠹弊特甚。宜將欺隱及坍荒田土。一一檢覈改正。（明史卷七八食貨志）

〔加餉〕

嘉靖時始加餉。

三十年始加派。自武宗正德九年。建乾清宮。加賦百萬。初天下財賦。歲入太倉庫者二百萬兩有奇。舊制以七分經費。而存積三分備兵。歉以爲常。世宗中年。邊供費繁。加以土木禱祀。月無虛日。帑藏既竭。二十九年。俺答

犯京師。增兵設戍。餉額過倍。三十年京邊歲用。至五百九十萬石。戶部尙書孫應奎蒿目無策。乃議於南畿、浙江等州縣。增賦百二十萬。加派於是始。嗣後京邊歲用。多者過五百萬。少者亦三百餘萬。歲入不能充歲出之半。由是度支爲一切之法。筭歛、財賄、題增、派括、贓贖、算稅契、折民壯、提編、均徭、推廣事例興焉。……明史食貨志曰。提編者加派之名也。其法以銀力差排編。十甲如一甲。不足則提下甲補之。時東南被倭。南畿、浙、閩皆有額外提編。江南至四十萬。及倭患平。應天巡撫周如年。乞減加派。給事中何燧亦具陳南畿困敝。言軍門養兵。工部料價。操江募兵。兵備道壯丁。府州縣鄉兵。率爲民累。甚者指一科十。請禁革之。命如燧議。而提編之額。仍不能減。（續文獻通考卷二田賦考）

萬曆時加遼餉。

其後接踵三大征。頗有加派。事畢旋已。至四十六年。驟增遼餉三百萬。時內帑充積。帝靳不肯發。戶部尙書李汝華乃援征倭播例。畝加三釐五毫。天下之賦增二百萬有奇。明年復加三釐五毫。明年以兵工二部請。復加二釐。通前後九釐。增賦五百二十萬。遂爲歲額。所不加者。畿內八府及貴州而已。（明史卷七八食貨志）

崇禎時復加遼餉三釐。

崇禎三年軍興。兵部尙書梁廷棟請增田賦。戶部尙書畢自嚴不能止。乃於九釐外。復加三釐。（明史卷七八食貨志）

至是軍興。兵部尙書梁廷棟又請增田賦。戶部尙書畢自嚴不能止。乃於九釐外。復徵三釐。惟順天永平以新

被兵。無所加。餘六府畝徵六釐。得他省之半。共增賦百六十五萬有奇。合舊所增。凡六百八十餘萬。海內咨怨。……八年。徵助餉銀。總督盧象昇請加宦戶田賦十之一。民糧十兩以上同之。既而概徵每兩一錢。謂助餉。
(續文獻通考卷二田賦考)

曰勦餉。

家楨(王)故庸材不足任。嗣昌乃薦文燦(熊)代之。因議增兵十二萬。增餉二百八十萬。其措餉之策有四。曰因糧。曰溢地。曰事例。曰驛遞。因糧者。因舊額之糧量爲加派。畝輸糧六合。石折銀八錢。場地不與。歲得銀百九十二萬九千有奇。溢地者。民間土田溢原額者核實輸賦。歲得銀四十萬六千有奇。事例者。富民輸資爲監生。一歲而止。驛遞者。前此郵驛裁省之銀。以二十萬充餉。議上。帝乃傳諭。流寇延蔓。生民塗炭。不集兵無以平寇。不增賦無以餉兵。勉從廷議。暫累吾民一年。除此心腹大患。(明史卷二五二楊嗣昌傳)

曰練餉及雜餉。共一千六百餘萬兩。而民困極矣。

崇禎十二年六月。加徵練餉。廷臣多請練邊兵。帝命楊嗣昌定議。邊鎮及畿輔、山東、河北。凡四總督、十七總兵官。各抽練額兵總七十三萬有奇。又汰郡縣佐貳。設練備、練總。專練民兵。於是有練餉之議。初。嗣昌增剿餉。期一年而止。後餉盡而賊未平。詔征其半。……於是剿餉外。復畝加練餉銀一分。共增七百三十萬。(續文獻通考卷二田賦考)

蓋自神宗末。增賦五百二十萬。崇禎初。再增百四十萬。總名遼餉。至是復增剿餉、練餉。先後增賦千六百七十

萬。民不聊生。益起爲盜矣。於是御史衛周嗣言。嗣昌流毒天下。剿練之餉多至七百萬。民怨何極。御史郝晉亦言。萬曆末。合九邊餉止二百八十萬。今加派遼餉至九百。剿餉三百三十萬。業已停罷。旋加練餉七百三十餘萬。自古有一年而括二千萬以輸京師。又括京二千萬以輸邊者乎。疏語雖切直。而時事危急。不能從也。（續文獻通考卷二田賦考）

「歲計」

明代賦入之米皆有常支。曰漕糧。曰宗祿。曰地方存留。曰改折。國用則取給於改折及商稅之銀。嘉靖以前。歲入銀二百餘萬兩。歲出不過百餘萬兩。少僅七八十萬。萬曆之初。出入恆四百萬。末年加遼餉皆徵銀。共需千萬。至崇禎季年。遂達二千餘萬。入不敷出者五百餘萬。雖苛斂不足以給矣。

世宗嘉靖初。內府供應視弘治時。其後乃倍之。初太倉中庫積銀八百餘萬兩。續收者貯之兩廡。以便支發。而中庫不動。遂以中庫爲老庫。兩廡爲外庫。及是時。老庫所存者。僅百二十萬兩。二十二年。特令金花子粒銀應解內庫者。並送太倉備邊用。然其後復入內庫。（續文獻通考卷三〇國用考）

王圻曰。正統時。天下歲徵入數。共二百四十三萬兩。出數共一百餘萬兩。自正德後。出多入少。國用益不支矣。……臣等謹按……嘉靖二十八年以前。歲支多不過二百萬。少僅七八十萬。及二十九年。備禦邊警。餉額倍

增。三十四五年間。宣大被寇。募軍賑恤。諸費取給內帑。歲無紀極。所入二百萬之額。不能充所出之半。（續文獻通考卷三〇國用考）

穆宗隆慶元年。……帝初卽位。……至是問戶部京帑貯金以贍軍國。足備幾年。奏言所存僅足三月。計今歲尙虧九月有奇。邊軍百萬。悉無所需。帝大駭。……十二月。諭戶部查內庫太倉銀出入數。尙書馬森奏。太倉見存銀一百三十五萬四千六百五十二兩。歲支官軍俸銀一百三十五萬有奇。邊儲二百三十六萬有奇。補發年例一百八十二萬有奇。通計所出五百五十三萬有奇。以今數抵算。僅足三月。京倉見存糧六百七十八萬三千一百五十一石。歲支官庫月糧二百六十二萬一千五百餘石。遇閏又加二十二萬餘石。以今數抵算。僅足二年。……四年。……是歲七月。戶部尙書張守直又疏曰。國家貢賦在量入爲出。嘗計天下錢穀。一歲所入。僅二百三十萬有奇。而中多積逋災免奏留者。一歲所出京師百萬餘。而邊餉至二百八十餘萬。其額外請乞者不與焉。二年用四百四十餘萬。三年則三百七十九萬。此其最少者。而出已倍於入矣。（續文獻通考卷三〇國用考）

初世宗時。太倉所入二百萬兩有奇。至萬曆六年。太倉歲入凡四百五十餘萬兩。而內府歲供金花銀外。又增買辦銀二十萬兩以爲常。後又加操馬芻料銀七萬餘兩之多。久之。太倉、光祿、太僕銀括取幾盡。邊賞首功向發內庫者。亦取之太僕矣。……二十三年二月。戶部以公私兼窘。陳時政之要。從之。略云。……顧各邊鎮且額外加添。以示寬容。自四十餘萬增至二百八十餘萬。……二十八年八月。給事中王德完奏。國家歲入僅四百

萬。而歲出至四百五十餘萬。……臣等謹按食貨志。萬曆後每事溢經制數倍。且徵調開採。閭閻僭侈。由是二百年財力。殫竭靡遺矣。(續文獻通考卷三〇國用考)

莊烈帝崇禎……八年四月。……時戶部奏報兩餉出入數。舊餉歲入四百二十三萬九千兩有奇。歲出四百二十九萬三千兩有奇。新餉歲入八百五十七萬三千兩有奇。歲出七百八十六萬兩有奇。合而計之。該存剩銀六十五萬九千兩有奇。而頻年徵調。轉輸絡繹。以及留者。蠲者。逋者。緩者。在在見告。是歲缺額。遂至二百三十餘萬兩。……祖宗朝。歲入京師者未滿四百萬。今且一千二百餘萬。尙可以用度不足。更責輒將於百姓乎。(續文獻通考卷三〇國用考)

崇禎十六年三餉合一出入簡表

兵	餉	左
每年出銀一千零六十一萬零七百四十兩	每年入銀九百八十七萬一千七百零七兩	除蠲免外實徵七百七十五萬七千七百
出款內包括薊州鎮月餉一百七十二萬餘兩。密雲鎮七十五萬餘兩。昌平鎮三十七萬餘兩。柳溝鎮二十八萬餘兩。宣府鎮四十八萬餘兩。易州鎮一百三十萬餘兩。陽和鎮五十六萬餘兩。大同鎮六十九萬餘兩。延綏鎮三十三萬餘兩。甘肅鎮十三萬餘兩。固原鎮四十萬餘兩。京支各項七十九萬餘兩。京營勇衛等營料草四十七萬餘兩。勇衛京營官軍廩糧米折四十八萬兩。勤餉銀一百四十萬餘兩。選練官舍銀二十一萬餘兩。其他鹽菜工食日犒雜項等。	入款內包括浙江額銀一百五十萬餘兩。廣東額銀八十三萬餘兩。四川六十三萬餘兩。陝西七十三萬餘兩。廣西二十七萬餘兩。貴州四萬餘兩。河南兩。淮安府二十五萬餘兩。蘇州府五十六萬餘兩。順天府十萬餘兩。	十六萬餘兩。

「丁役」

民年十六曰成丁。服役六十而免。凡田一頃。出夫一人。每歲服役三十日。編黃冊載之。十年一造冊。既而徭繁。吏得上下其手。賦役不均。人民苦之。

丁曰成丁、曰未成丁。凡二等。民始生。籍其名曰不成丁。年十六曰成丁。成丁而役。六十而免。又有職役優免者。役曰里甲、曰均徭、曰雜泛。凡三等。以戶計曰甲役。以丁計曰徭役。上命非時曰雜役。皆有力役、有雇役。府州縣驗冊丁口多寡。事產厚薄。以均適其力。（明史卷七八食貨志）

洪武元年二月。命中書定賦法役法。上以立國之初。經營興作。必資民力。恐役及平民。乃命中書省驗田出夫。於是省臣奏議。田一頃出丁夫一人。不及頃者。以別田足之。名曰均工夫。直隸、應天等十八府州。及江西饒州、九江、南康三府。計田三十五萬七千二百六十九頃。出夫如田之數。遇有興作。於農隙用之。（徐學聚國朝典彙卷九〇）

役法定於洪武元年。田一頃出丁夫一人。不及頃者。以他田足之。名曰均工夫。尋編應天十八府州、江西九江、饒州、南康三府均工夫圖冊。每歲農隙赴京供役。三十日遣歸。田多丁少者。以佃人充夫。而田主出米一石資其用。非佃人而計畝出夫者。畝資米二升五合。迨造黃冊成。以一百十戶爲一里。里分十甲曰里甲。以上中下戶爲三等。五歲均役。十歲一更造。一歲中諸色雜目應役者。編第均之。銀力從所便。（明史卷七八食貨志）

二十六年。定凡各處有司十年一造黃冊。分豁上中下三等入戶。仍開軍民、宦匠等籍。除排年里甲依之充當外。其大小雜泛差役。各照所分上中下三等入戶點差。……景泰元年。令里長戶下空閒人丁。典甲首戶下人丁。一體當差。若隱占者。許里甲首告。……嘉靖九年。令各該司府州縣審編徭役。先查歲額各項差役若干。該用銀若干。黃冊實在丁糧。除應免品官、監生、生員、吏典、貧難下戶外。其應役丁糧若干。以所用役銀酌量。每人一丁田幾畝。該出銀若干。儘數分派。如有侵欺餘剩聽差銀兩入己者。事發。查照律例從重問擬。（陳仁錫皇明世法錄卷三九）

英宗正統初。行均徭鼠尾冊法。先是編徭役里甲者。以戶爲斷。放大戶而勾單小。於是議者言。均徭之法。按冊籍丁糧。以資產爲宗。覈人戶上下以蓄藏得實也。……乃令以舊編力差、銀差之數。難易輕重酌其中。役以應差里甲除當復者。論丁糧多少。編次先後。曰鼠尾冊。按而徵之。市民商賈家殷足而無田產者。聽自占。以佐銀差。正統初。僉事夏時創行於江西。他省倣行之。役以稍平。（續文獻通考卷一六職役考）

弘治元年。令各處編審均徭。查照歲額差供。於該年均徭人戶丁糧有力之家。止編本等差役。不許分外加增餘剩銀兩。貧難下戶。并逃亡之數。聽其空閒。不許徵銀。及額外濫設聽差等項科目。違者聽撫按等官糾察問罪。奏請改調。不舉者坐罪。鎮守衙門不許干預均徭。（陳仁錫皇朝世法錄卷三九）

武宗正德元年十一月。均畿內差役。巡撫都御史柳應宸言。順天永平二府并各衛所差役不均。審戶雖有三等九則之名。而上戶則巧於規免。論差雖有三等出力之異。而下戶不免於銀差。且有司均徭當出於人丁。近

年兼徵地畝。軍衛均徭當出於餘丁。近年兼派正軍。姦弊難稽。民窮財盡。必須總括府衛所常用之役。而均派於所見有之丁。仍省冗差。革妄費。重必辦於富勢。輕則及於貧窮。而後畿民始得其所。帝如其言之。（續文獻通考卷一六職役考）

嘉靖……十五年。題准今後凡遇編審均徭。務要查照律例申明禁約。如某州縣銀力二差。原額各該若干。實該費銀若干。從公查審。刊刻成冊。頒佈各府州縣。候密編之時。就將實費之數編作差銀。分爲三等九則。隨其丁產。量差重輕。務使貧富適均。毋致偏累。違者糾察問罪。（陳仁錫皇明世法錄卷三九）

萬曆時行一條鞭法。苦累稍減。而役法猶未盡公。故明末言地方利病者。每主均田。以役自田生。均田者均其田之役而已。

嘉靖四十四年二月。議准江南行十段錦冊法。其法。算該年銀力差各若干。總計十甲之田。派爲定則。如一甲有餘。則留以爲二甲之用。不足。則提二甲補之。鄉宦免田。十年之內止免一年。一年之內止於本戶。寄莊田畝不拘同府別府。但已經原籍優免者。不許再免。臣等謹案世宗實錄。十段錦之議。出於巡按御史溫如璋。行之未幾。里下騷然。莫必其命。浙江爲尤甚。龐尙鵬巡撫浙江時。奏行一條鞭法。（續文獻通考卷一六職役考）

條鞭法者。合均徭。里甲。土貢與兩稅爲一。劑量均適。以一縣丁糧充一年之役。事業易集。又一年之役均之十年。稍出不至困也。（王原深明食貨志卷四）

嘉隆後。行一條鞭法。通計一省丁糧均派一省徭役。於是均徭。里甲與兩稅爲一。小民得無擾。而事亦易集。然

糧長里長名罷實存。諸役卒至復僉農氓。條鞭法行十餘年。規制頓紊。不能盡遵也。（明史卷七八食貨志）

「免糧」

耆民、節婦、官紳、生員皆得免役。嘉靖十年。定優免事例。一品官得免糧二十石。人丁二十丁。二品以下遞減。

洪武元年八月。詔民年七十以上者。許令一子侍養。免其役。二年。令凡民年八十以上。止有一子。若係有田產。應當差役者。許出丁錢雇令人代。無田產者。許存侍。十九年六月。詔有司存問高年。凡八十以上者。皆復其家。……三年。定民婦三十以前守志至五十以後不改節者。除免本家差役。四年。令免闕里孔氏子孫三十六戶徭役。……十二年八月。詔凡致仕官。復其家。終身無所與。十三年十二月。免朝官及功臣家雜役。……十六年三月。復鳳陽臨淮二縣民徭賦。世世無所與。……二十年七月。遷南方學官教士於北。復其家。以北方學校無名師。生徒廢學。命遷南方學官之有學者教之。增廣生員。不拘額數。復其家。至英宗正統十年。令監生家免差役二丁。世宗嘉靖九年。題準各竈戶內有舉人、監生、生員、省、祭、吏役。照有司例。一體優免。（續文獻通考卷一七職役考）

孝宗弘治元年。定諸王等親屬免丁之例。親王王親雜役免二丁。郡王王親一丁。鎮國等將軍夫人親父一丁。（續文獻通考卷一七職役考）

萬曆九年。定一品免糧三十石。人丁三十丁。餘遞減。視嘉靖所免更多。生員無田者。官給免糧銀一歲二兩。

嘉靖……二十四年。議定優免則例。京官一品免糧三十石。人丁三十丁。二品免糧二十四石。人丁二十四丁。三品免糧二十石。人丁二十丁。四品免糧十六石。人丁十六丁。五品免糧十四石。人丁十四丁。六品免糧十二石。人丁十二丁。七品免糧十石。人丁十丁。八品免糧八石。人丁八丁。九品免糧六石。人丁六丁。內官內使亦如之。外官各減一半。教官、監生、舉人、生員。各免糧二石。人丁二丁。雜職、省、祭官、承差、知印、吏典。各免糧一石。人丁一丁。以禮致仕者。免十分之七。閒住者免一半。其犯賊革職者不在優免之例。如戶內丁糧不及數者。止免實在之數。丁多糧少不許以丁準糧。丁少糧多不許以糧準丁。俱以本官自己丁糧照數優免。但有分門各戶疏遠房族。不得一概混免。（續文獻通考卷一七職役考）

清

〔正賦〕

清初正賦承明之舊。首除三餉。旋以萬曆爲準。崇禎時三餉仍舊徵收。

清初入關。首除明季加派三餉。時賦稅圖籍多爲流寇所毀。順治三年。諭戶部稽覈錢糧原額。彙爲賦役全書。悉復明萬歷間之舊。計天下財賦。惟江南、浙江、江西爲重。三省中猶以蘇、松、嘉、湖諸府爲最。……十一年。命右

侍郎王宏祚訂正賦役全書。先列地丁原額。次荒亡。次實徵。次起運存留。起運分別部寺倉口。存留詳列款項細數。其新墾地畝。招徠人丁。續入冊尾。每州縣發二本。一存有司。一存學宮。賦稅冊籍。有丈量冊。又稱魚鱗冊。詳載上中下田則。有黃冊。歲記戶口登耗。與賦役全書相表裏。……復採用明萬歷一條鞭法。……聖祖即位。……直省徵收錢糧。夏稅於五六月。秋糧於九十月。其報部之數。責成各有司於奏銷時。詳加磨勘。按年送京畿道刷卷。自世祖定賦稅之制。正雜款繁多。各題違錯。駁令查覆。印官即借部駁之名。擅行私派。其正賦錢糧。本有定額。地方官吏如有別項需用。輒令設法。實與加派無二。至是下令嚴禁。……三十年。……時徵收錢糧官吏。往往私行科派。其名不一。闔邑通里。共攤同出者。名曰鞭擻。各里各甲。輪流獨當者。名曰硬駝。於是設滾單以杜其弊。其法於每里之中。或五戶或十戶一單。於某名下註明田地若干。銀米若干。春秋應各完若干。分爲十限。發與甲首。依次滾催。自封投櫃。一限既定。二限又依次滾催。其有停擱不完不交者嚴懲。民以爲便。……乾隆初。州縣徵收錢糧。尙少浮收之弊。其後諸弊叢生。初猶不過就斛面浮收。未幾遂有折扣之法。每石折耗數升。漸增至五折六折。餘米竟收至二斗五升。小民病之。……德宗即位之初。復新驅籌海防。國用日增。戶部條陳整頓錢糧之策。略云。溯自髮逆之平。垂二十年。正雜錢糧。期可漸復原額。乃考覈正雜賦稅額徵總數。歲計三千四百餘萬兩。實徵僅百四十五萬兩。賦稅虧額如此。財既不在國。又不在民。大率爲貪官墨吏所侵蝕。……請飭各督撫藩司。認真釐剔。以裕度支。詔從其請。然終清之世。諸弊卒未能盡革也。……總計全國賦額。其可稽者。順治季年。歲徵銀二千一百五十餘萬兩。糧六百四十餘萬石。康熙中。歲徵銀二千四百四十餘

萬兩。糧四百三十餘萬石。雍正初。歲徵銀二千六百三十餘萬兩。糧四百七十餘萬石。高宗末年。歲徵銀二千九百九十餘萬兩。糧八百三十餘萬石。（清史稿食貨志二賦役）

「火耗」

民間以銀納糧。其數零星。成色不一。經火熔銷。必有耗蝕。故官吏須加火耗。寢久有每兩加至四五錢者。不啻公然賄賂。最爲民害。雍正時提以歸公。作爲文官養廉。歲二百餘萬兩。然火耗之弊仍在。

雍正二年。以山西巡撫諾敏。布政使高成齡。請提解火耗歸公。分給官吏養廉。及其他公用。火耗者。加於錢糧正額之外。蓋因本色折銀。熔銷不無折耗。而解送往返。在在需費。州縣徵收。不得不稍取盈以補折耗之數。重者數錢。輕者錢餘。行之既久。州縣重斂於民。上司苛索州縣。一遇公事。加派私徵。名色繁多。又不止於重耗而已。……自山西提解火耗後。各直省次第舉行。其後又酌定分數。各省文職養廉。二百八十餘萬兩。及各項公費。悉取諸此。及帝（乾隆）卽位。廷臣多言其不便。帝亦慮多取累民。臨軒試士。卽以此發問。復令廷臣及督撫各抒所見。大學士鄂爾泰。刑部侍郎錢陳羣。湖廣總督孫家淦。皆言耗羨之制。行之已久。徵收有定。官吏不敢多取。計已定之數。與未定以前相較。尙不逮其半。是迹近加賦而實減徵也。且火耗歸公。一切陋習皆革除。……詔從鄂爾泰諸臣議。（清史稿食貨志二賦役）

謹案。火耗起於前明。國初屢有厲禁。順治元年。令曰。官吏徵收錢糧。私加火耗者以賊論。康熙初。有額外科歛許民控告之律。^{四年}有剋取火耗上司徇隱之律。^{十七年}禁令非不嚴也。禁之而不能。則微示其意而爲之限。限之而不能。乃明定其額而歸之公。其變法也以漸。……聖祖嘗諭河南巡按鹿祐曰。所謂廉吏者。亦非一文不取之謂。若纖毫無所資給。則居常日用。及家人胥役何以爲生。如州縣官止取一分火耗。此外不取。便稱好官。若一概剝摘。則屬吏不勝參矣。^{四十八年九月諭旨}時各省耗羨。每兩多不過一錢。獨湖南加至二三錢。……六十年。陝西虧空事聞。總督年羹堯。巡撫噶什圖奏。秦省火耗。每兩有加至二三錢四五錢者。請酌留各官用度。其餘俱捐出彌補。上諭斷不可行。……提解歸公之議。倡於雍正二年山西巡撫諾岷。布政使高成齡。世宗令廷臣集議。議上。諭曰。州縣火耗。原非應有。因地方公費。各官養廉。不得不取給於此。且州縣徵收火耗。分送上司。以致有所藉口。肆其貪婪。上司瞻徇容隱。此從來積弊也。與其州縣存火耗以養上司。何如上司撥火耗以養州縣乎。爾等請將分數酌定。朕思州縣有大小。錢糧有多寡。地廣糧多州縣。火耗已足養廉。若行之地少糧少州縣。則不能矣。惟不定分數。遇差多事繁。酌計可以濟用。或是年差少事簡。即可等減。又或偶遇不肖有司。一時加增。而清廉者。自可減除。若……竟爲成額。必至有增無減。又奏提解火耗。非經常可久之道。凡立法行政。孰可歷久無弊。提解原一時權宜之計。將來虧空清楚。府庫充裕。有司皆知自好。則提解自可不行。火耗亦可漸省。蓋年羹堯之議。至是始行。後乃酌定分數。而各省文職養廉二百八十餘萬兩。及各項公費。實取諸此。先是江南每兩加耗五分。雍正六年以後。遞增至一錢。十三年。高宗即位。諭曰。向來耗羨。州縣任意徵求。經巡撫諾岷。田

文鏡倡爲提解歸公之法。各就本省情形。酌定分數。以外不許絲毫濫徵。然未提解以前。尙爲私項。既提解以後。恐不肖官員。視同正課。又於耗羨之外。巧取殃民。著各督撫嚴飭有司。耗羨一項。可減而決不可增。倘多取絲毫。卽題參重治。乾隆四年。從孫嘉淦、陳世倌奏。免直隸江南蠲賦耗羨。仍以河南耗餘撥補。五年。以地方無關緊要之事。輒動耗羨。令督撫將各省必需公費。分晰款項。報部核奏。自是以後。各省耗羨。掌於戶部湖廣司者。取之有定數。用之有定款。於世廟諭旨所云。將來府庫充裕。提解不行。火耗漸省者。卒無有議及者矣。他如關稅之有盈餘。鹽課之有雜費。昔歸私囊。後充公帑。亦耗羨之類也。（王慶雲熙朝紀政卷三紀耗羨歸公）

〔普免〕

清代普免錢糧簡表

朝代	年	代	普	免	種	類	普	免	數	目
康熙	五十年		分三年輪免錢糧一周				共計免天下糧賦新舊三千八百餘萬			
雍正	元年		普免天下康熙五十年以前宿逋				江蘇一省至八百八十萬（據會典則一千一百六十五萬有奇）			
乾隆	十年		將十一年直省錢糧通行蠲免廷議三年之內輪免一周				計爲數二千八百二十四萬有奇			
乾隆	三十年		遵康熙三十年慶典次第免各省漕糧五年而徧又以漕糧內有例徵折色者一律蠲免							

乾隆	三十五年	令各省錢糧通行蠲免一次	是年蠲免計二千七百九十四萬有奇
乾隆	四十二年	令自戊戌年（四十二年）爲始普蠲天下錢糧仍分三年輪免	計二千七百五十九萬有奇
乾隆	四十三年	普免天下漕糧一次七年而徧	
乾隆	五十五年	按年輪免各省錢糧	計二千七百七十萬有奇
乾隆	五十九年	普免八省漕糧五年而徧	
乾隆	六十年	以明年將歸政免嘉慶元年各省應徵地丁錢糧	
嘉慶	二十四年	免天下正耗民欠及緩帶銀穀	計銀二千一百二十九萬兩有奇米穀四百餘萬石
附註	本表根據清史稿食貨志及王慶雲熙朝紀政而作		

「江浙減賦」

江浙田賦自明特重。清屢減之。同治時猶重於他地。

雍正元年……蘇松浮糧多於他省。詔蠲免蘇州額徵銀三十萬。松江十五萬。永著爲例……各省中賦稅繁重。蘇松而外。以浙江嘉湖二府爲最。五年詔減十之一。共銀八萬餘兩……七年。蠲浙江額賦十之三。共十萬

兩。……乾隆元年。……諭改江南、浙江白糧十二萬石。免蘇、松浮糧額銀二十萬石。（清史稿食貨志二）

同治元年。……兩江總督曾國藩、江蘇巡撫李鴻章疏言。蘇、松、太浮賦。上溯則比元多三倍。比宋多七倍。旁證之。則比比連之常州多三倍。比同省之鎮江等府多四五倍。比他省多一二十倍不等。……自粵逆竄陷蘇、常。焚燒殺掠。慘不可言。臣親歷新復州縣。市鎮邱墟。人煙寥落。已復如此。未復可知。而欲責以數倍他處之重賦。向來暴徵之吏。亦無骨可敲。無髓可吸矣。細核歷年糧數。咸豐十年中。百萬以上者僅一年。八十萬以上者六年。皆以官墊民欠十餘萬在其中。是最多之年。民完實數不過九十萬也。成案如是。民力如是。惟籲請准減蘇、松、太三屬糧額。以咸豐中較多之七年爲准。折衷定數。總期與舊額本經之常。鎮二屬通融覈計。著爲定額。卽以開徵之年爲始。永遠遵行。不准再有墊完民欠名目。嗣後非水旱亦不准捏災。俾去無益之空藉。求有著之實徵。至蘇、松漕糧。核減後。必以革除大小戶名。爲清釐浮收之原。以裁減陋規。爲禁止浮收之委。制可。……三年。從閩浙總督左宗棠請。諭紹興屬八縣六場。正雜錢糧。統照銀數徵解。革除一切攤捐及陋規。計減浮收錢二十二萬有奇。米三百六十餘石。寧波屬一廳五縣六場。減浮收錢十四萬四千有奇。米八百餘石。四年。浙江巡撫馬新貽。請豁減金華浮收錢十五萬餘串。米五百餘石。衢州錢十萬餘串。米六十餘石。嚴州錢六萬餘串。米六千餘石。洋銀八十餘元。米百餘石。從之。是年。宗棠克湖州。疏言。漕南浮收過多。請痛加裁汰。事下部議。覆奏杭、嘉、湖漕糧。請仿江蘇例。減原額三十分之八。並確查賦則。按輕重量爲覈減。所有浮收漏規。悉予裁汰。其南匠米石。無庸議減。計三府原額漕白行月等米。百萬餘石。按三十分之八。共減米二十六萬六千餘石。（清

史稿食貨志二

「加賦」

光緒時以賠款分攤各省。大都就地加徵。名目繁多。

光緒二十年。中日之戰。賠兵費二萬萬。二十六年。拳匪肇禍。復賠各國兵費四萬五千萬。其後練新軍。興教育。創巡警。需款尤多。大都就地自籌。四川因解賠款而按糧津貼。捐輸之外。又有賠款新捐。兩江、閩浙、湖北、河南、陝西、新疆。於丁漕例徵外。曰賠款捐。曰規復錢價。曰規復差徭。曰加收耗羨。名稱雖殊。實與加賦無大異也。

（清史稿食貨志二）

辛丑約成。遂有四萬五千萬之鉅。派之各省者一千八百萬兩有奇。二十九年。以練新軍。復攤各省練兵經費。而各省以創練新軍。辦巡警教育。又有就地自籌之款。奉天一省。警費至三百餘萬兩。湖北一省。撥提地丁錢價充學費者六十萬兩。捐例停於二十七年。以練兵復開。至三十二年復停。庚子以後。新增之徵收者。大端爲糧捐。如按糧加捐。規復徵收。丁漕錢價。規復差徭。加收耗羨之類。（清史稿食貨志六）

光緒三十年。兩江總督魏光燾奏。本年正月。奉諭外務部代遞總稅務司赫德條陳一摺。據稱練兵籌餉。以地丁錢糧爲大宗。若竭力整頓。并可舉辦各項要務。按里計畝。按畝計賦。令每畝完錢二百文。百姓亦不受絲毫擾累等語。……該督等按照所陳。悉心會商。逐條議覆具奏。……不如就已辦到之成規。加之釐剔。查光緒二十五年。蘇省清釐田賦。委朱道之榛定章督辦。綜計蘇州、鎮江二府屬長洲等十三縣。熟田銀米兩項。每年共

增出銀五十餘萬兩。若由二府推之他府。更由江蘇一省推之他省。得人而理。不難照行。……果能認真整頓。數年後。每年似可增一二千萬。以濟要需。（皇朝續文獻通考卷四田賦考田賦之制）

宣統元年。……又兩江總督端方等奏。銀價益漲。州縣賠累更深。仍請將上下兩忙。甯蘇兩屬。地蘆各款。改爲徵銀。解銀。每銀一兩。隨收公費錢六百元。蘇屬並代收規復錢二百文。以期官民兩無所傷。下度支部議奏。嗣奏以蘇屬徵忙。每兩暫加二百文。試辦尙未經年。遽爾更張。非惟無以取信於民。應令先將該省地蘆等項。及經費各款。詳擬辦法。送部核明。……又都察院代遞度支部小京官李秀卿奏陳徵收積弊。略稱。其弊有四。……一、生於新政者。自新政繁興。州縣之誅求愈急。然使取之百姓者。仍爲百姓用之。亦何至怨讟四起。無如鎔積銖累。半歸中飽。……又江西巡撫馮汝驤瀝陳江西州縣徵收丁漕困難情形。略稱。……每徵地丁一兩。應解正耗銀一兩一錢。提補捐款銀一錢。知府公費銀五分。錢價平餘銀七分。學堂經費銀四分。練兵經費銀五分。共銀一兩七錢六分。出入相抵。地丁每兩已不敷銀五分九釐。漕米每石已不敷銀五分。而糧書、紙張、飯食、傾熔火耗、水脚等項。尙不在內。至捐攤教案各款。及本署一切辦公費用。更屬無著。……又安徽巡撫朱家寶奏請將丁漕加捐一項變通辦理。略稱。查新約賠款案內。安徽省每年奏派銀一百萬兩。前撫臣聶緝槩。當因數鉅期迫。設措爲難。奏請按照江浙成案。於各屬所徵地丁漕糧。每銀一兩米一石各加收錢三百文。飭令民間照章呈繳。由州縣彙解籌議公所。兌銀轉匯。歷經遵照在案。茲查前項加捐錢文。綜計光緒三十年以前。每年收數約得錢四十萬串上下。以錢一千二百文合銀一兩。可得銀三十三四萬兩。現在銀價奇貴。每銀一兩。

需錢一千九百及二千文不等。雖收錢仍如前數。而合銀僅止二十一萬兩。實已驟減十成之三。且籌議公所常年解撥之項。均係銀數。輾轉受此暗耗。勢實難支。若不設法變通。則進款日虧。深恐貽誤大局。……擬將各屬加捐。自宣統二年冬漕起。每銀一兩。每米一石。向來捐錢三百文者。改收庫平銀一錢八分。以錢百文合銀六分。每年就四十萬串之數計之。每串得銀六錢。歲可收二十四萬餘兩。……其餘一切辦法。悉照原奏辦理。……又四川總督趙爾巽奏。川省京餉。需用甚鉅。援案再辦。宣統二年。按糧銀一兩。加津貼銀一兩。以資接濟。……又新疆巡撫聯魁奏。新疆南路徵收糧草。擬定新章。請飭立案。略稱。……光緒二十八年。前撫臣饒應祺。因認徵賠款。協餉日絀。設法彌補。曾奏請加收耗羨。無論本折。亦無論糧色。每石隨徵耗羨銀一錢五分。……經藩司王樹枬。與奴才悉心酌核。……定自光緒三十四年起。每本色糧一石。除應收耗羨銀一錢五分。酌中准加耗糧二斗五升。……折色則準各屬每年市價爲定。除一五公耗外。亦照本色每石加耗二斗五升折收銀兩。爲地方官辦公之用。其正糧一石。按市價折收之銀。較例價仍有盈餘。則悉數歸公。……二年。……又奏。遵議御史石長信奏。丁漕加捐。改錢爲銀。民情實多未便。略稱。查原奏內稱。安徽賠款加捐。係於地丁漕米折徵定價外。每銀一兩。米一石。各加收制錢三百文。乃因銀價昂貴。奏請每錢三百文。改收庫平足銀一錢八分。……飭下安徽巡撫。即將賠款加收丁漕錢文。仍照舊每兩每石加收制錢三百文。毋庸改爲徵銀。……又江蘇巡撫寶奎奏。准加捐地方自治經費。每地丁銀一兩。帶徵錢二十文。漕米一石。帶徵錢四十文。冬漕自宣統元年起。兩忙自二年起。（皇朝續文獻通考卷五田賦考田賦之制）

「歲計」

清代歲計出入。順治時二千萬兩。道光前約銀三四千萬兩。咸同軍興。歲出自倍。及末年達三萬萬餘。十倍於嘉道時。

清代歲計簡表

朝代	年	代	歲	入	歲	出	備	考
順治	十八年		二千一百五十七萬六千六兩有奇				不足者歲五百萬兩	
康熙	二十四年		二千四百四十四萬九千七百二十四兩				庫存常二千萬兩	
乾隆	五十六年		四千三百五十九萬兩有奇		三千一百七十七萬兩有奇		庫存七千萬兩	
嘉慶	十七年		四千十三萬兩有奇		三千五百十萬兩有奇			
道光	二十二年		三千七百十四萬兩有奇		三千一百五十萬兩有奇			咸豐初年。太平軍驟起。捻回諸軍繼之。國用大絀。迄於同治。歲入之項。轉以釐金洋稅爲大宗。歲出之項。又以善後籌防爲鉅款。
光緒	七年		八千二百三十四萬九千一百九十八兩		七千八百十七萬一千四百五十一兩			

	十七年	八千九百六十八萬四千八百五十四兩零	七千九百三十五萬五千二百四十一兩八錢二分四釐零	
	二十年	八千一百三萬三千五百四十四兩三錢三分五釐又金二十三兩九錢	八千二十七萬五千七百兩七錢八分	額外之費。歲不足者六百萬兩。
宣統	三年	二萬九千六百九十六萬二千七百兩有奇	三萬三千八百六十五萬兩有奇	宣統二年度支部奏試辦宣統三年預算
附註	本表根據清史稿食貨志及劉嶽雲光緒會計表而作			

「丁賦」

康熙時。均丁賦於田。計田派丁。不問丁數。嗣後鹽鈔銀、匠班銀亦陸續派入地丁。五十年。定丁額。永不加賦。雍正元年。遂以丁賦攤入地畝。一併起徵。名爲地丁銀兩。或曰條銀。

丁口之輸賦也。其來舊矣。至我朝雍正間。因各疆吏奏請。以次攤入地畝。於是輸納徵解。通謂之地丁。或曰丁隨地起。……我朝丁徭素薄。自康熙五十年定丁額之後。滋生者皆無賦之丁。凡舊時額丁之開除既難。必本戶適有新添可補。則轉移除補。易至不公。惟均之於田。可以無額外之多取。而催科易集。其派丁多者。必其田多者也。其派丁少者。亦必有田者也。……所不便者。獨家止數丁而田連阡陌者耳。然使丁地分徵。則富戶又

將賄脫而委之貧民。欲編審之均平。顧可得乎。故自康熙末年。四川、廣東等省。先已行之。田載丁而輸納。丁隨田而賣買。公私稱便。至雍正初。畿輔踵而行之。次及各省。惟奉天、貴州以戶籍無定。仍舊分徵。山西亦於乾隆元年以後陸續攤派。……我朝定制百餘年矣。地丁之外。分毫無取焉。……謹以各省丁隨地起者。次第著於篇。康熙十一年。以浙江鹽鈔銀均入地丁。三十六年。以浙江匠班銀七千餘兩派入地丁。後湖北於三十九年。山東於四十一年。均照浙江例匠班歸入地丁。五十五年。戶部議編審人丁。除向例照地派丁外。其按人派丁者。一戶之內。開除與新添互抵。不足以親族丁多者抵補。又不足以同甲糧多者頂補。有餘歸入滋生冊內造報。是年定賣買地畝。其丁銀有從地起者。隨地徵丁。倘有地賣丁留。與受同畢。是年准廣東所屬丁銀。就各州縣地畝攤徵。每地銀一兩。攤丁銀一錢六釐四毫不等。案丁隨地起。見於明。自廣東始。雍正元年。直隸巡撫李維鈞請丁銀隨地起徵。部議允之。每地賦一兩。攤入丁銀二錢七釐。二年。定福建地賦一兩。攤丁銀五分二釐七毫至三錢一分二釐不等。屯地自八釐三毫至一錢四分四釐八毫不等。是年。定山東地賦一兩。攤丁銀一錢一分五釐。……四年。定河南地賦一兩。攤丁銀一分一釐七毫至二錢七釐不等。……甘肅分河東、河西。河東一兩攤一錢五分九釐三毫。遇閏加。河西一兩攤一分六毫。遇閏不加。四川每糧五升二合至一石九斗六升不等。算一丁徵收。雲南亦於是年攤徵。其屯軍丁銀一萬五千餘兩。俟查出欺隱屯田抵額。五年。定江蘇、安徽丁攤地畝。屯丁亦攤入。屯衛田每畝攤一釐一毫至六分九毫不等。又定江西地賦。一兩徵丁銀一錢五釐六毫。屯地二分九釐一毫。六年。定湖南地糧一石徵丁銀一毫至八錢六分一釐不等。又定廣西地賦一兩徵丁銀一錢三

分六釐不等。七年定湖北地賦。一兩徵丁銀一錢二分九釐六毫。……乾隆元年。山西省臨汾……凡十六屬丁徭。全數歸入地糧。又祁縣……八屬丁徭。酌歸地糧。餘仍隨丁徵納。又平遙縣原額丁銀八千一百五十五兩有奇。是年歸入地糧二千六百六十一兩有奇。餘仍隨丁徵納。十年。戶部議准山西丁糧分辦。貧民偏累尙多。丁隨地徵。有勢所難行者。今將太原等十八縣丁銀。全攤地畝。每糧一石。合攤丁銀一分八釐至二錢二分二釐。賦銀一兩。合攤丁銀一錢四分七釐九毫至三錢三分八釐不等。交城等十五州縣。丁銀半攤地畝。甯鄉二縣。以丁則徵丁。餘銀歸地。渾源等二州縣。攤三分之一。河曲縣攤十分之一。吉州惟攤無業苦丁。餘陽曲等二十州縣。或貿易民多。輸丁爲易。或民貧地瘠。難於攤徵。或田多沙礫。或多徵本色。仍地丁分辦。中有屯丁徭銀之處。別攤入屯地徵收。二十三年。定山西太谷、臨縣、石樓、五臺、崞縣等五縣丁徭。全攤地糧。永甯州每丁徵三錢。沁州一錢。代州一錢三分三釐。餘者攤入地糧。榆次縣攤三分之一。沁源、武鄉二縣攤十之五。靜樂縣攤十之三。餘者仍歸丁納。保德州以下下則徵丁。餘歸地糧。朔州丁糧。均照中下。下下二則。按現在實丁。與寄莊已久之戶。按地多。地少分納。其衛丁按下下。中下。下下三則。分別貧富均納。隰州、永和二州縣。將寄居年久有產之戶。按丁輸納。下下則徭銀。原額重徭。均勻減除。三十一年。定山西交城縣之現徵民一半徭銀。及屯丁徭銀。文水縣之丁銀徭稅。河津縣之丁銀。稷山縣之優免丁與屯丁徭銀。俱攤入地糧屯租完納。隰州丁餘以十分之五歸地。大甯縣再減丁銀一千兩。攤入地糧。蒲縣丁銀。均勻攤派。改爲下下則徵收。其餘仍令丁糧分辦。三十八年。湖北巡撫陳輝祖奏請將民屯新墾丁銀。隨年攤徵。經部覆准。並行各省。……是年。山西省渾源州已

攤下賸丁銀。全歸地糧畢。三十九年。山西省榆次縣丁銀全歸地糧。四十二年。定貴州平越等三十六廳州縣。應徵丁銀九千三百餘兩。歷年隨糧完納。應仍其舊。貴陽等二十九府廳州縣。應徵丁銀四千四百餘兩。按畝攤徵。計各屬田地八十一萬二千有餘畝。每畝攤丁銀五釐四毫有奇。五十六年。部覆山西省丁徭。向未攤歸之陽曲二十六州縣。原屬分徵。今將曲沃縣丁屯徭銀。全歸地糧。天鎮縣丁銀。亦全數攤徵。尖丁耗銀。隨正輸納。其應徵本色米石。照舊徵收。朔州丁銀。州衛一體攤徵。其科則每地一畝自一分八釐至四分不等。再大同左雲等十四團操丁銀。在豐鎮同知地畝均攤。每兩九釐。其石樓、蒲縣、永和三縣缺額丁銀。於乾隆四十年升補一百四兩。至五十七年。豁未補虛額銀一千五百三十七兩有奇。五十八年。定大同縣折色銀。全歸地糧。每糧銀一兩攤一錢一分七釐。懷仁縣則額丁銀歸地糧。每糧銀一兩攤二錢一分六釐。尖丁銀歸屯糧。每一兩攤一錢七分六釐。前衛丁銀。歸入屯地。每一兩攤二錢二分六釐。至各屬尖丁耗羨。照地隨徵。嘉慶元年。山西省襄垣、陵川、靜樂、陽城、沁水五縣。已攤下賸丁徭。併山陰縣丁徭。全數歸入地糧攤徵。十八年。山西蒲縣丁徭。全歸地糧。二十四年。山西巡撫成格奏。岢嵐、保德二州丁銀缺額。請於通省養廉內攤捐。奉上諭。……所有岢嵐州缺額銀一千五百八兩零。保德州缺額銀七百十七兩零。著即加恩按年豁免。……道光二年。山西孟縣及平定州下賸丁徭。全歸地糧。三年。山西稷山、嵐縣、絳縣、霍邱四縣絳州一州丁徭。併黎城、廣靈二縣已攤下賸丁徭。全歸地糧。四年。山西祁縣、長治、潞城、沁源、繁峙、長子、甯鄉、武鄉八縣。代州一州。已攤下賸丁徭。併陽曲、陽高二縣丁徭。全歸地糧。惟吉州原額丁徭銀二千八百七十七兩。門差銀五百十五兩各有奇。經乾隆十年

及是年兩次歸入地糧銀一千四百九十兩有奇。仍隨丁辦納銀一千九百二兩有奇。五年。山西興縣、應州二屬丁銀。併和順、翼城二縣隰州一州已攤下賸丁銀。又大甯一縣兩次攤賸丁銀。均全歸地糧徵納。是年七月……上諭……自道光六年爲始。將右玉、平魯二縣無著丁銀正耗。共一千二百七十三兩零。全行豁免……六年山西沁州已攤下賸丁銀。全歸地糧。八年。山西永甯州已攤下賸丁銀。全歸地糧。十二年。山西壽陽縣丁銀。全歸地糧。十七年。山西平魯縣丁銀。歸入地糧。二百二十六兩有奇。（王慶雲熙朝紀政卷三紀丁隨地起）明初。因賦定役。丁夫出於田畝。迨黃冊成而役出於丁。凡役三等。曰里甲。曰均徭。曰雜派。其間累經更制。有銀差、力差、十段錦、一條鞭諸法。厥後工役繁興。加派無藝。編審輕重無法。里甲之弊。遂與有明一代相終始。國初革里正加派諸弊。賦役之法。載在全書。悉沿萬歷條鞭舊制。初定三年一編審。後改五年。順治三年凡里百有十戶。推丁多者十人爲長。餘百戶爲十甲。屆期坊廂里長造冊送州縣。由是而府而司。達於部。皆有冊。凡載籍之丁。六十以上開除。十六以上添注。丁增而賦隨之。有市民、鄉民、富民、佃民、客民之分。民丁之外。有軍、匠、宦、屯、站、土丁名。凡丁賦。均合徭里甲言之。曰徭里銀。凡徵丁賦。有分三等九則者。有一條編徵者。有丁隨丁起者。有丁隨地派者。率因其地之舊。不必盡同。都直省徭里銀三百餘萬兩。閒徵米豆。其科則輕自每丁一分數釐。重則山西之丁有四兩者。鞏昌有八九兩者。自康熙五十年定丁額。於是戶部議缺額入丁。以本戶新添者抵補。不足。以親戚多者抵補。又不足。以同甲糧多者頂補。編審時。所謂擦除擦補者。大略如此。顧有司於民。非能家至而日見。科則既不可強齊。除補且易滋流弊。於是雍正間以次攤入地糧。爲均徭銀。自丁歸地糧。乾隆五年。遂

併停編審。以保甲丁額造冊。而十一年。詔停江西編審婦女之數。蓋鹽鈔徵派。尙未盡除。故各省猶有照常冊報者。三十七年。上諭。李瀚奏請停編審造冊。所見甚是。舊例原恐漏戶避差。是以五年編造。今丁既攤入地糧。滋生人丁又不加賦。則編審不過虛文。況各省民數。俱經督撫年終奏報。更無藉五年查造。嗣後停止。自是惟有漕衛所軍丁四年一編審而已。（王慶雲熙朝紀政卷三紀停編審）

（丙）漕糧

明

「額運」

永樂時沿元之舊。以東南之漕濟京師。而增其額。曰漕糧。歲恆四百萬石。以供軍餉。曰白糧。歲恆四十萬石。以供上用及百官廩祿。每石運費。率三倍於糧價。在民完漕。量斛則有淋尖之苦。水次則有加耗之苦。在運官運丁。則苦於飄流水濕。及收兌需索。公私俱敝。萬曆以後。嘗議興近畿水利。而漕終不能廢。然漕船准帶土宜免稅。南北貨物。賴以流通。其利又別有在焉。

歲運正糧凡四百萬石。內兌運二十四萬赴薊州倉。改兌六萬赴天津。餘三百七十萬赴京通二倉。舊例民運淮安、徐州、臨清、德州水次四倉交收。漕運官分派官軍餘內支運於通州、天津二倉。成化十年。議四倉所收。令

官軍徑赴州縣水次四倉交兌。名爲改兌。弘治十六年。又以派不足額。每年於水次四倉支運九萬六百石。以足前數。正德間。全派改兌。支運遂絕。（黃訓皇明名臣經濟錄卷二二王鰲論食貨）

初運糧京師。未有定額。成化八年始定四百萬石。自後以爲常。北糧七十五萬五千六百石。南糧三百二十四萬四千四百石。其內兌運者三百三十萬石。由支運改兌者七十萬石。兌運之中。湖廣、山東、河南折色十七萬七千七百石。通計兌運改兌加以耗米入京通兩倉者。凡五百十八萬九千七百石。（明史卷七九食貨志三）

漕糧之外。蘇、松、常、嘉、湖五府。輸運內府白熟粳糯米十七萬四十餘石。內折色八千餘石。各府部糙粳米四萬四千餘石。內折色八千八百餘石。令民運謂之白糧船。自長運法行。糧皆軍運。而白糧民運如故。（明史卷七九食貨志三）

「交兌」

明初漕運變遷先後凡五。

一曰海運。洪武末及永樂初。蘇、松、浙江等處歲糧。俱輸納太倉。蘇州地方由海道以達直沽。二曰海陸兼運。永樂初。肇建北京。江南糧一由海運。一由淮河入黃河至陽武。陸運至衛輝。由衛河入白河至通州。三曰支運。先是永樂五年……至九年。以濟寧州同知潘叔正言。命工部尙書宋禮、都督周長等。發山東丁夫十六萬五千濬原會通河。自濟寧至臨清。三百八十五里。於是漕再始達通州。十年。禮以海船造辦太迫。議造淺船五百艘。由會

通河運淮、揚、兗等處歲糧一百萬石。以補海運一年之數。十二年。平江伯陳瑄等。始議原坐太倉歲糧蘇、松、浙江改送淮安倉。鎮江、廬、鳳、淮、揚送徐州倉。徐州并山東兗州送濟寧倉。河南、山東送臨清倉各交收。浙江并直隸衛分官軍於淮安運至徐州。京衛官軍於徐州運至德州。各立倉廠收囤。山東、河南官軍於德州接運至通州交收。名爲支運。一年四次。十三年。增造淺船千艘。海運始罷遮洋船。每歲河南、山東小灘等水次兌運糧三十萬石於天津等衛倉收二十四萬。內十四萬石連耗折銀六錢俱從直沽入海轉運薊州倉收。四曰兌運。先是裏河民運。多失農月。永樂末。始令民運於淮安瓜州補給腳價。兌運軍船領運。軍民兩益。衛所出給通關付繳。……宣德八年。參將吳亮言。江西、浙江、湖廣、江南船。各回附近水次領兌。南京、江北船。於瓜、淮領兌。其淮、徐、臨、德諸倉。仍支運十分之四。浙江、蘇、松等船。各本司府地方領兌。不盡者仍於瓜、淮交兌。其北邊一帶。如河南彰德等府於小灘。山東濟南州縣於濟寧。其餘水次倣此。五曰改兌。成化七年。都御史滕昭議罷瓜、淮兌運。裏河官軍雇江船於江南水次交兌。民加過江之費。視遠近爲差。十年。議淮、徐、臨、德四倉支運糧七十萬石。改就水次兌與軍船。名爲改兌。每年議派。多準其數。然不爲常例。（黃訓皇明名臣經濟錄卷二二邵寶國朝運法五變議）

運船之數。永樂至景泰。大小無定。爲數至多。天順以後。定船萬一千七百七十。官軍十二萬人。許令附載土宜。免徵稅鈔。孝宗時限十石。神宗時至六十石。（明史卷七九食貨志三）

正統三年。戶部覆議。運糧官軍。令遵勅諭。順帶土貨以爲盤費。不許沿河巡司官兵人等生事阻當。（黃訓皇

明名臣經濟錄卷二二 臧鳳正德十四年漕例奏

「河運」

永樂初。尙河海並運。以河運補海運之所不及。四年。始命陳瑄專理河漕事。九年。命工部尙書宋謙等。濬會通河。以南旺水淺。舟不能重載。納汶上老人白英建議。築壩於汶上縣之戴村。橫亘五里。不使汶水入洸。而遏之使入南旺湖。再分南北流。以濟運。稱爲奇工。南北運道始通。又經陳瑄開河置閘。轉輸益便。遂停海運。專行河運。然河流時需修治。嘉隆間尙有人主張開膠萊新河。海河並運者。以工鉅而止。

自永樂年間。開設裏河漕運以來。定撥湖廣、江西、浙江、南京、江南、江北并中都留守司衛所官兵。一十二萬七千八百餘員。分爲十二總。歲運糧儲四百萬石於京。通、天津、薊州等倉交納。其江西、湖廣、浙江、南直隸都司衛所官軍運糧。由揚子大江至江北裏河。由儀真、揚州、淮安、邳、徐、濟寧、東昌、臨清、德州、天津直抵通州等九衛。

（黃訓皇明名臣經濟錄卷二二 王瓊正德三年漕例奏一）

成祖擇天下形勝。建都北平。……命平江伯陳瑄專理河漕事。瑄乃疏清江浦。引水由管家湖入鴨陳口達淮。以避淮河風濤之險。浚瓜州儀真二壩。祛潮港之壅。鑿徐呂二洪之巨石。以平水怒。行沛縣招陽、濟寧南旺、高郵鹽社諸湖。築長堤以蓄巨漑。開泰州白塔河。以通大江。鑿高郵渠四十里。以便舟楫。自淮抵臨清。增閘四十

有七。以便蓄洩。自淮至通州。濱河置廬舍五百六十八所。居卒以治淺。緣河堤種樹置井。以待渴者。置倉於淮安、徐州、臨清、通州。以便轉運。亘四千里。數十年。漕河事宜。皆瑄所經綜。周慮而力圖之。至於今是賴。（朱健古今治平略卷八國朝漕運）

凡京倉五十有六。通倉十有六。（明史卷七九食貨志三）

「海運」

洪武之行海運。蓋爲兼濟北平、遼東。後來之廢。蓋畏風濤砂線不常。海船多致飄失。嘉隆時漸有議復者。崇禎十三年。慮河運有阻。始命沈廷揚以戶部郎中督理海運。行之數年。事捷費省。蓋以補河運之不足。

洪武元年北伐。……已而大將軍徐達令忻嘯代堅臺五州運糧大同。中書符下山東行省。募水工發萊州洋海倉餉永平衛。其後海運餉北平遼東。爲定制。（明史卷七九食貨志三）

洪武三十年。海運糧七十萬石。給遼東軍餉。永樂初。海運七十萬石。至北京。至十三年會通河通利。始罷海運。（黃訓皇明名臣經濟錄卷二二丘濬漕運議）

國初去勝國未遠。沙民猶能習海。余生長海壖。嘗聞父老言。驅民轉輸海粟。父別子。夫別妻。生受其祭。死招其魂。浮沒如蘋。生死如夢。其幸而脫鯨鯢之口。則以爲再世更生。來歲復運。如螻蛄之不知有春秋。（朱健古今

治平略卷八國朝漕運

隆慶辛未。海運初雇海鵬舡五隻。分載米二千石。每駕船十二人。自淮安至天津。試運無礙。（談遷北游錄紀聞上海運新考）

公姓沈氏諱廷揚。……公抗疏仿元世海運曰。安常不必計及海。有變不宜全恃河。并陳遼餉捷徑事宜。上海程圖冊。輯海運書五卷。言行之有八利。……願自買船載糧。先試以爲榜樣。……時崇禎十二年十月也。疏八上而克行。十三年授戶部尙書郎。督理海運。忘家捐貲。與一二童僕。出死力奔波於海陸四五百里之間。（沈寓白華莊藏稿鈔卷十一五梅公事記略）

清

「額徵」

清代漕糧。一仍明舊。康熙治河。歲費三百萬。俱以濟運爲辭。特設漕運總督。專理其事。然運途遼遠。費五得一。論者每以爲言。漕終不罷。暨海運暢行。輿販者衆。東南督撫猶堅持南糧不能改折。徒爲胥吏蠹蝕之資。庚子以後。始盡罷之。

順治二年。戶部奏定每歲額徵漕糧四百萬石。其運京倉者爲正兌米。原額三百三十萬石。江南百五十萬。浙江六十萬。江西四十萬。湖廣二十五萬。山東二十萬。河南二十七萬。其運通漕者爲改兌米。原額七十萬石。江

南二十九萬四千四百。浙江三萬。江西十七萬。山東九萬五千六百。河南十一萬。其後頗有折改。至乾隆十八年。實徵正兌米二百七十五萬餘石。改兌米五十萬石有奇。其隨時截留蠲緩者。不在其例。……漕糧之外。江蘇、松、常三府太倉一州。浙江嘉、湖兩府。歲輸糯米於內務府。以供上用及百官廩祿之需。謂之白糧。原額正米二十一萬七千四百七十二石有奇。……康熙初。定白糧概徵本色。惟光祿寺改折三萬石。石徵銀一兩五錢。（清史稿食貨志三漕運）

額徵漕糧。正兌漕糧。各省原額三百三十萬石。內除永折米改徵黑豆米並節年荒缺開墾報升不足原額外。以光緒十三年計之。共米二百四十七萬八千六百九十四石九斗四升有奇。內山東十六萬一千五百四十八石六斗有奇。河南二萬四千三百三十六石五斗有奇。江蘇八十五萬八百五十七石四升有奇。安徽十六萬五千五百六十九石有奇。江西奏銷冊。正改兌不分。共米五十萬一千七百一十五石有奇。浙江五十八萬四千九百九十八石四斗有奇。湖北九萬四千一百八十七石八斗有奇。湖南九萬五千四百八十二石六斗有奇。改兌漕糧。各省原額七十萬石。內除永折米改徵黑豆米並節年荒缺開墾報升不足原額外。以光緒十三年計之。共米二十七萬二千六百五十石有奇。內山東七萬八千二百三十三石二斗有奇。河南一萬五千五十石一斗有奇。江蘇十三萬一千八百四十九石四斗有奇。安徽一萬八千一百五十二石有奇。浙江二萬九千三百六十五石五斗有奇。白糧。江蘇、蘇州、松江、常州三府、太倉一州。原額十有五萬四百三十八石四斗七升。除改徵漕糧外。實徵六萬九千二十五石。浙江嘉興、湖州二府。原額六萬六千二百石。除改徵漕糧外。實

徵二萬九千九百七十五石。其實徵白糧九萬九千石。小麥……其實徵正兌改兌正耗麥六萬九千五百六十一石八斗四升有奇。黑豆共實徵正兌改兌正耗豆二十萬八千一百九十石三斗一升有奇。（大清會典事例卷一九四戶部漕運）

「河運」

清代河運。仍用屯丁長運。唯簽一雇九。又以額糧漸減。漕糧僅二百七八十萬石。白糧僅十萬石。糧船亦因之減半。咸豐中。河運全停。水手失業。乃多加入捻軍。逆河亦淤塞。行旅者遂舍舟而遵陸矣。

清初漕政仍明制。用屯丁長運。長運者。令瓜淮兌運軍船。往各州縣水次領兌。民加過江脚耗。視遠近爲差。而淮、徐、臨、德四倉。仍係民運交倉者。並兌運軍船。所謂改兌者也。逮至中葉。會通河塞。而膠萊故道。又難猝復。借黃轉般諸法。行之又不能無弊。於是宣宗採英和、陶澍、賀長齡諸臣議復海運。遴員集粟。由上海雇商船轉漕京師。民咸稱便。河運自此遂廢。（清史稿食貨志三漕運）

各省漕船原數萬四百五十五號。內除漕糧折銀徵解及灰石改折。並分載帶運及墾荒田地應蠲漕糧裁減船數外。以嘉慶十七年實運船數計之。共六千二百四十二隻。直隸三十七號。山東八百八十七號。江南江安糧道所屬二千六百九十六號。蘇松糧道所屬五百二十二號。浙江八百四十五號。江西六百三十八號。湖北

一百八十號。湖南一百七十八號。河南無出運衛所。係撥直隸、山東、江南幫船就近協運。江南運白船一百三十八號。浙江百二十一號。（大清會典事例卷二〇二戶部漕運）

〔海運〕

道光中始行海運。初猶自雇沙船裝載剝運。咸豐以後。天津上海間外商海輪暢通。由其代運。倉場僅備剝船。自天津運往通州入倉而已。

嘉慶中。洪澤湖洩水過多。運河淺涸。令江浙大吏彙籌海運。兩江總督勒保等。會奏不可行者十二事……自是終仁宗之世。無敢言海運者。道光四年。南河黃水驟漲。……挾沙日久。淤墊爲患滋深。上亦知借黃濟運非計。於是海運之議復興。……時琦善督兩江。陶澍撫安徽。咸請以蘇、松、常、鎮、太倉四府一州之粟。全由海運。乃使布政使賀長齡親赴海口。督同地方官吏。招徠商船。並籌議剝運兌裝等事。陶澍言見雇沙船千艘。三不像船數十。分兩次裝載。計可運米百五十萬石。其安徽、江西、湖廣離海口較遠。浙江乍浦、寧波海口。或不能停泊。或盤剝費鉅。仍由河運。上乃命設海運總局於上海。並設局天津。復命理藩院尙書穆彰阿。會同倉場侍郎駐津驗收監兌。以杜經紀人需索留難諸弊。六年正月。各州縣剝運之米。以次抵上海受兌。分批開行。計海運水程四千餘里。踰旬而至。米石抵通後。轉運京倉。（清史稿食貨志三漕運）

道光五年……茲據奏現雇有沙船一千餘隻。三不像船數十隻。計春夏兩次。可以運米一百五十餘萬石。著

照所請。將蘇、松、常、鎮、太四府一州新漕。並緩帶漕糧。由海運抵津。……咸豐元年。覆准上屆海運漕白各糧。上海沙船不敷運送。間雇外省蟹船。及三不像等船。一併裝載。……三年。議准本屆浙江漕糧。海運所需船隻。除寧波船三不像船。由浙省自行封雇外。其上海之沙船。及直隸之衛船。山東之登。由于子船。由浙省派員赴滬設立總局。會同蘇省委員。不分畛域。一律封雇。以資裝運。又諭。著直隸、山東各督撫速派幹員封備衛船。並著奉天府尹及各督撫確查各處海口。如有寧波商船停泊。押令迅速回浙。聽候封雇。裝運漕糧。不准胥役人等需索滋擾。致生事端。……同治五年。諭浙江本屆新漕米數較增。尤須多備船隻。俾敷裝運。著直隸總督、山東巡撫。即飭產船各地方官。儘數挑選東衛等船。趕緊駛赴上海協運。俾免貽誤。……十一年。奏准嗣後海運白糧抵津。由各該糧道自雇民船剝運赴通。毋庸在津候驗。（大清會典事例卷二一〇戶部海運）

剝船直隸舊設二千五百艘。二百艘分撥故城等處。八百艘留楊村。餘千五百艘集天津備用。後雇覓堪裝漕糧二百五十石民船五百艘。以備裝載。商船首次抵津。先僅府縣倉廩廟宇撥卸三十萬石。餘令剝船徑運通倉。隨將天津倉廩廟宇所儲漕米運通。無庸轉卸北倉。（清史稿食貨志三漕運）

「搭載貨物」

漕船本許載運土宜免稅。爲鼓勵海輪運漕。因有搭載貨物二成免稅之例。久之遂成走私之藪。雖有海關查驗。不能禁絕。

道光五年。奏准商運米船八成載米。酌留二成載貨。並由海關查明免稅放行。……二十八年。奏准商船二成

載貨。由海關查明免稅。計數請豁稅額。係裝米千石。准帶貨二百石。論石而不論價……咸豐六年。咨准本屆海運漕糧各口岸。遇有商船到口。速即驗明護照。將二成貨物免稅。如二成以外。及販豆回南者。仍照例納稅。毋任偷漏。九年。議准現奏定洋藥釐稅章程。凡各關海口。每洋藥一百斤。納稅三十兩。與尋常貨物不同。嗣後海運沙船進口。攜帶洋藥者。令照新章納稅。並於貨單註明。以免牽混。其餘貨物。仍照章免稅。同治五年。議准商船兩旁跨帶竹木。係因遠涉重洋。防禦風濤之用。且係粗笨之物。例定稅則無多。亦應與二成貨物。一律免交關稅。所有沿海各關。俟海運商船到口。均行查照辦理。……又議准漕船到津。米石交清後。即由津局、蘇、浙糧道。分別填給該船米數某日交清。准在天津、奉天各口自運四貨全行免稅印照。持赴天津、牛莊各關呈驗放行。交米未清之船。概不給照。六年。議准如所帶二成貨物。在津未能銷完者。即照案轉至奉天銷售。由津給予免稅照單。以憑查驗。……十二年。咨准商局輪船運米。由上海道填給免稅執照。如帶有洋藥。及二成之外另帶餘貨。均照沙寧各船例納稅。（大清會典事例卷二一二戶部海運）

「京通倉」

清制。以戶部侍郎一人爲倉場總督。專理倉務。其屬有坐糧廳掌收漕。大通橋監督掌抽查。京倉十三。爲廩九百五十六。通倉二。爲廩二百五十。每廩貯米萬石。例以御史一人稽查之。各倉有監督。有看倉旗員、吏典、皂隸、守兵、花戶。其事甚繁。其制甚密。

京師十有三倉。祿米倉五十七廩。南新倉七十六廩。舊太倉八十三廩。富新倉六十四廩。興平倉八十一廩。均在朝陽門內。海運倉百廩。北新倉八十五廩。均在東直門內。太平倉八十六廩。在朝陽門外。本裕倉三十廩。在德勝門外清河。萬安倉九十三廩。在朝陽門外。儲濟倉百有八廩。裕豐倉六十三廩。均在東便門外。豐益倉三十廩。在德勝門外。安河橋、大通橋號房四十八間。朝陽門號房五十八間。通州二倉。西倉一百四十二廩。在新城。中倉一百有八廩。在舊城。南門內通州石壩號房二十五間。舊城南門外號房十間。新城南門外號房二十五間。（大清會典事例卷一八四戶部倉庾）

倉場職掌。總督倉場戶部右侍郎。順治十五年。定滿漢各一人。駐紮通州新城。總理京通各倉糧務。其漕運總督、各該督撫及沿河文武衙門。凡漕運文冊應報倉場者。均照報部體式。應舉劾者。照例舉劾。各項應行事宜。倉場報部查覈。又覆准每年春間出巡。閱看牘河。點驗石土兩壩。經紀車戶剝船。督令坐糧廳催置布袋。以備新糧到壩起運。又覆准漕白糧船抵天津。督率沿河文武官弁往來催運。並查驗北河淺阻。令坐糧廳督夫疏濬深通。毋致糧艘阻滯。……康熙二年。題准倉場督收各省漕糧。除帶運米不算外。其扣收餘米。抵欠算入正運數內。總作十分考覈。未完五釐以上至一分者。罰俸一年。三年連欠五釐以上至一分者。降一級督催。雍正三年。覆准漕白糧船。抵通日期。及起過糧數。回空船數。並石壩外河水勢深淺。五日一次具奏。……乾隆四十四年。奏准通漕辦理糧務。向設漕運通判一員。駐紮張家灣。專管內河修防、外河挑濬各事宜。其關涉漕務事件。經行呈報倉場及坐糧廳辦理。至北河雇備剝船。委楊村通判稽查。漕船剝貨。委務關同知會同嚴查。悉照

張家灣通判之例。經行申報倉場。嘉慶十五年。奏准各省漕船行至北運河一帶。由務關營通州協催趲。每致倉場呼應不靈。嗣後歸倉場衙門兼轄。以重漕運。（大清會典事例卷一八四戶部倉庾）

大抵京通兩倉。所放米曰官俸。曰官糧。亦名甲米。二者去全漕十之六。其一。養工匠名匠米。其一。定鼎時。宗臣封親王者六。封郡王者二。世宗之弟封親王者一。此九王子孫。自適裔外。並有封爵。以世降而隨之。統名恩米。二者去京倉百之一。（清史稿食貨二倉庫）

（2）征權

（甲）明之征權

「鈔關」

明代鈔關設於水次。以需納船鈔。故名鈔關。一代皆以寶鈔上納。或須改折銀錢。故鈔及銀錢並用。關皆屬於戶部。命主事主征權之事。收入頗鉅。爲國計之一大宗。

國初有商稅。未嘗有船鈔。至宣德間始設鈔關。凡七所……兼權商稅。其所權本色錢鈔則歸內庫。以備賞賜。折色銀兩則歸太倉。以備邊儲。每歲或本折輸收。或折色居七分之二。其收鈔有輕重。差官有專攝……設關處所。河西務、臨清、九江、潞寧。俱戶部差。淮安、揚州、杭州。俱南京戶部差。（大明會典卷三五）

宣德四年。^{一四二}以鈔法不通。由商居貨不稅。由是於京省商賈湊集地。市鎮店肆門攤稅課增舊凡五倍。^{九年}兩

京蔬果園。不論官私。種而鬻者。場房庫房店舍居商貨者。騾驢車受僱裝載者。悉令納鈔。委御史、戶部、錦衣衛、兵馬司官各一。於城門簽收。舟船受僱裝載者。計所載料多寡。路近遠。納鈔。鈔關之設自此始。其倚勢隱匿不報者。物盡沒官。仍罪之。於是有漕縣、濟寧、徐州、淮安、揚州、上新河、潁墅、九江、金沙洲、臨清、北新諸鈔關。量舟大小修廣而差其額。謂之船料。不稅其貨。惟臨清、北新則兼收貨稅。各差御史及戶部主事監收。自南京至通州。經淮安、濟寧、徐州、臨清。每船百料。納鈔百貫。（明史卷八一食貨志五）

正統十一年。^{一四四}移漕縣鈔關於河西務。……嘉靖四年。鳳陽府設正陽鈔關。前後凡十有二處。皆止稅船料。惟臨清、杭州兼收貨稅。至萬曆時。止存河西務、臨清、淮安、揚州、蘇州、杭州、九江共七處。此明一代鈔關之大略也。凡船料始時估料定稅。後以估料難核。乃度梁頭廣狹爲率。自五尺至三丈六尺有差。嘉靖時。又命以成尺爲限。勿科畸零焉。（續文獻通考卷一八征權考一）

崇禎二年。^{一六二}命關稅每兩增一錢。……按春明夢餘錄載戶部議權額疏。南北權關有舊額有新增。北新關原額四萬。天啓元年增二萬。五年增二萬。共八萬兩。潁墅關原額四萬五千。天啓二年增二萬二千五百。五年增二萬。共八萬七千五百兩。九江關原額二萬五千有奇。天啓元年增一萬二千五百有奇。五年增二萬。共五萬七千五百餘兩。兩淮鈔關原額二萬二千。天啓元年增七千六百有奇。五年增一萬五千。共四萬四千六百兩。揚州關原額一萬三千。天啓元年增二千六百。五年增一萬。共二萬五千六百兩。惟臨清關原額銀八萬三千八百。河西務原額四萬六千。並無加增。因解不足額。臨清減二萬兩。河西務減一萬四千兩。崇文門原額

六萬八千九百二十九兩。天啓五年增二萬。共八萬八千九百二十九兩。此舊額與新增之數也。天啓六年。以助工稅差。照正額每兩加羨餘銀一錢。大工竣。改爲助餉。每兩止增羨餘五分。至是量增五分。爲一錢。合計八關。共增銀五萬餘兩。明季關鈔之數。大略備矣。（續文獻通考卷一八征權考一）

崇禎三年。^{一六三〇年}復增二錢。惟臨清僅半。而崇文門、河西務俱如舊。……九年。復議增稅課款項。十三年。增關稅二十萬兩。而商民益困矣。凡諸課程始收鈔。間折米。已而收錢鈔半。後乃折收銀。（明史卷八一食貨志五）

〔商稅〕

商稅三十而稅一。唯書籍農具不征。

太祖初征酒醋之稅。收官店錢。卽吳王位。減收官店錢。改在京官店爲宣課司。府縣官店爲通課司。凡商稅三十而取一。過者以違令論。（明史卷八一食貨志五）

國初洪武中。……令天下稅課司局。諸客商貨賄俱三十而稅一。……其金、銀、鉛、硃砂、膽礬、雄黃、丹青綠、毛纓、碧甸子、鍾乳粉、棕毛、水銀。俱起解本色。其餘鹽、茶、酒、醋、硝、鉛、黑錫、石膏。商稅密課俱折收金銀錢鈔。輸京師。惟五穀、農器、書籍、紙笥不稅。酒課不設務。不定額。如異時已榜諭各稅課司局巡攔所辦。令計額課逐日旬辦貯司局官按季攢收。而官攢侵欺。致巡攔賠納者罪。（傳維麟明書卷八三食貨志三）

凡一應收稅衙門。有都稅。有宣課。有司。有局。有分司。其收稅有本色。有折鈔。其起解收貯。有入內府。有留各處。亦有添設除免。其差官有巡視、監收。……各司局衙門。歷朝建革不一。其已革衙門。課程仍於該府州縣及附

近司局帶管。或於均徭內編補。或將革過巡攔工食銀抵補。歲辦不缺。（大明會典卷三五）

稅課司局。京城諸門及府州縣市集多有之。凡四百餘所。其後以次裁併十之七。（明史卷八一食貨志五）

初南京軍民居室皆官所給。比舍無隙地。商貨至或止於舟。或貯城外。驢僮上下其價。商人病之。太祖乃命於三山諸門外。瀕水爲屋。名塌房。以貯商貨。其貨物以三十分爲率。內除一分官收稅錢。再出免牙錢一分。房錢一分。與看守者收用。貨物聽客商自賣。其小民鬻販者。不入塌房投稅。（續文獻通考卷一八征權考一）

永樂七年。一四〇九年……令京城官店塌房照三山門外塌房例。宣課分司收稅錢一分。免牙塌房錢二分。（續

文獻通考卷一八征權考一）

永樂七年。一四〇九年。遣御史、監生於收課處權辦課程。二十一年。一四二三年。山東巡按陳濟言。淮安、濟寧、東昌、臨清、

德州、直沽。商販所聚。今都北平。百貨倍往時。其商稅宜遣人監權一年。以爲定額。帝從之。（明史卷八一食貨志五）

洪熙元年。一四二五年。正月。增市肆門攤課鈔。時欲通鈔法。戶部尙書夏原吉等。請於市肆各色門攤內。量度輕重

增納課鈔。官取其昏軟者悉燬之。帝是其言。（續文獻通考卷一八征權考一）

正統七年。一四四二年。正月。定在京宣課。都稅二司稅鈔則例。初二司收課則例不一。姦弊蠹生。戶部主事汪澍以

爲言。事下順天府議定。每季緞鋪納鈔一百二十貫。油磨、糖機、粉、茶食、木植、翦裁、繡作等鋪三十六貫。餘悉量貨物取息。及工藝受直多寡取稅。（續文獻通考卷一八征權考一）

正統九年。^{一四四四年}王佐掌戶部。置彰義門官房。收商稅課鈔。復設直省稅課司官。征權漸繁矣。（明史卷八—食貨志五）

弘治間。課鈔四千六百一十八萬九十貫。嘉靖二十三年。課鈔五千二百六萬八千一百九貫。（大明會典卷三五）

商稅總額簡表

收 稅 處 所	稅	額
京都九門	鈔六十六萬五千一百八十貫	錢二百四十三萬二千八百五十文
順天府歲徵都稅司 正陽門稅課司 安定門稅課司 德勝門稅課司	共鈔十三萬七千九百五十貫	錢二十七萬五千九百文
崇文門宣課分司 商稅猪口牙稅 條稅船稅	共銀四萬三百餘兩	錢一千八百八十七萬七千七百文
通州張家灣宣課司 抽分麴併條稅船稅 通州鹽牙稅 居庸關商稅	共銀一萬六百餘兩	錢二百八十八萬七千餘文

永平保定河間眞定順德廣平大名等府商稅

共鈔六十八萬四千六百餘貫

南京兵馬司房稅龍江關船料石灰山關大勝關應天府都稅司商稅

聚寶門宣課司及分公司朝陽門分公司

江東龍江兩宣課司商稅門攤

太平門龍江龍潭三稅課司商稅

上元江寧等縣商稅併酒醋房屋江東瓜埠兩巡檢司

共鈔一千四百八十九萬一千一百餘貫

以上俱每貫折銀六毫閏月加鈔在外

安徽府商稅并魚酒醋課

池州太平蘇州三府商稅并茶課

松江府蘇州府商稅并魚課

常州府揚州府商稅并酒醋課

鎮江府兩府商稅并酒醋課

淮安府兩府商稅并酒醋課

徐州府兩府商稅并酒醋課

廣德州商稅并酒醋課

浙江布政司商稅門攤并酒醋魚課

鈔二百二十八萬三千四百四十三錠五貫餘

江西布政司商稅

銀三千五百五十兩二錢

錢五十六萬七千餘文

湖廣布政司商稅	鈔二百六十九萬八千六百四十 一貫餘	
福建布政司商稅門攤并魚課	鈔二十六萬七千三百三十六錠 五貫餘	
山東布政司商稅	鈔三百五十萬一千一百十錠一 貫	
山西布政司商稅門攤并酒醋	本色鈔三十六萬一千四百八十 八錠三貫餘	折色鈔九百二十錠三貫
河南布政司商稅	鈔四十萬六千八百二十錠二貫 餘	
陝西布政司商稅并酒醋	鈔一百七十四萬五千三百二十 一貫餘	
四川布政司商稅	鈔五十四萬四千七百一十八貫 餘	
廣東布政司額征南雄府太平橋 南北抽盤商稅并鐵課	銀約四萬三千餘兩	
廣西布政司商稅門攤	鈔二萬四千五百六十六錠三貫 餘	

雲南布政司商稅門攤并酒醋鉛
鐵銅稅魚課

銀約一萬五千一百三十五兩二
錢餘

海肥約五千四百九十八索二十
手

貴州布政司商稅

鈔一十四萬八千三百六十三貫
餘

附註 本表爲萬曆六年商稅總額。據續文獻通考征權考而作。

「抽分」

商稅收納實物。謂之抽分。亦有折銀者。

明太祖洪武初。設抽分竹木局。……凡龍江、大勝港、俱設立抽分竹木局。客商與販蘆柴茅草等。三分取一。杉木機毛等。三十分取二。松木杉板柴炭等。十分取二。又令軍衛設場收貯柴薪。按給禁軍孤老等。竹木堆垛在場。奏申知數。以憑度量關支。如營造數多。抽分不敷。或給價收買。差人斫辦。（續文獻通考卷二四征權考七）

永樂六年。^{一四〇八年}設通州、白河、蘆溝、通積、廣積五抽分局。至十三年。^{一四一五年}令以三十分爲率。凡竹木柴炭。甄瓦等。取一至取十五。各有差。（續文獻通考卷二四征權考七）

正統元年。^{一四三六年}設眞定抽分竹木局。令眞定府稅課司帶管。凡木植抽三十分之四。……至天順時。又設保定抽分。令唐縣委官至倒馬關。抽分木植二十分之六。（續文獻通考卷二四征權考七）

成化七年。^{一四七一年}又設杭州、荊州、太平三處抽分。……凡竹木等物抽十分之一。……十七年。^{一四八一年}設蘭州

抽分。本州衛掌印官會同將河橋上岸捉獲木植。每十分抽其二。過河橋捉獲者。盡數入官。至嘉靖元年。^{一五二二}年定通州抽分竹木局。凡商販竹木曾經真定九一抽分取有印信執照者。止用九一抽分。通前合爲二八。其未經抽分者。仍用二八抽取。^{一五二二}六年。^{一五二七}裁革白河抽分竹木局官吏軍人。其例應抽分竹木柴炭甄瓦等。令廣積局帶管。仍聽巡按御史督察。^{一五三一年}十年。蘆溝抽分竹木局。堆積木植朽壞。每年終工部委官盤查。變賣銀兩。解部作正支銷。（續文獻通考卷二四征權考七）

成化九年。^{一四七三年}更定蘆柴木柴折銀例。景泰間。應天等處歲辦蘆柴。以十分爲率。減免四分。三分折鈔。三分本色。折鈔每束二貫五百文。每一萬貫又折收銀二十二兩五錢。至是令於蘆柴三分本色內以一分折銀。每束二分。俱送應天府收貯支用。其折納木柴者。每百斤折銀四分。至抽分竹木原鈔者。至是亦折銀。漸益至數萬兩。（續文獻通考卷二四征權考七）

「河泊所」

河泊所以稅船舶。兼管魚課。

洪武初。設河泊所。……十五年。^{一三八二年}……定河泊所官制。吏部奏。凡天下河泊所二百五十二。歲課米五千石以上至萬石者設官三人。千石以上者二人。三百石以上者一人。制可。（續文獻通考卷二四征權考七）凡魚課每歲南京戶科編印勘合。通計四川等布政司。并直隸河間等府州縣河泊所等衙門。該勘合六百八十九道。皆以河字爲號。南京戶部領回。發各該衙門收掌。各記所收魚課米鈔若干。年終進繳。其勘合底簿仍

送戶部。如各衙門繳到勘合。務比對硃墨字號相同。於上明白填寫。以憑查考。河泊所累朝建革不一。其已革衙門。魚課仍於各該府州縣帶管。或歸併附近河泊所。歲辦不缺。（大明會典卷三六）

洪武十八年。^{一三八五年}令各處魚課皆折收金銀錢鈔。……宣德七年。^{一四三二年}令湖廣、廣西、浙江魚課辦納銀者。

每銀一兩折鈔一百貫。（大明會典卷三六）

魚課數。弘治十五年。^{一五〇二年}課鈔三百一十七萬五千三百七十貫。嘉靖二十三年。^{一五四四年}課鈔三百一十七

萬七千一百一十貫。（大明會典卷三六）

萬曆時魚課簡表

地域	稅	額	地域	稅	額
直隸永平府	鈔一萬七十三貫六百文		河間府	鈔一萬五千七百一十七貫七百六十文	
保定府	鈔四千七百七十一貫七十文		大名府	鈔七千七百一十貫五十一文	
應天府	鈔九萬九千四十九貫一百三十文		直隸蘇州府	鈔二千一百七十四貫四百文	
松江府	銀五百五十七兩四錢六分三釐		常州府	鈔三萬四千九百八十一貫九百五十五文 錢六萬九千九百六十四文	

鎮江府	鈔五千一百六十四貫	廬州府	鈔二萬六千三百八十二貫五百文
揚江府	鈔一十二萬一千五百一貫三百三十二文	太平府	銀一百一十七兩二錢四分八釐
浙江	鈔一十八萬二千九百六十九貫六百二十文	江西	銀一千四百八十兩五錢三分
湖廣	鈔一百二十六萬五千四百二十四貫	福建	銀七千一百兩
山東	鈔三百四十四貫	河南	鈔七千二百六十八貫七百四十二文
陝西	鈔二萬三千九百一十二貫九百四文	廣西	鈔二千七十九貫五百三十文
四川	銀三百三十七兩五錢七分九釐	雲南	銀一千三百五十三兩七錢八釐米麥三百五十石五斗

〔市舶司〕

明初設市舶司於上海黃渡。有提舉司司其事。後改設於寧波、泉州、廣州。成化以後。廣州對外貿易最盛。獨以太監領之。嘉靖時有海禁。然獨不及廣州。市舶皆行抽分之制。故廣州有十三行之設。以銷行外貨。直至道光海通時爲止。

明初東有馬市。西有茶市。皆以馭邊。省戍守費。海外諸國入貢。許附載方物。與中國貿易。因設市舶司。置提舉

官以領之。所以通夷情。抑姦商。俾法禁有所施。因以消其釁隙也。（明史卷八一食貨志五）

太祖訓曰。日本限山隔海。得其地不足以供給。得其民不足以使令。不許興兵致伐。然夷中百貨。皆中國不可缺。夷必欲售。中國必欲得之。故立三市舶司。設提舉官。（傳維麟明書卷八三食貨志三）

洪武初。設市舶司於太倉黃渡。尋改於浙江、福建、廣東設三市舶司。三年^{一三七〇年}二月。罷太倉黃渡市舶司。凡

番舶至太倉者。命軍衛有司封籍其數。送赴京師。……尋復設市舶司於寧波、泉州、廣州。寧波通日本。泉州通琉球。廣州通占城、暹羅、西洋諸國。（續文獻通考卷二六市糴考二）

初以太倉爲六國馬頭。旋以近京師。恐生他變。遂徙之寧波諸處。而以按察司主其事。旋改提舉。（傳維麟明書卷八三食貨志三）

琉球、占城諸國。……任其時至入貢。惟日本……獨限其期爲十年。人數爲二百。舟爲二艘。以金葉勘合表文爲驗。以防詐僞侵軼。（明史卷八一食貨志五）

洪武二年^{一三六九年}九月。定朝貢附至番貨。欲與中國貿易者。官抽六分。給價償之。仍免其稅。……明律曰。凡泛

海客商船舶到岸。將貨物盡實報官抽分。不得停擱沿港土商牙儉之家。違者有罪。（續文獻通考卷二六市糴考二）

永樂三年^{一四〇五年}。以諸番貢使益多。乃置驛於福建、浙江、廣東三市舶司以館之。福建曰來遠。浙江曰安遠。廣

東曰懷遠。（明史卷八一食貨志五）

永樂六年一四〇八年正月。設交趾雲南市舶司。（續文獻通考卷二六市糴考二）王圻曰：……貢舶與市舶一事也。凡外夷貢者皆設市舶司領之。許帶他物。官設牙行與民貿易。謂之互市。是有貢舶即有互市。非入貢即不許其互市矣。（續文獻通考卷二六市糴考二）

「牙稅」

明代牙錢、稅及羅段、紙張、鐵鍋、顏色等行貨。與清代不同。

景泰二年。一四五一年令順天府及大興、宛平二縣。俱集各行。依時估計物貨價直。照舊折收鈔貫。……其收稅則例。上等羅段每疋稅鈔牙錢鈔塌房鈔各二十五貫。中等羅段每疋稅鈔牙錢鈔塌房鈔各一十五貫。下等羅段每疋稅鈔牙錢鈔塌房鈔各一十貫。上等紗綾錦每疋。青紅紙每一千張。篋子每一千箇。稅鈔牙錢鈔塌房鈔各六貫七百文。中等紗綾錦每疋。細羊羔皮襖每領。黃牛真皮每張。扇骨每一千把。稅鈔牙錢鈔塌房鈔各五貫。青三梭布每疋。紅油紙每八千張。冥衣紙每四千張。鐵鍋每套四口。藤黃每斤。稅鈔牙錢鈔塌房鈔各四貫。……其餘估計未盡物貨。俱照價直相等則例收納。其進塌房鈔并抽分布疋及按月該納房鈔。俱爲免除。（大明會典卷三五）

「稅監」

萬曆中有稅監之設。旋復停止。然崇文門之稅。始終爲太監管之。收入皆歸皇室。

萬曆二十四年一五九六年十月。始命中官權稅通州。是後各省皆設稅使。羣臣屢諫不聽。（續文獻通考卷一八

征權考一）

權稅之使。自二十六年一五九八年。千戶趙承勛奏請始。高宗於京口。暨祿於儀真。劉成於浙。李鳳於廣州。陳奉於

荊州。馬堂於臨清。陳增於東昌。孫隆於蘇杭。魯坤於河南。孫朝於山西。邱乘雲於四川。梁永於陝西。李道於湖口。王忠於密雲。張曄於盧溝橋。沈永壽於廣西。或征市舶。或征店稅。或專領稅務。或兼領開採。姦民納賄於中官。輒給指揮千戶劄。用爲爪牙。水陸行數十里。卽樹旗建廠。視商賈懦者。肆爲攘奪。沒其全資。負戴行李亦被搜索。又立土商名目。窮鄉僻壤米鹽雞豕。皆令輸稅。所至數激民變。帝率庇不問。（明史卷八一食貨志五）

萬曆三十三年一六〇五年。……戶部尙書趙世卿……言。崇文門、河西務、臨清、九江、潯墅、揚州、北新、淮安各鈔關。征本折約三十二萬五千餘兩。萬曆二十五年增銀八萬二千兩。此定額也。乃二十七年以後。歷歲減縮。至二十九年。總解二十六萬六千餘兩。究厥所由。則以稅使苛斂。商至者少。連年稅使所供。卽此各關不足之數也。疏入不省。……九門稅尤苛。舉子皆不免。甚至擊殺觀吏。（明史卷八一食貨志五）

（乙）清之征權

清代商稅。多沿明制而屢增其額。海關釐金爲新制。蔚爲國課大宗。

清興。首除煩苛。設關處所。多依明制。自海禁開。常關外始建洋關。而釐局之設。洋藥之徵。亦相繼而起。三者皆前代所無。……至印花稅、煙酒加徵。均試行旋罷。（清史稿食貨志六）

〔常關〕

常關有屬於戶部者。爲崇文門、左翼、右翼、坐糧廳、淮安、濟甯、揚州、蕪湖、西新、鳳陽、江海、天津、臨清、九江、贛關、北新、浙海、閩海、太平、粵海、山海、張家口、殺虎口、歸化城等二十四處。屬於工部者。爲龍江、蕪湖、宿遷、臨清、甄版、閘、南新等五處。海通以前。海關亦在常關之列。

康熙元年。^{一六六二年}移設河西務於天津。更名天津關。更定各關兼差滿漢官筆帖式各一。由六部咨送輪掣。停蒙古漢軍差。其張家、殺虎二口。專差滿蒙官。（清史稿食貨志六）

康熙五年。^{一六六六年}命各關稅均交地方官管理。……惟兩翼、張家口、殺虎口如故。只差戶部司員。（清史稿食貨志六）

康熙二十三年。^{一六八四年}始開江、浙、閩、廣海禁。於雲山、寧波、漳州、澳門設四海關。關設監督。滿漢各一筆帖式。期年而代。定海稅則例。免海口內橋津地方抽稅。（清史稿食貨志六）

乾隆二十二年。^{一七五七年}增定浙閩二海關稅則。尋又申禁洋船不准收泊浙海。有駛至者。仍令回粵貿易納稅。（清史稿食貨志六）

乾隆二十九年。^{一七六四年}定外番商貨至回部貿易者三十抽一。皮貨二十抽一。回商往外番貿易二十抽一。皮

貨十之一。其牲畜貨物不及抽分之數。視所值折算。(清史稿食貨志六)

嘉慶四年各關贏餘額簡表

關名	贏餘額	關名	贏餘額	關名	贏餘額
戶關坐糧廳	六千兩	天津	二萬兩	臨清	一萬一千兩
江海	四萬二千兩	濟甯	二十三萬五千兩	淮安	十一萬一千兩
海關廟灣口	二千二百兩	揚州	六萬八千兩	西新	二萬九千兩
九江	三十四萬七千八百兩	贛關	三萬八千兩	閩海	十一萬三千兩
浙海	三萬九千兩	北新	六萬五千兩	武昌	一萬二千兩
夔關	十一萬兩	粵海	八十五萬五千五百兩	太平	七萬五千五百兩
梧州	七千五百兩	漳州	五千二百兩	歸化城	一千六百兩
山海關	四萬九千四百八十七兩	殺虎口	一萬五千四百十四兩	張家口	四萬五百六十一兩
打箭鑪	儘收儘解	工關辰關	三千八百兩	宿遷	七千八百兩
蕪湖	四萬七千兩	龍江	五萬五千兩	荆關	一萬三千兩
通水道	三千九百兩	閩南新渝三關潘桃古北殺虎三口竹木稅無贏餘			

嘉慶九年。一八〇四年復增定各關贏餘額數。浙海四萬四千。西新三萬三千。九江三十六萬七千。潯暨二十五萬。

淮安十三萬一千。……道光十年。一八三〇年定各關盈餘銀以六成爲額內。四成爲額外。覈其溢額細額。分別功

過例。（清史稿食貨志六）

光緒十七年。一八九一年歲入……常稅二百五十五萬八千四百一十兩。（清史稿食貨志六）

「洋關」

商埠初只五口。後侵略者隨時增索。亦有自行開埠者。商埠之設。幾遍內地。各關監督多由實缺道員兼任。唯閩海由福州將軍兼之。粵海由內務府派充。關稅出入口稅。初俱定值百抽五。子口則納半稅。數十年間。物價屢漲。而稅則如故。關稅徵收。由外籍稅務司司之。英人赫德爲總稅務司。自後唯英人得當此任。以擔保借款賠款之故。稅款支撥。皆由總稅司掌管。中央所設稅務司。竟不能過問。

洋關之設。自五口通商始。前此雖有洋商來粵貿易。惟遵章向常關納稅而已。道光……二十二年。一八四二年秋。

英人要求通商口岸。允於沿海廣州、福州、廈門、寧波、上海五口開埠通商。明年。一八四三年定洋貨稅則值百徵五。

……洋貨進口。按則輸納後。由華商運入內地。所過稅關。只照估價若干。每兩加稅不過某分。（清史稿食貨

志六）

咸豐八年。^{一八五六年}復定英約。……一。子口稅按值百抽二五。如願一次輸納。洋貨在進口土貨在經過第一關

納稅給票後。他口不再徵。（清史稿食貨志六）

咸豐十一年。^{一八六一年}……定長江及各口通商章程。洋貨入江於上海納正稅及子口稅。土貨出口納出口稅。

復進口時完一正稅准扣二成。若完半稅不扣二成。再入內地仍照納稅釐。（清史稿食貨志六）

光緒二十八年。^{一九〇二年}……先是商約大臣盛宣懷、聶緝渠等言。稅務司赫德籌擬洋貨進口稅。援照洋藥稅

釐並徵之法。核估時值。按正稅子口稅七二五統加釐金一倍。爲值百抽十五。由海關並徵。以免各處釐局留難紛雜。貨可暢銷。洋商或可允從。並擬出口土貨向完半稅者。改完釐金。以抵洋貨釐捐。改歸海關並徵之數。於各省釐金亦無所損。……至是始與英定裁釐加稅之約。一。約款照行時。中國允除現有各常關外。向設各釐卡及抽類似釐捐之關概行裁撤。一。英允於進口洋貨增至切實值百抽五。加一額外倍半之稅。以抵撤釐金子口稅及各項稅捐。至土貨出口稅總數。不得逾值百抽七五之數。……尋與美、日、大西洋各國均定此約。卒以事費調查。迄未能實行也。（清史稿食貨志六）

自光緒二十二年。^{一八九六年}裁撤臺南、淡水、漢城各關外。爲關二十七。宣統三年。^{一九一一年}續增南寧、梧州、三水、岳州、福海、吳淞、金陵、膠海、騰越、江門、安東、大東溝、大連、濱江、滿洲里、綏芬河、愛芬、三姓、琿春、延吉等。爲關四十七。（清史稿食貨志六）

凡華洋輪船貨稅經徵之關二十有七。常關兼收者。直隸、津、海關、山海關、山東、東海關、江蘇、江海關、鎮江關、安

徽蕪湖關。江西九江關。福建閩海關。浙江浙海關。廣東粵海關。及所屬潮州、瓊州、北海等關。設關專收者。江蘇蘇州關。浙江甌海關。杭州關。湖北江漢關。宜昌關。沙市關。四川重慶關。廣西鎮南關。梧州關。雲南蒙自關。思茅關。甘肅嘉峪關。廣東九龍關。拱北關。（大清會典卷二三）

先是土藥各稅列入進口。同治十二年。^{一八七三年}始列專款。合計洋關歲徵各稅咸豐末年只四百九十餘萬。同治末年增至千一百四十餘萬。光緒十三年。^{一八八七年}兼徵洋藥釐金。增爲二千五十餘萬。三十四年。^{一九〇八年}增至三千二百九十餘萬。宣統末年。都三千六百十七萬有奇。爲歲入大宗云。（清史稿食貨志六）

宣統四年預算歲入關稅簡表

關名	銀額	關名	銀額
崇文門*	八十七萬七千三百一十一兩	張家口*	十萬五千五百九十八兩
殺虎口*	十一萬三千三百三十八兩	揚州關*	十萬五千兩
淮安關*	二十四萬五千二百九十七兩	鳳陽關*	二十萬三千八百七十二兩
贛關*	三萬三千六百十二兩	臨清關*	十七萬四千一百八十九兩
辰州關*	二萬一千四百四十兩	寶慶關*	一萬二千二百九十三兩
武昌府關*	四萬五千八百八十八兩	漢陽關*	二十萬四百八十兩

江漢關	長沙關*	膠海關	蕪湖關	鎮江關	江海關	琿春關	安東關	山海關	漳關*	歸化城*	太平關*	荊州府關*
三百十萬六千六百七十六兩	二十五萬七千一百二兩	一百十九萬零六百兩	九十三萬四千六十七兩	一百二十三萬八千九百七十四兩	一千一百五十六萬八千八百二十七兩	一萬三千五百三十六兩	十七萬八千九百四十四兩	一百四十三萬二千三百二兩	六千三百三十三兩	十一萬一千七百五兩	十一萬五千九百六十三兩	三萬七千一百八十二兩
沙市關	岳州關	東海關	九江關	金陵關	蘇州關		濱江關	大連關	津海關	四川各常關*	漳州廠*	荊州鈔關*
一萬五千九百四十六兩	六萬七千九百三兩	九十二萬五千八百六十六兩	一百零六萬五百五十二兩	十六萬七千四百二十六兩	十一萬六千四百九十四兩		九十萬三千五百七十九兩	一百十六萬一千五百兩	四百四十四萬九百七十九兩	二十一萬三千九百九十九兩	八萬九千二百二兩	七萬八千六百九十一兩

宜昌關	六萬八千三百四兩	閩海關	二百十七萬一千六百三十一兩
杭州關	六十四萬二千八百四十五兩	浙海關	七十四萬六千八百六十二兩
甌海關	九萬七千九百二十七兩	粵海關	七百九十七萬三千五百九十二兩
梧州關	七十二萬四千二十七兩	南寧關	七萬八千六百七十五兩
鎮南關	七千九百五十九兩	嘉峪關	一千六百九十兩
重慶關	三十八萬八千八百六十五兩	蒙自關	二十二萬七百一十一兩
思茅關	六千十一兩	騰越關	四萬六千一百四十兩
共計	四千四百七十四萬七千五十五兩		

附註 本表據宣統四年全國歲入歲出總預算表而作。

凡洋關皆有稅務司分海關常關兩種。此表所列非洋關者以*別之。凡史稿所列洋關爲此表所無者。爲潮州、瓊州、北海、九龍、拱北、梧州、三水、福海、吳淞、江門、大東溝、濱江、滿洲里、綏芬河、愛芬、三姓、延吉十七關。

〔釐金〕

釐金。咸豐初雷以釐納錢江之議。行之揚州。商貨每百錢抽一錢。故謂之釐金。郭嵩

肅行之湖南。爲曾軍的餉。本定軍事告終。卽行停止。後各省通設釐金。至清亡不改。且有鹽釐、肉釐、米穀釐、棉布稅釐等。雖只抽一釐甚輕。然遇卡卽須上納。一釐成爲數分矣。清季議加關稅。外人堅持必須裁釐。致關稅無從增加也。

咸豐初年。江甯布政使雷以誠。主江南釐事。遂擢副都御史。開府邵伯埭。采歸安諸生錢江之議。行釐捐。每百文抽一文。此爲釐金作俑之始。所取廉。所入巨。是以商賈不病。兵氣遂揚。曾胡踵之。事平不去。且增至每百抽三文。江浙二省。歲抽各約三四百萬。可不謂之巨款耶。其後卡若櫛比。法若凝脂。一局多卡。一卡多人。隻鷄尺布。併計起捐。……商民以什輸。公家所入三四而已。其六七皆官私所耗費而魚肉之。（皇朝續文獻通考卷

四九征權考）

釐金抽捐。創始揚州一隅。後遂推行全國。咸豐三年。一八五三年刑部右侍郎雷以誠治軍揚州。始於仙女廟等鎮

創辦釐捐。是年蘇常疊陷。丁漕無收。乃設釐局於上海。藉資接濟。又設江北釐捐。歸大營糧臺經理。五年。一八五

年江西設六十五局卡。湖北設四百八十餘局卡。湖南亦設城內外總分各局。江蘇揚、常、鎮各府屬添設小河

口、普安、新港、三江營、荷花池五局。……六年。一八五六年盛京抽收商貨及糧石捐。值百抽一。吉林亦如之。烏魯木

齊之吐番亦抽收棉花釐金。七年。一八五七年設湖北釐金總局。八年。一八五八年定豫省釐捐。……是年福建廣西均

設局卡。抽收貨釐。九年。一八五九年登、萊、青三府屬海口設局抽釐。山西設籌餉局。收行商藥稅及百貨釐捐於各

隘口。設七總卡及各分卡。十年。一八六〇年以張家口辦理釐金不善。激成事變。……兩江總督曾國藩。以湘軍援

鄂。請於長沙設東征局。……凡貨物皆於本省釐金外。加抽半釐。允之。……十一年。^{一八六一年}……安徽抽收釐金。設立正卡。……並設分卡分巡五十九。貴州亦設貨釐局於川楚鄰近之區。（清史稿食貨志六）

同治三年。^{一八六四年}……浙江定百貨釐捐值百抽九。浙東兩起兩驗。間卡抽收。貨值千文。起卡抽三十。驗卡減

半。捐足兩起兩驗。不重徵。浙西則一起一驗。由第一卡併徵。餘皆驗放。（清史稿食貨志六）

光緒二十五年。^{一八九九年}……我國釐金不能知其確數。惟西人皆以爲多於關稅。然考歷年報告。則所入不過

千三百餘萬兩。當關稅三分之一。（皇朝續文獻通考卷五〇征權考二二）

宣統四年預算歲入釐金簡表

地域	銀	額	地域	銀	額
吉林	八十六萬七千七百三十二兩		直隸	四十五萬八千七百一十二兩	
江甯	一百三十六萬六千五百四十三兩		江蘇	二百四十四萬五千九百九十二兩	
江北	十八萬三千六百四十一兩		安徽	九十二萬三千六百七十五兩	
山東	十二萬八千六百四十八兩		山西	四十萬四千五百二十八兩	
河南	三十六萬七千五百四十一兩		陝西	六十萬五千四百六十一兩	
甘肅	六十五萬一百八十兩		新疆	十三萬二千一百一十九兩	

福建	一百九萬二千五百六十七兩	浙江	二百七十九萬二千八百九十三兩
江西	一百八十九萬二千五百二十四兩	湖北	二百三十三萬四千五百六十一兩
湖南	一百四十九萬八千八百四十六兩	四川	一百九十萬五百一十七兩
廣東	二百八十二萬三千二百一十兩	廣西	八十九萬九千一十七兩
雲南	三十八萬一千三百三十兩	貴州	一十六萬七千五百九十八兩
察哈爾	一千二百兩	歸化城	八千三百八十二兩
川滇邊務	一千兩	伊犁	一萬九百二十兩
庫倫	五萬兩		
共計	二千四百三十八萬九千三百三十七兩		
附註	本表據宣統四年預算表而作		

「洋藥釐稅並徵」

諱鴉片之名而稱洋藥。行銷內地。例收釐金。外人屢以責難。乃與議定釐稅並徵。每百斤由海關收銀一百十兩。本爲海軍經費。竟爲海關扣抵他債。後又增爲二百五

十兩。以後洋藥輸入漸少矣。

鴉片輸入中國，其初概稱藥材。……乾隆中海關則例仍附藥材入口，每擔稅銀三兩。又每包加稅二兩四分五釐。顧其時輸額歲不過二百箱，都以葡人主販。（皇朝續文獻通考卷五一征權考二三）

咸豐七年。^{一八五七年}閩浙總督王懿德等，始有軍需緊要，暫時從權，量予抽捐之請。朝旨允行。八年。^{一八五八年}與法

定約。向來洋藥不准通商，現稍寬其禁，聽商貿易。每百斤納稅銀三十兩。只在口銷售，離口即屬中國貨物。准華商運往內地。法商不得護送。嗣與各國定約皆如之。（清史稿食貨志六）

咸豐九年。^{一八五九年}……雲貴總督張亮基言，滇省向無洋藥，上命先將所產土藥分別徵收稅釐，不得以洋藥

混土藥。（清史稿食貨志六）

光緒七年。^{一八八一年}直隸總督李鴻章言，洋藥既難驟禁，只可先加稅釐，煙價增則吸者漸減，未始非徐禁示罰之意。……查洋藥由印度先到香港，然後分運各口，奸商即於該港私相授受。……加捐易辦，偷漏難防。擬於

洋藥每百觔正稅三十兩外，加徵八十兩，統計釐稅百一十兩。土藥不論價之高下，每百觔徵四十兩，帝用其議。又以洋藥來自英商，命出使大臣曾紀澤與英確商。至九年。^{一八八三年}始如前議定約，併在進口時輸納。……

十三年。^{一八九七年}與葡定議在澳門協助中國徵收運往各口之洋藥稅釐，一如英香港辦法。（清史稿食貨志六）

宣統三年。^{一九一一年}度支部奏言。……洋藥進口已與英定約，稅釐並徵，每百觔增收二百五十兩。土藥亦須同

時比例加稅。查土藥價值不及洋藥三分之二。以徵爲禁。稅則無妨略重。卽照洋藥稅推算。定土藥百觔加徵二百三十兩。凡未禁運及本產本銷地方。卽按新章徵收。從之。（清史稿食貨志六）

「牙稅」

清代牙行有牙帖。由布政司頒行。例有定額。不得擅增。於是有帖者得長子孫。或以轉租同行。瓜果菜蔬例禁牙行而京師有之。

凡官牙定之以額。擇其人輸稅領帖。以充牙行。民間懋遷有無。評物價以助市政。若瓜果菜蔬日用之物。私立牙行名色者。禁之。屢禁州縣於定額之外私添牙帖。及胥役冒充爲民害。（王慶雲熙朝紀政卷六紀雜稅）雍正十一年。^{一七三三年}飭令各省額設牙帖……俱由藩司衙門頒發。不許州縣濫給……近聞各省牙帖歲有增添……嗣後止將額內退帖頂補之處。查明換給。再有新開集場應設牙行者。酌定名數給發。亦報部存案。（皇朝文獻通考卷三一征權考六）

乾隆五年。^{一七四〇年}議定清釐牙行之例。向例每行認充經紀。取具同行互保一人。出具殷實良民甘結。該管官加結送司。給帖充應。互結雖有殷實字樣。而互保之責成。未經議及。今定鋪家拖累商人者。將本牙行帖追繳。勒限清還。仍行給與。倘逾限不完。將互保之人一并更換。牙行惟圖用錢。任鋪戶坑騙客商者。除逾限不完。將牙行革退外。仍將鋪戶責限追比。其不足之項。令牙行賠補。牙行侵吞客賬者。除逾期不完。將本行互保一體

斥革外。仍將本牙賁限追比。其不足之項。令互保攤賠。其追比之限期。案欠數之多寡酌定。至於以後客之貨。挪補前客之欠。移弱客之貨。代償強客之欠。該互保先舉首。免其治罪。容隱者責令分賠。牙行夥計人等。侵吞客賬。總照牙行侵吞之例。追帖賠補。又……議。各省衙門胥役。現在更名捏姓兼充牙行者。令地方官嚴查確實。即行追帖。勒令歇業。並將胥役充補牙行之處。永行嚴禁。倘不法胥役。仍敢更名捏姓兼充牙行。應照更名重役例治罪。侵食客貨貽累商人者。發附近充軍。該管官照例議處。載入則例遵行。從之。（皇朝文獻通考卷三一征權考六）。

乾隆六年。^{一七四一年}革除牙行積弊。戶部覆准河南巡撫雅爾圖奏稱。……各省貿易集場及零星口岸。於額設牙行之外。竟復有集主包頭攬頭名色。朋比攘據。任意勒索。實爲商民之累。……應行令各省督撫。轉飭各該地方官。嚴查禁革。……從之。（皇朝文獻通考卷三一征權考六）

乾隆二十五年。^{一七六〇年}定湖廣漢口等鎮牙行稅額。湖廣總督蘇昌議覆湖北布政使公泰條奏。牙行所完牙稅。皆有上中下三等之殊。江西牙稅上則納銀三兩。中則納銀二兩。下則納銀一兩。湖北四通八達。漢口一鎮。更爲九省通衢。商賈輻輳。不減江浙等省。……請將漢口草市、沙市、樊城、岳家口等處牙行。按照上中下則。上行完稅銀二兩。中行完稅銀一兩。下行完稅銀五錢。其餘僻邑村鎮。上行完稅銀一兩。中行完稅銀五錢。下行完稅銀三錢。……從之。（皇朝文獻通考卷三一征權考六）

乾隆二十八年。^{一七六三年}……在京各項經紀。多寡不齊。一牙一帖。統計額缺八百九十一名。徵輸稅銀一千五

百三十一兩。例由順天府通判管理。(皇朝文獻通考卷三十一征權考六)

牙稅額簡表

地域銀		額	地域銀		額
京城	千五百三十一兩		直隸	萬二千三百四十八兩	
奉天	千九百二十八兩		盛京	三百九十二兩二分	
山東	萬八千四百二十二兩一錢五分		山西	九千一百十兩五錢八分	
河南	六萬四百十三兩一錢一分		江蘇	萬一千五百五十八兩六錢三分	
安徽	八千四百四十四兩一錢		江西	五千二百六兩	
福建	二千七百二十兩五錢五分		浙江	四千五百十七兩九錢	
湖北	五千九百三十六兩八錢		湖南	千四十四兩八錢九分	
陝西	千七百六十四兩七錢九分		甘肅	七百五十二兩六分	
廣東	萬七千八百四十六兩七錢七分		廣西	五十兩	
雲南	三百八十五兩五錢		貴州	五百七十一兩五分	

吉林牙
當稅 四百五十六兩五錢

四川牙
當稅 千四百八十五兩八錢

本表據光緒會典事例而作

「牲稅」

牲稅多歸知府兼管。所入甚豐而報解則甚少。

順治二年。^{一六四五年}定凡貿易牲畜。按價值每兩納銀三分。（大清會典事例卷二四五）

乾隆六十年。^{一七九五年}覆准吉林伯都訥所屬孤榆樹地方。設稅務售賣牲畜等稅。每年征收銀三十二兩。作為

定額。……又議准。孤榆樹地方。收征馬畜稅銀。以一百三十二兩作為定額。（皇朝續文獻通考卷四六征權考一八）

嘉慶十一年。^{一八〇六年}議准山西額征畜稅銀每年四千六百兩七錢有奇。大同縣加征畜稅銀四十九兩九錢

有奇。（皇朝續文獻通考卷四六征權考一八）

光緒二年。^{一八七六年}伊犁牲畜稅無定額。約歲征銀四千六七百兩。（皇朝續文獻通考卷四七征權考一九）

牲畜稅額簡表

地域	銀	額	地域	銀	額
直隸	五千九百九十八兩三錢		吉林	三千八百三兩五錢三分	
山東	二千五百三十八兩四錢六分		山西	四千七百三十二兩六錢	
江蘇	二千一百八十七兩二錢一分		安徽	二千一百六十八兩八錢二分	
江西	三百九兩六錢		福建	六百九十八兩四錢七分	
浙江	七百五十九兩四錢三分		湖北	一百四十兩九錢四分	
湖南	一百三十八兩七錢四分		陝西	九千三百八十五兩六錢六分	
甘肅	四千五兩四錢七分		本表據光緒會典事例而作		

(3) 幣制

(甲) 銀

明初用鈔而禁金銀。惟定金、銀、錢、鈔、糧米五者比價。未幾鈔漸不行。中葉以後。對外貿易驟興。白銀大量輸入。而民間始普遍使銀。金銀比價。由四增而爲十。萬曆之世。所收田賦全部折銀。遂爲銀錢並用之制。

國初所收天下田賦。未嘗用銀。惟坑冶之課有銀。……洪武二十四年。但有銀二萬四千七百四十兩。至宣德五年。則三十二萬二百九十七兩。歲辦視此爲率。當日國家固不恃銀以爲用也。至正統三年。以採辦擾民。始罷銀課。封閉坑穴。而歲入之數不過五千有餘。九年閏七月戊寅朔。復開福建、浙江銀場。原注：是年採納已六萬七千一百八十兩。乃倉糧折輸變賣。無不以銀。後遂以爲常貨。（顧炎武日知錄卷一一銀）

正統元年八月庚辰。命江南租稅折收金帛。先是都察院右副都御史周銓奏。……請令該部會議。……於浙江、江西、湖廣、南直隸不通舟楫之處。各隨土產折收布、絹、白金。赴京充俸。……上曰。祖宗嘗行之否。尙書胡濙等對曰。太祖皇帝嘗行於陝西。每鈔二貫五百文折米一石。黃金一兩折二十石。白金一兩折四石。絹一匹折一石二斗。布一匹折一石。各隨所產。民以爲便。後又行於浙江。民亦便之。上遂從所請。原注：每米麥一石折銀二錢五分。遠近稱便。（顧炎武日知錄卷一一銀）

每鈔一貫準錢千文。銀一兩。四貫準黃金一兩。（明史卷八一食貨志五）

銀錢。大者七錢五分。夷名黃幣崎。次三錢六分。夷名突曆。又次一錢八分。名羅料釐。小者九分。名黃料釐。俱自佛郎機攜來。（張燮東西洋考卷五）

東洋呂宋。地無他產。夷人悉用銀錢易貨。故歸船自銀錢外。無他攜來。即有貨亦無幾。（東西洋考卷七）

錢用銀鑄造。字用番文。九六成色。漳人今多用之。（顧炎武天下郡國利病書卷九三）

其曰番錢者。則銀也。來自海舶。上有文如城堞。或有若鳥獸人物形者。泉漳通用之。聞往時閩中巨室。皆擅海

舶之利。……每一舶至。則錢貨充牣。（王澐漫遊紀略卷一閩遊紀物產）

清代沿明之舊。仍銀錢並行。

我朝銀錢兼權。實爲上下通行之幣。……

順治三年

又更定錢直。戶部議定。制錢行使。原係每七文準一分。錢價既

重。小民交易不便。應改爲每十文準銀一分。永著爲令。（皇朝文獻通考卷一三錢幣考一）

雍正二年。……又禁直省收納錢糧銀匠估色之弊。刑部尙書勵廷儀奏言。……臣等謹按直省解銀。由布政

使起解者曰地丁銀。由運使起解者曰鹽課銀。由糧道起解者曰漕項銀。由關監督起解者曰關稅銀。皆必傾

鎔成錠。然後起解。其解銀之具曰鞘。每銀一千兩爲一鞘。……金史食貨志載。舊例。銀每錠五十兩。……一兩

至十兩分五等。此今日以重五十兩者爲元寶。重十兩或五兩三兩者爲中錠。所由始也。元至元三年。以銀五

十兩鑄爲錠。文以元寶。……又有揚州元寶。遼陽元寶等名色。此元寶命名之始。蓋古者多以元寶之名鑄於

錢面。自元以後。銀始蒙錢文元寶之稱。於是錢面始專鑄通寶矣。（皇朝文獻通考卷一五錢幣考三）

乾隆十三年。……以京師錢價昂。銀一兩僅易八百文。……上諭廷臣曰。……物之定直。以銀不以錢。而官民乃

皆便錢不便銀。趨利之徒。以使低昂爲得計。……嗣是宜重銀。凡直省官修工程民間總置貨物皆以銀。（清

史稿食貨志五）

清代洋錢輸入愈多。乾隆時已遍行於東南沿江沿海之地。粵中無論矣。

道光間。……華洋互市。以貨易銀。番船冒禁。歲漏出以千萬計。……而大髻、小髻、蓬頭、蝙蝠、雙柱、馬劍各種番

銀。亦潛輸內地以規利。自閩廣通行至黃河以南。而洋商復挾至各省海口。陽置貨而陰市銀。至洋銀日多。而紋銀日少而貴。上患之。命粵督申嚴禁約。然所禁不及洋銀。仿鑄之廣板、福板、杭板、吳莊、行莊。耗華銀如故。……十七年。詔沿江沿海督撫、海關監督。飭屬嚴稽偷漏。……而海內銀卒耗竭。每兩易錢常至二千。（清史稿食貨志五）

洋錢。粵中所用之銀。不一種。曰雙鷹。曰十字。曰雙柱。此四種來自外洋。曰北流錠。曰銀。此二種出自近省。皆乾隆初年以前所用。其後外洋錢有花邊之名。來自米時哥。又有鬼頭之名。來自紅毛。亦謂之公頭。夷國法嗣王立。則肖其像於銀面。史記所謂安息國以銀爲錢。錢如其王面。王死。轉效嗣王面是也。福公康安。節制兩粵。爵嘉勇公。有司以公頭之名。犯公爵。禁之。令民間呼爲番面錢。以畫像如佛。故又號佛番。南韶連肇多用番面。潮、雷、嘉、瓊多用花邊。粵中用錢。千敲百鑿。率皆爛板。其發江浙者。曰出鎗光板。無一槩痕。每圓以廣平稱之。足重七錢二分。以尋常通用爛錢易之。每圓加二三分。四五分不等。仁和周南卿茂才。詠洋錢句云。一種假情留半面。十分難事仗圓光。寫得不黏不脫。（梁紹壬兩般秋雨廬隨筆卷三洋錢）

光緒十四年張之洞始於廣東鑄造銀幣。後各省仿造。競以餘利爲籌款之法。成色亦參差不一。

初。洋商廣集粵東。西班牙、英吉利銀錢大輸入。總督林則徐謀自鑄。圖抵制。以不適用而罷。嗣是墨西哥、日本以國幣相灌輸。光緒十四年。張之洞督粵。始用機器如式試鑄。李瀚章繼任。續成之。文曰光緒元寶。庫平七錢

二分、廣東省造、幕紋龍、並鑄三錢六分、一錢四分四釐、七分二釐、三分六釐四種小銀圓。中國自行銀錢自此始。湖北、江西、直隸、浙江、安徽、奉天、吉林以次開鑄。尋以廣東、湖北、江西所鑄最稱便用。許以應解京餉。撥充鑄本。直省未開鑄者。飭從附鑄。……七省所鑄。規模成色苦參差。不利通行。會造幣總廠成。擬撤其三。而留江南、直隸、廣東爲分廠。初鑄準重墨圓。議者頗非之。之洞始於湖北試行一兩銀幣。戶部亦以中國立算。夙準兩錢分釐。因定主幣爲庫平一兩。而以五錢、一錢小銀幣暨銅圓、制錢輔助之。令總分廠如式造行。（清史稿食貨志五）

光緒末。以幣制不一。議改用金本位。以抵制鎊虧。議久不定。宣統初。乃改兩爲元。鑄大清銀幣。自圓迄角。以十遞進。

宣統二年。一九一一年上諭。……中國國幣單位。著即定名曰圓。暫就銀爲本位。以一圓爲主幣。重庫平七錢二分。另以五角、二角五分及一角三種銀幣。又五分銀幣。二分、一分、五釐、一釐四種銅幣。爲輔幣。圓角分釐。各以十進。永爲定價。不得任意低昂。著度支部一面責成造幣廠。迅即按照所擬各項重量、成色、花紋。鑄造新幣。積有成數。次第施行。所有賦稅課釐。必用制幣交納。放款亦然。（皇朝續文獻通考卷二四錢幣考六）

（乙）錢

明初。使用大錢。民間不便。乃鑄小錢。自嘉靖以後。鑄錢始多而精。謂之黃錢。每銀一兩。通常易黃錢七百文。

太祖實錄。歲辛丑^{一三六}二月。置寶源局於應天府。鑄大中通寶錢。與歷代之錢相兼行使。至嘉靖。所鑄之錢最爲精工。隆慶、萬曆。加重半銖。而前代之錢。通行不廢。予幼時見市錢。多南宋年號。後至北方。見多汴宋年號。眞、行、草字體皆備。間有一、二唐錢。自天啓、崇禎。廣置錢局。括古錢以充廢銅。於是市人皆攢古錢不用。而新鑄之錢。彌多彌惡。旋鑄旋銷。寶源、寶泉二局。祇爲姦蠹之窟。（顧炎武日知錄卷一一錢法之變）

太祖初。置寶源局於應天。鑄大中通寶錢。與歷代錢兼行。以四百文爲一貫。四十文爲一兩。四文爲一錢。及平陳友諒。命江西行省置貨泉局。頒大中通寶錢。大小五等錢式。即位。頒洪武通寶錢。其制凡五等。曰當十、當五、當三、當二、當一。當十錢重一兩。餘遞降至重一錢止。各行省皆設寶泉局。與寶源局並鑄。而嚴私鑄之禁。洪武四年。改鑄大中、洪武大錢爲小錢。初。寶源局錢鑄京字於背。後多不鑄。民間無京字者不行。故改鑄小錢以便之。（明史卷八一食貨志五）

洪武二十六年。^{一三九}定在京外鑄錢制。……各處爐座錢數。北平二十一座。每歲鑄錢一千二百八十三萬四百文。廣西十五座半。每歲鑄九百三萬九千六百文。陝西三十九座半。每歲鑄錢二千三百三萬六千四百文。廣東一十九座半。每歲鑄錢一千一百三十七萬二千四百文。四川一十座。每歲鑄錢五百八十三萬二千文。山東二十二座半。每歲鑄錢一千二百一十二萬二千文。山西四十座。每歲鑄錢二千三百三十二萬八千文。河南二十二座半。每歲鑄錢一千三百一十二萬二千文。浙江二十一座。每歲鑄錢一千一百六十六萬四千文。江西一百一十五座。每歲鑄錢六千七百六萬八千文。……惟不開雲、貴、湖廣、福建四處。至弘治十六年。

始照浙江等處定例。俱行開鑄。（續文獻通考卷一一錢幣考）

明初鑄洪武錢。成祖九年鑄永樂錢。宣德九年鑄宣德錢。弘治十六年以後鑄弘治錢。至世宗嘉靖六年大鑄嘉靖錢。每文重一錢三分。且補鑄累朝未鑄者。三十二年鑄洪武至正德九號錢。每號百萬錠。嘉靖錢千萬錠。一錠五千文。（明史卷八一食貨志五）

孫承澤春明夢餘錄曰。明初錢法專屬工部寶源局。虞衡司員外郎監督其事。至天啓二年始增設戶部寶泉局。以右侍郎督理之。名錢法堂。加鑪鑄造。以濟軍興。其政屬於戶部。而工部之所鑄微矣。（續文獻通考卷一一錢幣考）

崇禎中私鑄之禁不嚴。且許各鎮自鑄。錢式不一。濫惡已甚。每銀至易五六千文。物價不定。生計維艱。亦當時致亂之一端。

傅維麟明書食貨志曰。崇禎中。內帑大竭。命各鎮有兵馬處皆開鑄。以資軍餉。而錢式不一。盜鑄孔繁。末年每銀一兩。易錢五六千文。錢有煞兒、大眼賊、短命官諸號。……臣等謹按。啓禎時濫惡僞錢。尙有寬邊、大版、金燈、胖頭、歪脖、尖脚等號。（續文獻通考卷一一錢幣考）

清初入關。懲於明季錢式濫惡。改鑄新朝之錢。務極厚重。民間尊貴明代舊錢。而新鑄者反貶折以行。乃禁明錢。新錢始得通行。

太祖初。鑄天命通寶錢。別以滿漢文爲二品。滿文爲一品。錢質較漢文一品爲大。天聰因之。世祖定鼎燕京。大開鑄局。始定一品。於戶部置寶泉局。工部置寶源局。順治通寶錢定制。以紅銅七成、白銅三成。搭配鼓鑄。錢千爲串。萬二千串爲一卯。年鑄三十卯。每錢重一錢。二年增重二分。定錢七枚準銀一分。舊錢倍之。民間頗病錢貴。已更定十枚準一分。各省鎮遵式開鑄。（清史稿食貨志五）

乾隆中始鑄青銅錢。謂之青錢。與黃錢並行。道光以後。錢製始粗。銀價驟貴。

乾隆五年。^{一七四〇年}定改鑄青錢。浙江布政使張若震奏言。錢價之貴。實由私毀。……訪之舊時爐匠。咸云。配合銅鉛。加入點錫。卽成青錢。設有銷毀。但可改造樂器。難作小件。民間無利可圖。隨令戶部試鑄。每紅銅五十觔。配合白鉛四十一觔八兩。黑鉛六觔八兩。再加點錫二觔。共爲百觔。卽鑄成青錢。以所鑄錢復投爐內鎔成銅觔。錘擊卽碎。不能打造器皿。猶恐不肖奸民將鉛錫提出。取銅獲利。復用接紅銅爐座鎔試。每大錢四串。加火耗銀一兩有奇。分得紅銅五觔八兩。止值銅價銀一兩六錢。較之原用工本。虧折甚多。……嗣後戶工二局。應照式鑄造青錢。與見在黃錢相兼行使。……（皇朝文獻通考卷一六錢幣考）

乾隆時於新疆、西藏鑄造小銀幣通行。永用乾隆年號。

乾隆二十四年。^{一七五九年}回部平。頒式於葉爾羌。鑄乾隆通寶。枚重二錢。幕鑄葉爾羌名。左滿文。右回文。用紅銅並煨舊普爾錢充鑄。越二年。阿克蘇請鑄如葉爾羌例。復允西藏開鑄銀錢。重一錢與五分二種。文曰乾隆寶藏。幕用唐古忒字。邊郭識年份。以上二類錢。第行之回藏。內地不用。（清史稿食貨志五）

乾隆二十九年。^{一七六}令回部鑄錢。永用乾隆年號。（清史稿食貨志五）

咸豐中。以財政困竭。錢不敷用。鑄用大錢。流弊無窮。至光緒中。始盡廢。

文宗即位。四川學政何紹基力請行大錢。以復古救時。……大錢當千至當十凡五等。重自二兩遞減至四錢四分。當千、當五百。淨銅鑄造。色紫。當百、當五十、當十。銅鉛配鑄。色黃。百以上文曰咸豐元寶。以下曰重寶。幕滿文局名。四年。以乏銅兼鑄當五鐵錢及制錢。已而更鑄鉛制錢。……大錢當千、當五百。以折當過重。最先廢。當百、當五十繼廢。鐵錢以私票梗之而亦廢。乃專行當十錢。盜鑄叢起。死罪日報而不爲止。錢亦漸惡。雜私鑄中不復辨。（清史稿食貨志五）

清季。始仿外洋鑄造當十銅幣。物價因之提高。而制錢盡由洋商收買銷毀。後以銅輸入。獲倍利。

光緒二十四年。^{一八九}……京師以制錢少。行當十錢如故。三十二年。^{一九〇}鑄銅幣。當十錢民不樂用。於是創鑄銀銅圓。……銅圓鑄始閩廣。江蘇繼之。……總廠擬鑄之幣凡三品。曰金、曰銀、曰銅。最先鑄銅幣。自當制錢二十降至當二。自重四錢降而四分。凡四種。文視直省小異大同。直省曰光緒元寶。總廠初同直省。嗣定曰大清銅幣。皆識某所造。幕皆龍文。紫銅鑄。直省間亦用黃銅。（清史稿食貨志五）

（丙）鈔

有明一代。皆用洪武寶鈔。鈔多錢少。值不相侔。洪武季年。鈔卽不行。雖許納商稅。仍須貶值。一貫只值三釐。刑律論贓。猶以鈔計不改。最爲可笑。崇禎中。復議行鈔。且欲用銅鈔。終不能行。

鈔法之興。因於前代未以銀爲幣。而患錢之重。乃立此法。……今日上下皆銀。輕裝易致。而楮幣自無所用。故洪武初。欲行鈔法。至禁民間行使金銀。以姦惡論。而卒不能行。及乎後代。銀日盛而鈔日微。勢不兩行。灼然易見。乃崇禎之末。倪公元璐掌戶部。必欲行之。其亦未察乎古今之變矣。議者但言洪武間鈔法通行。考之實錄。二十七年^{一三九}八月丙戌。禁用銅錢矣。三十年^{一三九}三月甲子。禁用金銀矣。三十五年^{一四〇}十二月甲

寅。命俸米折支鈔者。每石增五貫爲十貫。是國初造鈔之後。不過數年。而其法已漸壞不行。於是有奸惡之條。充賞之格。而卒亦不能行。蓋昏爛倒換出入之弊。必至於此。乃以鈔之不利。而并錢禁之。廢堅剛可久之貨。而行輾熟易敗之物。宜其弗順於人情。而卒至於滯閣。（顧炎武日知錄卷一一鈔）

洪武四年^{一三七}……有司責民出銅。民毀器皿輸官。頗以爲苦。而商賈沿元之舊。習用鈔。多不便民錢。七年^{一三七}

^{一三七}四年。帝乃設寶鈔提舉司。明年。始詔中書造大明寶鈔。命民間通行。以桑穰爲料。其制方高一尺廣六寸。質青色。外爲橫文花欄。橫題其額。曰大明通行寶鈔。其上兩旁復爲篆文八字。曰大明寶鈔天下通行。中圖錢貫。十串爲一貫。其下云中書省奏準印造。大明寶鈔與銅錢通行使用。僞造者斬。告捕者賞銀二十五兩。仍給犯

人財產。若五百文則盡錢文爲五串。餘如其制而遞減之。其等凡六。曰一貫。曰五百文、四百文、三百文、二百文、一百文。每鈔一貫準錢千文、銀一兩、四貫準黃金一兩。禁民間不得以金銀物貨交易。違者罪之。以金銀易鈔者聽。……商稅兼收錢鈔。錢三鈔七。（明史卷八一食貨志五）

惠帝建文四年十一月。

時成祖已即位。稱洪武三十五年。

戶部尙書夏原吉言。鈔板歲久。篆文銷乏。且皆洪武年號。明年改

元永樂。宜併更之。帝曰。板當易則易。不必改爲永樂。朕遵太祖成憲。雖永用洪武可也。自後終明世。皆用洪武年號。（續文獻通考卷一〇錢幣考）

民卒輕鈔。至宣德初。米一石用鈔五十貫。……嘉靖四年。一五二五年令宣課分司收稅。鈔一貫折銀三釐。錢七文

折銀一分。是時鈔久不行。錢亦大墜。益專用銀矣。（明史卷八一食貨志五）

清初軍費不支。又行鈔貫之制。未幾卽停。

順治八年。一六五一年行鈔貫之制。是年始造鈔一十二萬八千一百七十二貫有奇。自後歲以爲額。至十八年。卽

行停止。（皇朝文獻通考卷一三錢幣考）

咸豐軍興。鈔與大錢並行。鈔尤沮滯。

咸豐二年。一八五二年……

……是時銀虧錢匱。重而軍需、河餉。糜帑二千數百萬。籌國計者率以行官票請。次年。命戶

部集議。惠親王等請飭部製造錢鈔。與銀票相輔並行。票鈔製以皮紙。額題戶部官票。左滿右漢皆雙行。中標二兩平足色銀若干兩。下曰戶部奏行官票。凡願將官票兌換銀錢者。與銀一律。並準按部定章程。搭交官項。

偽造者依律治罪。邊文龍鈔額題大清寶鈔。漢字平列。中標準足制錢若干文。旁八字爲天下通寶平準出入。下曰。此鈔卽代制錢行用。並準按成交納地丁錢糧一切稅課捐項。京外各庫一概收解。邊文如票。……偽造鈔票斬監候。（清史稿食貨志五）

鈔法初行。始而軍餉。繼而河工。搭放皆稱不便。民情疑阻。直省搭放五成。以款多抵撥。既艱搭放。遂不復肯搭收。民間得鈔積爲無用。京師持鈔入市。非故增直卽匿貨。持向官號商鋪。所得皆四項大錢。不使用。故鈔行而中外兵民病之。其後京師以官號七折錢發鈔。直益低落。至減發亦窮應付。鈔遂不能行矣。（清史稿食貨志五）

清季。外國銀行自由發行紙幣。自設大清銀行。始仿製銀券。民間終信銀不信券。故券之發行不多。

（4）茶法

（甲）明代茶法

明代茶法有引。茶與引離者爲私茶。其禁至嚴。官吏販茶者尤嚴。出境者死罪。

初。太祖令商人於產茶地買茶。納錢請引。引茶百斤。輸錢二百。不及引曰畸零。別置由帖給之。……後又定。茶引一道輸錢千。照茶百斤。茶由一道輸錢六百。照茶六十斤。既又令納鈔。每引由一道。納鈔一貫。（明史卷八

○食貨志四

無由引及茶引相離者。人得告捕。置茶局批驗所較稱。茶引不相當。卽爲私茶。凡犯私茶者與私鹽同罪。私茶出境。與關隘不識者。並論死。（明史卷八○食貨志四）

洪武初定令。凡賣茶之地。令宣課司三十取一。（明史卷八○食貨志四）

明有官茶。以易青海西藏之馬。名曰茶馬。

洪武四年。^{一三七}年。戶部言。陝西漢中、金州、石泉、漢陰、平利、西鄉諸縣。茶園四十五頃。茶八十六萬餘株。四川巴茶三百十五頃。茶二百三十八萬餘株。宜定令。每十株官取其一。無主茶園。令軍士殲探。十取其一。以易番馬。從之。於是諸產茶地設茶課司。定稅額。陝西二萬六千斤有奇。四川一百萬斤。設茶馬司於秦、洮、河、雅諸州。自礪門、黎雅抵朵甘、烏思藏。行茶之地。五千餘里。山後歸德諸州。西方諸部落。無不以馬售者。礪門、永寧、筠連所產茶。名曰剪力、篋葉。惟西番用之。……四川茶鹽都轉運使言。宜別立茶局。徵其稅。易紅纓、氈衫、米、布、椒、蠟。以資國用。……於是永寧、成都、筠連皆設茶局矣。（明史卷八○食貨志四）

洪武十六年。^{一三八}年。八月。定永寧以茶易馬之價。先是河州茶馬司定例。凡上馬一匹。給茶四十斤。中三十斤。下二十斤。至是命永寧如河州之例。至十七年五月。又定烏撒、烏蒙、東川、芒部馬一匹給茶一百斤。（續文獻通考卷二二征權考五）

初制。長河西等番商。以馬入雅州易茶。由四川嚴州衛入黎州。始達茶馬司。定價馬一匹茶千八百斤。於礪門

茶課司給之。番商往返迂遠。而給茶太多。巖州衛以爲言。請置茶馬司於巖州。而改貯礮門茶於其地。且驗馬高下以爲茶數。詔茶馬司仍舊。而定上馬一匹給茶百二十斤。中七十斤。駒五十斤。（明史卷八〇食貨志四）製金牌信符。命曹國公李景隆齎入番。與諸番要約。……運茶五十餘萬斤。獲馬萬三千八百匹。（明史卷八〇食貨志四）

（乙）清代茶法

清沿明制。仍用茶引。四川之茶。有腹引、邊引、土引之分。

我國產茶之地。惟江蘇、安徽、江西、浙江、福建、四川、兩湖、雲貴爲最。明時茶法有三。曰官茶。儲邊易馬。曰商茶。給引徵課。曰貢茶。則上用也。清因之。於陝甘易番馬。他省則召商發引納課。間有商人赴部領銷者。亦有小販領於本籍州縣者。又有州縣承引。無商可給。發種茶園戶經紀者。戶部寶泉局鑄刷引由。備書例款。直省預期請領。年辦年銷。茶百斤爲一引。不及百斤謂之畸零。另給護帖。行過殘引皆繳部。（清史稿食貨志五）

凡僞造茶引。或作假茶與販。及私與外國人買賣者。皆按律科罪。（清史稿食貨志五）

順治……元年。定與西番易馬。每茶一篋重十觔。上馬給茶篋十二。中馬給九。下馬給七。（皇朝文獻通考卷三〇征權考）

司茶之官。初沿明制。陝西設巡視茶馬御史五。……尋改差部員。又令甘肅巡撫兼轄。後歸總督管理。四川設鹽茶道。江西設茶引批驗大使。隸江甯府。（清史稿食貨志五）

陝甘發西甯、甘州、莊浪三茶司。……每引納官茶五十斤。餘五十斤由商運售作本。每百斤爲十篋。每篋爲二封。共徵本色茶十六萬六千四百八十篋。改折之年。每封徵折銀三錢。其原不交茶者。則徵價銀共五千七百三十兩有奇。亦有不設引。止於本地行銷者。由各園戶納課。共徵銀五百三十兩有奇。四川有腹引、邊引、土引之分。腹引行內地。邊引行邊地。土引行土司。而邊引又分三道。其行銷打箭爐者曰南路邊引。行銷松潘廳者曰西路邊引。行銷邛州者曰邛州邊引。皆納課稅。共課銀萬四千三百四十兩。稅銀四萬九千一百七十兩各有奇。（清史稿食貨志五）

（5）鹽法

（甲）明代鹽法

明代鹽有專官。兩淮兩浙且以御史巡鹽。鹽之行銷。有引有岸。鹽商由此而興。蓋由商認稅也。

太祖初起。卽立鹽法。置局設官。令商販鬻。二十取一。以資軍餉。……丙午歲。始置兩淮鹽官。吳元年。置兩浙。洪武初。諸產鹽地次第設官。都轉運鹽使六。曰兩淮。曰兩浙。曰長蘆。曰山東。曰福建。曰河東。鹽課提舉司七。曰廣東。曰海北。曰四川。曰雲南。雲南提舉司凡四。曰黑鹽井。白鹽井。安寧鹽井。五井。又陝西靈州鹽課司一。（明史卷八〇食貨志四）

兩淮所轄分司三。曰泰州、淮安、通州。通州批驗所二。曰儀真、淮安。鹽場三十。……各鹽課司一。……洪武時。兩淮歲辦大引鹽三十五萬三千餘引。孝宗弘治時。改辦小引鹽倍之。每引四百斤爲大引。二百斤爲小引。神宗萬曆時同。其鹽行直隸之應天、寧國、太平、揚州、鳳陽、廬州、安慶、池州、淮安九府。蘇、和二州。江西、湖廣二布政司。河南之河南、汝寧、南陽三府及陳州。至英宗正統二年。貴州亦食淮鹽。憲宗成化十八年。湖廣、衡州、永州改行海北鹽。武宗正德二年。江西贛州、南安、吉安改行廣東鹽。……兩浙所轄分司四。曰嘉興、松江、寧紹、溫台。批驗所四。曰杭州、紹興、嘉興、溫州。鹽場三十五。……各鹽課司一。……洪武時。兩浙歲辦大引鹽二十二萬四百餘引。弘治時。改辦小引鹽倍之。萬曆時同。其鹽行浙江及直隸之松江、蘇州、常州、鎮江、徽州五府及廣德州。江西之廣信府。……長蘆所轄分司二。曰滄州、青州。批驗所二。曰長蘆、小直沽。鹽場二十三。各鹽課司一。洪武時。歲辦大引鹽六萬三千一百五十三引有奇。弘治時。改辦小引鹽一十八萬八百餘引。萬曆時同。其鹽行北直隸及河南之彰德、衛輝二府。……河東所轄解鹽。初設東場分司於安邑。永樂時。增設西場於解州。……弘治二年。增置中場分司。……洪武時。歲辦小引鹽三十萬四千觔。弘治時。增八萬引。萬曆中。又增二十萬引。其鹽行陝西之西安、漢中、延安、鳳翔四府。河南之歸德、懷慶、河南、汝寧、南陽五府及汝州。山西之平陽、潞安二府。澤、沁、遼三州。……穆宗隆慶中。延安改食靈州池鹽。愍帝崇禎中。鳳翔、漢中二府亦改食靈州鹽。……廣東所轄鹽場十四。……海北所轄鹽場十五。……各鹽課司一。洪武時。廣東歲辦大引鹽四萬六千八百餘引。海北二萬七千餘引。弘治時。廣東如舊。海北一萬九千四百餘引。萬曆時。廣東小引生鹽三萬二百餘引。熟鹽三萬四千六百餘引。海北小

引正耗鹽一萬二千四百餘引。鹽行廣州、肇慶、惠州、韶州、南雄、潮州六府。海北鹽行廣東之高雷、廉、瓊四府。湖廣之桂陽、郴二州。廣西之桂林、柳州、潯州、慶遠、南寧、太平、思明、鎮安十府。田、龍、泗城、奉議、利五州。……山東所轄分司二。曰膠萊、濱樂。批驗司一。曰濰口。鹽場十九。……各鹽課司一。洪武時。歲辦大引鹽一十四萬三千三百餘引。弘治時。改辦小引鹽倍之。萬曆時。爲九萬六千一百餘引。其鹽行山東、直隸、徐、邳、宿三州。河南開封府。後開封改食河東鹽。……福建所轄鹽場七。……各鹽課司一。洪武時。歲辦大引鹽一十萬四千五百餘引。弘治時。增七百餘引。萬曆時。減一千引。……其鹽行境內。……陝西靈州有大小鹽池。又有漳縣及西和鹽井。洪武時。靈州歲辦鹽二百八十六萬七千四百餘斤。漳縣五十一萬五千六百餘斤。西和一十三萬一千五百餘斤。弘治時同。萬曆時。三處共辦一千二百五十三萬七千六百餘斤。其鹽行陝西之鞏昌、臨洮二府及河州。（續文獻通考卷二〇征權考三）

四川鹽井轄鹽課司十七。洪武時。歲辦鹽一千一十二萬七千餘斤。弘治時。辦二千一十七萬六千餘斤。萬曆中。九百八十六萬一千餘斤。鹽行四川之成都、敘州、順慶、保寧、夔州五府。潼川、嘉定、廣安、雅、廣元五州縣。……雲南黑鹽井轄鹽課司三。白鹽井、安寧鹽井各轄鹽課司一。五井轄鹽課司七。洪武時。歲辦大引鹽萬七千八百餘引。弘治時。各井多寡不一。萬曆時。與洪武同。鹽行境內。（明史卷八〇食貨志四）

松江李雯論。鹽之產於場。猶五穀之生於地。宜就場定額。一稅之後。不問其所之。則國與民兩利。又曰。天下皆私鹽。則天下皆官鹽也。此論鑿鑿可行。……余於鹽法。……引杜子美詩云。蜀麻吳鹽自古通。又曰。風烟渺吳

蜀。舟楫通鹽麻。又曰。蜀麻久不來。吳鹽擁荆門。若如今日之法。各有行鹽地界。吳鹽安得至蜀哉。（顧炎武日知錄卷一〇行鹽）

行鹽地分有遠近之不同。遠於官而近於私。則民不得不買私鹽。既買私鹽。則與販之徒必與。於是乎盜賊多而刑獄滋矣。……余少居崑山。常熟之間。爲兩浙行鹽地。而民間多販淮鹽。自通州渡江。其色青黑。視官鹽爲善。及游大同。所食皆番鹽。堅緻精好。此地利之便。非國法之所能禁也。明知其不能禁。而設爲巡捕之格。課以私鹽之獲。每季若干。爲一定之額。此掩耳盜鈴之政也。（顧炎武日知錄卷一〇行鹽）

明有開中之制。商人納糧或馬以易鹽引。所以濟軍糧轉運之艱。中葉以後。此制遂廢。

洪武三年^{〇年}_{一三七}六月辛巳。山西行省言。大同糧儲。自陵縣長蘆運至太和嶺。路遠費重。若令商人於大同倉入米一石。太原倉入米一石三斗者。俱准鹽一引。引二百斤。商人鬻畢。卽以原給引自赴所在官司繳之。如此則轉輸之費省。而軍儲充矣。從之。此中鹽之法所自始。（顧炎武日知錄卷一〇行鹽）

有明鹽法。莫善於開中。……召商輸糧而與之鹽。謂之開中。其後各行省邊境。多召商中鹽。以爲軍儲。鹽法邊計相輔而行。^{洪武}四年^{一三七}定中鹽例。輸米……諸倉計道里近遠。自五石至一石有差。先後增減。則例不一。率視時緩急。米直高下。中納者利否。……編置勘合及底簿。發各布政司及都司衛所。……書所納糧及應支鹽數。齎赴各轉運提舉司。……轉運諸司亦有底簿。比照勘合相符。則如數給與。鬻鹽有定所。刊諸銅版。（明

史卷八〇食貨志四

開中解鹽與海鹽異。海鹽非一所。此不足則取之彼。可以通融轉補。解鹽惟一池。不幸而歲多霖雨。風不自南。則歲不及額矣。竊聞近年以來。商賈中納解鹽之數。已踰十歲額。守支持次至十數年。一遇兵荒。官府有所措置。召商中納。患其折閱。多不肯應。（丘濬大學衍義補卷二八）

宣德元年。

一四二六年

……戶部尚書郭敦言……洪武中。中鹽客商年久物故。代支者多虛冒。請接引給鈔十錠。

帝從之。而命倍給其鈔。（明史卷八〇食貨志四）

正統三年。

一四三年

寧夏總兵官史昭……奏請納馬中鹽。上馬一匹與鹽百引。次馬八十引……中馬之始。驗

馬乃掣鹽。既而納銀於官以市馬。銀入布政司。宗祿、屯糧、修邊、振濟、展轉支銷。銀盡而馬不至。而邊儲亦自此告匱矣。（明史卷八〇食貨志四）

明代鹽之產銷。其數略可尋求。歲課四百餘萬。兩淮佔其半額。揚州鹽商之盛。他處不能比。自嘉靖迄乾隆之末。揚州繁華。亘二百餘年。與世風日趨奢侈。至有關係。

兩淮……所輸邊。甘肅、延綏、寧夏、宣府、大同、遼東、固原、山西、神池諸堡。上供光祿寺神宮鹽。內官鹽。歲入太倉餘鹽銀六十萬兩。兩浙……所輸邊。甘肅、延綏、寧夏、固原、山西、神池諸堡。歲入太倉餘鹽銀十四萬兩。……河間、長蘆……所輸邊。宣府、大同、薊州。上供郊廟百神祭祀。內府羞膳及給百官有司。歲入太倉餘鹽銀十二萬兩。山東……所輸邊。遼東及山西、神池諸堡。歲入太倉餘鹽銀五萬兩。福建……歲入太倉銀二萬二千餘兩。

河東……歲入太倉銀四千餘兩。給宣府鎮及大同代府祿糧。抵補山西民糧銀共十九萬兩有奇。陝西靈州……歲解寧夏、延綏、固原餉銀三萬六千餘兩。廣東……海北……歲入太倉鹽課銀萬一千餘兩。四川……歲解陝西鎮鹽課銀七萬一千餘兩。雲南……歲入太倉鹽課銀三萬五千餘兩。（明史卷八〇食貨志四）兩淮鹽課幾二百萬。可當漕運米直全數。天下各鹽運。兩淮課居其半。兩浙次之。長蘆次之。福建無巡御。以行無遠地。河東場無運官。以出有專所。廣場兼之。故巡運俱無。清理鹽法都臺止一員。統治長蘆、淮、浙、兩淮引鹽開中七十萬五千二百引。又折色銀一千八百三十兩。長蘆開中八萬八百引。折布一萬一千二百六十疋。河東開中四十二萬引。山東開中八萬三千一百引。折色銀九百兩。折布四萬六千六十疋。兩浙賣銀六萬四千三百四十二兩。福建賣銀一萬二千二百餘兩。折米五千八百石。四川開中一十萬六千八百引。鹽井衛、龍州司、雅州所。折米二千四百石。每百二十斤折米麥一石。雲南開中五萬三千引。折銀五千兩。廣東折銀二萬五千二百兩。海北折銀三千二百兩。靈州開中五萬九千四百引。西和漳縣折銀一千六百二十兩。（徐學聚國朝典彙卷九六戶部一〇鹽法）

（乙）清代鹽法

清沿明制。鹽岸分割。尤不近理。

清之鹽法。大率因明制而損益之。蒙古、新疆多產鹽地。而內地十一區尤有裨國計。十一區者。曰長蘆。曰奉天。曰山東。曰兩淮。曰浙江。曰福建。曰廣東。曰四川。曰雲南。曰河東。曰陝甘。長蘆舊有二十場。後裁爲八。行銷直隸、

河南兩省。奉天舊有二十場。後分爲九。及日本據金川灘地。乃存八場。行銷奉天、吉林、黑龍江三省。山東舊有十九場。後裁爲八。行銷山東、河南、江蘇、安徽四省。兩淮舊有三十場。後裁爲二十三。行銷江蘇、安徽、江西、湖北、湖南、河南六省。浙江三十二場。其地分隸浙江、江蘇。行銷浙江、江蘇、安徽、江西四省。福建十六場。行銷福建、浙江兩省。其在臺灣者尙有五場。行銷本府。……廣東二十七場。行銷廣東、廣西、福建、江西、湖南、雲南、貴州七省。四川鹽井。產旺者凡州縣二十四。行銷西藏及四川、湖南、湖北、貴州、雲南、甘肅六省。雲南鹽井。最著者二十六。行銷本省。河東鹽池分東、中、西三場。行銷山西、河南、陝西三省。陝、甘鹽池。最著者曰花馬大池。在甘肅靈州。行銷陝西、甘肅兩省。（清史稿食貨志四）

長蘆、奉天、山東、兩淮、浙江、福建、廣東之鹽。出於海。四川、雲南出於井。河東、陝、甘出於池。其製法。海鹽有煎有曬。池鹽皆曬。井鹽皆煎。論質味則海鹽爲佳。池鹽、井鹽次之。海鹽之中。灘曬爲佳。板曬次之。煎又次之。論成本。則曬爲輕。煎之用蕩草者次之。煤火又次之。木則工本愈重。此其大較也。（清史稿食貨志四）

初。鹽政屬戶部山東司。宣統二年。乃命戶部尙書兼任督辦鹽政大臣外。遣御史巡視。後裁歸總督巡撫管理。其專司曰都轉運使司。無運司各省。或以鹽法道、鹽糧道、驛鹽道、茶鹽道兼理。（清史稿食貨志四）

行鹽法有七。曰官督商銷。曰官運商銷。曰商運商銷。曰商運民銷。曰民運民銷。曰官督民銷。惟官督商銷行之爲廣且久。（清史稿食貨志四）

凡商有二。曰場商。主收鹽。曰運商。主行鹽。其總攬之者曰總商。主散商訥課。後多剝削侵蝕之弊。康熙、乾隆間。

革之而未能去。（清史稿食貨志四）

兩淮鹽課最多。鹽商最盛。乾隆以後。包墊挪借。賠累不堪。陶澍始創爲引票兼行。爲淮鹽一大變革。而淮商始衰。咸同軍興以後。擅其利者湘軍。繼以湘人。至清末亦衰敗矣。

商人之購鹽也。必請運司支單。亦曰照單。曰限單。曰皮票。持此購於場。得鹽則貯之官地。奉天謂之倉。長蘆謂之坵。未檢查者曰生鹽。已檢查者爲熟鹽。熟鹽乃可發售。（清史稿食貨志四）

凡引有大引。沿於明。多者二千數百斤。小引者。就明行引。剖一爲二。或至十。有正引。改引。餘引。食引。陸引。水引。浙江於綱引外。又有肩引。住引。其引與票之分。引商有專賣域。謂之引地。當始認時。費不貲。故承爲世業。謂之引窩。後或售與承運者。買單謂之窩單。價謂之窩價。道光十年。陶澍在兩淮。以其擡價。奏請每引限給一錢二分。旋禁止。票無定域而亦有價。當道光、咸豐間。兩淮每張僅銀五百兩。後官商競買。逮光緒間。至萬金以上。又引因引地廣狹大小而定售額。票則同一行鹽地。售額亦同。（清史稿食貨志四）

淮南商力雖疲。然自開綱以來。尙捆運至五十餘萬引。淮北則止捆二萬餘引。較定額不及十分之一。實屬疲憊已久。臣前與尙書王鼎等會議時。卽經聲請另行籌辦。本年奏准借帶運殘鹽課銀二十萬兩。將官收竈鹽。督商辦運。均係擇其暢銷之岸。先行運往。以冀早將庫項收回。而滯岸仍無鹽濟售。民間既無官鹽。不得不

買向民販。竈丁積有餘鹽，亦不能不賣與民販。臣體察情形，擬將暢岸仍歸商運。其餘滯岸即仿照山東、浙江票引兼行之法。於海州所屬之中正、板浦、臨興三場，分設行店，聽小民投行購買，運往書賣。擇各場要隘之地，設立稅局，給以照票，註明斤數及運往何處售賣字樣。凡無票及越境者，仍以私論。如此通融辦理，俾竈丁民販皆獲有生計，而所收稅銀，又可補正課之不足。臣……即札行運司妥議條款，酌量試行。如果行之有裨，再當漸次推廣，設使行之不便，亦不難於停止。（陶文毅公全集卷一三）

道光十二年

一八三二年

五月，鹽政陶澍奏……所有淮北綱鹽，共行安徽、河南兩省四十一州縣，內除安徽江運

八州縣，暨安徽、河南湖運暢岸十一州縣……尙非極敵之區……一切照舊辦理外，惟安徽之鳳陽、懷遠、鳳

臺、靈璧、阜陽、潁上、亳州、太和、蒙城、英山、泗州、盱眙、天長、玉河、河南之汝陽、正陽、上蔡、新蔡、西平、遂平、息縣、確山

二十二州縣……稱爲極滯，久已商運課欠，配運不前……又江蘇之山陽、清河、桃源、邳州、睢寧、宿遷、贛榆、沐

陽八州縣，係淮北食鹽口岸，向因私充官滯……食商配運亦復寥寥，計滯岸二十二州縣內，除天長一縣……

……與淮南引地錯雜，應仍歸商運以固藩籬外，其餘二十一州縣，應與食岸八州縣，一律變通，改行票鹽，以資

補救。又安東、海州兩州縣……亦應……改行票鹽，以歸畫一……謹將設局收稅章程……恭呈御覽。（王

定安兩淮鹽法志卷五二）

淮南每引六百斤，外加滴耗六十斤，包索三斤半，每引分裝八包，每包連耗索八十六斤。鄂、湘、西三岸爲大票，每票五百引。皖岸爲小票，每票一百二十引。通計現額五十六萬三千七百六十引，大小共一千六百九十六

票。鄂岸十五萬引。共三百票。湘岸十五萬四千引。共三百八票。西岸十七萬引。共三百四十票。皖岸八萬九千七百六十引。共七百四十八票。淮南食岸。通計現額三萬三千八百四十八引。淮北每引四百斤。外鹵耗包索四十斤。每引分裝四包。每包連索耗一百十斤。海、贛用一百斤小票。其餘皆十引大票。以十引爲號。通計現額二萬九千六百九十八號八百斤。正額二十九萬六千九百八十二引。（陳慶年兩淮鹽法撰要上票引總數）

清代鹽稅。至四千餘萬。十倍於明。雖由生齒日繁之故。而鹽斤加價。實爲主要原因。若夫歲入。道光以前惟有鹽課。及咸豐軍興。復創鹽釐。鹽課分二類。曰場課。曰引課。場課有灘課、竈課、鍋課、井課之分。長蘆有邊布。福建有坵折。邊布者。明時竈戶按丁徵鹽。商人納粟於邊。給鹽報支。是謂邊鹽。其有場遠。鹽無商支。令八百斤折交布三丈二尺。後改徵銀三錢。是謂布鹽。竈課分地丁爲二。但丁不盡有地。雍正間。……將丁銀攤入於地徵收。……坵折者。鹽田所納錢糧謂之折價。程漏所納錢糧謂之鹽坵。……引課有正課、包課、雜課。鹽釐分出境稅、入境稅、落地稅。逮乎末造。加價之法興。於是鹽稅所入。與田賦國稅相埒。是以順治初。行鹽百七十萬引。徵課銀五十六萬兩有奇。其後統一區夏。引日加而課亦日盛。乾隆十八年。計七百一萬四千九百四十一兩有奇。嘉慶五年。六百八萬一千五百一十七兩有奇。道光二十七年。七百五十萬二千五百七十九兩有奇。光緒末。合課釐計。共二千四百萬有奇。宣統三年。度支部預算。鹽課歲入約四千五百萬有奇。（清史稿食貨志四）

（6）科舉

科舉制度。始於隋。確定於唐。至明制度愈備。清代因之。今合述如下。

(甲) 考試

「院試」

明制。兩京浙江設學院。餘設學道。清初因之。後各省盡改學院。凡童生無論已冠未冠。試於縣。再試於府。及格者得試於學院。及格者爲附生。分府縣學肄業。謂之入學。鄉試以前有歲考與科考。明之歲考。以六等試諸生優劣。三科不與考者。褫革衣衿。請假游學則否。廩增。附通稱生員。俗則稱爲秀才。縣府院試之榜曰紅案。故有案首之稱。

士子未入學者。通謂之童生。當大比之年。間收一、二異敏。三場並通者。俾與諸生一體入場。謂之充場儒士。中式卽爲舉人。不中式仍候提學官歲試。合格乃准入學。提學官在任三歲。兩試諸生。先以六等試諸生優劣。謂之歲考。一等前列者視廩膳生。有缺依次充補。其次補增廣生。一、二等皆給賞。三等如常。四等撻責。五等則廩增遞降一等。附生降爲青衣。六等黜革。(明史卷六九選舉志一)

清之六等黜陟法。視明爲繁密。中葉以後。考校極疏闊。三等以下不常有也。

考列一等。增附青社俱補廩。無廩缺。附青社補增。無增缺。青社復附。各候廩。原廩增停降者收復。二等。增補廩。

附青社補增。無增缺。青社復附。停廩降增者復廩。增降附者復增。不許補廩。三等。停廩者收復。候廩丁憂起復。病痊考復。緣事辨復。增降附者許收復。青衣發社者復附。廩降增者不許復。四等。廩免責。停餼。不作缺。限讀書六月送考。停降者不許限考。增附青社俱扑責。五等。廩停作缺。原停廩者降增。增降附。附降青衣。青衣發社。原發社者黜爲民。六等。廩膳十年以上發社。六年以上與增十年以上者發本處充吏。餘黜爲民。入學未及六年者發社。（清史稿選舉志一）

明代科考。在歲考之後。大比之前一年。試諸生優劣。以決其應否鄉試。故又名決科。清一切從寬。生員錄取遺才謂之錄遺。幾無有不能入試者矣。

繼取一、二等爲科舉生員。俾應鄉試。謂之科考。其充補廩增給賞。悉如歲試。其等第仍分爲六。而大抵多置三等。三等不得應鄉試。撻黜者僅百一。亦可謂絕無也。（明史卷六九選舉志一）

清制稍詳。而入旗生員獨優異。

科試一、二等送鄉試。幫補廩增。如歲試。大率祇列三等。八旗生員給錢糧。考列四等以下停給。次屆列一、二、三等給還。優等補廩增。劣等降青社。如漢生員。（清史稿選舉志一）

清屢增學額舉額。所以優異士子。然一代文風較明爲稍遜矣。明代生員。歲久出學。挨次補貢者。曰歲貢生。由登極及慶典得貢者。曰恩貢生。皆入太學。以試得官。崇禎

八年有選貢。廷試之。清增鄉試副榜爲副貢生。以選貢爲拔貢生。六年由學試之。後改十二年。又有優貢生。三年一試。由督撫會同學政試之。得舉者赴廷試。拔貢可得小京官。知縣教職。優貢可得知縣教職。合歲貢恩貢稱爲五貢。謂之正途。

「鄉試」

鄉試始於洪武三年。自後每三年逢子午卯酉年之八月舉行一次。五年兩試。試之於省城。欽命典試者曰主考。分房者曰房考。登第者曰舉人。謂之乙榜。或曰乙科。以門生禮稱主考曰座主。房考曰房師。

科目者沿唐宋之舊。而稍變其試士之法。專取四子書。及易、書、詩、春秋、禮記五經。命題試士。蓋太祖與劉基所定。其文略仿宋經義。然代古人語氣爲之。體用排偶。謂之八股。通謂之制義。三年大比。以諸生試之。直省曰鄉試。中式者爲舉人。（明史卷七〇選舉志二）

洪武三年詔……自今年八月始特設科舉。務取經明行修。博通古今。名實相稱者。朕將親策於廷。第其高下而任之以官。使中外文臣皆由科舉而進。非科舉者毋得與官。於是京師行省各舉鄉試。直隸貢額百人。河南、山東、山西、陝西、北平、福建、江西、浙江、湖廣皆四十人。廣西、廣東皆二十五人。才多或不及者。不拘額數。（明史卷七〇選舉志二）

清仍明制。而額數屢增。幾致倍許。時有恩科。進取之途益廣。

有清科目取士。承明制。用八股文。取四子書及易、書、詩、春秋、禮記五經命題。謂之制義。三年大比。試諸生於直省曰鄉試。中式者爲舉人。（清史稿選舉志三）

鄉試解額。順治初定額從寬。順天、江南皆百六十餘名。浙江、江西、湖廣、福建皆逾百名。河南、山東、廣東、四川、山西、陝西、廣西、雲南。自九十餘名遞殺。至貴州四十名爲最少。（清史稿選舉志三）

「會試」

三年一次。試期在二月。清改三月。於鄉試之次年。逢辰戌丑未年試於京師禮部。中式者爲貢士。謂之甲榜。或曰甲科。貢士名額。遞有增加。明分南北中卷。清則按與試者人數。臨時定額。大約一榜三百人爲常。

鄉試……次年。以舉人試之京師。曰會試。（明史卷七〇選舉志二）

鄉試中式舉人。出給公據。官爲應付廩給脚力。赴禮部印卷會試。將就鄉試文字。咨繳本部照驗。以鄉試之次年二月初九日、十二日、十五日爲三場。（大明會典卷七七）

會試則太祖洪武三年定額百名。英宗正統五年奏准增額爲百五十人。憲宗成化以後進士以三百名爲率。其由恩請而廣額者。不爲定制。（續通志卷一四一選舉略二）

清制會試亦與明同。所不同者。明會試有副榜。清則無之。

會試有副榜。大抵署教官。故令入監者亦食其祿也。……三月一考其文。與庶吉士同。頗示優異。後不復另試。則取副榜年二十五以上者授教職。年未及者或依親或入監讀書。既而不拘年齒。依親入監者皆聽。（明史卷六九選舉志一）

惟清自雍正殿試後添朝考。乾隆又添五言八韻詩。嘉慶初年定令。各省舉人到京。必先覆試。方能會試。若道路遠阻。則會試之後。仍須覆試。此又與明特異者。

康熙五十一年壬辰。順天解元查爲仁以傳遞事覺而逸。帝疑新進士有代倩中式者。親覆試暢春園。黜五人。會試覆試自是始。乾隆……五十四年。貢士單可虹覆試詩失調。訛舛不符。中卷除名。詔旨嚴切。謂禮闈非嚴行覆試。不足拔眞才。懲倖進。至嘉慶初。遂著爲令。道光二十三年定制。各省舉人一體至京覆試。非經覆試。不許會試。以事延誤。於下三科補行。除丁憂展限外。託故不到。以規避論。永停會試與赴部銓選。（清史稿選舉志三）

〔殿試〕

會試之後。復有殿試。分一、二、三甲。一甲三名授修撰編修。稱爲狀元、榜眼、探花。自唐以來。世俗極重之。餘選庶吉士。屬於翰林院。論資論俸。蓋明代以翰林院爲本衙門。

大學士就任在此。故史官爲儲材之選。可以不出衙門而登政地。最爲清貴。餘授部屬中、行、評、博。三甲多授推官、知縣。有明極重科舉。而黨援亦由之而起。

以舉人試之京師曰會試。中式者。天子親策於廷。曰廷試。亦曰殿試。分一、二、三甲。以爲名第之次。一甲止三人。曰狀元、榜眼、探花。賜進士及第。二甲若干人。賜進士出身。三甲若干人。賜同進士出身。狀元、榜眼、探花之名。制所定也。而士大夫又通以……二、三甲第一爲傳臚。（明史卷七〇選舉志二）

狀元授修撰。榜眼、探花授編修。二、三甲考選庶吉士者。皆爲翰林官。其他或授給事、御史、主事、中書、行人、評事、太常國子博士。或授府推官、知州、知縣等官。（明史卷七〇選舉志二）

永樂二年。

四年

既授一甲三人……官。復命於第二甲擇文學優等……五十人。及善書者……十人。俱爲

翰林院庶吉士。庶吉士遂專屬翰林矣。……其後每科所選多寡無定額。……弘治四年。給事中涂旦。以累科

不選庶吉士。請循祖制行之。大學士徐溥言。……請自今以後。立爲定制。一次開科。一次選用。……每科所選

不過二十人。每選所留不過三、五輩。……孝宗從其請。命內閣同史、禮二部考選。以爲常。……其與選者謂之

館選。以翰詹官高資深者一人課之。謂之教習。三年學成。優者留翰林爲編修、檢討。次者出爲給事、御史。謂之

散館。與常調官待選者。體格殊異。（明史卷七〇選舉志二）

清代殿試。分甲授職。一如明制。唯試以四月。分甲後。復有廷試分等。殿試所試爲對

策。廷試試論及詩。皆不重文而重字。字貴停勻整齊。忌別體字。忌錯落。違式者多後列。兩試等第。可以相互平均。選庶吉士名額較多。有至百餘人者。乾隆以前。須習清書。後只課詩文而已。

庶吉士之選無定額。……順治九年。

一六五二年

以給事中高辛允言。按直省大小選庶吉士。直隸、江南、浙江各五

人。江西、福建、湖廣、山東、河南各四人。山西、陝西各二人。廣東一人。漢軍四人。另榜授滿洲、蒙古修撰、編修、庶吉士九人。自是考選如例。惟滿、蒙、漢軍。選否無常。……雍正五年。

一七二七年

詔內閣會議簡選庶常之法。尋議照雍正

癸卯科例。殿試後。集諸進士保和殿考試。仍令九卿確行保舉。考試用論、詔、奏議、詩四題。是爲朝考之始。……

乾隆三年。

一七三八年

……依省分甲第引見。臨時甄別錄用。……嘉慶以來。每科庶常。率倍舊額。各省無不入

選者矣。凡用庶吉士曰館選。初制分習清漢書。隸內院。以學士或侍讀教習之。自康熙九年。

一六七〇年

專設翰林

院。歷科皆以掌院學士領其事。內閣學士間亦參用。三十三年。

一六九四年

命選講讀以下官。資深學優者數人。分

司訓課。曰小教習。六十年。

一七二一年

以禮部尙書陳元龍領教習事。厥後尙書、侍郎、開學之不兼掌院事者。並得

爲教習大臣。滿漢各一。雍正十一年。

一七三三年

特設教習館。頒內府經史詩文。戶部月給廩餼。工部供張什物。……

三年考試散館。優者留翰林爲編修、檢討。次者改給事中、御史、主事、中書、推官、知縣、教職。……間有未散館

而授職編檢者。或供奉內廷。或宣諭外省。或校書議敘。或召試詞科。皆得免其考試。凡留館者。遷調異他官。有

清一代宰輔。多由此選。（清史稿選舉志三）

(乙) 試藝

鄉會試試藝規程。明沿唐宋之舊而稍加變通。謂之八股文。名爲代聖立言。實則束縛人心。康熙初。詔廢八股。改試策論。言者稱其不便。未幾復舊。

子午卯酉年鄉試。辰戌丑未年會試。鄉試以八月。會試以二月。皆初九日爲第一場。又三日爲第二場。又三日爲第三場。初設科舉時。初場試經義二道。四書義一道。二場論一道。三場策一道。中式後十日。復以騎、射、書、算、律五事試之。後頒科舉定式。初場試四書義三道。經義四道。四書主朱子集註。易主程傳。朱子本義。書主蔡氏傳及古註疏。詩主朱子集傳。春秋主左氏、公羊、穀梁三傳及胡安國、張洽傳。禮記主古註疏。永樂間。頒四書五經大全。廢註疏不用。其後春秋亦不用張洽傳。禮記止用陳澧集說。二場試論一道。判五道。詔誥表内科一道。三場試經史時務策五道。(明史卷七〇選舉志二)

京師及各行省鄉試。八月初九日試初場。又三日試第二場。又三日試第三場。第一場試四書義三道。每道二百字以上。經義四道。每道三百字以上。……第二場論一道。三百字以上。判語五條。詔誥表内科一道。第三場試經史時務策五道。未能者許減二道。俱三百字以上。(大明會典卷七七)

清制。鄉會試三場試題。仍如明例。

順治二年。……定鄉會試三場試題之制。禮部議覆給事中龔鼎孳疏言。故明舊制。考取舉人。第一場時文七

篇。二場論一篇。表一篇。判五條。三場策五道。今應如科。臣請減時文二篇。用時文五篇。於論表判外。增用詩。去策。改用奏疏。上不準所請。命考試仍照舊例。初場四書三題。五經各四題。士子各占一經。四書主朱子集註。易主程傳。詩主朱子本義。書主蔡傳。春秋主胡安國傳。禮記主陳澧集說。二場論一道。判五道。詔詰表內科一道。三場經史時務策五道。鄉會試同。（皇朝文獻通考卷四七選舉考一）

其論科場文字格式之弊。以顧炎武之言爲最切。

明初三場之制。雖有先後而無重輕。乃士子之精力多專於一經。略於考古。主司閱卷。復護初場所中之卷。而不深求其二、三場。夫昔之所謂三場。非下帷十年。讀書千卷。不能有此三場也。今則務於捷得。不過於四書一經之中。擬題一、二百道。竊取他人之文記之。入場之日。抄賸一過。便可僥倖中式。而本經之全文有不讀者矣。率天下而爲欲速成之童子。學問由此而衰。心術由此而壞。（顧炎武日知錄卷十六三場條）

清末庚子之難。改行新政。始廢八股用策論。後專意辦學。以進士舉人名目。獎勵畢業生。而科舉遂廢。

光緒二十四年^{一八九八年}上諭。我朝承宋明舊制。以四書文取士。康熙年間。曾經停止八股。改試策論。未久旋復舊制。……乃近來風氣日漓。文體日敝。若不因時變通。何以見實學而拔真才。著自下科爲始。鄉會試及生童歲科各試。向用四書文者。一律改試策論。（皇朝續文獻通考卷八七選舉考四）

(7) 官制

明清兩代官制。似若相沿。細一按之。多名同實異。

明官制沿漢唐之舊而損益之。自洪武十三年罷丞相不設。析中書省之政歸六部。以尙書任天下事。侍郎貳之。而殿閣大學士祇備顧問。帝方自操威柄。學士鮮所參決。其糾核則責之都察院。章奏則達之通政司。平反則參之大理寺。……分大都督府爲五。而征調隸於兵部。外設都布按三司。分隸兵、刑、錢、穀。其考核則聽於府部。(明史卷七十二職官志序)

太祖肇基東土。國俗淳壹。事簡職專。……世祖入關。因明遺制。內自閣部。以迄庶司。損益有物。藩部剏建。名竝七卿。外臺督撫。杜其紛更。著爲令甲。綠營提鎮以下。悉易差遣爲官。旗營御前領衛。年宿位重。意任隆密。都統旗長。軍民合治。職視專圻。駐防分輪外畿。規撫京制。西北邊陲。守以重臣。綏靖蒙番。方軌都護。斯皆因俗而治。得其宜已。……自改內三院爲內閣。台輔拱袂。迨軍機設。題本廢。內閣益類閑曹。六部長官數四。各無專事。甚或朝握銓衡。夕兼支計。甫主戎政。復領容臺。一職數官。曲存稟仰。建樹宵論。時軍機之權。獨峙於其上。國家興大兵役。特簡經略大臣。參贊大臣。親寄軍要。吏部助之用人。戶部協以巨饌。用能藉此雄職。奏厥膺功。自是權復移於經略。督撫儀品。雖與相埒。然不過承號令。備策應而已。……初制內外羣寮。滿漢參用。蒙古漢軍。次第分布。康熙兩朝。西北督撫。權定滿闕。領隊辦事大臣。專任滿員。累朝膺闕外重寄者。滿臣爲多。逮文宗兼用漢人。勲業遂著。大抵中葉以前。開疆拓宇。功多成於滿人。中葉以後。撥劇整亂。功多成於漢人。(清史

茲將其改革上之重要者。分述如下。

(甲)中央官

明自洪武十三年罷丞相不設。永樂後大學士以五品官入閣辦事。遂爲定制。

先是太祖承前制。設中書省。置左右丞相、平章政事、左右丞、參知政事。以統領衆職。……洪武……十三年……誅丞相胡惟庸。遂罷中書省。九月。置四輔官。……尋亦罷。十五年。倣宋制。置華蓋殿、武英殿、文淵閣、東閣諸大學士。又置文華殿大學士。以輔導太子。秩皆正五品。二十八年。勅諭羣臣。……以後嗣君。其毋得議置丞相。臣下有奏請設立者。論以極刑。(明史卷七十二職官志一)

成祖即位。特簡解縉、胡廣、楊榮等直文淵閣。參預機務。閣臣之預務自此始。然其時入內閣者。皆編、檢、講、讀之官。不置官屬。不得專制諸司。諸司奏事亦不得相關白。仁宗以楊士奇、楊榮東宮舊臣。陞士奇爲禮部侍郎兼華蓋殿大學士。榮爲太常卿兼謹身殿大學士。閣職漸崇。其後士奇、榮等皆遷尙書。職雖居內閣。官必以尙書爲尊。景泰中。王文始以左都御史進吏部尙書入內閣。自後誥勅房、制勅房俱設中書舍人。六部承奉意旨。靡所不領。而閣權益重。世宗時三殿成。改革蓋爲中極。隨身爲建極。閣銜因之。嘉靖以後。朝位班次。俱列六部之上。(明史卷七十二職官志一)

大學士雖無相名。實有相職。中葉以後。乃有首、次、羣輔之分。

中極殿大學士、建極殿大學士、文華殿大學士、武英殿大學士、文淵閣大學士、東閣大學士。掌獻替可否。奉陳規誨。點檢題奏。票擬批答。以平允庶政。凡上之達下。曰詔。曰詔。曰制。曰冊文。曰諭。曰書。曰符。曰令。曰檄。皆起草進畫。以下之諸司。下之達上。曰題。曰奏。曰表。曰講章。曰書狀。曰文冊。曰揭帖。曰制對。曰露布。曰譯。皆審署申覆而修畫焉。平允乃行之。……大典禮大政事。九卿科道官會議已定。則按典制。相機宜。裁量其可否。斟酌入告。……以其授餐大內。常侍天子殿閣之下。避宰相之名。又名內閣。（明史卷七十二職官志一）

清大學士滿漢各二人。初制滿員一品。漢員五品。迨後始並定正一品。而以三殿三閣爲定制。

初天聰二年。建文館。命儒臣分直。十年。更名內三院。始亦沿承政名。後各置大學士一人。順治元年。置滿漢大學士。不備官。兼各部尚書銜。學士滿洲漢軍各三人。漢學士無員限。……十年。置三院漢大學士各二人。十五年。更名內閣。別置翰林院官。以大學士分兼殿閣。曰中和殿、保和殿、文華殿、武英殿、文淵閣、東閣諸大學士。仍兼尚書。學士亦如之。十八年。復三院舊制。康熙九年。仍別置翰林院。改三院爲內閣。置滿漢大學士四人。雍正九年。禮部尚書陳元龍、左都御史尹泰特授額外大學士。置協辦自此始。厥後多至六人。少或一、二人。乾隆十三年。始定大學士、協辦大學士員限。省中和殿。增體仁閣。以三殿三閣爲定制。唯保和殿不常置。（清史稿職

雍正七年。青海告警。始設軍機處。一代不改。大學士不復預聞機務矣。

軍機大臣。掌軍國大政。以贊機務。常日侍直。應對獻替。巡幸亦如之。其屬曰章京。滿洲十有六人。漢二十人。分掌清文漢字。（清史稿職官志一）

有明大政寄於六部。

洪武元年。始置吏、戶、禮、兵、刑、工六部。設尙書、侍郎、郎中、員外郎、主事。仍隸中書省。……十三年。罷中書省。倣周官六卿之制。陞六部秩。各設尙書侍郎一人。每部分四屬部。……二十九年。定爲文選、驗封、稽勳、考功四司。并五部屬。皆稱清吏司。（明史卷七十二職官志一）

吏部爲百官之首。視五部爲特重。

吏部尙書一人。正二品左右侍郎各一人。正三品其屬司務廳司務二人。文選、驗封、稽勳、考功四清吏司各郎中一人。員外郎一人。主事一人。尙書掌天下官吏選授封勳考課之政令。以甄別人才。贊天子治。蓋古冢宰之職。視五部爲特重。侍郎爲之貳。（明史卷七十二職官志一）

吏、禮、兵、工四部所屬皆四司。獨戶、刑兩部十三司。掌分省之事。各司有郎中、員外郎、主事等官。而戶部甚重。

戶部尙書一人。左右侍郎各一人。其屬司務廳司務二人。浙江、江西、湖廣、陝西、廣東、山東、福建、河南、山西、四川、

廣西、貴州、雲南十三清吏司。……尙書掌天下戶口田賦之政令。侍郎貳之。……十三司各掌其分省之事。兼領所分兩京直隸貢賦及諸司衛所祿俸邊鎮糧餉。并各倉場鹽課鈔關。（明史卷七十二職官志一）

清與明同。所不同者。部、院、寺、監皆有滿缺。且滿之位次在漢之前。

吏部尙書原注。初制。滿洲一品。漢人二品。順治十六年。改滿尙書二品。康熙六年。復故。九年。仍改正二品。雍正八年。俱定從一品。各部同。左右侍郎原注。初制。滿洲漢軍二品。漢員三品。順治十六年。改滿侍郎三品。雍正八年。復故。九年。仍改正三品。各部同。俱滿漢一人。其屬堂主事。清檔房滿洲二人。漢本房滿洲二人。漢軍一人。司務廳司務。滿漢各一人。繕本筆帖式十有二人。（清史稿職官志一）

明偶有大學士管部者。清則吏、戶、兵三部各以大學士一人領之。合滿漢尙侍共爲七堂。初滿人專政。漢尙書唯唯而已。及漢人亦得預政。而苦於一國三公。甚難調處也。

初天聰五年。詔羣寮議定官制。建六部。各以貝勒一人領之。……雍正元年。以大學士領部事。嘉慶四年。更命親王綜之。尋罷。……六年。復以大學士管部。自是爲定制。（清史稿職官志一）

九卿有大小九卿之別。都察院、通政司、大理寺合六部爲大九卿。詹事府、太常寺、光祿寺、太僕寺、順天府、鴻臚寺、國子監、翰林院、尙寶司爲小九卿。此明清二代所同者也。自隋唐行六部之制。九卿已同虛設。迄於明清。遂成冗署。

唐之時。固有六部矣。戶部無版圖。兵部無戎帳。虞水不管山川。金倉不司錢穀。而職名虛設。宋之時。亦有六部矣。然既有吏部。又有審官院。既有刑部。又有審刑院。既有兵部。又有樞密院。既有工部。又有三司使。而分散不一。凡若此者。皆戾於古而不宜於今。我朝之六部則不然。天下之官。悉歸吏部。天下之財。悉歸戶部。兵部則掌兵籍。工部則籍工課。而無所謂刑省計省。禮部主禮儀。刑部主刑獄。而無所謂禮院刑院。其通於今而不煩者。可知矣。（黃道周博物典彙卷九）

官吏進用。有明一代。長官多由會推。次則由銓選。

凡文官之品九。品有正從。爲級一十八。不及九品。曰未入流。凡選。每歲有大選。有急選。有遠方選。有歲貢就教選。間有揀選。有舉人乞恩選。選人咸登資簿。釐其流品。平其銓注而序遷之。凡陞必考滿。若員缺當補。不待考滿。曰推陞。類推上一人。單推上二人。三品以上九卿及僉都御史、祭酒。廷推上二人或三人。內閣吏兵二部尙書。廷推上二人。凡王官不外調。王姻不內除。大臣之族。不得任科道僚屬。同族則以下避上。外官才地不相宜。則酌其繁簡互換之。有傳陞乞陞者。竝得執奏。以署職。試職。實授奠年資。以開設裁併。兼攝適繁簡。以薦舉。起廢。徵召振幽滯。以帶俸。添注寄恩宥。以降調。除名馭罪過。以官程督吏治。以寧假悉人情。（明史卷七十二職官志一）

清代三品以上多由簡任。咸同以後。府道或由簡放。或由外補。餘官亦補多選少。銓法遂不行。

三載考績。文武大臣。具疏自陳。襲前明舊制也。順治間。京官三品以上及各省督撫。康熙間。增盛京侍郎。雍正間。增奉天府尹。皆自陳。乾隆八年。命自陳乞罷者。舉賢自代。繼命宗室王公兼閣部事者。不必自陳。十五年。命御前大臣。領侍衛內大臣。御前侍衛。乾清門侍衛。兼閣部及八旗事者。不必自陳。十七年。停止內外大臣自陳之例。二十四年。勅部於京察年分。將尚書至三品京堂以上及直省督撫。軍政年分。將都統。副都統。駐防之將軍。都統。副都統及提督總兵官。分別繕本進呈。聽候鑒察。有以衰庸解退者。皆出自聖裁。（吳振械養吉齋叢錄卷三）

直省知縣正途出身者。三年行取一次。大省三人。中省二人。小省一人。吏部按期奏請。沿前明舊制也。康熙四十四年。從部議。行取知縣以主事用。遇考選科道時。方準考選。然康熙雍正間。行取之例。少舉多停。乾隆初。亦間行之。其實前明專重資格。按俸遷轉。不得不以部用一途疏通壅滯。本朝州縣之賢能者。得奏題擢用。且繁劇之任。參罰必多。凡無事故。合行取例者。大約居中簡之缺。尋常供職。幸免處分者耳。故事相沿。於吏治無益。乾隆十六年。命永遠停止。（吳振械養吉齋叢錄卷三）

（乙）地方官

地方區劃。明代南北兩京外。有十三布政司。其長曰承宣布政使。專掌財賦民政。其刑名則歸提刑按察使。與都指揮司稱爲三司。中葉以後。多設巡撫。習慣上仍存省之名稱。省之首長遂爲巡撫。與巡按合稱兩臺。而三司爲之屬。

初太祖下集慶。自領江南行中書省。……後每略定地方。卽置行省。其官自平章政事以下。大略與中書省同。……洪武九年。改浙江、江西、福建、北平、廣西、四川、山東、廣東、河南、陝西、湖廣、山西諸行省俱爲承宣布政使司。罷行省平章政事、左右丞等官。改參知政事爲布政使。……十五年。置雲南布政司。……永樂元年。以北平布政司爲北京。五年。置交趾布政司。十一年。置貴州布政使。宣德三年。罷交趾布政司。除兩京外。定爲十三布政司。（明史卷七五職官志四）

明初。置提刑按察司。吳元年。置各道按察司。設按察使。……洪武十三年。尋罷。十四年。復置。并置各道按察分司。十五年。又置天下府州縣按察分司。……二十九年。改置按察分司爲四十一道。（明史卷七五職官志四）

清代每省皆設巡撫。合兩省設一總督。布、按、兩司隸之。

初沿明制。督撫繫右都御史、右副都御史、右僉都御史銜。無定員。順治十年。諭會推督撫。不拘品秩。擇賢能者具題。康熙元年。停巡撫提督軍務。加工部銜。十二年復故。……三十一年。定總督加銜例。……雍正元年。定巡撫加銜例。時西安有同署巡撫者。山東山西並有協辦巡撫之目。非制也。（清史稿職官志三）

明初本京外官並重。久而內重外輕。

初置藩司。與六部均重。布政使入爲尙書侍郎。副都御史每出爲布政使。宣德、正統間猶然。自後無之。（明史卷七五職官志四）

至清則變本加厲。內陞外陞。殊不一致。

李枬疏言……布政使內陞寺卿。數轉然後至副都御史。則布政使外陞巡撫。乃超擢。非循序也。（漢名臣傳卷一〇李枬傳）

布、按之下有道。道之下有府、州、縣。明之道爲布、按二司兼管。州、縣皆受約束於府。

明初改諸路爲府。洪武六年。分天下府三等。糧二十萬石以上爲上府。知府秩從三品。二十萬石以下爲中府。知府正四品。十萬石以下爲下府。知府從四品。已竝爲正四品。……自宣德三年棄交趾布政司。計天下府凡一百五十有九。……州凡二百三十有四。（明史卷七五職官志四）

吳元年。定縣三等。糧十萬石以下爲上縣。知縣從六品。六萬石以下爲中縣。知縣正七品。三萬石以下爲下縣。知縣從七品。已竝爲正七品。……計天下縣凡一千一百七十有一。（明史卷七五職官志四）

清代官制。大異於明者。有內廷行走。如御前大臣、軍機大臣、內務府大臣、弘德殿、毓慶宮師傅、南書房翰林、上書房師傅。而內務府卽明代內官二十四衙門之改稱。又有領侍衛內大臣。以掌宮禁之防。大九卿中之左都御史。與刑部、大理寺尙合稱三法司。然不似明代左都御史之參預計典。明代六科十三道爲兩衙門。而清則隸於都察院。司其黜陟。巡按御史裁於順治之末。外官布政司參政、參議道。謂之守道。按察司副使僉事道。謂之巡道。兩京督學御史外。有學道。又有糧道、鹽道、河道、海道。清

康熙初元。以歲計不敷。裁守道而留兵備道。分巡道。自爲實官。不借布按之銜。以學政代督學御史及學道。留糧鹽而裁河海。明制知府之次曰同知管軍。通判管糧。推官管刑。康熙中裁推官。以同通分防設治。府州縣屬官。經歷、縣丞、吏目、巡檢。亦設分治。清代開疆設治。多設直屬於道之直隸州知州。邊遠則設直隸廳同知。以施軍治。有清一代。府州縣之數。亦較明爲多。

(8) 兵制

(甲) 明代兵制

衛所之制。略得漢唐寓兵於農之意。

明以武功定天下。革元舊制。自京師達於郡縣。皆立衛所。外統之都司。內統於五軍都督府。而上十二衛爲天子親軍者不與焉。征伐則命將充總兵官。調衛所軍領之。旣旋則將上所佩印。官軍各回衛所。蓋得唐府兵遺意。(明史卷八九兵志序)

太祖下集慶路。爲吳王。……革諸將襲元舊制樞密、平章、元帥、總管、萬戶諸官號。而覈其所部兵五千人爲指揮。千人爲千戶。百人爲百戶。五十人爲總旗。十人爲小旗。天下旣定。度要害地係一郡者設所。連郡者設衛。大率五千六百人爲衛。千一百二十人爲千戶所。百十有二人爲百戶所。所設總旗二。小旗十。大小聯比以成軍。

其取兵有從征、有歸附、有謫發。從征者諸將所部兵，既定其地，因以留戍。歸附則勝國及僭僞諸降卒，謫發以罪遷爲兵者，其軍皆世籍。此其大略也。（明史卷九〇兵志二）

初，洪武二十六年，定天下都司衛所，共計都司十有七，留守司一，內外衛三百二十九，守禦千戶所六十五，及成祖在位，二十餘年，多所增改，其後措置不一。（明史卷九〇兵志二）

京軍之制。一變而爲三大營。

京軍三大營。一曰五軍。一曰三千。一曰神機。其制皆備於永樂時。初太祖建統軍元帥府，統諸路武勇，尋改大都督府。以兄子文正爲大都督，節制中外諸軍。京城內外置大小二場，分教四十八衛卒。已又分前、後、中、左、右五軍都督府……成祖增京衛爲七十二，又分步騎軍爲中軍、左右掖、左右哨，亦謂之五軍……已得邊外降丁三千立營……已征交趾，得火器法，立營肄習……三大營之制如此。（明史卷八九兵志一）

再變而爲十團營。

土木之難，京軍沒幾盡。景帝用于謙爲兵部尙書，謙以三大營各爲教令，臨期調撥，兵將不相習，乃請於諸營，選勝兵十萬，分十營團練……其餘軍歸本營曰老家。京軍之制一變。（明史卷八九兵志一）

繼增而爲十二團營。

英宗復辟，謙死，團營罷。憲宗立，復之，增爲十二。成化二年復罷，命分一、二等訓練，尋選得一等軍十四萬有奇。帝以數多，令仍分十二營團練，而區其名……名其軍曰選鋒，不任者仍爲老家，以供役，而團營之法又稍

變。（明史卷八九兵志一）

再變而爲兩官廳矣。

武宗卽位。十二營銳卒。僅六萬五百餘人。稍弱者二萬五千而已。……及流寇起。邊將江彬等得幸。請調邊軍入衛。於是集九邊突騎家丁數萬人於京師。名曰外四家。立兩官廳。選團營及勇士四衛軍於西官廳操練。正德元年。所選官軍操於東官廳。自是兩官廳軍爲選鋒。而十二團營且爲老家矣。（明史卷八九兵志一）

又沿海之地。皆設兵戍守。曰防海衛。

沿海之地。自廣東樂會接安南界。五千里抵閩。又二千里抵浙。又二千里抵南直隸。又千八百里抵山東。又千二百里踰寶坻。廬龍抵遼東。又千三百餘里抵鴨綠江。島寇倭夷。在在出沒。故海防亦重。吳元年。用浙江行省平章李文忠言。嘉興、海鹽、海寧皆設兵戍守。洪武……十七年。命信國公湯和巡視海上。築山東、江南北、浙東西沿海諸城。後三年。命江夏侯周德興抽福建、興、漳、泉四府三丁之一。爲沿海戍兵。得萬五千人。移置衛所於要害處。築城十六。……二十一年。又命和行視閩粵。築城增兵。置福建沿海指揮使司五。……領千戶所十二。……（明史卷九一兵志三）

防海外。防江爲重。

洪武初。於都城南新江口。置水兵八千。已稍置萬二千。造舟四百艘。又設陸兵於北岸浦子口相犄角。所轄沿江諸郡。上自九江、廣濟、黃梅。下抵蘇、松、通、泰。中包安慶、池、和、太平。凡盜賊及販私鹽者。悉令巡捕。兼以防倭。永

樂時特命勛臣爲帥。視江操……成化四年。從錦衣衛僉事馮瑤言。令江兵依地設防。於瓜、儀、太平置將領鎮守……弘治中。命新江口兩班軍。如京營例。首班歇。卽以次班操。（明史卷九一兵志三）

至於邊地。各爲鎮軍。

元人北歸。屢謀興復。永樂遷都北平。三面近塞。正統以後。敵患日多。故終明之世。邊防甚重。東起鴨綠。西抵嘉峪。綿亘萬里。分地守禦。初設遼東、宣府、大同、延綏四鎮。繼設寧夏、甘肅、薊州三鎮。而太原總兵治偏頭。三邊制府駐固原。亦稱二鎮。是爲九邊。（明史卷九一兵志三）

洪武時。宣府屯守官軍殆十萬。正統、景泰間。已不及額。弘治、正德以後。官軍實有者僅六萬六千九百有奇。而招募與土兵居其半。他鎮率視此。（明史卷九一兵志三）

其制有總制、後改總督總兵、副總兵、參將、遊擊、守備、把總。

弘治十四年。設固原鎮。先是固原爲內地。所備惟靖虜。及火篩入據河套。遂爲敵衝。乃改平涼之開成縣爲固原州。隸以四衛。設總制府。總陝西三邊軍務。（明史卷九一兵志三）

總兵官、副總兵、參將、遊擊、將軍、守備。無品級。無定員。總鎮一方者爲鎮守。獨鎮一路者爲分守。各守一城一堡者爲守備。與主將同守一城者爲協守。（明史卷七六職官志五）

初邊政嚴明。官軍皆有定職。總兵官總鎮軍爲正兵。副總兵分領三千爲奇兵。遊擊分領三千往來防禦爲遊兵。參將分守各路東西策應爲援兵。營堡墩臺。分極衝次衝爲設軍多寡。平時走陣、哨探、守瞭、焚荒諸事無敢

情稍違制。輒按軍法。而其後皆廢壞云。（明史卷九一兵志三）

明初文武並重。中葉尙然。末季始以文制武。文重武輕。而總兵官竟戎裝伏地跪迎督撫矣。

宣德……時都指揮使與布按並稱三司。爲封疆大吏。而專閫重臣。文武並無定職。世猶以武爲重。軍政修飭。正德以來。軍職冒濫。爲世所輕。內之部科。外之監軍督撫。疊相彈壓。五軍府如贅疣。弁帥如走卒。總兵官領敕於兵部。皆踞閭。爲長揖。卽謂非體。至於末季。衛所軍士。雖一諸生。可役使之。積輕積弱。重以隱占虛冒諸弊。至舉天下之兵不足。以任戰守。而明遂亡矣。（明史卷九〇兵志二）

（乙）清代兵制

清代內外相御。八旗居內。綠營居外。爲經制兵。嘉慶時始大募鄉勇。後來有湘淮軍。清季始用洋操。練新軍。

有清以武功定天下。太祖高皇帝崛起東方。初定旗兵制。八旗子弟。人盡爲兵。不啻舉國皆兵焉。太宗征藩部。世祖定中原。八旗兵力最強。聖祖平南服。世宗征青海。高宗定西疆。以旗兵爲主。而輔之以綠營。仁宗勦教匪。宣宗禦外寇。兼用防軍。而以鄉兵助之。文宗穆宗先後平粵捻。湘軍初起。淮軍繼之。而練勇之功始著。至是兵制益數變矣。道咸以後。海禁大開。德宗復立海軍。內江外海。與水師並行。而練軍陸軍又相繼以起。（清史稿

兵志序)

八旗以旗統人。卽以旗統兵。合滿洲、蒙古、漢軍爲一。

太祖高皇帝辛丑年。初設四旗。先是癸未年。太祖以遺甲十三副起事。征尼堪外蘭。敗之。益厲兵力。以次削平諸郡。歸附日衆。初定出兵校獵。不論人之多寡。各隨族黨屯寨而行。每人各取一矢。十人設一長領之。其長稱爲牛录額眞。至是始分爲四旗。曰黃旗。曰白旗。曰紅旗。曰藍旗。以純色爲辨。每旗下以三百人爲一牛录。轄以牛录額眞一人。(皇朝文獻通考卷一七九兵考一)

甲寅年。定八旗之制。以初設四旗爲正黃、正白、正紅、正藍。增設四旗爲鑲黃、鑲白、鑲紅、鑲藍。黃、白、藍均鑲以紅。紅鑲以白。合爲八旗。統率滿洲、蒙古、漢軍之衆。每三百人設牛录額眞一人。五牛录設甲喇額眞一人。五甲喇設固山額眞一人。每固山設左右梅勒額眞二人。時滿洲牛录三百有八。蒙古牛录七十六。漢軍牛录十六。行軍時。地廣則八旗並列。分八路。地狹則八旗合一路而行。(皇朝文獻通考卷一七九兵考一)

其後戶口日繁。又編蒙古八旗、漢軍八旗。合二十四旗。爲一代定制。

國初先編立四旗。以統人衆。尋以歸服益廣。乃增建爲八旗。然猶統滿洲、蒙古、漢軍之衆而合於一也。迨其後戶口日繁。又編蒙古八旗。設官與滿洲等。繼編漢軍八旗。設官與滿洲、蒙古等。合爲二十四旗。其制以旗統人。卽以旗統兵。蓋凡隸於旗者。皆可以爲兵。非如前代有僉派、召募、充補之煩而後收兵之用也。(皇朝文獻通考卷一七九兵考一)

天聰九年。設蒙古八旗。……其旗色與滿洲八旗同。每旗設固山額真一人。梅勒章京、甲喇章京各二人。分轄所編牛錄。（皇朝文獻通考卷一七九兵考一）

崇德七年。設漢軍八旗。定旗色。與滿洲八旗同。每旗設固山額真一人。梅勒章京二人。甲喇章京五人。（皇朝文獻通考卷一七九兵考一）

兵額之可考者。乾隆時定爲

八旗滿洲兵五萬九千五百三十名。蒙古兵一萬六千八百四十三名。漢軍兵二萬四千五十二名。（皇朝文獻通考卷一七九兵考一）

據光緒會典所載佐領之數。滿洲六百八十一。蒙古二百四。漢軍二百六十八。凡千一百五十有三。每佐領以三百人爲率。總數未過四十萬也。

駐防八旗。畿輔曰稽查小九處大臣。盛京、吉林、黑龍江曰將軍。熱河曰都統。綏遠城曰將軍。寧夏曰將軍。伊犁曰將軍。內地各省西安、成都、荊州、江寧、杭州、福州、廣州曰將軍。山海關、密雲、青州、涼州、京口、乍浦有副都統。太原有城守尉。

若夫駐防之兵。則無論騎步。皆合滿洲、蒙古、漢軍以爲營。畿輔駐防二十有五。兵八千七百五十有八。東三省各城駐防四十有四。兵三萬五千三百六十。新疆駐防八。兵萬五千一百四十。各省駐防二十。兵四萬五千五

百四十。又守陵寢。守圍場。盛京吉林守邊門。二千九百七十人。共駐防兵十萬七千七百有六十。皆統於將軍。都統。城守尉。惟東三省及新疆駐防。則於滿洲蒙古八旗外。又別出索倫兵、錫伯兵、達瑚爾兵、巴爾虎兵、察哈爾兵、額魯特兵。皆打牲游牧部落之臣服較後者。故別編佐領。不列於八旗焉。（魏源聖武記卷一一武事餘記兵制）

八旗駐防之兵。大類有四。曰叢輔駐防兵。其藩部內附之衆及在京內務府理藩院所轄悉附焉。曰東三省駐防兵。曰各直省駐防兵。新疆駐防兵附焉。曰藩部兵。（清史稿兵志一）

其爲民累。清初已然。

順治十二年二月戊午。諭兵部。前以湖南寇氛未靖。殃及生民。曾有旨增遣滿兵。攜家口。駐防武昌。今念大軍所過。沿途水陸居民及驛遞。必至騷擾。所駐之地。又須撥給房屋田土。其爲民累。更有不可勝言者。……其停止攜帶家口駐防。（清世祖實錄卷八九）

綠營沿明舊制。各省設實缺提督、總兵、副將、參將、游擊、都司、守備、千總、百總、外委等武官。

綠營規制。始自前明。清順治初。天下已定。始建各省營制。綠營之制。有馬兵、守兵、戰兵。戰守皆步兵。額外外委皆馬兵。綜天下制兵。都六十六萬人。安徽最少。閩廣以有水師故最多。甘肅次之。……將軍兼統綠營者惟四川。有屯兵者惟湖南、貴州。其新疆之綠營屯防。始乾隆二十五年。由陝甘陸續移往。駐防各省標兵規制。督撫

得隨時疏定。綠營戰功。自康熙征三藩時。用旗綠兵至四十萬。雲南多山地。綠營步兵居前。旗兵繼之。所向輒捷。其後平定準部。回疆。金川。咸有助績。乾隆四十六年增兵。而川楚教匪之役。英法通商之役。兵力反遜於前。迨粵寇起。廣西。綠營額二萬三千。土兵一萬四千。遇敵輒靡。承平日久。暮氣乘之。自同治迄光緒。疊經裁汰。綠營之制。僅存而已。（清史稿兵志二）

康熙十八年四月……疏言……八旗勁旅。衝鋒破敵。所向無前。惟山澗陡絕之處。弓馬難施。請多用綠旗步兵。俾之攀藤附葛。爲大兵前驅。不難直搗賊穴。疏下兵部。如所請行。（滿洲名臣傳卷二二楊茂勳傳）

康熙二十一年八月。上以進取臺灣。有綠旗兵及駐防漢軍足用。滿洲兵可撤。命拉哈達率之還京。（滿洲名臣傳卷一五拉哈達傳）

練勇卽鄉勇。起自臺灣。推廣於陝西、川、楚諸省。

德楞泰奏言。鄉勇之設。起自臺灣。嗣後平定苗疆。及此次勦辦教匪。均有招募。慶元年二月間。川省應募者。有三十七萬之多。陝楚兩省。亦復不少。陝之漢江。川之嘉陵江。楚之鄖西。並三省邊界近山各屬。其城守卡隘台站。有兵力不敷防範者。不得不藉鄉勇爲協護。用以禦賊。即使之自衛身家。又可制其從賊之心。其隨征鄉勇。藉本地之人。爲之哨探嚮導。故進勦抄襲。較爲便捷……（國史列傳卷三五德楞泰傳）

又陳川楚軍務。略云。昨聞陝省團練鄉勇。或一二村。或數村。聯爲一處。築堡聲援。尤合衆志成城之道。川楚可推而行之。（國史列傳卷六一胡季堂傳）

嘉慶十年……諭曰……乃近年每遇征調。多有藉資鄉勇之力。衝鋒陷陣者。卽如湖南近日攻打苗寨。同知傅鼎督率練勇千餘人。陟險先登。所向克捷。而總兵魁保轉帶兵丁在後。爲之策應。豈非以官兵怯懦。不若練勇之趨健乎。（國史列傳卷五○魁保傳）

自太平軍興。八旗綠營。久同虛設。而湘軍、淮軍以起。

道咸間。粵匪事起。各省多募勇自衛。張國樸募潮州勇丁最多。咸豐二年。命曾國藩治湖南練勇。定湘軍營哨之制。爲防軍營制所防。迨國藩奉命東征。湘勇外。益以淮勇。多至二百營。左宗棠平西陲。所部楚軍。亦百數十營。軍事甫定。各省險要。悉以勇營留防。舊日綠營。遂同虛設。（清史稿兵志三）

及其末季。立練兵處。以練新軍。命奕劻爲管理大臣。而以袁世凱佐之。釐訂軍制。爲後來陸軍之濫觴。計分全國爲三十六鎮。僅成立十鎮。而清社遂屋。

（9）刑法

（甲）明代刑法

明初法外用刑。有榜文禁例。極爲嚴厲。

太祖懲元縱弛之後。刑用重典。然特取決一時。非以爲則。後屢詔釐正。至三十年始申畫一之制。所以斟酌損益之者。至纖至悉。令子孫守之。羣臣有稍議更改。卽坐以變亂祖制之罪。而後乃滋弊者。由於人不知律。妄意

律舉大綱。不足以盡情僞之變。於是因律起例。因例生例。例愈紛而弊愈無窮。（明史卷九三刑法志序）

後始定大明律。略遵唐舊。唯改十二篇爲六部。

洪武元年。又命儒臣四人。同刑官譌唐律。日進二十條。……六年夏。刊律令憲綱。頒之諸司。其冬。詔刑部尙書劉惟謙詳定大明律。每奏一篇。命揭兩廡。親加裁酌。及成。翰林學士宋濂爲表以進。曰。臣以洪武六年冬十一月受詔。明年二月書成。篇目一準於唐。曰衛禁。曰職制。曰戶婚。曰廩庫。曰擅輿。曰賊盜。曰鬪訟。曰詐僞。曰雜律。曰捕亡。曰斷獄。曰名例。採用舊律二百八十八條。續律百二十八條。舊令改律三十六條。因事制律三十一條。掇唐律以補遺百二十三條。合六百有六條。分爲三十卷。或損或益。或仍其舊。務合輕重之宜。（明史卷九三刑法志一）

大明律外。復爲大誥。凡三編。又有大誥武臣一編。大誥初編七十四條。明史只載十條。且有不屬於初編者。蓋由未見大誥之故。

大誥者。太祖患民狃元習。徇私滅公。戾日滋。洪武十八年。采輯官民過犯。條爲大誥。其目十條。曰攬納戶。曰安保過付。曰詭寄田糧。曰民人經該不解物。曰灑派拋荒田土。曰倚法爲奸。田空引偷軍。曰黥刺在逃。曰官吏長解賣囚。曰寰中士夫不爲君用。其罪至抄劄。次年。復爲續編三編。皆頒學宮以課士。里置塾師教之。囚有大誥者。罪減等。於時天下有誦讀大誥師生來朝者。十九萬餘人。竝賜鈔遣還。（明史卷九三刑法志一）

又有大明律誥。

洪武二十五年。刑部言。律條與條例不同者宜更定。太祖以條例特一時權宜。定律不可改。不從。三十年。作大明律誥成。御午門諭羣臣曰。朕倣古爲治。明禮以導民。定律以繩頑。刊著爲令。行之既久。犯者猶衆。故作大誥以示民。使知趨吉避凶之道。……然法在有司。民不周知。故命刑官取大誥條目。撮其要略。附載於律。凡榜文禁例悉除之。除謀逆及律誥該載外。其雜犯大小之罪。悉依贖罪例論斷。編次成書。刊布中外。令天下知所遵守。（明史卷九三刑法志一）

自律誥出。而大誥所載諸峻令。未嘗輕用。其後罪人率援大誥以減等。亦不復論其有無矣。

（乙）清代刑法

清初刑法極簡。大致爲死、鞭、罰金三種。條文亦不備。

有清起自遼左。不三四十年。混一區宇。聖祖冲年踐阼。與天下休養。六十餘稔。寬恤之詔。歲不絕書。高宗運際昌明。一代法制。多所裁定。仁宗以降。事多因循。未遑改作。……德宗末葉。……朝野上下。爭言變法。於是新律萌芽。迨宣統遜位。而中國數千年相傳之刑典俱廢。（清史稿刑法志序）

順治初元。暫用明律。

清太祖嗣服之初。始定國政。禁悖亂。戢盜賊。法制以立。太宗繼武。於天聰七年。遣國舅阿什達爾漢等。往外藩

蒙古諸國。宣布欽定法令。時所謂盛京定例是也。嗣後陸續著有治罪條文。然皆因時立制。不盡垂諸久遠。世祖順治元年。攝政睿親王入關。……六月。即令問刑衙門准依明律治罪。八月。……攝政王諭令法司會同廷臣詳釋明律。參酌時宜。集議允當。以便裁定成書。頒行天下。十月。世祖入京。即皇帝位。刑部左侍郎党崇雅奏。在外官吏。乘茲新制未定。不無憑臆舞文之弊。並乞暫用明律。候國制畫一。永垂令甲。得旨。在外仍照明律行。如有恣意輕重等弊。指參重處。（清史稿刑法志一）

順治三年。成大清律集解附例。

順治二年。命修律官參稽滿漢條例。分輕重等差。從刑科都給事中李士焜請也。三年五月。大清律成。世祖御製序文曰。朕惟太祖太宗創業東方。民淳法簡。大辟之外。惟有鞭笞。朕仰荷天休。撫臨中夏。人民既衆。情僞多端。每遇奏讞。輕重出入。頗煩擬議。律例未定。有司無所稟承。爰勅法司官。廣集廷議。詳譯明律。參以國制。增損劑量。期於平允。書成奏進。朕再三覆閱。仍命內院諸臣校訂妥確。乃允刊布。名曰大清律集解附例。爾內外有司官吏。敬此成憲。勿得任意低昂。務使百官萬民畏名義而重犯。冀幾刑措之風。以昭我祖宗好生之德。子孫臣民。其世世守之。（清史稿刑法志一）

幾於全錄明律舊文。以爲比附之資。

刑部等衙門尙書臣圖納等謹奏。……據廣西道試監察御史盛符升條奏疏稱。……大清律一書。所載諸事。有仍襲前代之舊文。而於本朝之法制。絕不相蒙者。如郡王、將軍、中尉親自赴京者治罪等項。其類尙多明載。

律中。實非遵行正法。所當刪定改正。以成善本。……先經刑部議覆。律文乃係遞沿成書。例乃因時酌定。凡見行則例或遇事而定。或遵旨而定。若將此等陸續定例事件附入律內。則律文難以告成。其律內所有郡王、將軍、中尉親自赴京治罪等項。雖非遵行正法。若將此等條例刪去。恐以後比照定擬者。無憑查考。……康熙二十八年八月二十八日題。（清律纂修奏疏輯錄）

自後雖屢經纂修。然僅續增附律之條例。而律文未之或改。一代多舍律用例。舍律用案。

例文自康熙初年。僅存三百二十一條。末年增一百一十五條。雍正三年分別訂定。曰原例。累朝舊例。凡三百二十一條。曰增例。康熙間現行例。凡二百九十條。曰欽定例。上諭及臣工條奏。凡二百有四條。總計八百十有五條。……乾隆一朝。纂修八九次。刪原例增例諸名目。而改變舊例及因案增設者。爲獨多。嘉慶以降。按期開館。沿道光、咸豐以迄同治。而條例乃增至一千八百九十有二。蓋清代定例。一如宋時之編敕。有例不用律。律既多成虛文。而例遂愈滋繁碎。其間前後抵觸。或律外加重。或因例破律。或一事設一例。或一省一地方專一例。甚且因此例而生彼例。不惟與他部則例參差。卽一例分載各門者。亦不無歧異。輾轉糾紛。易滋高下。（清史稿刑法志一）

清季欲圖收回領事裁判權。爲杜外人藉口。故修訂新刑律。刪除重法。改善監獄。廢

除非刑。又以滿漢科罪各別。亦欲加以修改。而有修訂法律館之設。以沈家本任其事。家本舊以刑名名家。後頒布現行刑律。多采自日本刑法。大清律例遂廢。

光緒二十八年。

一九〇二年

直隸總督袁世凱、兩江總督劉坤一、湖廣總督張之洞、會保刑部左侍郎沈家本、出使

美國大臣伍廷芳。修訂法律。兼取中西。旨如所請。（清史稿刑法志一）

光緒三十一年。

一九〇五年

修訂法律大臣沈家本等奏請刪除重法……三事。一曰凌遲、梟首、戮屍、凌遲之刑……

遼史刑法志始列入正刑之內。……至今相仍未改。梟首在秦漢時惟用諸夷族之誅。……今之梟首仍明制也。戮屍一事惟秦時成蟜軍反。其軍吏皆斬戮屍。……明自萬曆十六年定有戮屍條例。專指謀殺祖父母、父母而言。國朝因之。後更推及強盜。凡此酷重之刑。……實非聖世所宜遵。請將凌遲、梟首、戮屍三項。一概刪除。死罪至斬決而止。凡律例內凌遲、斬、梟各條。俱改斬決。斬決而下。依次遞減。一曰緣坐。緣坐之制。起於秦之參夷。……唐律惟反叛、惡逆、不道。律有緣坐。他無有也。今律則姦黨、交結近侍諸項。俱緣坐矣。反獄、邪教諸項。亦緣坐矣。……今世各國。皆主持刑罰止及一身之義。與罪人不孥之古訓。實相符合。請將律內緣坐各條。除知情者仍坐罪外。其不知情者。悉予寬免。餘條有科及家屬者。准此。一曰刺字。刺字乃古墨刑。漢之黥也。文帝廢肉刑。而黥亦廢。……至石晉天福間。始創刺配之制。相沿至今。其初不過竊盜、逃人。其後日加煩密。……擬請將刺字款目。概行刪除。……奏上。諭令凌遲、梟首、戮屍三項永遠刪除。所有現行律例內。凌遲、斬、梟各條。俱改爲斬決。其斬決各條。俱改爲絞決。絞決各條。俱改爲絞監候。入於秋審情實。斬監候各條。俱改爲絞監候。與

絞候人犯。仍入於秋審。分別實緩。至緣坐各條。除知情者仍治罪外。餘悉寬免。其刺字等項。亦概行革除。……三十二年。^{一九〇六年}法律館奏准。將戲殺、誤殺、擅殺、虛擬死罪各案。分別減爲徒流。……法律館……議准。婦女犯笞杖。照新章罰金。徒、流、軍遣。除不孝及姦盜、詐僞。舊例應實發者。改留本地習藝所工作。以十年爲限。餘俱准其贖罪。徒一年。折銀二十兩。每五兩爲一等。五徒准此遞加。由徒入流。每一等加十兩。三流准此遞加。遣軍照滿流科斷。如無力完繳。將應罰之數。照新章按銀數折算時日。改習工藝。其犯該枷號。不論日數多寡。俱酌五兩。以示區別。（清史稿刑法志三）

自順治迄乾隆間。……若宗室有犯。宗人府會刑部審理。覺羅。刑部會宗人府審理。所犯笞杖枷號。照例折罰責打。犯徒。宗人府拘禁。軍流鎖禁。俱照旗人折枷日期。滿日開釋。屢犯軍流。發盛京、吉林、黑龍江等處圈禁。死刑。宗人府進黃冊。（清史稿刑法志三）

清律犯罪發遣條。凡旗人犯罪笞杖各照數鞭責。軍流徒免發遣。分別枷號。徒一年。枷號二十日。每等遞加五日。流二千里者。枷號五十日。每等亦遞加五日。充軍附近者枷號七十日。近邊沿海邊外者八十日。極邊煙瘴者九十日。（清史稿刑法志二）

光緒三十三年。^{一九〇七年}更命侍郎俞廉三與沈家本俱充修訂法律大臣。沈家本等乃徵集館員。分科纂輯。並延聘東西各國之博士、律師。藉備顧問。……十二月。遵旨議定滿漢通行刑律。……宣統元年。^{一九〇九年}全書纂成。繕進。諭交憲政編查館核議。二年。^{一九〇四年}覆奏。訂定名爲現行刑律。……僅行之一年。而遜位之詔下矣。

（清史稿刑法志一）

宣統二年。^{○一九〇一年}頒布之現行刑律。……其五刑之目。首罰刑十。以代舊律之笞杖。一等罰罰銀五錢。至十等罰爲銀十五兩。……次徒刑五。年限仍舊律。次流刑三。道里仍舊律。然均不加杖。……次遣刑二。曰極邊。足四千里及烟瘴地方安置。曰新疆當差。以閩刑加入正刑。……次死刑二。曰絞。曰斬。……徒流雖仍舊律。然爲制不同。按照習藝章程。五徒依限收入本地習藝所習藝。流遣毋論發配與否。俱應工作。故於徒五等注明。按限工作。流二千里。注工作六年。二千五百里。注工作八年。三千里。注工作十年。遣刑。俱注工作十二年。收贖則根據婦女贖罪新章。酌減銀數。改爲通例。罰刑照應罰之數。折半收贖。徒一年。贖銀十兩。每等加銀二兩五錢。至徒三年。收贖銀二十兩。流刑每等加銀五兩。至三千里。贖銀三十五兩。遣刑與滿流同科。絞斬則收贖銀四十兩。亦分注於各刑條下。然非例應收贖者。不得濫及也。捐贖據光緒二十九年^{一九〇三年}刑部奏准。照運糧事例減半銀數。另輯爲例。其笞杖雖不入正刑。仍留竹板。以備刑訊之用。外此各刑具。盡行廢除。枷號亦一概芟削。刑制較爲徑省矣。惟就地正法一項。始自咸豐三年。時各省軍興。地方大吏遇土匪竊發。往往先行正法。然後奏聞。……沿及國變。而就地正法之制。迄未之能革。（清史稿刑法志二）

（二）生業

(1) 農業

明太祖起自民間。習知貧富不均之弊。卽位後務抑富民。

洪武二十四年秋七月戊戌。上諭工部臣曰。昔漢高祖徙天下豪富於關中。朕初不取。今思之。京師天下根本。乃知事有當然。不得不爾。朕今亦欲令富民入居京師。卿其令有司驗丁產殷富者。分遣其來。於是工部徙天下富民至者凡五千三百戶。(明太祖實錄卷二一〇)

馬道街。相傳明富民沈萬三居此。萬三非名也。洪武初。分其民爲哥、畸、郎、官、秀五等。秀最上。又各有等。鉅富者爲萬戶三秀。沈名富。字仲榮。性豪華。其弟貴屢以詩諷之。不聽。未幾。籍沒其家。戍金齒。(陳作霖東城志略志街道)

尤嚴兼并之禁。賦役不均。侵漁貧農者。皆重懲之。然卒不能禁。

洪武四年三月壬寅。……上以兵革之後。中原民多流亡。臨濠地多閒棄。有力者遂得兼并焉。乃諭中書省曰。古者井田之法。計口而授。故民無不受田之家。今臨濠之田。連疆接壤。耕者亦宜驗其丁力。計畝給之。使貧有所資。富者不得兼并。若兼并之徒。多佔田以爲己業。而轉令貧民佃種者。罪之。(明太祖實錄卷六二)

洪武五年五月戊辰。……諭。……曩者兵亂。人民流散。因而爲人奴隸者。卽日放還。……或有凍餒不能自存者。令里中富室假貸錢穀以資養之。工商農業皆聽其故。俟有餘贍。然後償還。(明太祖實錄卷七三)

洪武十六年五月庚申。免應天、太平、鎮江、寧國、廣德五府稅糧。……諭。……敢有恃強暴以侵漁小民者。必置

於法。朕不輕貸。（明太祖實錄卷一五四）

洪武十七年秋七月乙卯。上諭……民戶以百一十戶爲里。里有長……凡賦役。必驗民之丁糧多寡。產業厚薄。以均其力……有不奉行役民。致貧富不均者。罪之。（明太祖實錄卷一六三）

（甲）農佃

規定佃人田者曰承佃戶。見田主如少事長之禮。

洪武五年^{一三七}二月^二五月戊辰……諭……佃見田主。不論齒序。並如少事長之禮。若在親屬。不拘主佃。則以親

屬之禮行之。（明太祖實錄卷七三）

臣請立爲通融之法。凡江右之民。寓於荆湖多歷年所。置成產業者。則名以稅戶之目。其爲人耕佃者。則曰承佃戶。專於販易傭作者。則曰營生戶。（丘濬大學衍義補卷一三）

約中除樂戶、家奴及傭工、佃戶。各屬房主地主挨查管束。不許收入鄉甲。（呂坤實政錄卷五鄉甲約鄉甲事宜）

流來寄住皆貧苦無賴之人。未有不僦人房屋。佃人土田。依人審場者。房主地主先查來歷。更擇保人。編入莊頭。自行管理。（呂坤實政錄卷六風憲約憲綱十要）

諺云。良田不如良佃。此最確論。主人雖有氣力心計。佃情且劣。則田日壞……良佃之益有三。一耕種及時。二培壅有力。三蓄洩有方……且良佃所居則屋宇整齊。場圃茂盛。樹木蔥鬱。此皆主人僮僕力之所不能及。而

良佃自爲之。（張英恆產瑣言）

佃人田者。牛種皆田主給之。收而均分之。歲稔則餘數年之畜矣。得比歲稔。無立錫者或致千金。稱貸者其息恒一歲而子如其母。故多兼併之家。（皇朝經世文編卷三六李兆洛鳳臺縣志論食貨）

意以多種則多收。不知地多則糞土不能厚壅。而地力薄矣。工作不能遍及。而人事疎矣。是以小戶自耕己地。種少而常得豐收。佃戶受地承耕。種多而收成較薄。（皇朝經世文編卷三六尹會一敬陳農桑四務疏）

田主歲收私租畝恆一、二石。佃人竭一歲之力。不足溫飽。

吳中之民。有田者什一。爲人佃作者十九。其畝甚窄。而凡溝渠道路。皆并其稅於田之中。歲僅秋禾一熟。一畝之收。不能至三石。原注。凡言石者。皆以官斛。少者不過一石有餘。而私租之重者。至一石二三斗。少亦八九斗。佃人竭一

歲之力。糞壅工作。一畝之費可一縷。而收成之日。所得不過數斗。至有今日完租而明日乞貸者。（顧炎武日知錄卷一〇）

余聞南昌新建佃田者。上則畝止租二石。中或一石五六斗。下則畝率一石。新邑志載。每十五畝五分六釐有奇。合科糧一石。以俗例三升糧額通較。每畝合租穀二石一斗餘。俗但以石斗名田。田供租一石。稅糧三升。視他處上則且溢……

新城田皆依山傍溪。其高下一因山水。故惟山深水沃。平疇塗泥之地。可爲上則。去水稍遠。待人力溉灌者爲中則。下則沿山臨谷。畸零小邱。大水旱不能任。中歲猶可爲田。若夫童山惡水。歲受旱澇。疎薄不宜稻者。當別之爲地。使種菽粟麻蔬。上田畝租二石。中一石六斗。下一石二斗。地或五六斗。賦稅如之。（皇朝經世文編卷

三一陳道江西新城田租說

故春耕之際必貸穀。秋收輒倍償。

一圖之大者五六千畝。小者二三千畝。上農佃二十畝。口必多。中下以次而降。其數他人不知。田主未有不知者。由倉而核田主之真名。由田主而核佃戶之真數。春頒則田主承領。秋歛則田主歸償。……夫農夫之常困於他途者。他途貧。謀口而止。一畝之田。耒耜有費。籽種有費。耨斛有費。僱募有費。祈賽有費。牛力有費。約而計之。率需千錢。一畝而需千錢。上農耕田二十畝。耗於田者二十千。以中年約之。一畝得米二石。還田主租息一石。是所存者僅二十石。當其春耕急需之時。米價必貴。折中計之。每石貴一千有餘。勢不得不貸之有力之家。而富人好利。挾其至急之情。以邀其加四加五之息。以八閱月計之。率以二石償一石。所存之二十石。在秋必賤。富人乘賤而索之。其得以暖不號寒。豐不啼饑。而可以卒歲者。十室之中無二三焉。農民之所以困。反不在凶年而在樂歲。（皇朝經世文編卷三九章謙備荒通論上）

國初地餘於人。則地價賤。承平以後。地足養人。則地價平。承平既久。人餘於地。則地價貴。向日每畝一二兩者。今至七八兩。向日七八兩者。今至二十餘兩。貧而後賣。既賣無力復買。富而後買。已買可不復賣。近日田之歸於富戶者。大約十之五六。舊時有田之人。今俱爲佃耕之戶。每歲所入。難敷一年口食。必須買米接濟。而富戶登場之後。非得善價。不肯輕售。實操糧價低昂之權。（皇朝經世文編卷三九楊錫紱陳明米貴之由疏乾隆十三年）

竊查米價騰貴。皆由國戶居奇。往往捏作謠言。增長米價。或云風爲旱兆。或云雨爲水徵。一日之間。頻增價值。一店長價。諸店皆然。名曰齊行。莫敢異議。富民家有蓄積。樂其高擡。於己無損。惟手藝貧民。終日拮据。不供口食。即遇官府有平糴倉穀。不過一升半升。日糴日食而已。無力多買。又不能戶戶有碾米之具。且以終日鹿鹿。並無餘暇。故甯貴價向米鋪糴米。非不知官賣價賤。不得已也。若欲惠此貧民。無如官開米局。（皇朝經世文編卷四〇廣東總督鄂彌達請官開米局疏雍正十一年）

而田主或更苛以額外之租。虐以非法之刑。

鄧茂七與弟茂八皆編爲總甲。僱佃人田。例於輸租外。餽田主以新米鷄鴨。茂七始倡其民革之。（黃瑜雙槐歲鈔卷六襲指揮氣節）

董遂老雖出於望族。爲諸生時頗貧困。與弟葵初共嘗荼苦。故策名以來。友愛備至。凡事不論公私。俱葵初爲政。以故富厚十倍於乃兄。一日謂其家人曰。我家百事俱備。唯鹽菜尙無出產。今思各佃戶種我田者。其四圍餘地俱植蔬茹。何可獨享。今後每米一石。須要瓜乾一斤。隨租並納。此法一立。諸佃戶無不唯唯。迨其子祐申通南事敗。兵丁乘機肆搶。百物充牣。所不必言。而瓜乾用蒲包盛貯者。亦盈倉焉。（曹家駒說夢）

秉謙字抑之。號克齋。己酉登賢書。以松人薄其家世之微。故厭孫姓。改從謝姓。曰家本浙籍。乃謝文正公之族也。壬戌科。中進士。筮仕縣令。旋擢侍御。居鄉橫暴。……弟名秉諤。字節之。倚兄勢。流毒桑梓。佃戶有逋租者。破其陰囊。剔外腎。（曹家駒說夢）

復使奴僕課租。侵漁尤甚。大租之外。復有小租。或採取次年之租。而以佃戶抗租捏控。

張勉學字益甫。嘉靖二十六年進士。……陞湖廣叅事。分巡長沙。長沙藩府莊田房租稅特重。豪奴倍收。有不能償。沒人子女爲奴婢。勉學悉平其額。歲聽縣官徵解。民咸便之。（元和縣志卷二三人物）

易王而黃。……曰元甫者。復歸廬。家塘壑。元母爲邑勢官家乳嫗。官田三千畝在吾鄉。以嫗故。委元課租。元恃主威。禾未登場。輒駕賑船。呼囂鄉里。鷄犬不寧。農人苦之。衆議每畝出斗粟勞之。名曰脚步錢。元于主人正犒外。復蝕其十之二。……營大宅于吾鄉。……役佃民爲傭作。經年落成。一鄉苦之。（過墟志感上）

旗民往往因欠租奪地。互控結訟。其弊皆起於取租之旗奴。承租之莊頭。攬租之地棍。小民欲治良田。必積二三年之苦工。深耕易耨。加以糞治。田甫就熟。而地棍生心。遂添租挖種矣。……莊頭取租。多索而少交。田主受其侵盜。佃戶受其侵漁。甚且今年索明年之租。若不預完。則奪地另佃矣。另佃必添租。……所收之租。隨手花去。則又探次年之租矣。至於次年無租可索。而懼主責懲。則以佃戶抗租爲詞矣。……小民以爲租已預交。旗奴以爲並未收取。遂至互訟不休矣。（皇朝經世文編卷三五孫家淦八旗公產疏）

吾里田地上。農夫一人。止能治十畝。汝田多者。輒佃人耕植。而收其租。又人稠地密。不易得田。故貧者賃田以耕。亦其勢也。……佃戶終歲勤動。祁寒暑雨。吾安坐而收其半。賦役之外。豐年所餘。猶及三之二。不爲薄矣。而俗每存不足之意。任僕者額外誅求。脚尖斛面之類。必欲取盈。此何理耶。……近見富家巨室。田主深居不出。

足不及田疇。面不識佃戶。任紀綱僕所爲。至有盜賣其產變易區畝而不知者。侵沒租入。將熟作荒。退善良之佃任與刁黠。種種弊端。不一而足。坐使生計置索。靡糧積累。以致破家亡身。無不由此。或乃恃目前之豪橫。陵虐窮民。小者勒其酒食。大者通其錢財。妻子寘之獄訟。出爾反爾。可畏哉。（皇朝經世文編卷三六張履祥農書）

光緒初。元和陶煦租覈一書。本于顧炎武私租不得過八斗之說。力論佃農租重之苦。述租米隨市價折收之事甚詳。折租起源甚早。明萬曆四十二年。福王之國。湖廣應辦莊田四千八百五頃有零。由湖廣巡撫董漢儒等。每年認折租銀一萬兩。輸解福府。見定陵註略卷六。清代內府莊田。皆折租銀。見內務府慶豐司則例。是爲不換佃之定額折租。民田則多按市價折租。不換佃之地。亦有同于民田者。不盡一律也。

……又田中事。田主一切不問。皆佃農任之。糞壅工作之資。畝約錢踰一緡。穀賤時七八斗之值也。三春雖種菽麥。要其所得。不過如傭耕之自食其力而無餘。一歲僅恃秋禾一熟耳。秋禾畝不過收三石。少者止一石有餘。而私租竟有一石五斗之額。然此猶虛額。例以八折算之。小歉則再減。同治二年。朝廷從合肥李伯相之請。下詔減賦。蘇松減三之一。於是田主聲言減租。以虛額之數。畝減其三斗。故向止一石二斗而無增者。今亦一石二斗。……最可異者。納租收錢而不收米。而故昂其米之價。必以市價一石二三斗或一石四五斗之錢。作

一石算。名曰折價。卽有不得已而收米者。又別有所謂租斛。亦必以一石二三斗作一石。……更可異者。賦有九則。而租獨一例。試以吳江之下下田而論。納一升五合有奇之賦。而亦收一石有餘之租。此尤事之不平者矣。（陶煦租覈重租論）

折租之價。率視市價增一二分。如市價石錢一千八百。折租必二千。或二千一二百不等。佃之良懦者。必使之如其言而不敢較。若狡滑之佃。多方陳說。閱時延欠。庶幾市價之更賤。新穀初糶時。價必稍貴。糶者漸多。乃亦日賤。是如限者受虧。而踰期者反利。此之謂無定價。或有折價既定。不隨市價貴賤。亦非。餘如司租之需索。紳富初得田。司租者必索佃者錢。畝約七八百。或千數百。曰匯租費。還租時。以錢者千索錢二三十。曰盤錢費。以洋錢者。索錢三五十。曰看洋錢費。（陶煦租覈減租瑣議）

荒年。田主或得免租。而佃戶田租仍須全繳。至於賣妻子以償。清代雖間有佃戶亦蠲之令。然奉行者寥寥。

今高淳縣之西。有永豐鄉者。宋時之湖田。所謂永豐圩者也。……今隸總所。王弼

成化十一年進士溧水知縣

永豐謠曰。永豐

圩接永寧鄉。一畝官田八斗糧。人家種田無厚薄。了得官租身卽樂。前年大水平斗門。圩底禾苗沒半分。里胥告災縣官怒。至今追租如追魂。有田追租未足怪。盡將官田作民賣。富家得田貧納租。年年舊租結新債。舊租了。新租促。更向城中賣黃犢。一犢千文任時估。債家算息不算母。嗚呼。有犢可賣君莫悲。東鄰賣犢兼賣兒。但願有兒在我邊。明年還得種官田。讀此詩。知當日官佃之苦卽已如此。而以官作民。亦不始於近日矣。（顧炎

武日知錄卷一〇

貧民方寄食於富民之田。值豐歲規其贏羨以給妻子。日給之外。已無餘粒。設一遭旱潦。盡所有以供富民之租。猶不能足。（皇朝經世文編卷三〇盛楓江北均田說）

康熙四十二年^{一七〇三年}。八月甲申。刑部尙書王士正等。因山左被災。奉旨截留漕米。並派八旗官員領帑往賑。

奏謝得旨。朕四次經歷山東。於民間生計。無不深知。東省與他省不同。田野小民。俱與有身家之人耕種。豐年則有身家之人所得者多。而窮民所得之分甚少。一遇凶年。自身並無田地產業。強壯者流離於四方。老弱者即死於溝壑。此等情由。爾東省大臣庶僚。及有產業之富人。亦當深加體念。似此荒歉之歲。雖不能大爲拯濟。若能輕減其田租等項。各瞻養其佃戶。不但深有益於窮民。爾等田地。日後亦不至荒蕪。如果民受實惠。豈不勝謝恩千百倍耶。（清聖祖實錄卷二二三）

康熙四十九年^{一七〇四年}。兵科給事中高遐昌奏言。歲遇免租。佃戶田租亦應酌免。下戶部議定。業主蠲免七分。佃戶蠲免三分。著爲例。（皇朝文獻通考卷四五國用考）

雍正十三年^{一七三五年}。九月。今皇上登極。詔免天下田租。又諭免雍正十二年以前逋租。……隨諭勸業戶。各計所免之數。捐十分之五。以惠佃農。（皇朝文獻通考卷四四國用考）

乾隆三十二年^{一七六七}。諭各省督撫。屆輸蠲漕米年。分諭各業戶。亦令佃戶免交一半。（皇朝文獻通考卷四四國用考）

惟各屬內有王。貝勒所受莊田。以係私租。爲諭旨所不及。各府仍派人徵收。不肖莊頭恃勢恫喝。迫令貧佃一律交足。否則押送地方官監比。以臣所聞。安州一帶各佃。有因此逃匿無蹤者。有變產完租者。甚至有賣鬻妻子者。……並聞各府員弁。下鄉徵租。自稱管家大人。寓所服用極其奢侈。桀驁莊頭爲其羽翼。擇肥而噬。婪索無厭。及歸報私租數目。則雖豐稔之年。並不如額。其爲侵吞中飽。不問可知。（皇朝經世文續編卷三八朱以增請將順直王莊遇災酌減分數並佃租歸官徵解疏）

濬與內黃。……其被災與脩略同。……有田姓買同村張姓田房都盡。其一兒出四百五十錢。契上寫世世爲奴字樣。大戶之無人心如此。（皇朝經世文續編卷三九熊其英致南中書）

甚至學租有逾額之征。亦取贏於佃。

今亦增學租以入公家。學役不能賠納。勢必取贏于佃戶。佃戶畏累則棄田不耕。田不耕則不特學租無辦。而正供亦將缺額矣。（皇朝經世文編卷三二蔡方炳書韓中丞請免省存餘耗疏後）

佃不堪其苛求。則起而反抗。

邇者康熙中吳中水旱頻仍。租戶歛結以抗田主。（黃中堅蓄齋集卷五卹農）

嘉慶甲子年九年。公元一八〇四年

五月。吳郡大雨者幾二十日。田俱不能插蒔。忽于六月初一日。鄉民結黨成羣。搶奪富

家倉粟及衣箱物件之類。九邑同日而起。搶至初六日。不知其故。共計一千七百五十七案。真異事也。其時撫軍汪公稼門。僅殺余長春一人。草草完結。（錢泳履園叢話卷一四）

鄉民買田承種。田入稍薄。仇視其主。抗持之風。漫衍浸漬。雖豐入者亦且效尤。爭訟盈庭。主佃交困。皆田則不清所致也。（皇朝經世文編卷三一陳道江西新城田租說）

民皆不識字而仇恨官長。問官吏貪乎。枉法乎。曰不知。問何以恨之。則以收錢糧故。問長毛不收錢糧乎。曰吾交長毛錢糧。不復交田主糧矣。（汪士鐸汪悔翁乙丙日記卷二）

與農夫談。聞去歲舒家橋張氏毆斃佃戶。致毀屋事。（翁文恭公日記光緒二十五年五月二十一日）

聞東鄉鄉民抗租。聚衆拆催頭並及業主屋。大約由任陽起。漸次將及支塘。深慮成光道丙午年事。（翁文恭公

日記光緒二十六年十一月一日）

東鄉鄉民拆至董浜。富戶何姓爲平地。（翁文恭公日記光緒二十六年十一月二日）

（乙）授田

喪亂之後。田多荒蕪。乃招民授田。或官給牛種農具。或永不起科。貧農多趨之。

洪武三年六月。諭……北方近城地多不治。召民耕。人給十五畝。蔬地二畝。免租三年。有餘力者。不限頃畝。……

官給牛及農具者。乃收其稅。額外墾荒者。永不起科。（續文獻通考卷二田賦考）

四川經張獻忠之亂。子遺者百無一二。耕種皆三江湖廣流寓之人。雍正五年。一七二七年因逃荒而至者益衆。諭

令四川州縣。將人戶逐一稽查姓名籍貫。果係無力窮民。即量人力多寡。給荒地五六十畝。或三四十畝。令其

開墾。（清史稿卷一二〇食貨志一）

東南兵火之餘。農久失業。光祿少卿鄧錫瀛言。國家歲入金約四千數百萬。餉糈支耗半之。宜廣屯田養兵。以節費。尋御史汪朝榮稱。各省新復土疆。宜急墾闢。徐景軾亦以修農利。安流徙爲言。由是曾國藩於皖。楊昌濬於浙。皆分別土客。部署開荒。而馬新貽於蘇。劉典於陝。亦汲汲督勸。曾璧光。黎培敬前後於黔。與屯田之政。
(清史稿食貨志一)

然開墾甫熟。卽課其稅。或指爲己業。控訐無已。轉以升科爲弭爭唯一善法。

明初。承元末大亂之後。山東、河南多是無人之地。洪武中。詔有能開墾者。卽爲己業。永不起科。原注。是時方孝儒有因其曠土復古井

田之議。至正統中。流民聚居。詔令占籍。景泰六年六月丙申。戶部尙書張鳳等奏。山東、河南、北直隸并順天府無額田地。甲方開荒耕種。乙卽告其不納稅糧。若不起科。爭競之塗終難杜塞。今後但告爭者。宜依本部所奏減輕起科則例。每畝科米三升三合。每糧一石科草二束。不惟永絕爭競之端。抑且少助倉廩之積。從之。(顧炎武日知錄卷一○開墾荒地)

明廢藩莊地。自我朝定鼎。勢豪侵佔。疊告不休。屢行變價。難于清核。先考盧震題請畫一。卽令現在之人納糧盡歸條編。每畝四分起科。爭端永息。至今直隸各省皆照湖南例行。(陳奕禧春鵲堂集卷一三廬中丞行狀代)

同治初元。……山東遭教匪之亂。鄒、滕諸縣田里爲墟。三年。一八六四年決用移民策。而東昌、臨清、兗、曹各屬。逆產及絕戶地。盡沒入官。五年。一八六六年乃有辦理湖團之諭。湖團者。曹、濟客民種蘇、齊界銅、沛湖地。聚族立團。既而

土著歸鄉。控閱無已。然客墾由官招集。不乏官荒。所占土田不甚廣。且訟者非實田戶也。於是會國藩研燭其情。爲之驅逐莠戶。留其良園。各安所業。（清史稿食貨志一）

（丙）豪強

豪強侵佔田地。首推皇莊。

皇莊既立。則有管理之太監。有奏帶之旗校。有跟隨之名下。每處動至三四十人。其初。管莊人員出入。及裝運租稅。俱是自備車輛夫馬。不干有司。正德元年以來。權奸用事。朝政大壞。於是有符驗之請。關文之給。經過州縣有廩餼之供。有車輛之取。有夫馬之索。其分外生事。巧取財物。又有語言不能盡者。及抵所轄莊田處所。則不免擅作威福。肆行武斷。其甚不靖者。則起蓋房屋。則架搭橋梁。則擅立關隘。則出給票帖。則私刻關防。凡民間撐駕舟車。牧放牛馬。採捕魚蝦螺蚌蒹蒲之利。靡不括取。而鄰近地土。則展轉移築封堆。包打界至。見畝徵銀。本土豪猾之民。投爲莊頭。撥置生事。幫助爲虐。多方掊克。獲利不貲。輸之官闈者。曾無什之一二。而私囊聚者。蓋不啻什八九矣。是以小民脂膏吮剝無餘。（皇明經世文編卷二〇二夏言查勘報皇莊疏）

查得正德十一年以前。^{皇莊}已有三百八十餘處。每處土地動計數千百頃。中間侵佔混奪之弊。積襲已非一朝。爲厲之階。實起於姦人欲盡規地利。以媚朝廷。其末流之弊。則壞於勢家。盡奪產以肥私室。其在官闈者。則中官禁卒旁午肆出。而郡縣恣其搔擾。其在勳戚者。則豪奴悍僕肆行威斷。而官府莫敢誰何。節經委官查勘。終於患害不除。蓋由私人貴戚憑藉寵靈。猾少奸徒盤據窟穴。是以積垢宿蠹。莫可爬梳。合勢朋計。動行阻撓。此

實累朝弊政。（皇明經世文編卷八六林俊查處皇莊田土疏）

次則藩王宗族及勢要奏討之田。皆不納錢糧。且侵佔鄰近之田。多倍原額。

照得臣所屬五府地方。惟鄖陽漢中未有藩封。而荆襄南陽皆係分藩之地。有等奸滑棍民。或因爭競不明。或以糧差負累。往往將下戶田地。投郡王將軍位下。希求厚值。倚借聲威。苟圖一人目前之利。而各該宗室將田到手。但知收租。不肯納糧。有司莫敢誰何。里遞只得賠贖。實貽通縣無窮之害。（皇明經世文編卷三四二吳桂芳條陳民瘼疏）

六曰禁勢要之奪田地。……近年以來。內外貴權之家。往往挾勢。不思民間沒官空閒田地。俱是起科之數。亦不思前項田地曾撥與民間。既以納糧當差。輒以朦朧奏討。該部不行查審明白。却乃依阿曲從。徇情撥予。其下民因見奉旨欽撥。莫敢誰何。其間奏討五十頃而侵佔一百頃者有之。奏討一百頃而侵佔二百頃者有之。況古者一夫受田百畝。不過一頃。以養八口之家。而又納賦於其上。今以一人而討百頃之田。又不納糧當差。是一人而坐享百頃之利。其可乎哉。自古開國勳臣。亦不過食邑五十戶或一百戶而已。今其奏討者不可勝計。且如武清侯石亨。享祿千鍾。尚稱喂馬艱難。奏討田地開種草料。及跟隨指揮人等求地蓋房。及都督同知王竑才。方陞任前職。祿非不厚。却稱日食不敷。又奏討田地二處。又如百戶唐興。奏討田地不下二三百頃。且唐興一家。豈能盡種。詢訪其實。多係在京奸詐之徒。投充家人名色。倚恃勢要。威逼侵佔。害人肥己。所以怨則歸於朝廷。利則歸於奸詐。其他奏討田地者。難以枚舉。忍心逆理。莫此爲甚。……（皇明經世文編卷四五行

聰修災弭災疏

勢宦兼併者尤衆。田既膏腴。且概邀優免。一縣賦額。盡取足於貧瘠之田。胥吏利貧農之無告。益爲姦利無所憚。

今袁州一府四縣之田。七在嚴^嵩。而三在民。在嚴者皆膏腴。在民者悉瘠薄。在嚴則槩戶優免。在民則獨累不勝。臣聞百姓苦楚難支。避散流離者接踵矣。（皇明經世文編卷三二九申逆罪正其刑以彰天討疏）

彼以爲按地均攤。則地畝額數載在賦役全書。難以高下其手。不如門戶牌甲牛驢村莊參差不齊。使上司無從考查之爲得也。又以爲紳民同辦則耳目甚周。差費浮加難以強令輸納。不如鄉曲小民無知無識。即使不甘。而勢孤力薄不能上控之爲得也。于是胥吏得以分肥。豪強得以包攬。使自食其力之小民。仰不足以事父母。俯不足以畜妻子。霑體塗足。終歲勤動。而捫指差錢。有拆房蕩產者。有因此賣妻鬻子者。有因此棄家逃亡者。困苦流離。死而無告。因而盜賊竊發。民不聊生。此關心民瘼者所爲痛哭流涕長太息者也。（皇朝經世文編卷三三張杰均徭文）

語曰。雀歷不如牛髀。近日奸頑里老。比欠止帶貧民。不知錢糧逋負。不在荒地而在腴田。不在貧民而在奸富。不在小民而在勢豪。（呂坤實政錄卷四民務徵收糧稅）

隆見天下士大夫。官無論久暫崇卑。必有華屋接闔閭。良田連阡陌。積貨充市肆。僮奴溢街巷。大則兼數百家之產。小亦不下數十家。此貲非從天降地出。悉小民之脂膏也。（屠隆鴻苞節錄卷二舊語懲貪競）

(丁)投獻

民或苦於科歛。則以田投獻於勢豪。雖納私租。可免國稅。其中奸徒。往往藉勢侵漁貧農。甚至己本無田。而誣指他人之田。帶投以爲利。

民之窮困。不特緣於有司之侵漁。亦多迫於勢豪之橫暴。蓋官豪勢要之家。其堂宇連雲。樓閣冲霄。多奪民之居以爲居也。其田連阡陌。地盡膏腴。多奪民之田以爲田也。至于子弟特氣陵人。受奸人之投獻。山林湖澤。奪民利而不敢言。當此之時。天下財貨皆聚於豪勢之家。若不嚴爲禁治。小民之害。何時而已也。(皇明經世文編卷二五一王邦直陳愚衷以卹民窮以隆聖治事)

凡詭寄投獻等禁例。洪武初令。凡民間賦稅自有常額。諸人不得於諸王駙馬功勳大臣及各衙門妄獻田土山場窯冶。遺害於民。違者治罪。十五年令。各處奸頑之徒。將田地詭寄他人名下者。許受寄之家首告。就賞爲業。十八年令。將自己田地移坵換段。詭寄他人。及灑派等項。事發到官。全家抄沒。……正統九年奏准。順天府所屬地土有限。今後公侯駙馬伯等官在京年久及外夷人員。曾經撥地安插住坐者。不許奏討田地。(大明會典卷一七戶部四田土)

投充名色。從古所無。……此事起於墨勒根王許各旗收投貧民。爲役使之用。嗣則有身家有土地者。一概投收。遂有積奸無賴。或恐圈地。而甯以地投。或本無地。而暗以他人之地投。甚且帶投之地有限。而恃強霸占之弊端百出矣。借旗爲惡。橫行害人。所投之主原不盡知。但聽投充之口護庇容縱。以致御狀、鼓狀、通狀紛爭。無

不抗租。而豪戶下以佃戶抗租無米之田上供國家之賦。於是上戶亦困。而諸無田不耕之人。又無慮十人而六七。荒形甫見。則徒手待哺之民遍郊野。是故蘇松之荒。較甚他郡縣。（皇朝經世文編卷四三張海珊甲子救荒私議）

（戊）錢糧

富民則納賄竄田及丁于勢紳之籍。以避糧徭。謂之詭寄。

田之不均。生自二豪。貴官多賂。富室多財。顧肥饒之區。擅山澤之利。富民又以餘田竄仕籍業。貧民仕者優力役。貧者代輸租。諺謂富人家穀。貧者官粟者也。富則曳絲被綺。侈以相競。貧者衣食下同犬彘牛馬。痛哉。近者有司立法均田。畫丘計畝。三品徵稅。惜其負之胥吏。高下任心。衆口稱喧。尤爲二豪扇搖。欲壞而罷之。曠代而舉事。偶噎而廢食。惜乎。（皇明經世文編卷一五三崔銑政議）

且此等人數。雜沓不齊。或市井逃食之輩。或丁多有力之家。以甲姓而影射乙名。以途人而詭充子侄。或一家三四人。或一人三四籍。躲避差徭。貪圖糧賞。憑藉內府。驕炫鄉隣。身不閑藝業。而謂之高手上工。按月辦苞苴。而謂應役不缺。弊端百出。難以悉陳。遂致司農乏計。而倉庾告空。有識寒心。而朝廷不覺。（皇明經世文編卷一九二鄭自璧裁濫役以節京儲疏）

稽詭詭影射影之術有二。曰慎優免。曰考寄莊。夫優免。免其本業耳。今則廣收富人之財以射利。寄莊其廣布者耳。今則借豪貴之名以隱差。至於投獻有例。強占有禁。其法具存也。（朱健古今治平略卷一國朝田賦）

查得按屬各州縣編密均徭。俱隨各甲內原額丁田挨年編派。其法初未嘗不善。但奸欲避重就輕。往往詭寄糧多甲下。而宦豪之家又花分子戶。頻年告免。更相影射。以致輕重愈失其平。法意蓋蕩然矣。（皇明經世文編卷三五七龐尙鵬題爲均徭役以杜偏累民困事）

以糧言。豪紳卽納糧亦薄於常農。其買田也。必乘貧民急售之際。限以輕賦。於是貧農售田而留賦。田益狹。賦益重。

奸胥豪索。乘歲久。亂常賦之則。有司爲名書。首尾莫之省。貧者歛日衆。逃日衆。而土日荒。（皇明經世文編卷三二三林燦贈節齋劉公之江西左轄序）

……蓋今天下。田地不均。官民異則。狡獪之胥。豪悍之族。倍力爲巧詐。飛走千形。穢詭萬狀。派於見在。謂之活灑。藏於逃絕。謂之死寄。分於子戶。謂之帶管。留於賣主。謂之包納。有推無收。有總無徹。倏忽變幻。鬼不得而原也。至於富人。憚於征徭。割數畝之產。加數倍之賦。無直以免貧民。貧民逼於窮蹙。持難售之田。苟速售之利。減賦以邀富室。廣狹輕重。雜亂混淆。富者田廣而賦反輕。貧者田狹而賦反重。富者有公侯之資。貧者爲狗彘之食。此所流徙徧山林。而盜賊難禁也。（皇明經世文編卷三六六葉春及較賦稅因地定賦）

山陰、會稽、蕭山諸縣完納錢糧。向有紳民戶之分。每正耗一兩。紳戶僅完一兩六分至一兩三四錢而止。民戶則有完至二千八九百文或三四千文者。（皇朝經世文續編卷三〇左宗棠核減紹屬浮收錢糧疏）

以徭言。明初定制。每十年則里書造冊。田多者爲里長。任徭役。田少者爲花戶。又造

魚鱗冊。以稽田額。法頗縝密。年久。田多易主。冊遂漫漶不可稽。富者賄里書。捏立戶名。謂之鬼戶。以己田分隸其下。謂之飛灑。又有活灑、死寄、畸零、帶管、懸掛、掬回、包納、寄莊諸名色。使田數銳減。貧民反以田多充里長。應重徭。

魚鱗冊歲久漫漶。至亡失不可問。而田得買賣。糧得過都圖。賦役冊獨以田從戶。其巨室置買田產。遇造冊。賄里書。有飛灑見在人戶者。名爲活灑。有暗藏逃絕戶納者。名爲死寄。有花分子戶不落眼者。名爲畸零、帶管。有留在賣戶全不過割者。有過割一二石爲包納者。有全過割不歸本戶者。有有推無收、有總無徵名爲懸掛、掬回者。有暗襲京官方面進士舉人脚色捏作寄莊者。（蔡方炳廣治平略卷一七田賦篇）

至錢糧包攬飛灑。以致歷年拖欠。亦由戶名不清。村莊不順。所以里長雖行禁革。而變爲圩頭、圖總、甲首種種名色。甚且有衿監吏胥暗占爲缺者。蓋浙俗糧冊並無的姓的名。或子孫分析。承用詭名。至輾轉授受。又聯合數姓報作一戶。因而互相推諉。並不知爲何人。或投託豪戶名下代納。任其侵蝕。無從稽考。又或一戶之糧數人應交。而散居各處。別鄉之人置產此地。而相隔寫遠。於是滾單不能挨送。不得不用一熟悉根柢之人。令其查造傳催。伊等既操其權。遂致從中舞弊。若按保甲之實戶。問田產之坐落。以田產之的名。編行糧之圖甲。挨莊順序。戶戶可稽。則錢糧何從詭寄。抗欠何難追比乎。（皇朝經世文編卷二九徐鼎請稽保甲以便徵輸疏）

一曰清戶。柱、至。到有田在山鄉而糧在湖鄉者。有東鄉之人買西鄉之田。而糧仍撥入東鄉者。有一糧戶而數十花名者。有一兩錢糧而分立數名者。其意欲混入積淹之冊。希圖蠲緩也。欲避大戶之名而巧卸差徭也。更

欲避堤頭圩頭之舉而深畏相累也。更有田已典當而未杜賣過戶。及催收錢糧。問之田主。田主曰已典當與某。問之當主。曰並未杜賣。仍須田主完糧。彼此相推。幾乎無可捉摸。種種詭弊。皆逃亡故絕之源也。（皇朝經世文續編卷三〇胡林翼札各州縣論錢漕吏胥）

糧多者爲富民。糧少者爲貧民。今富者既多倖脫。承差者俱屬窮黎。或逃或欠。下累里甲。上礙考成。（皇朝經世文編卷三〇曾王孫勘明沔縣丁銀宜隨糧行議）

夫里甲十年一定。田多僉里長。田少爲花戶。固矣。浙省各屬。有等奸頑富民。串通本里冊書。每於編審之年。捏立鬼戶。飛灑田數。少者四五畝五六畝不等。多不及十畝而止。田數既已無多。重役便已漏脫。及至臨審缺額。反將貧民瘠產串立應充。是田多者以花分而得卸擔。田少者以愚實而應重差。是皆冊書舞弊。以致苦樂不均。（皇朝經世文編卷三〇柯聶編審釐弊疏）

衙門吏書舞文壞法。或變亂丁糧。或洗改圖冊。或重輕罪名。或要索人犯。皂快下鄉。或添幫掛搭。或拷掠良民。或騙詐貨財。或凌辱婦女。（呂坤實政錄卷三民務有司雜禁附）

此其弊莫甚于丁。而丁之害莫甚江以北淮以南。何者。區方百里以爲縣。戶不下萬餘。丁不下三萬。其間農夫十之五。庶人在官與士夫之無田及逐末者十之四。其十之一則坐擁一縣之田。役農夫盡地利。而安然食租衣稅者也。舉一縣之丁課。徵什一於富民。寬然則有餘。其十之九。非在官則士夫也。否則逐末者也。其最下則農夫之無田者也。彼既以身役於官。焉能復辦一丁。士夫既委身朝廷。亦當不附此例。逐末者買遷無定。且歛

於法外。以求倖免。勢必以十九之丁盡徵之。無田之貧民而止。貧民方寄食於富民之田。值豐歲。規其贏羨。以給妻子。日給之外。已無餘粒。設一遭旱潦。盡所有以供富民之租。猶不能足。既無立錫以自存。又鬻妻子爲乞丐。以償丁負。爲吏者上格於國課。下迫於考成。且爲剝肉補創之計。鞭箠囚繫。忍見其轉死流亡。故逋賦愈多。而貧民愈困。（皇朝經世文編卷三〇盛楓江北均田說）

糧賦之外。又有實物之賦。所取無方。惟吏所需。徭役之外。又有工徒之役。挑河供車。惟吏所使。又有坐派。加派。加耗種種名目。蘇常田賦本重。民尤苦之。及新穀上場。又歛銀爲賦。非田所出。農民必賤售其穀以納租。

今日之農。不苦于賦。而苦于賦外之賦。不苦于差。而苦于差外之差。何謂賦外之賦。卽如江南揚州府屬。國家正賦每畝二錢四分五釐。田有高下。約數畝折一畝。每畝納銀不過四五分。其取之于民者。固有定則矣。今也不然。船廠礮廠須用鐵。則賦。築河堤須用夯木。則賦。決口捲掃須用稻草。則賦。下椿須用柳。則賦。紫掃須用白麻。則賦。夫民以其土之所有爲上用。猶易辦耳。若採鐵于不出鐵之鄉。責麻于不產麻之地。早曠草枯。水澇木壞。徒肆苛索。祇費緡錢。或倍價以相鬻。或乾折以倖免。歲凡數供。追呼不息。此苦于賦外之賦也。何謂差外之差。國家賦役全書。定爲經制。是賦中已兼有役。今臣見揚州府江都縣。每歲一里貼淺夫工食銀二十四兩。則田已役其二矣。頃河流潰決。復按畝起夫。則田已役其三矣。挑河夫之外。又有幫工夫。則田已役其四矣。四役之不已。而又有所謂莊差。莊差者。取之耕田之窮農也。農夫代人出力以耕田。其所耕之田。卽里地已起差

之田也。在里地起差者此田。今起莊差者亦此田。即令田係農夫所自有。而田已在里地起差之內。若更加以莊差。不一田而二差也哉。自莊差之名一設。則有供土船之害。有供土籬土基之害。有供車輛之害。賣妻鬻女。尙不足以應其求。敲骨擢筋。惟恐不獲終其役。嗟此疲勞告瘁之民。即我皇上捐賑賑哺之民也。差一及身。進無以邀廩餼。退不能就粥糜。有轉死溝壑已耳。此苦于差外之差也。（皇朝經世文編卷二八許承宣賦差關稅四弊疏康熙十九年）

方今山林川澤。悉入徵輸。夏稅秋糧。各有歲額。舳艫千里。飛輓窮年。其所以充邊儲而供國用者。既有成規矣。頻年以來。倭虜爲患。此外復有坐派加派之名。養馬養兵之費。而當事臣工。權宜議處。至於贓罰商稅寺產事例度牒引錢。所以搜括之者。亦既無不盡矣。（皇明經世文編卷三六七李邦義足國裕民疏）

自唐宋來。天下賦江南居十九。浙東西居江南十九。而蘇、松、常、嘉、湖又居浙東西十九。實當江南州府縣之半。蓋由平吳之日。籍諸豪族田沒入官。而按其家入私簿爲稅額徵。意獨以示懲。後三年。而蘇連稅至三十餘萬。……于是創爲平米法。官民田畝皆畫一加耗。（朱健古今治平略卷一國朝田賦）

今來關中。自鄠以西。至於岐下。則歲甚登。穀甚多。而民且相率賣其妻子。至徵糧之日。則村民畢出。謂之人市。問其長吏。則曰。一縣之鬻於軍營而請印者。歲近千人。其逃亡或自盡者。又不知凡幾。何以故。則有穀而無銀也。所獲非所輸也。所求非所出也。（顧炎武亭林文集卷一錢糧論上）

收糧時胥吏因緣爲姦。開倉坐派。催科收解。無不叢弊。

地糧詭寄何以收歸一人。欺隱何以查復原額。荒閑之地何以勘實。死逃之丁何以除補。（呂坤實政錄卷三民務有司雜禁附）

今也貴賤不均。陞擢未確。豪猾通積書而增升減合。里老瞞官府而賣富差貧。數畝之田。差名種種。一人之稅。赤曆紛紛。官不得其要領。民不知其精詳。甚者暗增千百。十詭二三。此坐派之奸也。里老騙收。花戶重納。花戶追慢。大戶包賠。差催人衆。則錢糧止足供賄賂之資。地戶星居。則里排日疲於奔走之役。比限不分多寡。一體鞭扑。豪猾竟不到官。專責下戶。或死丁荒地逼見在攤包。或詭隱田糧致甲中受累。則催科之混也。民間轉辦糶賣爲多。律法徵收定於熟月。今有司無有不催科矣。雖各項差糧日用刻期。而青黃不接勢必稱貸。又有司終年比較。里老終年催徵。花戶終年辦納。大戶終年坐櫃。則開倉之害也。及納銀到官。垂涎於大戶之多收者。巧名取派。借口於有司之需索者。橫肆增添。有暗加一明加二者。既重取於小民。又輕給於解役。甚者無銀而空文起解。或經歲而不問批收。此收解之弊也。其他編審頭役或傾人之家。耗費里甲或逼人之命。累苦者獨不見知。奸巧者公然得志。（呂坤實政錄卷六風憲約憲綱十要）

其逕納糧料者。多方刁措。必壓其欲。

弘治以後。……各款糧料。……俱令小民運送內府。以故內官軍校視彼爲奇貨。多方刁措。百計需求。有白糧一石加至二三石。乃能上納。各項物料倍出三四百兩。始得批回。解糧之人。費踰常數。不得不稱貸賠納。輕則蕩產。重則喪身。雖有禁例。誰敢與內臣抗辯。（皇明經世文編卷三六七王得春據明詔聲愚衷疏）

(己) 逃戶

農民不勝重斂。棄田而逃。吏則以逃者之賦。攤於留者。以足其額。留者賦愈重。逃者日愈多。

一里百戶。一歲之中。一戶推出一戶稅可也。假令今年逃二十戶。乃以二十戶稅。攤於八十戶中。是四戶而出五戶稅也。明年逃三十戶。又以三十戶稅。攤於七十戶中。是五戶而出七戶稅也。又明年逃五十戶。又以五十戶稅。攤於五十戶中。是一戶而出二戶稅也。逃而去者。遺下之數日增。存而居者。攤與之數日積。存者不堪。又相率以俱逃。一歲加於一歲。積壓日甚。小民何以堪哉。非但民不可以爲生。而國亦不可以爲國矣。爲今之計。奈何。曰。李渤謂盡逃戶之產稅。不足者免之。是固然矣。然民雖去而產則存。宜斟酌具爲常法。每歲十月以後。詔布政司委官一員。於所分守之地。親臨州縣。俾官吏里胥各具本縣本里民數。逃去開除者若干。移來新收者若干。其民雖逃。其產安在。明白詳悉開具。即所收以補所除。究其產以求其稅。若人果散亡。產無蹤跡。具以上聞。覈實除免。如李渤所言。絕攤逃之弊。(丘濬大學衍義補卷二二)

凡逃戶。洪武二十三年。令監生同各府州縣官。拘集各里甲人等。審知逃戶。該縣移文。差親鄰里甲於各處起取。其各里甲下。或有他郡流移者。即時送縣。官給行糧。押赴原籍州縣復業。永樂十九年。令原籍有司覆審逃戶。如戶有稅糧。無人辦納。及無人聽從軍役者。發回。其餘准於所在官司收籍。撥地耕種。納糧當差。其後仍發回原籍。有不回者。勒於北京爲民種田。(大明會典卷一九戶部六戶口一)

臣見自今年以來。差繁賦重。財盡民窮。……丁戶已絕。尙多額外之徵。田土雖荒。猶有包攤之累。里甲浪費。而日不聊生。刑罰過嚴。而肌無完膚。民不能堪。往往流轉他處。以全性命。（皇明經世文編卷二五一王邦直陳愚衷以卹民窮以隆聖治事）

迨至宣德、正統、天順、成化年間。民困財竭。一遇大荒。流移過半。上司不知行文。有司不行招撫。任彼居住。詭寄附籍。南方州縣多增其里圖。北方州縣大減其人戶。軍匠消耗。率由於此。年遠者卒難得回。近逃者尙可招撫。若不申明舊制。着實舉行。誠恐數十年後。逃移稅糧併於見在人戶賠納。日加困苦。無以聊生。誠非治道之所宜也。（皇明經世文編卷六二馬文升撫流移以正版籍疏）

以今日言之。荆襄之地田多而人少。江右之地田少而人多。江右之人大半僑寓於荆湖。蓋江右之地力所出。不足以給其人。必資荆湖之粟以爲養也。江右之人羣聚於荆湖。既不供江右公家之役。而荆湖之官府亦不得以役之焉。是併失之也。臣請立爲通融之法。凡江右之民寓於荆湖。多歷年所。置成產業者。則名以稅戶之目。其爲人耕佃者。則曰承佃戶。專於販易傭作者。則曰營生戶。隨其所在。拘之於官。詢其所由。彼情願不歸其故鄉也。則俾其供詞。具其邑里。定爲板冊。見有某人主戶。見當某處軍匠。明白詳悉。必實毋隱。然後遣官齎冊。親詣所居。供報既同。卽與開豁所在郡邑。收爲見戶。俾與主戶錯居共役。有產者出財。無產者出力。如此通融。兩得其便。（皇明經世文編卷七二丘潛江右民遷荆湖議）

萬曆時。通行一條鞭法。人民稱便。

而徵一法、一條鞭、綱銀諸法、……異名而同實。民咸稱便。徵一法者。都御史歐陽鐸撫南畿時督儲法也。鐸督十郡糧儲。曰。吾不虞他七郡。獨虞蘇、松、常。而最甚者蘇。夫蘇漕餉天下半。卽不裕當如國計何。厥田雖有上下。然獨伯季耳。季畝僅五升。而伯至十五倍之。如蘇何。旣而曰。版籍糧畝業不可擅變。而加耗歲會固巡撫之所職也。昔周文襄據田以行法。吾當因法以補田。令府州縣各總其畝之額。而丈量田以正畝。括其徵米徵銀之凡。而計畝均輸之。乃請於帝。科則不易其舊。而比其最重者與其最輕者。稍以耗損益推移之。重而不能盡損者。爲遞減耗米派輕費折除之。以陰見輕。輕而不能加益者。爲徵本色遞增耗米加乘之。以陰見重。諸推收田者。從圩不從戶。田爲母。人爲子。姦巧無所容。而逃竄漸復。又令民歲以田出絹錢僱役。毋得仍十年前之舊。裁省郵置濫費。定收約例。凡數十百條。與蘇郡守王儀推行之。曰徵一法。於是諸郡糧雖不得減而得均。綱銀舉民間應役歲費。丁四糧六。總徵之在官。法易知不繁。猶網有綱。一舉而盡也。一條鞭法者。通州縣一歲中。夏稅秋糧存留起運額若干。均徭里甲土貢雇募加銀額若干。通爲一條。總徵而均支之也。其徵收不輸甲。通一縣丁糧均派之。而下帖於民。備載一歲中所應納之數於帖。而歲分六限納之官。其起運完輸若給。皆官府自支撥。大都不雜出名色。吏無所措手。人知帖所載。每歲並輸。可省糧長收頭諸費。利固不可勝言矣。（蔡方炳廣治平略卷一七田賦篇）

清康熙五十年。定丁額後。不復加丁賦。雍正時攤丁入畝。通謂地丁。民始免徭役之苦。

丁口之輸賦也。其來舊矣。至我朝雍正間。因各疆吏奏請。以次攤入地畝。於是輸納徵解。通謂之地丁。或曰丁隨地起。……我朝丁徭素薄。自康熙五十年定丁額之後。滋生者皆無賦之丁。凡舊時額丁之開除既難。必本戶適有新添可補。則轉移除補。易至不公。惟均之於田。可以無額外之多取。而催科易集。其派丁多者。必其田多者也。其派丁少者。亦必有田者也。保甲無減匿。里戶不逃亡。貧窮免敲撲。一舉而數善備焉。（王慶雲熙朝紀政卷三紀丁隨地起）

然官吏之不肖者。仍有加糧之事。時釀巨案。清末四川東鄉案。其著者也。

光緒初。四川有東鄉縣抗糧案。知縣孫定揚每錢糧一兩加收制錢三百文。鄉民哀騰。絞糾衆抗糧。定揚以叛案報省。護督文格命署川東鎮總兵李有恆往勦。有恆濫殺無辜多命。騰蛟數次京控。後經總督丁寶楨結案。孫李二人遣戍。張之洞前爲四川學政時。按試綏定。生童皆不作文而訴冤狀。故之洞知其事甚稔。至是乃出彈章謂濫殺由於報叛。報叛由於抗糧。抗糧由於加賦。一時傳誦。之洞由此顯名。以至大用。朝命恩承童華往四川查辦。改處孫李皆斬。予童時曾見鈔本東鄉案一厚冊。今不憶作何語矣。恩童兼查御史指參寶楨官鹽都江堰機器等事。得賄十六萬金。文格寶楨處分皆輕。未幾閻敬銘特參恩童沿途需索有據。亦遭嚴議。閻蓋爲寶楨報復也。（松堪小記）

（2）工業

（甲）工人

「百工」

百工製器。自人常日用以至美術品。多自貨賣。所謂百工居肆是也。或居家或負擔以覓售。非興販而實兼商。其數遠過於行商。

今天下財貨聚於京師。而半產於東南。故百工技藝之人。亦多出於東南。江右爲夥。浙直次之。閩粵又次之。西北多有之。然皆衣食於疆土。而奔走於四方者亦鮮矣。今輦轂之下。四方之人咸鱗集焉。其在官者。國初以工役抵罪。編成班次。有五年、四年一班者。有三年、二年、一年一班者。其造作若干。成器若干。廩餼若干。皆因其多寡大小而差等之。精粗美惡亦然。此其大率也。自後工少人多。漸加疏放。令其自爲工作。至今隸於匠籍。若閭里之間。百工雜作。奔走衣食者尤衆。以元勳、國戚、世胄、貂璫。極靡窮奢。非此無以遂其欲也。（張瀚松窗夢語卷四百工紀）

工藝之家。男女或盡棄耕織不務。而施奇技淫巧。爲服用之物。以漁厚利。縱多費工力。而無益於實用。農夫竭一家之利者。或不足以當其一夫之獲。積一歲之收者。或不足侔其一旦之售。（皇明經世文編卷一二王叔英資治策疏）

竹與漆與銅與窯。賤工也。嘉興臘竹王二之漆竹。蘇州姜華雨之篋簞竹。嘉興洪漆之漆。張銅之銅。徽州吳明官之窯。皆以竹與漆與銅與窯名家起家。而其人且與縉紳先生列坐抗禮焉。（張岱陶菴夢憶卷五諸工）吳中絕技。陸子岡之治玉。鮑天成之治犀。周柱之治嵌鑲。趙良璧之治梳。朱碧山之治金銀。馬勳、荷葉李之治

扇。張寄修之治琴。范崑白之治三弦子。俱可上下百年。保無敵手。但其良工苦心。亦技藝之能事。（張岱陶菴夢憶卷一吳中絕技）

南京濮仲謙……技藝之巧。奪天功焉。其竹器。一帶一刷。竹寸耳。勾勒數刀。價以兩計。然其所以自喜者。又必用竹之盤根錯節。以不事刀斧爲奇。則是經其手略刮磨之。而遂得重價。真不可解也。仲謙名噪甚。得其款。物輒騰貴。（張岱陶菴夢憶卷一濮仲謙雕刻）

雍正元年^{一七二三年}五月戊戌諭……山西平定州等處。山多田少。粒食恆艱。小民向賴陶冶器具。輸運直省易米。以供朝夕。（清世宗實錄卷七）

湖南之邵陽、武岡、慈利、安化、永定等州縣鐵礦。俱係各該居民農隙自創。以供農器。間有產鐵旺盛之芷江縣。挑往鄰邑售賣。（皇朝文獻通考卷三〇征權考）

一婦之手。歲可斷百疋……一畝之桑。獲絲八斤。爲紬二十疋。夫婦並作。桑盡八畝。獲絲六十四斤。爲紬百六十疋。嚴氏故有土一畝。易桑損十五。以食三口。歲餘半資。（皇朝經世文編卷三七唐甄情貧）

查江南蘇、松兩郡。最爲繁庶。而貧乏之民。得以俯仰有資者。不在絲而在布。女子七八歲以上。即能紡絮。十二三歲即能織布。一日之經營。儘足以供一人之用度而有餘。（皇朝經世文編卷三六尹會一敬陳農桑四務疏）

常郡五邑……棉布之利。獨盛於吾邑。^{無錫}……鄉民食於田者。惟冬三月……春月則闔戶紡織。以布易米而

食。家無餘粒也。……及秋稍有雨澤。則機杼聲又徧村落。抱布易米以食矣。故吾邑雖遇凶年。苟他處棉花成熟。則鄉民不致大困。（黃印錫金識小錄卷一力作之利）

江南膏腴之壤。植木棉。女紅惟布爲多。……而織婦最爲勤苦。碾彈紡績。工亦勞矣。而一布之值。不敵匹帛之什一。工多利少。不足以供口食。季女斯飢。良不免矣。（皇朝經世文編卷三七郭起元布帛贏縮說）

松有勞紆之利。……功歸女子。……曉星芒芒。夜燈煌煌。人在睡鄉。非官非商。萬機齊張。啞啞似語。唧唧是訴。聲苦心寬。明日賣布。……絢綬十尺。贏錢一百。積一機之勤。疲一女之力。月可取布三十丈焉。（皇朝經世文編卷二八欽善松問）

「官工」（匠）

隋唐工以番上。明謂之班匠。初以罪人爲之。繼則班選天下匠人。入都輪作。編爲匠籍。子孫亦得應試仕宦。後以人苦匠役。改爲徵銀以代役。

凡輪班人匠。洪武十九年。一三八六年。令籍諸工匠。驗其丁力。定以三年爲班。更番赴京。輪作三月。如期交代。名曰輪班匠。仍量地遠近。以爲班次。置勘合給付之。至期齎至部。聽撥。免其家他役。（大明會典一八九工部）

洪武二十六年。一三九三年。定凡天下各色人匠。編成班次。輪流將齎原編勘合爲照上工。以一季爲滿。完日隨即查原勘合及工程。明白。就便放回。周而復始。如是造作數多。輪班之數不敷。定奪奏聞。起取撮工。本戶差役。定例與免二丁。餘丁一體當差。設若單丁重役。及一年一輪者。開除一名。年老殘疾戶無丁者。相視揭籍。明白。疎

放。其在京各色人匠。例應一月上工一十日。歇工二十日。若工少人多。量加歇役。如是輪班各匠。無工可作。聽令自行趁作。又奏准。照諸司役作繁簡。更定班次。率三年或二年輪。當給與勘合。凡二十三萬二千八十九名。計各色人匠一十二萬九千九百八十三名。（大明會典卷一八九工部）

輪班人匠簡表

四年一班						班期	匠色	名	數	備	註
五年一班							木匠	三萬三千九百二十八名			
							裁縫匠	四千六百五十二名			
							鋸匠	九千六百七十九名			
							瓦匠	七千五百九十名			
							油漆匠	五千一百三十七名			
							竹匠	一萬二千七百八名			
							五墨匠	二千七百五十三名			
							妝鑾匠	五百七十三名			

		三年一班												
總匠	石匠	染匠	挽花匠	絡絲匠	織匠	筆匠	搭材匠	穿甲匠	熟銅匠	土工匠	雙線匠	鐵匠	雕鑲匠	
九千三百六十名	六千一十七名	六百名	二百九十一名	二百四十名	一千四十三名	一百二十名	一千一百一十二名	二千五百七名	一千二百四名	一千三百七十六名	一千八百九十九名	四千五百四十一名	五百二名	

二年一班

船木匠	一萬五百六名
箬蓬匠	四百七十七名
櫓匠	三十九名
蘆蓬匠	二十二名
餞金匠	五十四名
緋匠	一百四十九名
刊字匠	一百五十名
熟皮匠	九百九十二名
扇匠	六十六名
鮑燈匠	七十五名
襴匠	二百九十九名
毯匠	一百五十八名
捲胎匠	一百九名
鼓匠	一百二名

削藤匠	四十八名	木桶匠	九十四名	鞍匠	一十三名	銀匠	九百一十四名	鎔金匠	五十九名	索匠	二百五十五名	穿珠匠	一百四名	表背匠	三百一十二名	黒窯匠	二千三百七十三名	鑄匠	一千六十名	繡匠	一百五十名	蒸籠匠	二十三名	箭匠	四百二十一名	銀硃匠	八十四名
-----	------	-----	------	----	------	----	--------	-----	------	----	--------	-----	------	-----	--------	-----	----------	----	-------	----	-------	-----	------	----	--------	-----	------

一年一班									
刀匠	一十二名	琉璃匠	一千七百一十四名	剉磨匠	一千一百二十五名	弩匠	一百一十二名	黃丹匠	二十二名
藤枕匠	三十四名	刷印匠	五十八名	弓匠	一百六十二名	鏃匠	四十六名	缸窯匠	一百九名
洗白匠	三十名	羅帛花匠	六十九名						

宣德元年。^{一四二六年}詔。凡工匠戶有二丁、三丁者留一丁。四丁、五丁者留二丁。六丁以上者留三丁。餘皆放回。俟後更代。單丁量年久近。次第放回。殘疾老幼及無本等工程者。皆放回。（大明會典卷一八九工部）

凡班匠徵銀。成化二十一年。^{一四八}奏准。輪班工匠。有願出銀價者。每名每月。南匠出銀九錢。免赴京。所司類齋勘合。赴部批工。北匠出銀六錢。到部隨即批放。不願者仍舊當班。^{五年}（大明會典卷一八九工部）

弘治十八年。^{一五〇}奏准。南北二京班匠。自弘治十六年編填勘合爲始。有力者每班徵銀一兩八錢。遇閏徵

銀二兩四錢。止解勘合到部。批工領回給散。無力者每季連人匠勘合解部。投當上工。滿日批放。如無勘合者。

雖納匠價。仍解人赴部。查理勘合下落。其已徵在官匠價。盡行解部。若有存留。那前補後。計贓論罪。年終通將

徵解過數目。造冊奏繳。^{（大明會典卷一八九工部）}

嘉靖四十一年。^{一五六}題准行各司府。自本年春季爲始。將該年班匠。通行徵價類解。不許私自赴部投當。仍

備將各司府人匠總數查出。某州縣額設若干名。以舊規四年一班。每班徵銀一兩八錢。分爲四年。每名每年

徵銀四錢五分。算計某州縣每年該銀若干。撫按官督各州縣官。各年徵完類解。不許拖欠。年終造冊類繳。分

別已未完等第參究。計各省府班匠。共一十四萬二千四百八十六名。每年徵銀六萬四千一百一十七兩八

錢。^{（大明會典卷一八九工部）}

各省府班匠徵銀簡表

地域	班	匠	額	徵	銀	額
浙江	三萬九千五百四十六名			一萬七千八百兩六錢五分		

河南	一萬八千四名	四千五百九十八兩五錢
山東	二萬二千三百六十二名	一萬七十兩五錢五分
山西	一萬六千二百一名	七千二百七十九兩二錢
陝西	一萬六千八百五十五名	四千七百六十兩六錢五分
應天府	二千五百九十五名	一千一百六十七兩七錢五分
蘇州府	八百八十四名	三千九百七十八兩
松江府	四千二百八十六名	一千九百二十八兩七錢
常州府	二千一百二十名	九百五十四兩
鎮江府	一千七百八十九名	八百五兩五分
徽州府	三千六十六名	一千三百七十九兩七錢
寧國府	一千二百二十八名	五百五十二兩六錢
池州府	四百七十八名	二百一十五兩一錢
太平府	一千六百八十一名	七百五十六兩四錢五分
安慶府	二千七十五名	九百三十三兩七錢五分

廣德府	八百五十一名	三百八十六兩一錢
廬州府	二千一百一名	九百四十五兩四錢五分
鳳陽府	一千六百四十一名	七百三十八兩四錢五分
淮安府	一千九百五十九名	八百八十一兩五錢五分
揚州府	二千四百二十名	一千八十九兩
徐州	九百四名	四百六兩八錢
滁州	五十六名	二十五兩二錢
和州	一百五十六名	七十兩二錢
順天府	一千六百一十四名	七百二十六兩三錢
永平府	三百四十名	一百五十三兩
保定府	九百七十一名	四百三十六兩九錢五分
河間府	四百名	一百八十兩
順德府	二百三十四名	一百五兩三錢
廣平府	二百四十三名	一百九兩三錢五分

眞定府	八百二名	三百六十兩九錢
大名府	七百一名	三百一十五兩四錢五分
<p>附記 湖廣、四川、兩廣、雲貴、福建、江西各省班匠。隸南京工部。凡南京工部各色班匠。江西布政司起送三萬九千五百五十五名。湖廣一萬三千二百四十四名。福建六千八百九十六名。</p>		

凡住坐人匠。永樂間。設有軍民住坐匠役。（大明會典卷一八九工部）

洪武二十四年。^{一三九}令工匠役作內府者。量其勞力。日給鈔貫。永樂十九年。^{一四二}令內府尙衣、司禮、司設

等監。織染、鍼工、銀作等局。南京帶來人匠。每月支糧三斗。無工住支。（大明會典卷一八九工部）

宣德九年。^{一四三}令內官監工匠。月支糧五斗。上工之日。光祿寺仍給飯食。……景泰元年。^{一四五}令在京各

監局及各廠上工軍匠。光祿寺不關飯者。月支米一石。關飯者五斗。三年。^{一四五}令兵仗局攢造軍器。軍匠仍

支米五斗。民匠四斗。天順元年。^{一四五}令司設監各色軍匠。月支米五斗。（大明會典卷一八九工部）

成化九年。^{一四七}令高手人匠。行錦衣衛鎮撫司帶管。月支糧一石。歲給冬衣布花。送監上工。仍於光祿寺日

支粳米八合。（大明會典卷一八九工部）

清初。首除匠籍。徵銀改入條編。需用官匠各給工資。

順治二年。^{一六四}題准。除豁直省匠籍。免徵京班匠價。十五年。^{一六五}議准。京班匠價仍照舊額徵解。康熙三

年。^{一六六}定班匠價銀。改入條編內徵收。（大清會典事例卷九五二工部）

監匠役。內務府存留外。其餘工匠仍隸工部。（大清會典事例卷九五二工部）

雍正元年。一七二三年題准實在存留各項食糧匠役定額。營繕司木匠、鋸匠、石匠、瓦匠、土作匠、五墨匠、油匠、釘鉸

匠、雕鑿匠、菱花匠、銅絲網匠、桶匠各二名。搭材匠四十二名。琉璃匠十有五名。棧匠、鑄匠各一名。每名月支米

七斗五升。鐵匠一名。月支米三斗。木倉夫、馬圈夫各二名。馬館夫一名。張家灣木廠夫八名。每名月支米三斗。

每斗折銀一錢三分。今增黃布城庫丁四名。虞衡司軍器火藥局首領二名。每名月支米一石。折銀一兩三錢。安民廠庫丁

四名。濯靈廠庫丁十名。盔甲廠庫丁一名。每名月支米三斗。安定門左翼礮局庫丁六名。德勝門右翼礮局庫

丁六名。戊丁二庫庫丁各二名。軍需庫庫丁八名。每名月支銀五錢。網匠六名。木匠三名。東珠匠二名。裁縫匠

一名。每名月支米七斗五升。養馬人役九名。每名月支銀四錢五分。米九斗。都水司棧匠、絲網匠各三名。刻字

匠、刷印匠、車子匠各二名。刻石匠、枰木匠、鐙匠、染紙界畫匠各一名。采子匠八名。裁縫匠六名。每名月支米七

斗五升。窖役四十名。每名月支米五斗。庫役一名。渡船夫十有六名。每名月支米三斗。橋夫二十名。每名月支

米七斗五升。屯田司作管八名。每名月支米五斗。銀一兩。西廠巡役二名。南廠巡役六名。每名月支米三斗。寶

源局阜隸三名。餘丁二十名。每名月支米三斗。節慎庫庫丁二十名。月支銀五錢。以上工匠夫役銀米。皆咨戶

部按冊給發。（大清會典事例卷九五二工部）

雍正元年。一七二三年定各項匠役每工給銀一錢八分。冬月給銀一錢四分。夫役仍舊。又定各項食糧匠役。遇有

工程。每日支銀七分。一七二三年。定食糧工役。遇有工程。日支銀六分。以上匠役工價。每銀一兩折給制錢千文。（大清會典事例卷

九五二工部

乾隆元年。一七三六年議准各匠工價。舊例長工每日給錢百八十文。短工給錢百四十文。今覈定無論長短工。給錢百五十四文。搭材匠。長工每日給錢百七十文。短工給錢百四十文。今無論長短工。給錢百四十文。夯碓夫。舊例日給錢百三十文。今覈定給錢百文。壯夫。長工日給錢八十文。短工日給錢六十文。今無論長短工。給錢七十五文。食糧匠。照舊日給錢六十文。（大清會典事例卷九五二工部）

（乙）工之組織

「行」

明清紀載行作者少。然宋明相去不遠。吳自牧夢梁錄所列團行名稱。有至今未改者。知數百年間風俗變動甚少。約束同業者謂之行規。由行定價者謂之行市。聚衆要求增加工資者謂之齊行。齊行之名。其來甚早。今尙有之。手藝人之會所則通稱爲行會。

工役之人或名爲作分者。……又有異名行者。如……鑽珠子者名曰散兒行。做靴鞋者名雙線行。（吳自牧夢梁錄卷一三團行）

凡願倩人力及幹當人。如解庫、掌事、貼窓、鋪席、主管、酒肆、食店、博士、鑪頭、行菜、過買、外出、餐兒、酒家人、師公、大伯等人。又有府第宅舍。內諸司都知、太尉、直殿、御藥、御帶、內監、寺廳分、顧覓大夫、書表司廳子、虞候、押番、門子、

直頭轎番、小廝兒、廚子、火頭、直香燈道人、園丁等人。更有六房院府判提點、五房院承直太尉、諸內司殿管判司幕士、六部朝奉、顧倩私身轎番、安童等人。或藥鋪要當舖郎中、前後作、藥生作、下及門面鋪席、要當舖裏主管後作。上門下番當直安童。俱各有行老引領。如有逃閃將帶東西。有元地脚保識人前去跟尋。如府宅官員豪富人家。欲買寵妾、歌童、舞女、廚娘、針線供過、粗細婢妮。亦有官私牙嫂。及引置等人。……或官員士夫等人。欲出路、還鄉、上官、赴任、游學。亦有出陸行老。顧倩脚夫、脚從。承攬在途服役。無有失節。（吳自牧夢梁錄卷一九顧覓人力）

甚矣工人之貧也。時錢賤物價貴。工人倡爲齊行。所爭者微。所聚者衆。（周暉瑣事剩錄卷四工人齊行）當慈禧太后垂簾聽政之時。網羅珠玉。多不勝計。是爲玉器業務全盛時期。而行會創立即始於此。玉器行供有祖師。係一道士。稱爲邱祖。相傳能捏玉如麵。可作任何形狀。故奉之爲祖師。（北平市工商業概況玉器業）關於建築各廠商之團體組織。在從前乾嘉年間。曾有魯班會。（北平市工商業概況建築業）

平市成衣鋪。……凡掛成衣二字招牌者。皆承做中式衣服。……組有成衣行會。以三皇爲祖師。往者每年開會時。……公議行規。（北平市工商業概況成衣業）

北平操條帶業者。……於乾隆年間即已立有行會。每年舊曆三月十五日。同行各家必集會一次。以爲盛舉。（北平市工商業概況條帶業）

當前清時。都中較大之香燭店。均自設有工廠。製造香燭。……此業向有行會。（北平市工商業概況香燭業）

明嘉靖萬曆間蘇州織工及浮梁陶工之變皆傭工所首倡

萬賢者。崑山人。以織繒質工於郡城。辛丑

萬曆二十九年

六月。有奸民具呈於孫稅監曰。願立新法。凡繒之出市者。每

疋納銀三分。方許市。某等願効力。司其事。列於富室。貸重資行賄于稅監。計垂成。稅監已出市。行有日矣。衆織

工及市繒家皆苦之。莫可爲計。賢挺身曰。吾當爲首。爲吳民剿亂。相率數十人。入玄妙觀。定約曰。若輩舉動。皆

視吾手中芭蕉扇所指。衆曰諾。于是先往具呈。入湯某徐某家毆殺之。繼往丁少參元復家及富室歸某家。皆

火其居。爲其出貸重資于市棍也。且禁不得掠一毫財物。又分投往闔胥二門外。凡稅官之在地方者盡毆殺

之。身往見府公曰。願得孫稅監監而甘心焉。府公但以好言慰止之。不敢問。及次日。衆猶不散。曰。必欲得稅監乃

已。於是孫召集衛軍及地方兵勇。揚兵示威以爲備。賢等亦聚衆趨稅監門。幸與兵不相遇。日暮各散。稅監得

乘間護送逸去入杭。賢乃投獄。府公問所欲。曰。夜多蚊。只求蚊帳一頂足矣。獄中人及外人之好事者多義之。

往往攜酒脯勞之無虛日。賢亦自分必死。乃奏下竟得寬旨。至今在獄無恙。亦異數也。（沈瓚近事叢殘）

嘉靖二十九年

六月辛酉。初。江西樂平縣民嘗傭工於浮梁。歲饑艱食。浮梁民負其傭直。盡遣逐之。遂行劫奪。二邑兇

民。遂各結黨千餘。互相讎殺。（明世宗實錄卷二五〇）

萬曆二十九年一六〇一年九月。江西浮梁縣景德鎮民變。冤民萬餘欲殺礦監潘相。燒焚廠房。通判陳奇可力行

曉諭乃散。奇可反以誣參被逮。（定陵註略卷五軍民激變）

「作坊」

或曰作。或曰作分。或曰作坊。至今猶沿此稱。皆有工人。而以機房規模爲較大。其事非外行所能。故主持者往往亦須勞作。

工役之人或名爲作分者。如碾玉作、鑽捲作、篋刀作、腰帶作、金銀打鍛作、裏貼作、鋪翠作、裱糊作、裝鑲作、油作、木作、甄瓦作、泥水作、石作、竹作、漆作、釘鉸作、箍桶作、裁縫作、脩香澆燭作、打紙作、冥器作等分。……花作所聚奇異。飛鸞走鳳。……極其工巧。（吳自牧夢梁錄卷一三園行）

杭東城。機杼之聲。比戶相聞。郎仁寶云。起於褚河南九世孫載善織作綾錦。……其中一二供尙衣之匠。花樣有爲西湖十景全圖者。（厲鶚東城雜記卷下）

織作。在東城。比戶習織。不啻萬家。工匠各有專能。計日受值。匠或無主。黎明林立以候相呼。名曰喚找。（元和縣志卷一六物產）

驍騎營一帶。小街曲巷。……機戶最多。三五成鄰。（甘熙白下瑣言卷四）

蠶桑盛於蘇浙。……惟織工推吾鄉爲最。入貢之品。出自漢府。民間所產。皆在聚寶門內東西偏。業此者不下千數百家。故江綢貢緞之名甲天下。剪絨則在孝陵衛。其盛與綢緞埒。（甘熙白下瑣言卷八）

道光庚子。（甘）靜齋……僱覓織工來省。捐資備辦棉紗。於孝陵衛一帶。設機織布。令絨織失業男婦習之。價廉工省。日用必需。……洵百世之美利也。（甘熙白下瑣言卷八）

縣治東南城內。業杼織者數百家。謂之機房。前清盛時。供全省之用。並銷陝、甘、雲、貴。先後所製。有蜀錦、天孫錦、

記字錦、雲龍錦、芙蓉錦諸目。（民國華陽縣志卷三四物產三）

織綢機房多在治城外。今亦半不存焉。（民國華陽縣志卷三四綢）

舊制一戶所領之機，不得逾百張。以抑兼并。過則有罰。逮曹尚衣寅，奏免額稅，其禁遂弛。乾嘉間，通城機以

三萬計。其後稍稍零落。然猶萬七八千……開機之家，謂之帳房。機戶領織，謂之代料。織成送緞。主人校其良

格，謂之讐貨。其織也，必先之以染經。經以湖絲爲之。經既染，分散絡工。絡工貧女也。日絡三四窠。絲曰片。經曰窠。百窠爲一

棹。得錢易米。可供一日食……經變交齊，則植二竿於前。兩人對牽之。謂之牽經。牽畢，即上機接頭。新舊並

繫。兩端相續，如新置之機。無舊頭可接。則必先撈範子。然後從交竹中縷縷分出。一絲不亂。謂之通交。而織工

乃有所藉手矣。（陳作霖鳳麓小志卷三記機業）

染坊則在柳葉街船板巷左近。蓋秦淮西流水以之漂絲。其色黝而明。尤於玄緞爲宜。猶之鎮江大紅。常州果

綠。蘇州玉色。西湖杭色。皆遷地弗能爲良也。（陳作霖鳳麓小志卷三記機業）

按王宗沐江西大志，廣信府紙槽，前不可考。自洪武年間，創于玉山一縣。至嘉靖以來，始有永豐、鉛山、上饒三

縣。續告官司，亦各起立槽房。（江西通志卷二七土產紙）

評事街亦名皮作坊……攻皮者比戶而居。夏日污穢不可近……轉東一卷，名曰皮場。蓋亦皮作坊之所。

（甘熙白下瑣言卷六）

（丙）工藝品

「瓷」

自明以來。景德鎮燒造瓷器。自飲食之具。以及文房雅玩。精者曰御瓷。由官領之。粗者曰民瓷。產品行銷全國。宋元官哥、定、汝、均諸瓷。皆失傳。彭城瓷但能製土碗。行於鄉間。南瓷若建瓷。若宜興瓷。製器無多。

唐武德二年。六一年里人陶玉獻假玉器。由是置務設鎮。歷代相因。……洪武三十五年。二四〇年始開窯燒造。解京供用。有廠一所。官窑二十座。（江西通志卷二七土產瓷器）

器數則鋼、甕、磚、盤、碟、盃、罐、罈、盞、鍾、爐、盒。而飾以鳥獸草花。或描花。或堆花。或暗花。或錐花。玲瓏諸巧無不具備。自明萬曆時。回青少。民間多用純白之器。如蛋殼鍾杯。及人物仙佛之數。亦極精巧。顏料則鉛粉、焰硝、青礬、黛、赭石、黑鉛、松香、白炭、金箔、古銅。色則油紫、金翠色、金黃、金綠、金青、礬紅、紫色、燒青、描金、五彩。（浮梁縣志卷八食貨陶政）

陶器則有缸、盆、盂、盤、尊、爐、瓶、罐、碗、盞之類。而飾以夔雲鳥獸魚水花草。或描。或錐。或暗花。或玲瓏。諸巧具備。（江西通志卷二七土產瓷器）

「紙」

江西福建紙業最盛。曰榜紙。曰毛邊。曰毛苔。供公私文書及印行圖籍之用。曰宣紙。

供書畫之用。川粵所造稱爲竹紙。貴州爲皮紙。山陝爲桑皮紙。

司禮監行造紙名二十八色。曰白榜紙、中夾紙、勘合紙、結實榜紙、小開花紙、呈文紙、結連三紙、綿連三紙、白連七紙、結連四紙、綿連四紙、毛邊中夾紙、玉版紙、大白鹿紙、藤皮紙、大楮皮紙、大開花紙、大戶油紙、大綿紙、小綿紙、廣信青紙、青連七紙、鉛山奏本紙、竹連七紙、小白鹿紙、小楮皮紙、小戶油紙、方榜紙……乙字庫行造紙名一十一色。曰大白榜紙、大中夾紙、大開化紙、大玉版紙、大龍瀝紙、鉛山本紙、大青榜紙、紅榜紙、黃榜紙、綠榜紙、皂榜紙。（江西通志卷二七土產紙）

元有白簾紙、觀音紙、清江紙。皆出江西……皇明內用紙如前元。但江西西山紙最高。（曹昭格古要論卷二古紙）

從化有流溪紙。紙出流溪一堡……其竹名曰紙竹。與他竹異。男女終歲營營。取給簋簞。絕無外務。其法。先斬竹投地窖中。漬以灰水。久之乃出而椎練。漬久則紙潔而細。速則粗而滲。粗者一名後紙。（李調元南越筆記卷五紙）

石塘人善作表紙。搗竹絲爲之。竹笋三月發生。四月立夏後五日。剝其殼作簾紙。而竹絲置於池中。浸以石灰漿。上竹梘鍋煮爛。經宿水漂淨之。復將稿灰淋溼水。上梘鍋煮爛。復水漂淨之。始用黃豆泔注一大桶。梘一層竹絲。則一層豆泔。過三五日始取爲之。白表紙止用簾紙藥。黃表紙則用姜黃細春末。稱定分兩。每一槽四人抹頭一人。舂碓一人。檢料一人。焙乾一人。每日出紙八把。（江西通志卷二七土產紙）

南昌府紙有粉箋、連七、觀音疏紙等名。（江西通志卷二七土產紙）

瑞州府竹紙。即古之陟釐。有老大中、大羅端、晒紙、火紙等名。出新昌。（江西通志卷二七土產紙）

撫州府清江紙。金谿縣出。牛舌紙。以稻草爲之。崇仁出。（江西通志卷二七土產紙）

〔布疋〕

自元以來。松江產布。行銷北五省。謂之松江大布。或曰標布。故沿途護運者名曰標客。設有標行。與各地所織之布。俱能染成五色。且能印花。其顏料產自國內。雖經洗滌。永不變色。隆昌、瀏陽以麻布名。稱曰夏布。江西、廣東於麻布外。精織葛布。價貴於紗。

宣德間。巡撫侍郎周忱奏。以布折稅。匹準二石。……兩端織紅紗爲識。謂之紅紗官布。……其後三紗布。滋爲象腹、移紋、雲朵、膝欄、胸背等樣。成化間。鄉人有以餉貴近者。流聞禁廷。下府司織造赭黃、大紅、真紫等色。龍鳳、斗牛、麒麟等紋。工作胥隸。並緣爲奸。一匹有費至白金百兩者。……陳志。後有會墩布。闊三尺餘。又有三梭放闊。新改標寸等布。……舊有雲布。以絲作經。而緯以棉紗。而漸至濫惡。改爲抹絨布。雜用蠶絲緯之。其花紋各種。如織錦法。素者更雅淡。又有捺布。促線爲之。猶蘇機之捺紬也。獨紫花布。以紫花爲之。不加染工。大紅布。以花子紅作染。鮮明倍于綾羅。（松江府志卷六疆域志物產）

丁孃子布。郭志。東門外雙廟橋有丁氏者。彈棉花極純熟。花皆飛起。用以織布。尤爲精輒。號丁孃子。一名飛花布。……藥斑布。顧志。出青龍鹽廬。今城郭多有之。其法。以皮紙積積如板。以布幅廣狹爲度。簇花樣于其上。將染。以板覆布。用豆麵等調和如糊。刷之。候乾。入甃缸浸染成色。暴出。藥斑紋爛然。郭志。俗呼澆花布。（松江府志卷六疆域志物產）

織工皆東莞人。與尋常織苧麻者不同。織葛者名爲細工。織成弱如蟬翅。重僅數銖。皆純葛無絲。其以蠶絲緯之者。浣之則葛自葛。絲自絲。兩者不相聯屬。純葛則否。葛產綏福都山中。以蔓生地上而稚者爲貴。若繚繞樹間。則葛多枝葉。不中爲絲。采者日得觔。城中人買而績之。分上中下三等爲布。陽春亦然。其細葛不減增城。亦以紡緝精而葛真云。（李調元南越筆記卷五葛布）

「綢緞」

江浙盛產綾、羅、綢、緞、紗諸品。昔有織造。專供御用外。所製皆堅緻細密。耐于久用。能織各種時新花樣。染成深淺各色。行銷全國。四川川縐。嘉定大綢。順慶綾。巴緞。雲南通海緞。滇緞。汴綢。潞綢。漳紗。祝綢。魯黔野蠶絲所織繭綢。亦著聲稱。

杭紬有一等極輕纖者。用湖水漂淨。宜染色。大紅尤佳。以杭絲多錘練故也。浙江通志……綿紬。今紡綿而成者曰綿紬。嘉興餘杭縣志。（杭州府志卷五三物產布帛之屬）

紵絲。染絲所織。有織金、閃褐、間道等類。工部奏。內府供用紵絲紗羅計九千匹。請下蘇杭等府織造。上曰。民力艱難。可減其半。明仁宗實錄。按此卽今所謂緞。舊志云。明時無緞者。特無其名耳。（杭州府志卷五三物產布帛之屬）

錦。惟蜀錦名天下。今吳中所織。海馬、雲鶴、寶相花、方勝之類。五色炫耀。工巧殊過。尤勝於古。明宣德間。嘗織畫錦堂記。如畫軸。或織詞曲。聯爲帷障。又充裝璜卷冊之用。（蘇州府志卷一八物產帛之屬）

古錦帳。闊一丈有餘。多織畫錦堂記、滕王閣記。字方四寸。又有小幅者。皆（王）佐所目觀。亦有花竹翎毛者。……今泉州府蘇州府又有織者。大小幅皆有。然不及古遠甚。（曹昭格古要論卷八古錦帳）

緞。自昔繒爲帛之大名。而緞之稱尤晚。名義考今言段者。執繒之堅美者爾。其曰段者。猶言端正也。俗妄從米作緞。非是。（華陽縣志卷三四物產）

嘉靖中。陝西織羊絨。廣東等處織葛布。至是隆慶元年俱罷。（大明會典卷二〇一工部）

紬。出吳江。卽繒。紋線織者曰線紬。撚綿成者曰綿紬。比絲攢而成者曰絲紬。（蘇州府志卷一八物產帛之屬）
紵絲。出郡城。有素有花。紋有金縷彩粧。其製不一。皆極精巧。……上者曰清水。次曰兼生。以生絲雜織之。次帽料。又次丈八頭。皆以粉漿塗飾。品最下。織造府所製。上供平花、雲蟒諸緞。尤極精巧。幾奪天工。（蘇州府志卷一八物產帛之屬）

其人工所爲。則機工爲天下最。江寧本不出絲。皆買絲於吳越。而秦淮之水宜染。織工在江寧殆千餘人。所織曰緞。曰綢。曰紗。曰絹。曰羅。曰剪絨。（江寧府志卷一一物產）

江寧人又買毳毛於陝西。而織爲毯。屬之類。西洋所製之緊密。（江寧府志卷一一物產）

緞之類有頭號、二號、三號、八絲冒頭。而以韓素爲至美。其經有萬七千頭者。玄緞爲最上。天青者次之。（陳作霖鳳麓小志卷三記機業）

「五金器具」

五金製器。是處有之。漢口昆明以銅器。佛山以鐵器著名。各地皆有鍼作。以手磨成。繡花針長不及寸。極其精細。

洪武二十六年^{一三九三年}定。凡鑄造銅鍋、銅櫃等器。及打造銅鍋、銅竈、鐵窗、鐵猫等件。行下寶源局。定奪模範。及計算合用銅鐵木炭等項。明白具數呈部。行下丁字庫抽分竹木局放支。督工依式鑄造。永樂間。設……南寶源局。專鑄內外衙門銅鐵器皿。（大明會典卷一九四工部）

鍼作。出郡城。銀作。出木瀆。元朱碧山。蟹盃甚奇。其法不傳。鐵作。自歐冶子鑄劍。吳中鐵工不絕。舊傳靈巖山下數家。能鍊鐵成鋼。製刀者資之。銅作。昔木瀆王家所製。稱精巧。常熟亦有之。錫作亦出木瀆。舊傳朱象鼻所製爲佳。（蘇州府志卷一八物產工作之屬）

銀器。陶南村記銀工精詣者。松江唐俊卿與嘉興朱碧山、平江謝君羽、君和齊名。銅器。婁志。明萬曆中。胡文明作鑲金鼎、鑪瓶盒等物。極精雅。人效之多不及。（松江府志卷六疆域志物產）

鏤。陳志。……嘉靖初。海上有黃嬾軒。依仿古式。萬曆間。華亭胡友思。別以鏤金爲之。一時盛貴。（松江府志卷六疆域志物產）

銅作。……今郡中西城業銅作者。不下數千家。精粗巨細。日用之物。無不具。（蘇州府志卷一八物產）
濮刀。上海志。國初濮元良善製鋼。世居南城。人名其製廚刀曰濮刀。（松江府續志卷五疆域志物產）

「造船」

明初鄭和出使西洋。所造海船長四十四丈。載數百人。明清兩代戰船漕船。俱有定制。閩粵近海。能造快艇。各省船式及名稱至多。汪輝祖嘗舉所見。撰爲舟見錄一卷。惜不傳。

洪武二十六年^{一三九三年}定。……如或新造海運船隻。復要量度產木水便地方。差人打造。其風快小船。就京打造者。亦須依例計造木料等項。就於各場庫支撥。（大明會典卷二〇〇工部）

一千料海船一隻。合用杉木三百二根。雜木一百四十九根。株木二十根。榆木舵桿二根。栗木二根。櫓坯三十八枝。丁線三萬五千七百四十二箇。雜作一百六十一條箇。桐油三千一百一十二斤八兩。石灰九千三十七斤八兩。艚麻一千二百五十三斤三兩二錢。船上什物絡麻一千二百九十四斤。黃藤八百八十五斤。白藤二十斤。梭毛二千二百八十三斤一十二兩。四百料鑽風海船一隻。合用杉木二百二十八根。梳心木二根。雜木六十

七根。鐵力木舵桿二根。櫓坯二十枝。松木五根。丁線一萬八千五百八十箇。雜作九十四條簡。桐魚油一千一斤。一十五兩。石灰三千五斤。一十三兩。穀麻七百二十九斤八兩八錢。船上什物絡麻五百七十四斤一十四兩四錢。黃藤三百八十三斤八兩。梭毛七百三十斤。白藤一十斤。（大明會典卷二〇〇工部）

萬曆元年^{一五七三年}議准……損壞缺船六百餘隻。行督糧道。照依湖廣、江西二省船式。就於瓜、儀設廠打造。約裝載正耗米可五百石。務要底平倉闊。入水不深。（大明會典卷二〇〇工部）

糧船。順治初年定。成造糧船九驗之法。一曰驗木。木取良材。毋雜惡質。毋間舊料。長短有規。大小有準。二曰驗板。……廁板厚五寸。塘浪底板厚二寸。挖泥腳棧板厚一寸七分。……三曰驗底。船之大小始基於底。船底長不過五丈二尺。中間闊不過九尺五寸。……四曰驗梁。梁闊則船腹闊大。梁高則船腹容深。……淺船龍口梁。使風梁均闊不過一丈四尺。斷水梁闊不過九尺。高不過五尺。……五曰驗棧。淺船棧七丈一尺。深三尺六寸。……六曰驗釘。用釘之法。以一尺四寸用一釘爲度。未上兩棧。釘眼在外。上棧之後。釘眼在內。……七曰驗縫。匠人擲減大料。每多遷就。板邊不淨。是以縫口不合。雖竭力窒艙。隙終不滿。漏終不止。全在合板之時。早爲查驗。八曰驗艙。艙法以斧入鑿。以鑿入麻。然後固以油灰。……九曰驗頭梢。封頭封梢。……鐵葉扒鋸。爲頭梢之攀護。……鋪頭鋪梢裏料。爲頭梢之骨幹。……用釘必處處周到。窒艙必處處完全。頭梢堅實。船自經久。（大清會典事例卷九三五工部）

戰船。雍正六年^{一七二八年}議准。浙江戰船。船底膠木用松木。每膠長一丈。面梁闊三尺三寸。船身及正桅均長一

丈二尺。頭號艍船闊二丈二尺五寸。船身長八丈九尺。艙深七尺九寸。板淨厚三寸一分。二號趕艍船闊一丈九尺五寸。船身減長六丈六尺。艙深六尺一寸。板淨厚二寸五分。四號快船闊一丈四尺。船身減長四丈八尺。艙深五尺。板淨厚二寸。每板長一尺。均用釘三。又議准。奉天戰船身長七丈四尺。闊一丈八尺七寸。二十一艍。（大清會典事例卷九三六工部）

（3）商制

（甲）商之類別

「行商」

商人興販逐利。大者設行棧以事囤積。小者列肆貨謂之行商。明初猶襲重本抑末之說。商人不得衣絲。定例衿不充商。士大夫之家。每課其僮僕興生負販。故士流罕與商賈通婚。商賈尙不得與農爲伍。然中葉以後。商利大興。凡日常需用。若米、鹽、緞匹、標布、紙張、藥材之類。無不由大賈居奇操縱。明季黃宗義諸人始發爲貴商之論。清代官僚不諱營商。揚州鹽商、廣州洋商多兼科名仕宦。京師旗籍貴人亦恃市肆所入爲揮霍之資。主肆者謂之領東。清季談維新者競設礦廠。稱爲實業。利孔日興而商愈貴矣。

洪十四年。^{一三八}令農民之家穿紬紗絹布。商賈之家止穿絹布。如農民之家。但有一人爲商賈者。亦不得穿紬紗。（郭正域皇明典禮志卷一八士庶冠服）

楚宗錯處市廛者。甚多經紀貿易。與市民無異。通衢諸紬帛店俱係宗室。間有三吳人攜負至彼開舖者。亦必借王府名色。（包汝楫南中紀聞）

雍正二年。^{一七二}二月甲子。諭各省督撫。朕惟四民以士爲首。農次之。工商其下也。漢有孝弟力田之科。而市井子孫不得仕宦。重農抑末之意。庶爲近古。（清世宗實錄卷一六）

杭民半多商賈。耳目侈聲色之好。口腹恣芻豢之味。峻宇雕牆。履絲曳縞。冠婚喪祭。宴飲酬酢。無不踵事增華。雖素封之家。不出數年。立見蕭索。（杭州府志卷五二風俗）

自劉氏毛氏創造利端。爲鼓鑄國房。王氏債典。而大村名鎮必開張百貨之肆。以權管其利。而村鎮之負擔者俱困。由是累金百萬。至今吳中縉紳士夫。多以貨殖爲急。若京師官店。六郭開行債典。與販鹽酤。其術倍刻於齊民。（蘇州府志卷二風俗）

余族人有名焜者。住居無錫城北門外。以數百金開棉花莊。換布以爲生理。（錢泳履園叢話卷二三）

「牙商」

牙商有牙帖者。謂之官牙。或稱官店。否則曰私牙。皆爲行貨經紀。居間定價。收取用錢。并代徵牙稅。明初嚴禁官私牙。恐其操縱贏奇也。後漸弛禁。清沿明制。牙商有額。

不得擅增。生監之家不得充任。每行若干家。每家頒有牙帖一紙。大約糧食、布匹、騾馬、柴炭、蔬菜之類。後始及於魚蝦鮮果。清季急于籌款。始得由捐輸而增設。且許紳衿充任。凡牙商、鹽商、洋商。皆爲保障國稅不虧而設者。故皆以裕國通商爲名也。

洪武二年。一三六
九年

今天下府州縣鎮店去處。不許有官牙私牙。一切客商應有貨物。照例投稅之後。聽從發賣。

敢有稱係官牙私牙。許鄰里坊廂攀攬赴京。以憑遷徙化外。若係官牙。其該吏全家遷徙。敢有爲官牙私牙。兩鄰不首罪同。（大明會典卷三五）

嘉靖二年。

一五二
三年

定市易諸法。凡城市鄉村諸色牙行及船埠頭。准選有抵業人戶充應。官給印信文簿。附寫

客商、船戶、住貫、姓名、路引字號。物貨數目。每月赴官查照。私充者杖。諸物行人。評估物價。或貴或賤。令價不平者。計所增減之價論罪。買賣諸物。兩不而同。而把持行市。專取其利。及販鬻之徒。通同牙行共爲姦詐者。杖。若見人有所買賣。在旁高下比價。以相惑亂而取利者。笞。凡私造斛斗秤尺。及作弊增減者。官降不如法者。提調官失勘者。其在市行使。不經官司較勘印烙者。……凡造器用之物不堅固真實。及絹布等紕薄短狹而貨賣者。各定罪有差。（續文獻通考卷二五市糴考）

今天下大馬頭。若荊州、樟樹、蕪湖、上新河、楓橋、南濠、湖州市、瓜州、正陽、臨清等處。最爲商貨輳集之所。其牙行經紀主人。率賺客錢。架高擁美。乘肥衣輕。揮金如糞土。以炫耀人目。使之投之。孤商拚性命。出數千里。遠來發賣。主人但以酒食餌之。甚至兩家爭扯。強要安落。貨一入手。無不侵用。以之結交官府。令商無所控訴。致貧困。

不能歸鄉里。商中有奸黠者又爲之引誘後至之人。使那前遭後。已得脫去。俗謂之做移夫。如此不數年主人亦以奢敗。（葉權賢博編）

康熙四十三年。^{一七〇四年}革除私設牙行。戶部議。御史張蓮疏言。貿易貨物。設立牙行。倒給官帖。使平準物價。乃地方棍徒。於瓜果蔬菜等物。亦私立牙行名色。勒掙商民。請令部查稅課定例。一切私設牙行。盡行革除。應如所請。從之。（皇朝文獻通考卷三三市糴考）

戶部頒發江蘇省牙帖。戶部爲頒發牙帖事。江南司案呈。准江蘇巡撫咨。勸商捐輸牙帖。請由部頒發。本部援照湖北、江西章程。據咨奏明頒發該省加用印信。勸商捐輸承領。並准生監職銜人等一體捐充以廣招徠一摺。同治二年六月二十七日奉旨。知道了。欽此。欽遵到部。爲此合行頒發給牙帖。並列條款。以免州縣濫給牙帖之事。而地方光棍。亦無持帖任意勒索之弊。倘州縣仍有私行濫給牙帖。着該督撫大臣即行指名參辦。各宜恪遵。毋得違犯。致干查究。須至帖者。（根岸信清國商業綜覽）

「鹽商」

揚州鹽商。至萬曆以後。日見興盛。皆徽州人也。清初。業此有名者。曾爲御史之季天生。窮奢極侈。藏宋板書至精。安岐爲宰相明珠之僕。精鑒別。喜交文士。收藏書畫。自後程氏、馬氏、黃氏、江氏。無不以富聞。且皆好事。接納名士。爲之刻書。全唐詩文亦由

鹽商出資所刻。服食、器用、園亭、燕樂。同于王者。傳之京師及四方。成爲風俗。奢風流行。以致世亂。揚州鹽商與有責焉。

嘉靖五年後

權鹽之利。較初制不啻倍蓰。商力僉於兼營。於是遂分爲三。曰邊商。曰內商。曰水商。邊商多沿邊土著。專輸米豆草束中鹽。所在出給倉照。填勘合。以齎投運司支引。聽其受值於內商而賣之。內商多徽、歙、山、陝之寓籍揚州者。專買邊引。輸銀運司。入場配鹽。以達儀所。驗掣細售水商。其以內商而自作水商者。亦或有之。水商則江湖行賈。以內商不能自致。買其引鹽代行。官爲總鹽數。給水程於各行鹽地販鬻焉。旣而邊商以賣引得利微。復自支鹽出場。名曰河鹽。（揚州府志卷一八鹽法）

揚州鹽務競尙奢麗。一昏嫁、喪葬、飲食、衣服、輿馬。動輒費數十萬。有某姓者。每食庖人備席十數類。臨食時。夫婦並坐堂上。侍者抬席置于前。自茶、麵、葷、素等色。凡不食者。搖其頤。侍者審色。則更易其他類。或好馬。蓄馬數百。每馬日費數十金。朝自內出城。暮自城外入。五花燦著。觀者目炫。或好蘭。自門以至於內室。置蘭殆遍……其先以安綠村爲最盛。其後起之家更有足異者。有欲以萬金一時費去者。門下客以金盡買金箔。載至金山塔上。向風颺之。頃刻而散。沿沿草樹之間不可收復。又有三千金盡買蘇州不倒翁。流于水中。波爲之塞。有喜美者。自司閤以至灶婢。皆選十數齡清秀之輩。或反之而極。盡用奇醜者。自鏡之以爲不稱。毀其面以醬敷之。曝於日中。（揚州畫舫錄卷六）

揚州詩文之會。以馬氏小玲瓏山館、程氏篠園及鄭氏休園爲最盛……每會。酒肴俱極珍美。一日。共詩成矣。

請聽曲。邀至一廳。甚舊。有綠琉璃四。又選老樂工四人至。均沒齒禿髮。約八九十歲矣。各奏一曲而退。倏忽間。命啓屏門。門啓則後二進皆樓。紅燈千盞。男女樂各一部。俱十五六歲妙年也。（揚州畫舫錄卷八）

朱彝尊字錫鬯。號竹垞。浙江秀水人。舉博學鴻詞。授檢討。歸過揚州。安麓村贈以萬金。著經義考。馬秋玉爲之刊于揚州。（揚州畫舫錄卷一〇）

全祖望字謝山。浙江鄞縣人。工詩文。舉博學鴻詞。官庶常。在揚州與主政馬曰瑤友善。寓小玲瓏山館。得惡疾。主政出千金。爲之勵醫師。（揚州畫舫錄卷四）

黃氏本徽州歙縣潭渡人。寓居揚州。兄弟四人。以鹽筴起家。俗有四元寶之稱。……履昊字昆華。行四。謂之四元寶。由刑部官至武漢黃德道。（揚州畫舫錄卷一二）

江方伯名春。字穎長。號鶴亭。歙縣人。初爲儀徵諸生。工制藝。精于詩。與齊次風、馬秋玉齊名。……以獲逸犯張鳳。欽賞布政使秩銜。復以兩淮提引案。就逮京師。獲免。曾奉旨借帑三十萬。與千叟宴。其際遇如此。（揚州畫舫錄卷一二）

康、乾南巡。供張營建。所費不貲。以及平日貢獻報效。一皆責之於商。而商則挪移國課。以博歡心。乾隆中葉。已漸彫敝。道光屢次清查積欠稅課。抄沒各大商資財。以備抵補。而揚州繁華掃地盡矣。鹽商衰而洋商興。其富其奢更甚。貧窮之人。謀生益困。阮元肇經室再續集。癸卯八月十三日。遷居新城徐林門新第詩。舅家尊五福。自註云。江鶴亭方伯未葺康山。

前老私宅。乾隆間。被賜五次福字。勒於堂中。名五福堂。……康山自陶澍清欠帑後。公私皆沒入。舊時翠華臨幸之地。今亭館朽壞。荆棘滿地。游人限足不到。……陶澍追欠帑時。各大商皆有預墊錢糧。江墊足抵欠數。不料陶不准抵。抄江方伯孫爲首。將及其餘。各商通城譁諫不服。令不能行。是以中止。然江已奏抄。又自迴護。江孤弱不能辯。遂成此局。官估定價。王姓領得。乃遠宦粵西。十餘年不交價。督撫查例。延不交價者另召變賣。乃癸卯二月十二日召變文到出示。三月初三日。我家被火。遂應召認買。此似有數存乎其中。按揚州鹽商。自乾隆末。由盛極而衰。至道光中。改引爲票前。已一敗塗地。江春爲阮元祖母從弟。元于其籍沒。其詞若有憾焉。瑣姻婭。瞻徇一至於此。何也。（松堪小記）

「洋商」

洋商始于明季。其初皆粵人也。蓋外商來華貿易。上納抽分。購買華貨。皆由洋商爲之經理擔保。故又稱保商。爲外商與官府接洽之居間者。洋商得抽行費。亦得出資與外商夥營對外貿易。康熙末。始設公行。外商來華者凡十三館。或稱十三行。保商一人專任一館。故保商與外商資本猝難劃分。怡和洋行。洋股只占四成。見翁文恭公日記
丙申六月十四日亦時有欠債之事。保商中以伍氏爲最富。伍崇曜嘗延譚瑩爲刻嶺南叢書。粵海堂叢書。粵十三家詩。好事同於玲瓏山館。五埠通商以後。出入口貨。多由粵人經營之。

廣東軍餉資番船。開海市。華夷交易。夷利貨物無他志。固不爲害。乃今數千夷團聚一澳。雄然巨鎮。役使華人妻奴子女。守澳武職及抽分官。但以美言獎誘之。使不爲異。非能以力鈐束之也。蓋海市當就船上交易。貨完即行。明年又至。可也。舍船而屋居岸上。夷性變詐。叛賊亡人各相扇惑。知中國短長。一水竟達城下。其勢何可久哉。此肉食者謀之。是年嘉靖四十四年。公元一五六五年。春。東莞兵變。樓船鼓行直抵省城下。城門晝閉。賊作樂飲酒。天妃宮中。湯總兵克寬與戰。連敗。乃使誘濠鏡澳夷人。約以免其抽分。令助攻之。然非出巡撫意。已夷平賊。湯勦爲己功。海道抽分如故。夷遂不服。擁貨不肯輸稅。省城官謀困之。遂阻道。不許運米麵下澳。夷饑甚。乃聽抽分。因謂中國人無信。不知實湯總兵爲之也。中國亦謂夷難馭。不知湯固許之免也。天下事變。每生于兩情不通。

（葉權賢博編）

日余在番人家見六七歲小兒啼哭。余問通事。番人所生耶。曰非是。今年人從東莞拐來賣者。思父母哭耳。番人多者養五六人。女子多者十餘人。俱此類也。男子衣服如其狀。女子總髮垂後。裹以白布。上衣西洋布單衫。下以布橫圍。無內衣。赤脚。時十二月甚寒。亦止衣此。島中男女爲夷僕妾何下千數。悉中國良家子。可恨可歎。

（葉權賢博編）

從西邊起。第一家是丹麥行。沿着整個的丹麥商館。是一列中國房子。號稱新中國街。再東爲西班牙館。再東爲法國館。沿着整個法國館的。是行商中官的商行。再東爲舊中國街。再東爲美國館。寶順行。帝國行。再東爲瑞典館。舊英館。諸洲館。再東爲一窄胡同。號稱豬巷。可謂名符其實。再東新英館。再東爲荷蘭館。小溪館。因近

小溪而得名。此溪原爲廣州城西邊的護城河。以上一共有十三所商館。在這些商館的北邊是一條長而窄的街道。從東到西。號稱十三行街。（廣州番鬼錄）

廣屬香山。爲海舶出入嚆喉。每一舶至。常持萬金。併海外珍異諸物。多有至數萬者。先報本縣。申達藩司。令舶提舉同縣官盤驗。……其報官納稅者。不過十之二三而已。繼而三十六行領銀。提舉悉十而取一。蓋安坐而得無簿書刑杖之勞。（周玄暉涇林續記）

國朝設關之初。番舶入市者僅二十餘桅。至則勞以牛酒。令牙行主之。沿明之習。命曰十三行。舶長曰大班。次曰二班。得居停十三行。餘悉守舶。仍明代懷遠驛旁建屋居番人制也。乾隆初年。洋行有二十家。而會城有海南行。至二十五年。^{一七六〇年}洋商立公行。專辦夷船貨稅。謂之外洋行。別設本港行。專管暹羅貢使及貿易納餉之事。又改海南行爲福潮行。輸報本省潮州及福建民人諸貨稅。是爲外洋行與本港、福潮分辦之始。其後。本港既分隸無常。總商章程亦屢易。……凡粵東洋商。承保稅餉。責成管關監督。於各行商中擇其身家殷實、居心誠篤者。選派一二人。令其總辦洋行事務。並將所選總商名姓。報部備查。凡外洋夷船到粵海關。進口貨物應納稅銀。督令受貨洋行商人於夷船回帆時輸納。至外洋夷船出口貨物應納稅銀。洋行保商爲夷商代置貨物時。隨時扣清。先行完納。（梁廷枏粵海關志卷二五）

中國商人的壟斷勢力非常大。洋商根本就沒有條件與之競爭。因爲中國商人背後有總督。總督背後有皇帝的雄厚的政治勢力來支持。所以在廣州的貿易史中。從一七〇二年^{康熙四十年}到一八四三年^{道光二十三年}一向

是中國商人操其壟斷之權。開始時。有一個中間人是皇帝派的。其名稱叫作皇商。一切買賣。都經過這個人。爲什麼這樣作。因爲一個人操縱一切物價。可以保持獲得高度的利潤。不僅足以肥己。更可以分潤與其有關的一般官僚。這是對於作官人很有利的。……由經驗來說。皇商也有他的短處。所以慢慢的就由一個人一直發展到十四個人。這就叫作公行。公行於一七二〇年康熙五十九年正式組織起來。東印度公司反對未成。依然與之貿易。公行敲剝益緊。而東印度公司抗議日甚。但終無效。（吉蘭寧及艾斯庫林上海史）

公行商人……對洋商的利害關係甚大。因爲中外貿易的一切事項。都要經過他們。……每一公行商人。當其入行時。須先納出一筆款項。有多有少。多的達二十萬兩。等於五萬五千金鎊。……仍有很奢侈者。一個紀錄裏說。某公行商人。其家裏每年用度。竟達二十萬塊。等於當時的英鎊五萬左右。這時候。平常中國人。養一個家。每月有四塊到五塊錢就够了。（吉蘭寧及艾斯庫林上海史）

行用者。每價銀一兩。奏抽三分。以給洋行商人之辛工也。繼而軍費出其中。貢項出其中。各商攤還洋貨亦出其中。遂分內用外用名目。此外尚有官吏之需求。與閒遊之款接。亦皆出於入口出口之長落貨價。以故洋利漸薄。是年。嘉慶十五年大班喇佛等訴於廣東巡撫韓對。略曰。……今行用日夥。致壞遠人貿遷。如棉花一項。每石價銀八兩。行用二錢四分。連稅銀約四錢耳。茲棉花進口三倍於前。行用亦多至三倍。每石約銀二兩。即二十倍矣。他貨稱是。各洋行費用。皆由祖家貿易攤還。其何以堪。（王之春國朝柔遠記卷七）

公行商人……有一個最著名的領袖。叫作伍敦元。……繼之者爲浩官。洋人最重視的人。……當時一八四三年

估計伍敦元的財產。值兩千六百萬塊。(吉蘭寧及艾斯庫林上海史)

在很多的規定裏面。都有不准中國商人欠洋商錢的條款。……一七七九年。

乾隆四十四年

查出經濟稍差一點的

公行。欠洋商錢不在四百萬塊以下。利息十二分到十五分。……這個債務。總是繼續下去。(吉蘭寧及艾斯

庫林上海史)

嘉慶五年。

一八〇〇年

監督佶山奏言。……查粵海關征輸餉課。招接民夷商貨。現有外洋行、本港行、福潮行三項

名目。

一八〇〇年

乾隆三十五年。

一七七〇年

因各洋商。……漸至推諉。……經前督臣李侍堯會同監督臣德魁示禁。裁

撤公行名目。衆商皆分行各辦。

……乾隆六十年。

一七九五年

因拖欠夷帳。……將本港行三家概行革除。……其

本港事務仍著外洋行兼辦。

……旋於嘉慶元年。

一七九六年

五月。外洋行商。……呈請將本港行事務改歸福潮

行商人經理。……十二月。福潮衆商公舉福潮昌隆行陳衍之弟陳長緒。承開本港行一家。……嘉慶四年七

九

年九月間。

……追還商欠。咨明督臣。將該商陳長緒立行斥革。臣因與督臣再三籌議。……仰懇聖恩俯准。

將本港一行裁革。仍歸外洋行兼理。永著爲例。……奉硃批。……汝斟酌既妥。即照汝所辦可也。(梁廷枏粵

海關志卷二五)

道光九年。

一八二九年

監督延隆奏言。竊照粵省外洋行。從前共有十三家。在西關外開張。料理各國夷商貿易。向

稱十三行街。……近年只存怡和等七家。

……自應另招新商。……自嘉慶十八年。

一八一三年

前監督德慶奏請

設立總商。經理行務。並嗣後選充新商。責令總散各商。聯名保結。欽奉俞允准行在案。……從前開行。止憑一

二商保結。即准承充。今則必需總散各商出具聯名保結。方准承充。……倘有一行不保。即不能承充。……數年以來。夷船日多。稅課日旺。而行戶反日少。……料理難於周到。……於是走私漏稅。勾串分肥。其弊百出。……應請嗣後如有身家殷實。具呈情願充商。經臣察訪得實。准其暫行試辦一二年。果其貿易公平。夷商信服。交納稅項不致虧短。即請仍照舊例。一二商取保著充。……奉上諭。……著照所請。（梁廷枏粵海關志卷二五）

道光十七年。^{一八三七年}總督鄧廷楨、監督文祥會同奏言。……從前洋行共有十三家。……迨至道光九年。^{二九}年。……僅存怡和等七行。不敷經理。……至今已復十三行舊觀。照料無虞不足。……竊以洋商既已招補無缺。……即當明立限制。應請嗣後十三行洋商。遇有歇業或緣事黜退者。方准隨時招補。此外不得無故添設一商。……其承商之時。仍請復歸聯保舊例。責令通關總散各商。公同慎選殷實公正之人。聯名保結。專案咨部著充。……奉上諭。……茲據該督等查明。現在招補缺商已復舊額。足敷辦公。自應仍復舊例。以示限制。（梁廷枏粵海關志卷二五）

浙人胡光墉設阜康銀號。徧於內地。操縱上海出口絲茶。抬價拒售。值甲申中法之戰。金融週轉不靈。以致倒閉。自後外商任意航行內河。內地徧設洋行。自行收貨。華商更難爭衡矣。

陳代卿慎節齋文存胡光墉傳云。浙江巡撫王壯愷公有齡。幼隨父觀察浙江。父卒於官。眷屬淹滯不能歸。傲

居杭州。一日。有錢肆夥友胡光墉。見王子而異其相。謂之曰。君非庸人。胡落拓至此。王以先人官貧對。胡問有官乎。曰。曾捐鹽課大使。無力入都。問需幾何。曰。五百金。胡約明日至某肆茗談。翌日王至。胡已先在。謂王曰。吾嘗讀相人書。君骨法當大貴。吾爲東君收某五百金在此。請以畀子。速入都圖之。王不可。曰。此非君金。而爲我用。主者其能置君耶。吾不能以此相累。胡曰。子毋然。吾自有說。吾無家。祇一命。卽索去。無益於彼。而坐失五百金無著。彼不爲。請放心持去。得意速還。毋相忘也。王持金北上。至天津。聞有星使何侍郎桂清。赴南省查辦事件。乃當年同硯席者也。先是。王隨父任。初就傳。何父爲司閹署中。有子幼慧。觀察喜之。命入塾與子伴讀。既長。能文章。舉本省賢書。入都赴禮部試。遂不復見。不意邂逅於此。卽投刺謁之。何見王驚喜。握手道故。歡逾平生。問何往。王告之故。何公曰。此不足爲。浙撫某公。吾故人也。今與一函。子持往謁。必重用。勝此萬萬矣。王持書謁浙撫。撫軍細詢家世。卽以糧臺總辦委之。王得檄。乃出語胡。取前假五百。加息償之。命胡辭舊主。自設錢肆。號曰阜康。王在糧臺積功保知府。旋補杭州府陞道員。陳臬開藩。不數載。簡放浙江巡撫。時胡亦保牧令。卽令接管糧臺。胡益得大發舒。錢肆與糧臺互相挹注。胡又善賈。列肆數十。無利不趨。兼與外洋互市。居奇致贏。動以千百萬計。又知人善任。所用號友皆少年明幹。精於會計者。每得一人。必詢其家食指若干。需用幾何。先以一歲度支畀之。俾無內顧憂。以是人莫不爲盡力。而阜康字號幾徧各行省焉。咸豐五年。杭州不守。王公殉難。繼者爲左中丞宗棠。胡以前撫信任。爲忌者所譖。左公聞之而未察。姑試以事。命籌米十萬石。限十日。毋違軍令。胡曰。大兵待餉十日。奈枵腹何。左公曰。能更早乎。胡曰。此事籌之已久。若待公言。已無及矣。現雖無款。某熟諸

米商。公如急需。十萬石三日可至。左公大喜。知其能。命總辦糧臺如故。而益加委任。時浙閩次第肅清。而甘逆回起。肆擾關內外。朝命左公督師往勦。左公欲貸洋款。洋人不可。計無所出。商之胡。胡曰。公第與借。某作保。合當允行。果借得五百萬金。洋人不聽大帥言。而信胡一諾。左公愈信愛胡。倚之如左右手。屢奏稱其顧全大局。積保至道員。加二品頂戴。賞穿黃馬褂。胡又有慷慨名。每遇兵荒祲歲。動捐數十萬金。無所吝。富而好義。人尤稱之。以是京內外諸鉅公囊中物。無不欲以阜康爲外庫。寄存無算。不資之富。雖西南百餘年票號。無敢與抗衡者。可謂盛矣。滬上大賈與外洋貿易。蠶絲爲最。胡每歲將出絲各路。於未繅時全定。洋人非與胡買。不得一絲。恨甚。乃相約一年不買絲。胡積絲如山。無售處。折耗至六百餘萬金。又各省號友多少年。喜聲色。久而用侈。不免侵漁。漸成尾大。胡知大局將壞。不可收拾。乃潛遣親信友人。分詣各肆。謹記號帳。一日與妻密計。設具內讌。夫婦上座。姬妾二十四人分左右坐。酒池肉林。間以絲竹。歡讌竟日。妻小倦思息。胡命繼燭。與諸姬洗盥更酌。夜方半。胡語諸姬曰。吾事寢不佳。諸姬隨我久。行將別矣。汝等盛年。尚可自覓生路。各回房檢點金珠細軟。儘兩箱滿裝攜出。此外概不准帶。自鎖房門。勿復再入。各予銀二千。或水或陸。舟車悉備。今夕卽行。一任所之。吾不復問。有數姬涕泣請留。胡亦不禁。餘姬一時星散。胡卽赴金陵。見左公。備陳顛末。且曰。卽今早計。除完公項外。私債尙可按折扣還。再遲。則公私兩負矣。左公許之。卽日電發各省號。同時關閉。俟各密友資各號帳回。分別公私。按折歸款。事畢返杭。收合餘燼。尙有二十四萬金。贖回故宅三所。分居諸昆季。又十餘年。夫婦皆以壽終。君字雪崖。浙江錢塘人。其在糧台積功事跡。見左文襄奏議之誠按。胡光墉大猾也。方其盛時。以財貨奔

走中外。及其敗也。虧蝕人資財無算。文士咸鄙其人。不肯執筆爲之記述。然馬尾船政局創於左宗棠。實由光緒倡議。凡計劃購器械。聘洋匠。雇華工。皆力任之。事以獲集。識鑒尙高於當時士大夫。非盡便私圖也。此傳筆致拙劣。事復有舛。王有齡之殉。在咸豐十一年。非五年。阜康閉肆在光緒九年十一月初六日。以壟斷絲茶抬價拒售。一年負子金鉅萬。中法戰起。金融停滯。遂至倒閉。時督兩江者曾國荃也。宗棠先爲軍機大臣。後以欽差大臣督辦福建軍務。不得云赴金陵見左公。宗棠同治元年正月撫浙。委光緒同辦浙江糧臺。時已保江西候補道。後宗棠爲請獎。僅同治二年。以奉母命屢次捐資至五萬兩以上。獎其母以御賜扁額。光緒四年。以光緒捐資達二十萬。請賞穿黃馬褂。皆得允行。虛榮而已。光緒亦不欲居官。與盛宣懷漸窺臺司者。行逕又異。自同治五年西征事起。即奏派光緒督辦上海採運局。購開花礮七響。後膛槍及借洋債。他書有言爲西征糧臺者。亦誤。至借洋款。宗棠同治六年十二月十五日奏云。擬援上年三月間奏借洋款成案。再由江蘇、浙江、福建、湖北、廣東各藩司。於同治七年二月至十一月連閱十個月。應協甘餉項下。按月撥還。解與海關。發還洋商清款。一切查照上屆成案辦理。惟胡光墉上屆籌借洋款極費經營。比以上海稅務司不肯畫押。幾被阻撓。聞總稅務司赫德到後。曾言借餉於衆商。外國常有之事。並不須多費息銀等語。可否敕下總理各國事務衙門。轉敕赫德會辦此事。督飭上海稅務司畫押。以期速成。而息銀亦冀可稍省。光緒三年五月二十六日。陳明借定洋款摺略云。胡光墉向匯豐銀行借定五百萬兩。據每月一分二釐五毫起息。五年勻還。各議罰款十五萬兩。如三個月關票不到。則罰銀歸胡光墉承認。如三個月內洋銀不交。則罰銀歸匯豐銀行承認。作保之說。當即

由此而訛。（松堪小記）

「外商」

五口通商。始由怡和、花旗、沙遜三洋行壟斷中外貿易。自後商埠增闢。各國洋行愈多。皆以賤價勒購原料。甚有非商埠亦設洋行者。怡和、太古等行兼營沿海及內河航運。甲午以後。且各在商埠設廠製造洋貨。工費省。運費輕。只納子口半稅百分之二五。即可暢銷內地。劫奪有甚于寇盜者矣。

一七八四年乾隆四十九年至一八四四年道光二十四年中美第一次簽訂了商業條約。一八二四年道光四年一月一日。美國旗昌

洋行接續山迷爾洋行。在中國開業。至一八九一年光緒十七年關閉。在一八四四年道光二十四年以前。捷安否斯和旗昌

洋行掌握了一批既輕且快的船隻。用來運輸鴉片。很快的就完全控制了鴉片的買賣。他們作鴉片買賣。完

全是代理性質的。直到一八三零年道光十年只是羅素爾和飛利浦阿迷道合作的。以後阿古斯丁赫爾、裴格林、

格雷斯沃德、庫利基等等。先後都加入了這個洋行。資本雄厚。經營力強。成為外人在中國最大的洋行。其他

洋商。難爲其比。（吉蘭寧及艾斯庫林上海史）

沙遜一七九二年乾隆五十七年生於巴格達。他同鴉片買賣有密切的關係。中英第一次戰爭時。沙遜遷到香港。成

爲香港最早幾家大的公司之一。一八四五年道光十五年成立了上海分行。（吉蘭寧及艾斯庫林上海史）

在廣州最早最老的幾家洋行中。一直到今天未變的。只有怡和洋行。創始人名叫維利安加爾定。原是外科醫生。在東印度公司的商船上工作。因此就結識了在廣州作買賣的商人。東印度公司當時曾有一種規定。其高級工作人員。有時也可以爲自己的利益而作點買賣。加爾定就利用這種機會。逐漸成立了怡和洋行。當十九世紀開始時。即委託瑞士商人艾其馬尼亞克住澳門。作代理人。該行另一個老板。是馬迪生。先在印度加爾各答其舅父的商行中工作。一八二七年。道光七年到廣州和加爾定合夥。到澳門又和馬尼亞克洋行合夥了。同年。馬迪生在廣州創辦了廣州紀錄報。這是遠東第一家英文報。怡和洋行和中國公行的買賣關係最大。一八三四年。道光十四年東印度公司的壟斷權失掉後。怡和洋行的經營大見活躍。每年的招待費達四萬鎊。其廚師的薪金每月一百鎊。其在上海的代理人。最早的是艾吉達拉斯和捷格浪特。（吉蘭寧及艾斯庫林上海史）

上海租界剛開始時。一家銀行也沒有。僅有幾家銀號。一八五三年。咸豐三年太平天國時期。銀號的票據。等於流通的支票。這時銀子還是大量進口。但另一方面。因爲鴉片走私的關係。却也不斷外流。從而減少了銀子的存數。在上海的第一家銀行。創始於何年。已不可考。一八五二年。咸豐二年有一家名叫吉爾曼洋行的。和稱作東方聯合銀行的。因事涉訟起來。據此可以證明。在一八五二年以前。上海已有銀行了。一八五四年。咸豐四年東方聯合銀行發現了他的對手。就是印度倫敦中國商業銀行在上海成立了分行。同年。英國的阿格拉銀行的分行。也在此開幕了。（吉蘭寧及艾斯庫林上海史）

「買辦」

買辦或稱剛八度。外商初設洋行。其經理稱爲大班。華人得任買辦。掌行內銀庫及會計出納。以及一切雜事。買辦多兼股東。其無股者須押鉅金。作爲擔保。次于買辦者曰式拉夫。卽跑街之意。清季捐納盛行。買辦式拉夫皆二品銜道員。名器之濫。自來所無也。維新之初。買辦多集資本。或領外資。在內地經營鑛廠實業者至多。姑舉一二例以概之。

李滄橋者。文耀丁丑回南。輪船江拔圖也。今在熱河挖礦。集資至四十萬。自去年至今。往返七八次。商人之豪也。（翁文恭公日記光緒九年六月初四日）

李滄橋來。爲伊熱河開礦事。有所干請。余未見。令斌見之。其言大約投邸而來。至則聞邸遣人赴彼踴礦。將并其所承開之烟筒山者。不能保矣。情急呼援。此等事豈余所欲聞哉。謝之而已。（翁文恭公日記光緒十年十月二十七日）

遊張氏園。未成園。主人張叔蘇。鴻稱道員。無錫買人也。花木房室皆洋式也。器具亦洋式也。饌極精。談商務極透。真市豪哉。（翁文恭公日記光緒十四年九月初十日）

過織布機器局。屋西式。機四百張。日可織兩匹。尙未開廠。此局前爲商董所壞。今襲道圖重集股十五萬興辦。洋人乃科督理之。又過

造紙機器局。凡方池五六疊。最下皆布縷棉花雜物。遞吐遞白。便成濃汁。瑩白化紙矣。其長無極。寬約三尺半。軸滿則斷之。（翁文恭公日記光緒十四年九月十四日）

（乙）商之組織

「行」

行之稱。由來甚古。宋有免行錢。吳自牧夢梁錄所載。與今相去不遠。手藝者有行。謂行業也。興販者亦有行。謂行貨也。皆得蓄徒弟。學徒期滿出師者。得爲鋪夥。鋪中錢財字據。均須入櫃。故有掌櫃之稱。如是者謂之內行。或曰在行。否則曰外行。鋪有鋪規。行有行規。行市漲落。以及同行爭論。須有公斷。皆由行主之。此所謂行。與牙行之行異。與行棧、發行之行亦異。

市肆謂之團行者。蓋因官府回買而立此名。不以物之大小。皆置爲團行。雖醫卜工役。亦有差使。則與當行同也。……其中亦有不當行者。如酒行、食飯行。而借此名。有名爲團者。如城西花團、泥路青果團、後市街柑子團、渾水閘鯊團。又有名爲行者。如官巷方梳行、銷金行、冠子行、城北魚行、城東蟹行、薑行、菱行、北猪行、候潮廟外南猪行、南上北土門菜行、蠟子橋鮮魚行、橫河頭布行、鷄鵝行。更有名爲市者。如炭橋藥市、官巷花市、融和市、南坊珠子市、修義坊肉市、城北米市。且如橋園亭書房、鹽橋生帛。五間樓泉福糖蜜。及荔枝圓跟湯等物。……

如買賣七寶者謂之骨董行。……開浴堂者名香水行。（吳自牧夢梁錄卷一三團行）

城內外諸鋪戶。每戶專憑行頭於米市做價。經發米到各鋪出糶。鋪家約定日子。支打米錢。其米市小牙子親到各鋪支打發客。又有新開門外草橋下南街。亦開米市三四十家。接客打發分俵鋪家及諸山鄉客販賣。與街市鋪戶大有徑庭。……且又袋自有賃戶。肩駝脚夫亦有甲頭管領。船隻各有受載舟戶。（吳自牧夢梁錄卷一六米鋪）

大抵酒肆。除官庫、子庫、脚店之外。其餘謂之拍戶。（吳自牧夢梁錄卷一六酒肆）

近日巡攔及集頭老人抽稅。將小民窮漢賣雞鴨攜簪疋布上街。擔篋入市。無不抽稅。油行既稅店又稅油。屠行既稅生又稅死。……針頭削鐵。所餘幾何。樹剝重皮。豈能堪命。（呂坤實政錄卷一明職稅課司之職）
行戶之賒欠爲苦。（呂坤實政錄卷三民務有司雜禁附）

〔幫〕

大批販貨運銷者謂之幫。幫之成當起於明代。至清尤盛。以貨名者如山貨幫、藥材幫、皮貨幫之類。以省名者如山陝幫、廣幫、川幫之類。以一地名者如寧紹幫、太湖幫、騰越幫、潮安幫之類。由幫之名。可以悉其地之所產及產地之分配。幫有公所之設。頗及公益事。亦足見其團結力量。

富室之稱雄者。江南則推新安。江北則推山右。新安大賈。魚鹽爲業。藏鏹有至百萬者。其它二三十萬則中賈耳。山右或鹽或絲。或轉販。或窖粟。其富甚於新安。（謝肇淛五雜俎卷四）

新都勤儉甲天下。故富亦甲天下。賈人娶婦數日則出外。或數十年。至有父子邂逅而不相認識者。大賈輒數十萬。則有副手而助耳目者數人。其人皆銖兩不私。故能以身得幸於大賈而無疑。……至於商賈在外。遇鄉里之訟。不啻身嘗之。鑄金出死力。則又以衆幫衆。無非亦爲己身地也。近江右人出外亦多效之。（顧炎武肇域志第三冊）

平陽澤潞豪商大賈甲天下。非數十萬不稱富。其居室之法善也。其人以行止相高。其合夥而商者名曰夥計。一人出本。衆夥共而商之。雖不誓而不藏私。……估其產者。但數其大小夥計若干。則數十萬產可屈指矣。（顧炎武肇域志第三十七冊）

紹興……多壯遊在外。如山陰、會稽、餘姚……其儇巧敏捷者入都爲胥辦。自九卿至閒曹細局無非越人。次者與販爲商賈。故都門西南一隅。三色人蓋櫛而比矣。（顧炎武肇域志第九冊）

本城征收在關已完進口稅之洋廣貨駝經費。致與臨安幫、廣幫忽起訟端。（光緒十七年通商各關華洋貿易總冊蒙自口華洋貿易情形論略）

九月二十八日。本埠潮幫源美行倒閉。虧空八萬餘兩之多。所虧太古、怡和、招商三公司水脚等銀爲數甚巨。故三公司特出新章。預防潮幫復蹈故轍。是以潮幫會館禁限該幫遵照新章。然三公司新章既出。皆相約不

裝潮幫之貨……後經該幫復允照三公司所立新章辦理。始行照常裝運。（光緒十九年通商各關華洋貿易總冊漢口華洋貿易情形論略）

福州……有茶幫公所。茶棧九十餘家。分爲五幫。一。京幫。多北京、天津、山東人。專銷北方各省及蒙古一帶。二。天津幫。亦專銷北方各省。惟其人多係福建籍。三。茅茶幫。專向茶戶收買毛茶或線茶。轉售於北京、天津各幫。及琉球輸出商。不自營輸出事業。四。廣潮汕幫。專銷南方各省及南洋一帶。其營業與他幫不同。蓋非自爲買賣。僅代理他商。爲之購買囤積。……照章徵收用錢。五。洋茶幫。專與洋商交易。廣東人最多。福州、泉州人不過數家而已。有嚴密之組合。曰公義堂。絕對不許本幫以外之茶棧與洋商交易。（陳重民今世中國貿易通志）

「會」

行必有會。主之者曰會董。或曰董事。清季改行會爲商會。而有會長之稱。會之建館以祀神者則曰會館。或以業分。或以區域分。而皆同行。以視仕宦敍鄉誼之會館。其成立或較早。華僑之在外洋者。且有中華會館之設。

去秋所議抽收花紗火油釐金。驟未能定。後經地方官與各行會館董事商訂章程。無須照納釐金。只自今年正月起。每年由各行會館包繳洋銀六千元。該銀仍由各該舖戶攤派。衆情於是悅服矣。（光緒十七年通商各關華洋貿易總冊瓊州口華洋貿易情形論略）

本省各項行業。分別立有會館堂名。其立堂名者。悉係包繳官場經費。殆與包攬無異。看其外面情形。以堂名頗多。每年認繳地方官經費。額數甚鉅。似覺有益。然其實不但與貿易頗形窒礙。卽如該商若非該堂業內之人。必致多方掣肘。殊難貿易。（光緒十八年通商各關華洋貿易總冊廣州口華洋貿易情形論略）

（4）礦廠業

（甲）礦之採禁

「明代鑛政」

明代鑛冶不如前代之盛。洪武初亦設官督廠。以利官少損民多而止。其後屢採屢禁。民間所辦。例有歲課。或課稅。或課實物。然惑于風水之說。或慮聚衆肇亂。每加封禁。福建懲于鄧茂七之事。封禁其山。卽以封禁爲山名。山界江西上饒廣豐、福建崇安浦城間。周圍三百餘里。略無人迹。至雍正時猶未開禁。沿海例禁鐵冶。慮其下海也。尋常煤鐵爲民間必需者不禁。萬曆時。遣中官開金銀鑛。十餘年間。先後所得鑛金不及萬兩。鑛銀二三十萬兩而已。

凡各處鑛冶。洪武二十六年^{一三九}定各處鑛冶。每歲煽煉鋼鐵。彼先行移各司歲辦。後至十八年^{一三八}五年^{一三八}停止。今不復設。如果缺用。卽須奏聞。復設鑛冶。採取生礦煅煉。著令有司差人陸續起解。照例送庫收貯。如係臨

邊用鐵去處。就存聽用。二十八年^{一三九}罷各布政司官冶。令民得採煉出賣。每歲輸課三十分取二。正德元年^{一五}奏准。浙江等布政司。課鐵每一斤折解銀二分五釐。待後鐵料不足。仍解本色。（大明會典卷一九

四工部）

國初置各處鐵冶。每冶各大使一員。副使一員。江西南昌府進賢冶。臨江府新喻冶。以上洪武七年^{一三七}置。

十八年^{一三八}罷。袁州府分宜冶。洪武七年置。十八年罷。二十七年^{一三九}復置。二十八年^{一三九}罷。湖廣興

國冶。蕪州黃梅冶。以上洪武七年置。十八年罷。山東濟南府萊蕪冶。廣東廣州府陽山冶。陝西鞏昌冶。以上俱

洪武七年置。十八年罷。山西平陽府吉州富國豐國二冶。洪武七年置。十八年罷。二十七年復置。二十八年罷。

太原府大通冶。潞州潤國冶。澤州益國冶。以上俱洪武七年置。十八年罷。四川龍州冶。永樂二十年^{一四二}置。

順天府遵化鐵冶。永樂間初置廠於沙坡峪。後移至松棚峪。宣德十年^{一四三}置。正統三年^{一四三}復置於白

冶莊。萬曆八年^{一五八}罷。……國初定各處鑪冶該鐵一千八百四十七萬五千二十六斤。（大明會典卷一

九四工部）

洪武二十年^{一三八}增福建銀屏山銀課額。延平府尤溪縣銀屏山。嘗設廠局煎煉銀礦。置鑪冶四十二座。歲

辦銀二千一百兩。至是增其額。（續文獻通考卷二三征權考）

永樂十二年^{一四一}遣提督官採辦湖廣辰州。貴州銅仁等處金銀場課。時又開陝西商縣鳳凰山銀坑八所。

福建浦城縣馬鞍等坑三所。設貴州太平溪。交趾宣光鎮金場局。葛溪銀場局。雲南大理銀冶。其不產金銀者。

亦屢有革罷。（續文獻通考卷二三征權考）

宣德十年一四三年

正月。時英宗已即位。

詔各處金銀硃砂銅鐵等課悉停免。坑冶封閉。其開辦內外官員即赴京。……

惟係洪武舊額歲辦課銀。并差發金不在停免之例。……明年正月。又罷貴州銅仁金銀局。（續文獻通考卷

二三征權考）

正統九年一四四年

閏七月。命戶部侍郎王質往浙江福建重開銀場。……帝初即位。下詔封坑冶。民大蘇息。至

是有盜礦脈相鬪殺者。御史孫毓、福建參政宋彰、浙江參政俞士悅。各言復開銀場。則利歸於上。而盜無所容。

事下二處三司議。浙江按察司軒輶等奏。復開銀場雖一時之利。然凡百器具。皆出民間。恐有司橫加科歛。人

心搖動。其患甚深。爲今之計。莫若擇官典守。嚴加禁捕。則盜息矣。朝廷是其言。已而給事中陳傳復請開場。中

官與言利之臣相與附合。乃命質往經理。……厥後民困而盜益衆。至十三年一四四年八月。遂有鄧茂七之亂。

（續文獻通考卷二三征權考）

景泰元年一四五年

二月。復置採浙江福建諸處銀課。先是福建賊鄧茂七。以開礦作亂。正統十四年一四四年正

月。免浙江福建銀課。二月。御史丁瑄等斬茂七於延平。……至是從御史畢鸞等奏。取回開辦官。令都布按三

司、巡礦官、提調各府縣。護守坑場。（續文獻通考卷二三征權考）

天順二年。一四五年

仍開浙江福建等處銀礦。自景泰元年封閉銀場後。尋以盜礦者多。從兵部尙書孫原貞請。

開浙江銀場。因並開福建。至是……照舊煎辦。……至四年。一四六年命宦官羅永之浙江。羅珪之雲南。馮讓之

福建。何能之四川。（續文獻通考卷二三征權考）

天順七年。^{一四六}復詔封閉各處坑場。停止煎辦銀課。取回內外官員。（續文獻通考卷二三征權考）

成化三年。^{一四六}仍遣內使提督浙江福建銀課。四川雲南令鎮守中官提督採辦。時又開湖廣金場。武陵等

十二縣。凡二十一場。歲役民夫五十五萬。……得金僅五十三兩。於是復閉。（續文獻通考卷二三征權考）

弘治五年。^{一四九}詔豁減浙江福建諸歲辦銀課。仍填塞礦穴。取回諸添設巡礦官。……四川山東礦穴。亦先

後封閉。十八年。^{一五〇}二月。又禁密雲私開銀場。（續文獻通考卷二三征權考）

我朝坑冶之利。比前代不及什之一二。間或有之。隨取隨竭。曩者固已。浙之溫處。閩之建福。開廠置官。令內臣以守之。差憲臣以督之。然所得不償所費。……雖然不徒不得其利。而往往又罹其害。蓋以山澤之利。官取之則不足。民取之則有餘。今處州等山場雖閉。而其間尤不能無滲漏之微利遺焉。此不逞之徒。猶囊橐其間。以競利起亂也。爲今之計。宜於山場遺利之處。嚴守捕法。可築塞者築塞之。可柵塹者柵塹之。俾其不至聚衆爭奪。以貽一方生靈之害可也。（皇明經世文編卷七二丘濬山澤之利）

正德六年。^{一五一}封閉雲南銀場九處。至九年。^{一五一}軍士周達又請開雲南諸銀礦並銅錫青綠。詔可。遂次

第開採。十五年。^{一五二}又令雲南銀礦新興場及新開處所一併封閉。以後不許妄開。嘉靖初。又命閉雲南大

理礦場。（續文獻通考卷二三征權考）

嘉靖十六年。^{一五三}命廣開山東等處銀礦。山東巡按李松言。沂州寶山開礦七十八所。得白金一萬一千三

百兩。宜將龍爬山石井山以次開採。帝……命撫按力任之。（續文獻通考卷二三征權考）

嘉靖四十三年^{一五六四年}三月。浙江江西礦賊作亂。命設兵備官。禁閉山場。時開化德興礦賊……其勢日熾……

…兵部議設兵備副使一員於浙江。駐劄衢州。以杜盜源。其雲霧山礦洞。宜嚴加封閉。從之。（續文獻通考卷二三征權考）

萬曆二十四年^{一五九六年}。詔開各處礦冶。……二十五年^{一五九七年}二月。又命開採續報礦洞。……河南巡按姚思

仁疏曰。中原八郡。實天下樞機。臣自入境以來。巡行郡邑。問民病苦。其開礦之大可慮者有八。礦盜嘯聚召亂。可慮一也。礦頭累極土崩。可慮二也。礦夫殘害流亡。可慮三也。雇民糧缺噪呼。可慮四也。礦洞徧開浪費。可慮五也。礦砂銀少逼買。可慮六也。民皆開礦失業。可慮七也。奏官強橫激變。可慮八也。今礦頭以賠累死。平民以逼買死。礦夫以傾壓死。以爭鬥死。自初開至今已踰八月。而所解不過四千。及今不止。恐禍起蕭牆。變生肘腋。雖傾府庫之藏。竭天下之力。亦無濟於存亡矣。（續文獻通考卷二三征權考）

萬曆三十三年^{一六〇五年}十二月。諭戶工二部。凡礦差內外官並令回京。其礦洞悉令封閉。自二十五年^{一五九七年}至是年。諸璫所進礦稅銀幾三百餘萬。……至是以礦砂微細。不償所費。始停免焉。（續文獻通考卷二三征權考）

「清代鑛政」

順康時。軍用浩繁。嘗遣部員督辦鑛務。旋即停止。唯聽民間開採。繳納歲課。十取其

二、道、咸時軍興餉絀廣事開採而得不償失。

凡採取五金之處。古俱曰冶場。今晉訛曰廠。按周禮司徒職。礦人掌金玉錫石之地。而爲之厲禁以守之。若以時取之。則物其地圖而授之。巡其禁令。此古冶場之所自始。而今礦廠之所由名。然今天下之廠。於雲南爲最多。五金而外。尚有白銅、硃砂、水銀、烏鉛、底母、硝磺等廠。大小不止百餘處也。今請言銀廠。……雲南之廠。肇自明時。管理者爲鎮守太監。……逮硃老山空。礦脈全斷。……廠俱封閉。……至康熙二十一年。一六八二年滇省蕩

平。廠遂旺盛。嗜利之徒。游手之輩。具呈地方官。查明無礙。即准開採。由布政司給與印牌。謂之廠官。……擇日出示。開爐試煎。每用礦砂不計多寡。……廠官、課長、硃領。各私投塊銀於內。以取原汁之名。……申文報旺。此

名一傳。挾資與分者遠近紛來。是爲米分廠客。……至上課之法。則品定礦觔。入爐煎置成汁。較定三拍。以鐵爲之。如戲盤而有柄。上拍可兩許。此爲解上官課。中拍可五錢。是廠官養廉。下拍可二錢。係課長及諸役分支。商民所開之廠。大概如此。至於踴躍獲大廠。非常人所能開者。則院司道提鎮衙門。差委親信人。擁資前去。招集峒丁。屏辭米分。獨建其功。……與商民無與。（皇朝經世文編卷五二倪蛻復當事論廠務書）

康熙十四年。一六七五年定開採銅鉛之例。戶部議准。凡各省產銅及黑白鉛處。如有本地人民具呈願採。該督撫即委官監督採取。（皇朝文獻通考卷三〇征權考）

康熙五十二年。一七一三年四川總督奏報。一盤水地方。聚衆萬餘人開礦。差官力行驅逐。諭以此等偷開礦廠。皆係貧民。若盡行禁止。何以爲生。地方文武官作何設法。使窮民獲有微利。但不得聚衆生事。乃令廷臣集議。諭

曰。有礦地方。初開時禁止乃可。若久經開採。貧民藉爲衣食之計。忽然禁止。恐生事端。總之天地間自然之利。當與民共之。不當以無用棄之。要在地方官處置得宜耳。乃定未經開採者。仍行嚴禁。（王慶雲熙朝紀政卷五紀礦政）

雍正二年。一七二四年兩廣總督孔毓洵奏請。於廣東開採。以濟窮民。上諭。廷臣會議。嗣奉諭旨。昔年粵省開礦。聚集多人。以致盜賊漸起。隣郡戒嚴。是以永行封閉。夫養民之道。惟在勸農務本。若皆舍本逐末。各省遊手無賴之徒。望風而至。豈能辨其姦良。況礦砂乃天地自然之利。非人力種植可得。焉保其生生不息。今日有利。聚之甚易。他日利絕。則散之甚難。爾等揆情度勢。必不致聚衆生事。庶幾可行。若招商開廠。設官收稅。傳聞遠近。以致聚衆藏姦。則斷不可行也。（皇朝文獻通考卷三〇征權考）

雍正三年。一七二五年江西巡撫裴倅度奏。廣信府封禁山。相傳產銅。舊名銅塘山。明代即經封禁。其中樹石充塞。荒榛極目。無沃土可以資生。康熙五十九年。一七二〇年擒獲匪類之後。搜查並無藏匿。請仍封禁爲便。尋又封禁雲南中甸銅廠。又以湖南撫臣布蘭泰疏奏開礦事宜。亦諭以逐末之民易聚難散。（王慶雲熙朝紀政卷五紀礦政）

雍正六年。一七二八年准廣西地方開採礦砂。戶部議覆。廣西巡撫金鉷疏言。桂林府屬潯江等處各礦。請招募本地殷實商人自備資本開採。……其梧州府屬之芋莢山產有金砂。請另委員辦理。……均應如所請。從之。（皇朝文獻通考卷三〇征權考）

乾隆六年。一七四一年 准開滇省卑浙塊澤二鉛廠。並試開東川者海地方鉛廠。……七年。一七四二年 奏定川省銅鉛

開採事宜。（皇朝文獻通考卷三〇征權考）

乾隆八年。一七四三年 湖廣總督孫淦奏。會同宜昌金礦及各縣礦廠。或屬苗疆。或防田園廬墓。或產砂細微。應嚴加封禁。惟榔桂二州。既非苗疆。又無防礙。應聽採抽稅。於鼓鑄有裨。（王慶雲熙朝紀政卷五紀礦政）

乾隆九年。一七四四年 總督那蘇圖以粵東鼓鑄難緩。見有礦廠可開。兼爲撫養貧民之計。宜酌量試採。砂旺卽開。砂弱卽止。至金銀二礦。民多競趨。恐轉礙鼓鑄。應照舊封閉。（王慶雲熙朝紀政卷五紀礦政）

乾隆十五年。一七五〇年 開浙省溫處兩郡採鐵之禁。戶部議覆閩浙總督喀爾吉善疏言。……浙省處州府屬之雲和等縣。前經撫臣常安奏請概行封禁。今據該督等奏稱。處州府屬之雲和、松陽、遂昌、青田四縣。並溫州府屬之永嘉、平陽二縣。及附於平邑洶洗之泰順一縣。土瘠民貧。以採鐵爲恆業。封禁以後。陽奉陰違。徒起吏胥需索之弊。況雲和等七縣。俱係內地。與近海產鐵應行封禁之寧台等屬不同。歷來並無潛藏奸匪。透漏外洋等弊。應照該督所請。仍弛其禁。照舊開採。以濟民生。……從之。（皇朝文獻通考卷三〇征權考）

乾隆二十六年。一七六一年 甘肅開騷狐泉礪礦。自後滇之通海。彌勒。黔之清平。廣西融縣。先後報開鉛廠。（王慶雲熙朝紀政卷五紀礦政）

乾隆五十一年。一七八六年 總督福康安奏。開甘肅沙州金砂。（王慶雲熙朝紀政卷五紀礦政）
嘉慶四年。一七九九年 廣東於黎地。試採石碌銅斤。總督吉慶以地濱海洋。且額已短缺。奏准停止。（王慶雲熙朝

紀政卷五紀礦政)

嘉慶五年。^{一八〇〇年}諭。雲南永昌府之茂隆銀廠。近年以來。並無分釐報解。……著卽封閉。(皇朝續文獻通考

卷四三征權考)

嘉慶六年。^{一八一〇年}諭。……前據明安等奏。大興縣人張士恆呈稱。平泉州屬四道溝、雲梯溝等處。有銅苗透出。

請自備工本開採等語。……該二處山場。久經封禁。見在詳悉查勘。亦未見實有可以開採之處。……所有平

泉州屬四道溝、雲梯溝等處。產銅山場。新舊洞口。俱著永遠封禁。不准開採。(皇朝續文獻通考卷四三征

權考)

嘉慶八年。^{一八一〇年}封閉雲南冷水箐、金龍箐二金廠。……十一年。^{一八一〇年}又封閉雲南魁甸廠金礦、永興廠銀

礦。十三年。^{一八一〇年}諭。……查禁達爾達木圖金廠。酌定章程永杜私採。……十五年。^{一八一〇年}封閉雲南慢梭廠

金礦、募迺銀礦。……十六年。^{一八一一年}又封閉雲南馬臘底銀礦。……十八年。^{一八一三年}封閉雲南白沙地銀礦。……

二十年。^{一八一五年}諭。據長齡等奏。試採都蘭哈拉鉛廠。約計每年可得銀四五萬兩。應交課銀一萬餘兩。於經

費未能多爲節省。應卽遵旨封閉等語。……卽將該礦永遠封閉。嗣後不准再請開採。……又封閉邦發銀礦、

北衙浦草廠金礦。……道光元年。^{一八一二年}封閉甘肅大通縣屬札馬圖金廠。(皇朝續文獻通考卷四三征

權考)

嘉慶十三年。^{一八一〇年}開採雲南太和銀礦。……十五年。^{一八一〇年}開採邦發銀礦。……二十年。^{一八一五年}又開採雲

南鎮沅州青龍銀礦……二十四年。一八一開採雲南永北礦山廠銀礦。（皇朝續文獻通考卷四三征權考）

道光二十四年。一八四諭……開礦一事。前朝屢行。而官吏因緣爲奸。久之而國與民俱受其累。我朝雲南、貴

州、四川、廣西等處。向有銀廠。每歲抽收課銀。歷年以來。照常輸納。並無絲毫擾累於民。可見官爲經理。不如任民自爲開採。……因思雲南等省。除見在開採外。尙多可採之處。著寶興、桂良、吳其濬、賀長齡、周之琦體察地

方情形。相度山場。民間情願開採者。准照見開各廠。一律辦理。不可假手吏胥。致有侵蝕滋擾阻撓諸弊。……

二十八年。一八四諭。開礦之舉。……如果地方官辦理得宜。何至藉口於人衆易聚難散。因噎而廢食。著四川、

雲貴、廣西、江西各督撫。於所屬境內。確切查勘。廣爲曉諭。其餘各省督撫亦著留心訪查。如有苗旺之處。酌量

開採。不准畏難苟安。託詞觀望。倘游移不辦。朕不難派員前往履勘。如果不便於民。或開採之後。弊多利少。亦

准奏明停止。於官辦、商辦、民辦。其應如何統轄彈壓稽查之處。朕亦不爲遙制。惟在該督撫等各就地方情形。

熟商妥議。定立章程具奏。（皇朝續文獻通考卷四三征權考）

道光二十三年。一八四開採廣西永寧州崇慶鐵廠……二十五年。一八四開採廣西恭城縣鉛礦。（皇朝續

文獻通考卷四三征權考）

道光三十年。一八五諭。王大臣等遵議給事中王東槐奏封禁礦廠一條。開採山礦。原期裕課便民。除貴州一

省。仍令開採外。其餘各省。著該督撫確切查明。如果於民未便。著卽遵照前奉諭旨奏明停止。……又諭。前據

程喬采等奏。滇省試辦銀廠。未臻成效情形。飭部議奏。茲據王大臣等會同戶部奏稱。該省試辦無效。自未便

必令開採。著程裔采等悉心查勘。如果弊多利少。即奏明停止。（皇朝續文獻通考卷四三征權考）

咸豐三年。^{一八五三年}諭。奕湘、恆春奏遵查礦山情形一摺。所有承德府屬之遍山線。及平泉州屬之錫蠟片地方。

據該尙書等查勘銀苗透旺。……業據該處商人承認。予限一月。酌定升課。即著該督會同新任熱河都統毓書。妥爲辦理。（皇朝續文獻通考卷四三征權考）

咸豐三年。^{一八五三年}諭。朕聞四川等省向產有金銀礦。自雍正以後。百餘年來。未嘗開採。……道光二十八年。^{一八四八年}

王大臣會議開礦一條。曾通行各省督撫履勘查辦。間有一二省分奏請開採。旋復藉口於硎老苗稀。輒請停止。或以聚衆生事爲辭。畏難苟安。因循不辦。……地方官經理得宜。自不致別滋流弊。即如見在各省舊有礦廠。按年開採抽課。官民日久相安。豈非明證。當此軍需浩繁。庫藏支絀。各省督撫。務……於礦苗豐旺之區。……奏明試辦。毋得……一奏塞責。（皇朝續文獻通考卷四三征權考）

咸豐六年。^{一八五六年}諭。業布冲額奏煎鍊鉛礦。設局鼓鑄一摺。甘肅迪化州福壽山地方。經訪獲鉛礦。煎鍊得銀。

著即准其設籌裕局。運鉛分鑄。（皇朝續文獻通考卷四三征權考）

同治十一年。^{一八七二年}題准廣西桂平縣吉一里界田水邊地方。山場產有鐵礦。設鐵鑪一座。每年納鑪稅銀二

十兩。……十二年。^{一八七三年}議准桂平縣屬千子嶺接壤大潤嶺一帶。山場鐵礦。招商開採。設鐵鑪一座。每年輸

納稅銀二十兩。（皇朝續文獻通考卷四三征權考）

同治十三年。^{一八七四年}開探喀拉心王旗地方羅圈溝銀礦。（皇朝續文獻通考卷四三征權考）

光緒元年。一八七五年 奏准廣西永寧州屬安寧里響水莽山場鐵礦。招商開採。設鐵鑪二座。每年共輸稅銀二十兩。……三年。一八七七年 議准廣西永寧州屬安寧里上團。土名礦山莽山場鐵礦。招商開採。設鐵鑪二座。每年共納稅銀二十兩。（皇朝續文獻通考卷四四征權考）

光緒二年。一八七六年 開採熱河窯溝銀礦。五年。一八七九年 封閉。（皇朝續文獻通考卷四四征權考）
光緒七年。一八八一年 封閉喀拉沁王旗地方羅圈溝銀礦。（皇朝續文獻通考卷四四征權考）

（乙）礦工之生活

「明代鑛工」

明代多以罪人充役。其苦累可知。嘉靖時。曾取砂丁爲兵。以禦倭寇。私鑛之盛可知。

洪武十五年。一三八二年 五月。……帝曰。……各冶鐵數尙多。軍需不乏。而民生業已定。若復設此。磁州鐵冶。必重擾之。是又欲驅萬五千戶於鐵冶中也。（續文獻通考卷二三征權考）

洪武十五年。一三八二年 十二月。……三府。濟南青萊奏。歲役民二千六百六十戶。採鉛三十二萬三千四百餘斤。（續文獻通考卷二三征權考）

宣德三年。一四二八年 九月。免江西德興鉛山浸銅丁夫雜役。二縣銅場。歲浸銅得五十餘萬斤。所用鐵炭。丁夫自備。其差徭科徵皆不免。歲額累虧。因詔有司悉免雜役。稅糧附近輸納。（續文獻通考卷二三征權考）
宣德五年。一四三〇年 ……浙江布政司王澤言。平陽、麗水等七縣銀冶。自永樂間遣官開辦。共歲額八萬七千八

百兩。至今十年。各場所產。有僅足額者。有不足者。有礦盡絕者。開辦官督令坑首冶夫納課。不敢稍失歲額。賠累之民。富者困敝。貧者逃亡。他處坑冶。其害亦然。（續文獻通考卷二三征權考）

天順四年。^{一四六}命雲南雜犯死罪以下無力者。俱發新興等場充礦夫。採辦銀課。（續文獻通考卷二三征權考）

權考）

成化九年。^{一四七}巡按御史胡涇等奏。雲南所屬楚雄、大理、洱海、臨安等衛軍。全充礦夫。歲給糧布。採辦之初。

洞淺礦多。課額易完。軍獲衣糧之利。未見其病。近日洞深利少。軍士多以瘴毒死。煎辦不足。或典妻鬻子。賠補其數。甚至流徙逃生。哨聚爲盜。（續文獻通考卷二三征權考）

弘治十三年。^{一五〇}十一月。巡撫都御史李士實奏。雲南銀場凡九。近者礦脈甚微。各衛俱以礦夫口糧賠納。

歲折銀三萬四百三十四兩。名曰礦夫口糧。餘丁或三五人朋當一名。歲辦銀二萬一千九百四十五兩。名曰夫丁乾認。今判山、窩村、廣運、寶泉四場。礦脈久絕。賠納無已。（續文獻通考卷二三征權考）

遵化鐵廠夫匠。永樂間。起薊州、遵化等州縣民夫二千三百六十六名。匠二百名。遵化等六衛軍夫九百二十四名。匠七十名。採辦柴炭。煉生熟鐵。……正統三年。^{一四三}凡燒炭人匠七十一戶。……洵沙人匠六十三戶。

……鑄鐵等匠六十戶。附近州縣民夫六百八十三名。軍夫四百六十二名。每年十月上工。至次年四月放工。凡民夫民匠月支口糧三斗。放工住支。軍夫、軍匠月糧六斗。行糧三斗。俱歲辦柴炭鐵沙。看廠軍月糧同行糧減半。各軍俱給冬夏衣布二疋。綿花二斤八兩幫貼。餘丁不支糧。該衛免其差役。歲辦半於正軍。此外又有順

天、永平輪班人匠。原額六百三十名。歲分爲四班。按季辦柴炭鐵沙。又有法司送到炒煉囚人。每名日給粟米一升。弘治十三年。一五〇〇年。奏准。本廠民夫每名每年給均徭銀十二兩。買辦柴炭。其口糧罷支。……萬曆元年。一五七三年。議定。……今額徵順、永二府民夫銀三千八百九十五兩。班匠銀二百九十二兩零五分。（大明會典卷一九四工部）

當時鐵冶十三處。俱以徒罪人犯充炒鐵。不輕役民耳。（孫承澤春明夢餘錄卷四六工部鐵廠）

「清代礦工」

營鑛業者。得利至厚。集衆至多。故約束至嚴。寒暑自采。則備受剝削。入廠爲工。則所得工資至微。有被誘買爲工者。有觸怒豪強。立喪其生者。天下極苦之人。蓋莫如鑛工矣。

康熙十八年。一六七九年。定各省採得銅鉛以十分內二分納官。八分聽民發賣。……大抵官稅其十分之二。其四分則發價官收。其四分則聽其流通販運。或以一成抽課。其餘盡數官賣。或以三成抽課。其餘聽商自賣。或有官發工本。招商承辦。又有竟歸官辦者。（皇朝文獻通考卷三〇征權考）

雍正五年。一七二七年。諭旨。……從來礦徒。率皆五方匪類。烏合於深山窮谷之中。遂此末利。（皇朝文獻通考卷三〇征權考）

米分廠客。或獨一人。或合數人。認定洞口。日需峒丁若干進採。每日應用油米鹽菜若干。按數供支。得獲銀兩。除上課外。分作十分。鑲頭峒領共得一分。峒丁無定數。共得三分。廠客則得六分。若遇大礦。則廠客之獲利甚豐。然亦有礦薄而僅足抵油米者。亦有全無礦砂。竟至家破人亡者。（皇朝經世文編卷五二倪蛻復當事論廠務書）

山西布政使永北劉慥奏免金課疏……雲南永北府地界金沙江。舊傳明季本有淘金人戶。每戶金牀一架。額徵金一錢五分。遞年約徵金十四兩五錢零。添平二兩。知府規禮三兩。通共徵金一十九兩五錢零。邇來金漸不產。從前淘金人戶。久已散亡。今聞有淘金之人。俱係四方窮民。藉此餬口。去來無常。或一日得一二分。或三四日竟無分釐。是以額徵之數。不能依例上納。倘課頭抽緊。淘金者即潛散他方。有司以正課不敢虛懸。胥責課頭。以淘金人盡散。無可著落。只得將江東西兩岸之夷課。按戶催徵。以完國課。間有逃亡一戶。又將一戶之課攤入一村。相仍積弊。苦累無窮。況二村夷課。並不淘金。及至賣妻鬻子。賠納金課。嗟此夷民。情何以堪。（雲南通志卷七三食貨志）

乾隆五十一年。一七八六年奏准甘肅敦煌縣沙州南北兩山出產金砂。採金人夫以三千名爲率。如有多帶。照例治罪。每五十名設夫頭一名。夫頭給與照票。散夫給與腰牌。照票由安西州填號鈴印。送廠員給發。腰牌即由廠員製造。逐日課金。責成夫頭收繳。按夫抽取。每夫交納課金三分。於正課之外。另抽撒散金三釐。即有風雪不能採挖之日。亦不准扣除。（皇朝續文獻通考卷四三征權考）

乾隆五十五年。一七九〇年題准直隸延慶府屬黃土梁地方銀鉛礦。准其開採。照黔省銀鉛礦廠抽課之例辦理。餘銀全行給商。餘鉛照川省之例。一半官爲收買。（皇朝續文獻通考卷四三征權考）

宋應星天工開物……商民鑿穴得砂。先呈官府驗辦。然後定稅出土。以斗量付與冶工。高者六七兩一斗。中者三四兩。最下一二兩。其礁碎放光甚者。精華洩漏。得銀偏少。（雲南通志卷七三食貨志）

王崧礦採煉篇……凡廠皆在山林曠逸之地……廠民穴山而入。曰礮。曰硿。即古之坑。取礦而出。火煉爲金。即古之冶……四方之民入廠謀生。謂之走廠……大府……專令一官主之。稱爲廠主。聽其治。平其訟。稅其所採煉者。入於金府。府以一人掌其出納。吏一人掌官文書。胥二人供僭伺之役。游徼其不法。巡察其漏逸。舉其貨。罰其人。廠主……以七長治廠事。一曰客長。掌賓客之事。二曰課長。掌稅課之事。三曰鑪頭。掌鑪火之事。四曰鍋頭。掌役食之事。五曰鑲頭。掌鑲架之事。六曰硿長。掌礮硿之事。七曰炭長。掌薪炭之事……其管事又各置司事之人。工頭以督力作。監班以比較背荒之多寡。其刑有笞有縛。其笞以荆。其縛以藤。兩拇懸之梁棟。其法嚴。其體肅。（雲南通志卷七三食貨志）

滇邊外則有緬屬之大山廠。粵西邊外則有安南之宋星廠。銀礦皆極旺……聽中國人往採……大山……江楚人所居。採銀者歲常有四萬人。人歲獲利三四十金。則歲常有一百餘萬齋回內地……廣東嘉應州人在廠滋事。由安南國王牒解廣府。余訊以得幾何。而在外國滋事如此。渠對云。利實不貲。礦旺處。晝山僅六尺。只許直進。不許旁及。先索做直六百元。始聽採。即有人立以六百元做之。則其利可知也。（趙翼簞曝雜記）

卷四

礦民入山採銅。官必每百觔預發價銀四兩五錢。至銅砂煎出時。抽去國課二十觔。秤頭加長三十觔。共交一百五十觔。此無本之礦民所由困也。其有不願官價。自備工本。入山開採者。至銅砂煎出時。令礦民自備脚力。駝至省店領銀。每百五十觔給銀五兩。又曠日持久。不能支領。於是有本之礦民亦困。其有私相買賣者。謂之私銅。將銅入官。復坐以罰。夫礦民開採銅觔。其費甚大。有油米之費。有錘鑿之費。有爐火之費。其運至省店也。有脚價之費。所費甚大。而官價不足償之。所以礦民每有硎老山空之請。蓋托之以逃耳。（皇朝經世文編卷五二李紱與雲南李參政論銅務書）

今之廠內各設課長、客長、硎長、鑪頭、鑪頭、鍋頭。皆所以約束礮戶、尖戶及鑪丁、砂丁之類。又須多派書差巡練。以杜偷匿漏課。並禁奪底爭尖。……查雲南各屬。無論五金之廠。皆有廠規。其頭人分爲七長。每開一廠。則七長商議立規。名目愈多。剝削愈甚。查歷辦章程。迤東各廠硎戶賣礮。按所得礮價。每百兩官抽銀十五兩。謂之生課。迤西各廠硎戶賣礮。不納課。惟按煎成銀數。每百兩抽銀十二三兩不等。謂之熟課。皆批解造報之正款。必不可少。此外有所謂撒散者。則頭人書役。巡查之工食薪水出焉。有所謂火耗、馬脚、硎主、硎分、水分以及西岳廟功德、合廠公費等名目。皆頭人所逐漸增添者。……查向來廠上之人。殷實良善者什之一。而獷悍詭譎者什之九。又廠中極興燒香結盟之習。故滇諺有云。無香不成廠。其分也爭相雄長。其合也併力把持。特衆欺民。漸而抗官藐法。是以有礦之地。不獨官懼考成。並紳士居民。亦皆懷然防範。（皇朝經世文續編卷二六林

則徐查勘礦情形試行開採疏）

光緒九年。一八八三年諭……湖南耒陽縣奸民。充當採煤窿戶。誘買窮民。闢禁土室。逼令作工。並設立各種名目。肆行陵虐。每歲致斃人命甚多……奸徒漁利。戕害生命。實屬犷悍殘忍。目無法紀。現下寶第查明懲辦。著即飭令地方官。勒石永禁。毋得視為具文。至此項人犯。如何明定治罪專條。著刑部議奏。（皇朝續文獻通考卷四四征權考）

（丙）礦之生產

「明代鑛產」

明代產額。見于官書者。以供官用而已。民間開採。必足供其所需。唯金銀之產。一代獨少。大臣受賜多至百金爲止。萬曆以後。始通用銀。豈來自海舶耶。

國初。定各處鑛冶。該鐵一千八百四十七萬五千二十六斤。湖廣六百七十五萬二千九百二十七斤。廣東一百八十九萬六千六百四十一斤。北平三十五萬一千二百四十一斤。江西三百二十六萬斤。陝西一萬二千六百六十六斤。山東三百一十五萬二千一百八十七斤。四川四十六萬八千八百八十九斤。河南七十一萬八千三百三十六斤。浙江五十九萬一千六百八十六斤。山西一百一十四萬六千九百一十七斤。福建一十二萬四千三百三十六斤。（大明會典卷一九四工部）

洪武二十年。一三八七年延平府尤溪縣銀屏山。嘗設場局煎煉銀礦。置鑪冶四十二座。歲辦銀二千一百兩。至是增其額。（續文獻通考卷二三征權考）

宣德三年。一四二八年……江西德興鉛山二縣銅場。歲浸銅得五十餘萬斤。（續文獻通考卷二三征權考）

宣德五年。一四三〇年……浙江布政司王澤言。平陽、麗水等七縣銀冶。自永樂間遣官閤辦。共歲額八萬七千八百兩。

（續文獻通考卷二三征權考）

嘉靖十六年。一五三七年山東巡按李松言。沂州寶山開礦七十八所。得白金一萬一千三百兩。（續文獻通考卷

二三征權考）

皇店採礦。據一歲所進。爲數不多。而官民賠賂之繁。有什佰於此者。加以原奏棍徒假公濟私。侵漁國課。剝削民膏。朝廷但見其進解之來。而不見貽害之大。（皇明經世文編卷四〇八張洪陽文集回奏御札揭）

蜀之民苦極矣。……採礦則有供給之苦。賠累之苦。……皇上以爲不忍加派於民。而姑取之於地也。……礦砂不足。不得不求足於民。故歲進之礦銀。什七皆小民之脂膏。而差官之私橐不與焉。（皇明經世文編卷四三五余文恪四川礦稅）

皇上以爲今礦尙採之山與。……自開採不止。地無餘骨。而處處包礦。則蒼黎之骨髓也。（皇明經世文編卷四三六朱文懿公文集請停止礦稅疏）

「清代鑛產」

清代鑛產較明爲盛。尤盛于雲南。乾隆以後。全國之銅約百廠。而滇有四十八廠。全國之金二十五廠。而滇有其七。銀廠凡三十六。永善、巧家、魯甸。卽漢代朱提之地。川、黔、湘、粵、贛五省之人。麇集其地。從事開採者。恆數萬人。窰硎深達數十里。或掘銀苗。或就黑鉛提鍊。得銀無算。後以銀盛銅衰。不給京運。又慮鑪丁衆多爲患。盡予封閉。光緒中。以制錢缺乏。命唐炯督辦雲南鑛務。所重者銅斤。僅出資購砂丁之銅。歲得百餘萬斤。不及全盛時十分之一。

乾隆十六年。一七五一年……京局歲需鉛七十萬餘斤。前於黔省黑鉛短少不能辦解案內。臣部酌議題交湖南接辦。（皇朝文獻通考卷三〇征權考）

乾隆二十九年。一七六四年四川總督阿爾泰奏。屏山縣之李村、石堰、鳳村及利店、茨藜、榮丁等處產鐵。……每歲計得生鐵三萬八千八百八十斤。（皇朝文獻通考卷三〇征權考）

乾隆三十年。一七六五年四川總督阿爾泰奏。江油縣木通溪和合硎等處產鐵。……每歲得生鐵二萬九千一百六十觔。（皇朝文獻通考卷三〇征權考）

乾隆三十年。一七六五年華陰縣之華陽川地方產黑鉛。自乾隆十三年。一七四八年題准開採。每年得鉛五六萬觔至十萬觔不等。自二十三年。一七五八年以後。得鉛日以減少。至二十八年。一七六三年。僅得四百觔。（皇朝文獻通考

卷三〇征權考

乾隆三十一年。^{一七六}四川總督阿爾泰奏。宜賓縣濫壩等處產鐵。……每歲計得生鐵九千七百二十觔。^{六年}

（皇朝文獻通考卷三〇征權考）

乾隆三十一年。^{一七六}貴州巡撫方世儒奏。清平縣之永興寨產黑鉛。……照例抽課。每年可收課鉛一萬二

三千觔。（皇朝文獻通考卷三〇征權考）

夫滇銅之始歸官賣也。歲供本路鑄錢九萬餘千。及運湖廣、江西錢四萬串。計纔需用一百一萬斤耳。至雍正

五年。^{一七二}滇廠獲銅三百數十萬斤。始議發運鎮江漢口各一百餘萬。聽江南、湖南、湖北受買。至雍正十年。

^{七年}發運廣西錢六萬二千餘串。亦僅需銅四十餘萬。其明年。欽奉世宗憲皇帝諭旨。議於廣西府設局開

鑄。歲運京錢三十四萬四千六十二串。計亦止需銅一百六十六萬三千餘斤。乾隆二年。^{一七三}總督尹文端

公繼善。……請敕江浙赴滇買銅二百萬斤。雲南依准部文解運京錢之外。仍解京錢三十餘萬。以足二百萬

之數。而直隸總督李衛。又以他處遠買滇銅轉解。孰與雲南徑運京局。由是各省供京之正銅及加耗。悉歸雲

南辦解。然尙止於四百四十萬也。未幾。而議以停運京錢之正耗銅。改爲加運京銅一百八十九萬餘斤矣。又

未幾。而福建採買二十餘萬斤矣。湖北採買五十餘萬斤矣。浙江採買二十餘萬斤矣。貴州採買四十八萬餘

斤矣。既而廣西以鹽易銅十六萬餘斤矣。既而陝西罷買川銅。改買滇銅三十五萬。尋又增爲四十萬斤矣。於

是雲南歲需備銅九百餘萬。而後足供京外之取。而滇局鼓鑄尙不與焉。……嘗稽滇銅之產。其初之一二百

萬斤者不論矣。自乾隆四、五年^{一七三九、一七四〇年}以來。大抵歲產六七百萬耳。多者八九百萬耳。其最多者千有餘萬。至於一千二三百萬止矣。今乾隆三十八年^{一七七三年}、三十九年^{一七七四年}皆以一千二百數十萬告。(皇朝經世文編卷五二王太岳銅政議上)

光緒十年。^{一八八四年}戶部奏。略稱滇省產銅。自乾隆以來。每年部撥銅本銀一百萬兩。歲運京銅六百三十餘萬斤。而本省之鼓鑄。各省之採買資焉。……自光緒元年^{一八七五年}起。已歷十載。運辦京銅只五百萬斤。尙不及常年一年之額。(皇朝續文獻通考卷四四征權考)

光緒十五年。^{一八八九年}唐炯奏。……東川、昭通兩府。開辦各廠。……大約本年可得銅一百數十萬報解。(皇朝續文獻通考卷四四征權考)

(丁) 廠

「鐵廠」

鐵木之廠。其來久矣。用地廣。需人衆。非室廬所容。必在高敞之地。故曰廠。或曰場。山居之人多從事于此。鐵廠必兼爐冶。其在城市村鎮間者。則爲昔之官冶。遵化鐵爐。五代時物也。

遵化鐵廠鐵課。成化十九年。^{一四八三年}令歲運京鐵三十萬斤。……正德四年。^{一五〇九年}開大鑑爐十座。共鍊生鐵

四十八萬六千斤。白作爐二十座。鍊熟鐵二十萬八千斤。鋼鐵一萬二千斤。六年。一五一一年開大鑑爐五座。白作爐八座。鍊生熟鋼鐵如前。八年。一五一三年令生鐵免炒。嘉靖八年一五二九年以後。每歲大鑑爐三座。鍊生板鐵十八萬八千八百斤。生碎鐵六萬四千斤。發白作爐鍊熟掛鐵二十萬八千斤解京。（大明會典卷一九四工部）京東北遵化境有鐵爐。深一丈二尺。廣前二尺五寸。後二尺七寸。左右各一尺六寸。前開數丈爲出鐵之所。俱石砌。以簡干石爲門。牛頭石爲心。黑砂爲本。石子爲佐。時時旋下。用炭灰。置二韓扇之。得鐵日可四次。石子產於水門口。色間紅白。略似桃花。大者如斛。小者如拳。擣而碎之。以投於火。則化而爲水。石心若燥。砂不能下。以此救之。則其砂始銷成鐵。……生鐵之鍊。凡三時而成。熟鐵由生鐵五六鍊而成。鋼鐵由熟鐵九鍊而成。其爐由微而盛而衰。最多至九十日則敗矣。（孫承澤春明夢餘錄卷四六工部鐵廠）

「木廠」

凡廠皆有稅。由官稽之。否則爲私廠。若神木廠。則國家貯木材之廠也。各省交界崇山峻嶺間。多散居之人。墾地外卽從事于廠。自唐宋以來卽有之。其地有以廠名者。亦有逐漸成爲繁盛之區。改設府縣治者。

崇文門外有神木廠。舊額發虎賁等十七京衛。通州等二十五外衛軍餘一千名。在廠工辦。逃故僉補後。止存八百二十一名。內上工二百名。雜差管事四十一名。大木廠借工一百二十名。其餘皆辦樁木。每名月辦二根。

以備苦蓋。朝陽門外有大木廠。與神木廠同。凡各省採到木植。俱於二廠堆放。永樂中。營建北京宮殿。令四川、湖廣、江西、浙江、山西採木。嘉靖三十六年。一五五七年營建朝門午樓。議准材木先儘神木廠。次差御史、郎中各一員。挨查先年沿途遺有大木解用。又令川、貴、湖廣三省採木。山西、真定採松木。浙江、徽州採鷹架木。（大明會典卷一九〇工部）

初。交山之民。雖耕穫地少。然茂林深澗。便芻牧。順治五年。一六四八年禁民間養馬。山民始困。山中又產木。歲採伐。

貯山口之南堡村廠場交易。歲納布政司稅六兩。隣近府縣販賣者四集。連山數百里藉以給。而山口貧民。遇

貯賣。役力拖撐。無凍餒者。以故南堡村落。烟火頗盛。康熙二年。一六六三年文水民爭利搆訟。前巡撫楊熙不許立

廠。聽山民沿河變賣。商販不至。而文水民遂立私廠於文水之峪口。去南堡村十有五里。交山木不到峪口即

不得賣。力費利薄。山民愈困。八年。一六六九年正月初七日。……翼日。村民數十人。連名呈懇申詳。重立廠場救民

命。趙吉士知縣復一一而訊。委曲既悉。爲文詳布政司。……吉士曰。山木之出。必乘水漲。水漲不時。若無廠場。

即不能隨到隨貯。山木貯積。豈無偷盜。必須人守。無廠場則無地主。即不能自往自來。且沿河非一定之地。沿

河變賣。又無一定之時。是賣者買者。嘗兩不可必也。賣木之民。撐木出山。嘗數百十里。販木之民。挈資入境。亦

嘗數百十里。而皆待交易於不可必得之中。此所以廠場一廢。交易兩絕也。……三月。布政司如議。遂出示。於

西山谷口之水泉灘。復立場交易。山民歡呼。商販日至。（夏駟交山平寇本末卷中）

乾隆二十四年。一七五九年定山西穆納山徵收木植稅課。……今酌議召募殷實諳練者爲商總。其散商或三四

人或五六人。不得過六名之數。每商一名。其名下砍運工丁。不得過一百名。給與該商人印照。指定山溝。分編字號。在山伐運。……至開採數年之後。大木無有。所有商丁。自應概行查逐出山。以免逗留滋事。從之。（皇朝文獻通考卷三一征權考）

山內營生之計。開荒之外。有鐵廠、木廠、紙廠、耳廠各項。一廠多者恆數百人。少者亦數十人。……凡開廠之商。必有貲本。足以養活廠內之人。必有力量的。足以驅使廠內之人。工作本利其貲值。帖然爲用。……叢竹生山中。遍嶺漫谷。最爲茂密。取以作紙。工本無多。獲利頗易。故處處皆有紙廠。山內險阻。老林之虬幹繆枝。固爲一端。而挂衣刺眼。令人不能展布。則叢竹之爲患更烈。竹筠常青。春燒不然。多有竹廠砍伐。非惟利民。亦可除害。（嚴如煜三省山內風土雜識）

所謂耳廠者。卽銀耳、木耳之培植者。

山內有耳扒者。將青桐木砍伐作架。至次年漸生耳。其利可以三年。耳盡而新蓄之青桐木。又可作扒。再有作曹扒者。另是一種木。間有取松樹爲之。洵陽則出構櫬。狀如麻。蘇廣爲紗羅者參用之。此數種皆山貨之貴重者。（嚴如煜三省山內風土雜識）

（三）學術

（1）理學

(甲)紫陽之學

明代表章朱子尊崇理學

英宗之世。河東薛瑄以醇儒預機政。雖弗究於用。其清修篤學。海內宗焉。吳與弼以名儒被薦。天子修幣聘之。殊禮。前席延見。……白沙而後。曠典缺如。原夫明初諸儒。皆朱子門人之支流餘裔。師承有自。矩矱秩然。曹端、胡居仁篤踐履。謹繩墨。守先儒之正傳。無敢改錯。學術之分。則自陳獻章、王守仁始。宗獻章者曰江門之學。孤行獨詣。其傳不遠。宗守仁者曰姚江之學。別立宗旨。顯與朱子背馳。門徒徧天下。流傳逾百年。其教大行。其弊滋甚。嘉隆而後。篤信程朱。不遷異說者。無復幾人矣。(明史卷二八二儒林傳序)

薛瑄字德溫。河津人。……高密魏希文。海寧范汝舟。深於理學。……爲瑄師。……究心洛閩淵源。至忘寢食。……舉河南鄉試第一。時永樂十有八年也。明年成進士。……居父喪。悉遵古禮。……爲山東提學僉事。首揭白鹿洞學規。開示學者。延見諸生。親爲講授。……爲大理左少卿。……御史王文承^王振旨誣瑄。……下獄論瑄死。……瑄讀易自如。……免。……英宗復辟。拜禮部右侍郎。兼翰林院學士。入閣預機務。……疏乞骸骨。……許之歸。瑄學一本程朱。其修己教人。以復性爲主。充養邃密。言動咸可法。嘗曰。自考亭以還。斯道已大明。無煩著作。直須躬行耳。有讀書錄二十卷。平易簡切。皆自言其所得。學者宗之。……卒年七十有二。……諡文清。

(明史卷二八二薛瑄傳)

吳與弼字子傳。崇仁人。……年十九。見伊洛淵源圖。慨然嚮慕。遂罷舉子業。盡讀四子五經洛閩諸錄。不下樓者數年。……天順元年。……徵與弼赴闕。……留京師二月。以疾篤請。……放還。……成化五年卒。年七十九。……所著日錄。悉自言生平所得。其門人最著者曰胡居仁、陳獻章、婁諒。次曰胡九韶、謝復、鄭伉。（明史卷二八二吳與弼傳）

陳獻章字公甫。新會人。……從吳與弼講學。居半載。歸。讀書窮日夜不輟。築陽春臺。靜坐其中。數年。無戶外跡。……獻章之學。以靜爲主。其教學者。但令端坐澄心。於靜中養出端倪。或勸之著述。不答。嘗自言曰。吾年二十七。始從吳聘君學。於古聖賢之書。無所不講。然未知入處。比歸白沙。專求用力之方。亦卒未有得。於是舍繁求約。靜坐久之。然後見吾心之體。隱然呈露。日用應酬。隨吾所欲。如馬之卸勒也。其學灑然獨得。論者謂有鳶飛魚躍之樂。而蘭谿姜麟至以爲活孟子云。……卒年七十三。（明史卷二八三陳獻章傳）

（乙）陽明之學

王學近於陸象山。其要在致良知與知行合一二者。陽明以事功顯。故其學最爲切實有用。學說具傳習錄中。

王守仁字伯安。學者稱爲陽明先生。餘姚人也。……登弘治己未進士第。授刑部主事。……以左僉都御史巡撫南贛。……討宸濠。……三戰俘濠。……陞南京兵部尙書。封新建伯。……年五十七。……先生憫宋儒之後

學者以知識爲知。謂人心之所有者不過明覺。而理爲天地萬物之所公共。故必窮盡天地萬物之理。然後吾心之明覺。與之渾合而無間。說是無內外。其實全靠外來聞見以填補其靈明者也。先生以聖人之學。心學也。心卽理也。故於致知格物之訓。不得不言致吾心之天理於事物。以知識爲知。則輕浮而不實。故必以力行爲工夫。良知感應神速無有等待。本心之明卽知不欺。本心之明卽行也。不得不言知行合一。此其立言之大旨。不出於是。（黃宗羲明儒學案卷一〇姚江一王守仁）

王學末流多變其宗。著名者有李贄。

李卓吾名載贄。福建晉江人。登鄉榜。仕至姚安府太守。無子。生平博學。深於內典。好爲驚世駭俗之論。務返宋儒道學之說。致仕後。遂祝髮住楚黃州府龍潭山中。儒釋從之者。幾千萬人。其學以解脫直截爲宗。少年高曠豪舉之士。多樂慕之。後學如狂。不但儒教潰防。而釋氏繩檢。亦多所屑棄。自謂具千古隻眼。標震世奇蹤。而以此爲訓。末流之弊。不知所終矣。又刊刻藏書焚書等。如以秦始皇、武則天爲聖君。馮道爲救時賢相。以張巡死節時。厲鬼殺賊等語爲放屁。識者恨之。鄞縣沈相公當國時。有科道論列。逮至錦衣衛獄。死焉。（沈瓚近事叢殘）

最貽人口實者。則顏山農、何心隱也。

顏山農、何心隱皆假道學之名。恣爲姦利。而士大夫多爲其所惑。（王之垣歷仕錄）
何心尹者。本名梁汝元。吉之永豐人也。有氣魄。爲顏山農之高弟。後以事直斥山農之非。反使之拜。以示不復

爲弟子。爲諸生時。與誦尙書豹爭墳地。一夜率衆賭其山。尙書告官捕之。殺公差而逃。動以聖人自期。以爲聖人之出。不爲天下君。則爲天下相。大賢以下人。卿貳以下官。皆不屑也。亦有過人處。能一見決人賢否貴賤。器器自得。……張居正爲政府。何方客遊楚。張諭楚中撫臺訪逮。榜殺之。（沈瓚近事叢殘）

（丙）東林講學

張居正毀書院。萬曆以後。講學者復盛。黨爭甚烈。明末死義者衆。皆與理學有關。

得先輩邵實所修楊時東林祠遺址於東林庵旁。闢爲東林書院。大會吳越之士講習其中。歲有會。月有紀。而東林之名滿天下矣。（陳鼎東林列傳卷二顧憲成傳）

東林自顧涇陽先生於萬曆二十二年會推閣臣罷歸。與同邑高景逸、劉本儒、安我素諸君子講學之所。一時清流趨之如市。而東林之名遂滿天下。推其名高之故。始於爭立國本。……受黜者身去而名高。東林君子之譽沸宇內。尊其言爲清議。卽中朝亦以其是非爲低昂。門庭愈峻。而求進者愈衆。……於時廟廊之上。或以清流自負者。小人輒忌之嫉之。擠以污垢之秩。……每罷官歸里者。若破車罷馬。殘書數簞。鄉黨卒以爲賢。願與約婚姻。結金蘭。相與往還不倦。若歸有餘貲。買田宅。高棟宇。卽親弟姪亦鄙以爲貪夫。至於親戚朋友。老死不相往來。……雖黃童白叟。婦人女子皆知東林爲賢。販夫豎子或相誚讓。輒曰。汝東林賢者耶。何其清白如是耶。……自涇陽先生救淮撫之書出。而東林之禍萌。未幾妖書獄起。梃擊案興。……爭紅丸。爭移宮。而東林之禍熾矣。及夫熹宗委命閹寺。熊、王之獄既成。楊、左之禍遂烈。又假三案以媒孽東林。而正人君子幾無噍類。……

崔、魏、煥、逆。不有楊、左諸君。則趙高問鼎矣。闖賊喋血。不有范景文、李邦華、倪元璐、劉理順、馬世奇諸公。則河岳蒙羞。乾坤削色矣。……東林初起者。爲顧憲成、爲高攀龍、爲鄒元標、爲趙南星。繼之者爲楊、左斗光。再繼之文震孟、姚希孟。最後則馬世奇輩。皆節義文章足以驚天地動鬼神者也。（陳鼎東林列傳卷二）

（丁）清初三大儒

顧炎武、王夫之近於朱。黃宗羲近於王。而皆志節炳然。夫之尤堅苦卓絕。顧、王皆不肯居講學之名。

顧炎武字寧人。初名絳。崑山人。……其論學以博學有恥爲先。嘗與友人論學云。百餘年來之爲學者。往往言心言性。而茫然不得其解也。命與仁。夫子所罕言。性與天道。子貢所未得聞。性命之理。著之易傳。未嘗數以語人。其答問士。則曰。行己有恥。其爲學。則曰。好古敏求。其與門弟子言。但曰。允執厥中。四海困窮。天祿永終。其告哀公明善之功。先之以博學。顏子幾於聖人。猶曰。博我以文。自曾子而下。篤實莫若子夏。言仁。則曰。博學而篤志。切問而近思。今之君子則不然。聚賓客。門人數十百人。與之言心言性。舍多學而識。以求一貫之方。置四海之困窮不言。而講危微精一。是必其道高於夫子。而其弟子之賢於子貢也。我弗敢知也。孟子一書。言心言性亦諄諄矣。乃至萬章、公孫丑、陳代、陳臻、周霄、彭更之所問。與孟子之所答。常在乎出處、去就、辭受、取與之間。是故性也、命也、天也。夫子之所罕言。而今之君子之所恒言也。出處、去就、辭受、取與之辨。孔子、孟子之所恒言。而

今之君子所罕言也。愚所謂聖人之道者如之何。曰博學於文。曰行己有恥。自一身以至於天下國家。皆學之事也。自子臣弟友。以至出入、往來、辭受、取與之間。皆有恥之事也。士而不先言恥。則爲無本之人。非好古多聞。則爲空虛之學。以無本之人而講空虛之學。吾見其日從事於聖人去之彌遠也。又曰。今之理學。禪學也。不取之五經論語。而但資之語錄。不知本矣。其論文。非有關於經旨世務者。皆謂之巧言。不以措筆。……炎武撰天下郡國利病書一百二十卷。……肇域志一編。……音論三卷。……詩本音十卷。……易音三卷。……唐韻正二十卷。韻補正一卷。古音表二卷。……金石文字記。求古錄。……日知錄三十卷。……杜解補正三卷。……石經考。二十一史年表。歷代帝王宅京記。亭林文集詩集。營平二州地名記。昌平山水記。山東考古錄。譙觚。菰中隨筆。救文格論等書。並有補於學術世道。……在華陰。與王宏撰等於雲臺觀側建朱子祠。……康熙二十一年卒於華陰。年六十九。（張穆亭林年譜附儒林傳）

晚益篤志六經。謂古今安得別有所謂理學者。經學卽理學也。自有舍經學以言理學者。而後邪說以起。不知舍經學則其所謂理學者禪學也。故其本朱子之說。參之以慈谿黃東發日抄。所以歸咎於上蔡、橫浦、象山者甚峻。（全祖望鮚埼亭集卷一二亭林先生神道表）

黃宗羲字太冲。餘姚人。……日夕讀書。十三經、二十一史及百家、九流、天文、曆算、道藏、佛藏。靡不究心焉。……以戴山劉忠正公宗周爲師。……魯王監國。……宗羲糾黃竹浦子弟數百人隨諸軍。……授職方司員外。……再晉左副都御史。……海氛靖後。……始奉母返里門。復舉戴山證人書院之會。從之請學者數百人。嘗謂

明人講學。語錄之糟粕。不以六經爲根柢。束書不讀。但從事於游談。學者必先窮經。經術所以經世。乃不爲迂儒。又謂讀書不多。無以證斯理之變。讀書多而不求於心。則又爲僞儒矣。故受其教者。不墮講學之弊。不爲障霧之言。其學盛行於東南。當時有南姚江。西二曲之稱。二曲者李中孚也。……宗羲之學。出自蕺山。雖姚江之派。然以慎獨爲宗。實踐爲主。不恣言心性。墮入禪門。乃姚江之諍子也。又以南宋以後。講學家空談性命。不論訓詁。教學者說經則宗漢儒。立身則宗宋學。……所著有明儒學案六十二卷。宋儒學案。元儒學案。易學象數論六卷。辨河洛方位說之非。授書隨筆一卷。則閻若璩問尙書而答之者。春秋日食曆一卷。律呂新義二卷。……孟子師說四卷。……明史案二百四十四卷。弘光紀年一卷。龍武紀年一卷。永曆紀年一卷。魯紀年一卷。贛州失事紀一卷。紹武事紀一卷。四明山寨紀一卷。海外痛哭紀一卷。日本乞師記一卷。舟山興廢一卷。沙定洲記亂一卷。賜姓本末一卷。汰存錄一卷。……授時曆故一卷。大統曆推一卷。授時曆假如一卷。西曆假如一卷。回曆假如一卷。氣運算法。勾股圖說。開方命算測圓要諸書。又有今水經。四明山志。台岩紀游。匡廬游錄。病榻隨筆。明文海四百八十二卷。……續宋文鑑。元文抄。……思舊錄。姚江瑣事。姚江文略。姚江逸詩。自著年譜。明夷待訪錄二卷。南雷文案十卷。外集一卷。吾悔集四卷。撰杖集四卷。蜀山集四卷。詩曆四卷。又分爲南雷文定。南雷文約。合之得四十卷。明夷留書一卷。言王佐之略。崑山顧絳見而歎曰。三代之治可復也。又欲修宋史而未成。僅存叢目補遺三卷。……卒年八十有六。（江藩漢學師承記卷八）

王夫之字而農。湖南衡陽人。……少負儒才。讀書十行俱下。與兄介之同舉崇禎十五年鄉試。……築土室石

船山名曰觀生。居杜門著述。其學深博無涯涘。以漢儒爲門戶。以宋五子爲堂奧。所作大學衍、中庸衍。皆力闡致良知之說。以羽翼朱子。而於正蒙一書。尤有默契。精釋而暢衍之。爲正蒙注九卷。思問錄內外篇各一卷。以爲張子之學。上承孔孟之志。下救來茲之失。如皎日麗天。無幽不燭。聖人復起。未之能易。惟其門人未有。殆庶世之信從者寡。道之誠然者不著。是以不百年而異說興。又不二百年而邪說熾。因推本陰陽法象之狀。往來原反之故。反覆辨論。所以歸咎上蔡、象山、姚江者甚峻。所著諸經有易、書、詩、春秋稗疏。共十四卷。……周易內外傳。大象解。尙書引義。詩廣傳。禮記章句。春秋家說。世論續。左氏傳博議。四書稗疏。訓義詳解讀。四書大全說。諸經考異。說文廣義。讀通鑑論。宋論。永曆實錄。及注釋老莊、呂覽、淮南、楚辭、薑齋詩文集等書。凡三百餘卷。……康熙……三十一年卒。年七十四。（清史列傳儒林傳王夫之傳）

天下師師。誰別玉珉。往苒首解。大命以淪。於是哀其所敗。原其所劇。始於嬴秦。沿於趙宋。以自毀其極。推初弱喪。具有倫脊。故哀怨繁心。於邑填膈。矯其所自失。以返軒轅之區畫。延明聖明。中邦作辟。行其教。制其辟。以藩扞中區。而終遠夷狄。則形質消隕。靈爽亦爲之悅懌矣。歲德在丙。火運宣也。斗建維辰。春氣全也。文明以應。竊承天也。太原之系。世胄綿也。爲漢大行。忠效捐也。悲懣窮愁。退論旃也。明明我后。遞播遷也。俟之方將。須永年也。黃書之所以傳也。意在斯乎。（王夫之黃書後序）

於大學補傳。爲之衍曰。……取大學之教。疾趨以附二氏之塗。以其恍惚空明之見。名之曰。此明德也。此知也。此致良知而明明德也。體用一。知行合。善惡泯。介然有覺。頽然任之。而德明於天下矣。乃羅織朱子之過。而以

窮理格物爲其大罪。天下之長難苟安。以希冀不勞。無所忌憚。而坐致聖賢者。翕然起而從之。嗚呼。彼之爲師者。與其繁有之徒。其所用心。吾既知之矣。（唐鑑學案小識卷三）

同時尊紫陽者。有張履祥、呂留良、陸世儀、陳瑚、朱王並重者。有孫奇逢、李顥。

張履祥字考夫。浙江桐鄉人。……年三十四。如山陰。受業劉宗周之門。歸而自謂有得。年三十九。友人規之曰。欲誠其意。先致其知。因覺人譖獨體。猶染陽明。遂一意程朱之學。與烏程凌克貞、海鹽何汝霖、歸安沈磊切劘講習。專務躬行。其學大要以仁爲本。以修己爲務。而以中庸爲歸。窮理居敬。宗法考亭。知行並進。內外夾持。無一念非學問。無一事非學問。……康熙十三年卒。年六十四。（清史列傳儒林傳張履祥傳）

先君諱留良。……號晚村。姓呂氏。……與桐鄉張考夫、鹽官何商隱、吳江江佩葱諸先生。及同志數人。共力發明洛閩之學。……欲補輯朱子近思錄。……嘗謂洛閩淵源至靖難時中絕。後來月川、敬軒、康齋、敬齋諸人。顛末由藥。僅能敷述緒論。而微言不傳。白沙、陽明乘吾道無人之時。祖大慧之餘智。改頭換面。陽儒陰釋。以瞽瞍天下之耳目。而陽明之才氣。尤足以鉗錘駕馭。自是以後。士之卑靡者。既溺於科舉詞章之習。其有志於講明此理者。俛俛然如瞽之無相。總不能脫離姚江之圈襪。若羅整庵之困知記、陳清瀾之學菰通辨。蓋嘗極力攻其瑕類。而所見猶粗。至後此講學諸儒。未嘗不號宗朱。及論至精微所在。則猶然金溪黑腰也。然則此學何由而明哉。……卒康熙癸亥。享年五十有五。（晚村文集附呂公忠先府君行述）

陸世儀字道威。江南太倉州人。……嘗欲從劉宗周問學。不果。……篤守程朱。自言初有得於心。爲嚴師。隨事

精察八字。謂心爲嚴師。卽居敬。隨事精察。卽窮理。既有得於理一分殊四字。謂聖賢工夫。隨事精察是起手。一以貫之是究竟。而此四字自精察而造一貫之階梯也。……卒年六十二。（清史列傳儒林傳陸世儀傳）

陳瑚字言夏。亦太倉州人。……瑚之學博大精深。尤講求經濟大略。暇則橫槊舞劍。彎弓注矢。其鑿刺妙天下。……康熙十四年卒。年六十三。（清史列傳儒林傳陳瑚傳）

孫奇逢字啓泰。直隸容城人。……順治二年。……徵。……以病辭。……闢兼山堂。讀易其中。率子弟躬耕自給。

……奇逢之學。原本象山、陽明。而兼采程朱之旨。以彌闕失。其論學以慎獨爲宗。以體認天理爲要。以日用倫常爲實際。而其大本主於窮則勵行。出則經世。其治身務自刻勵。而於人無叮咛。有問學者。隨其高下淺深。必開以性之所近。使自力於庸行。上自公卿大夫。下及野人。牧豎、武夫、悍卒。壹以誠意接之。用此名在天下。而人無忌嫉。……又表周、程、張、邵、朱、陸。及薛瑄、王守仁、羅洪先、顧憲成爲十一子。以爲直接道統之傳。……康熙十四年卒。年九十二。（清史列傳儒林傳孫奇逢傳）

康熙三年甲辰。八十一歲。二月。聞濟上事。余具呈當事。北行。（原註。順治九年。曾奉旨詳察確訪明末死難之人。在廷諸臣各舉所知。先生故有甲申大難錄一編。濟寧州牧李爲授梓。至是嚴野史之禁。有老蠹見編內有野史氏字。以爲此奇貨可居。遂首大部。李被逮。此信初傳。聞者皆爲變色。先生正在水部座上。聞之。飲食談笑自若。曰。天下事只論有愧無愧。不論有禍無禍。八十一歲老人。得此已足矣。遂投呈當事。自請赴部。）三月。至中途。聞簡。原書特爲表忠。毫無觸忌。釋濟守歸。余遂返。（原註。答同人慰問云。當此之時。誰敢自謂無過。所恃者

此心無疚。禍患死生。聽之而已。借鬼神之祐。同人之庇。幸不罹于法網。實出望外。從此當閉戶修省。以答神人之休。默之一字。原聖人微妙處。其默足容。此是何等功力。何等境地。願與諸同人精思而實體之。）（霍炳徵君孫先生年譜卷下）

十辭辟召。蚤謝公車。……曲避僞檄之催選。從容就道。首認野史。……予故信其有陽明本領。而無其任用也。（霍炳徵君孫先生年譜序）

李顥字中孚。陝西盩厔人。……其學以尊德性爲本體。以道問學爲工夫。以悔過自新爲始基。以靜坐觀心爲入手。……居恒教人。一以反身實踐爲事。謂孔、曾、思、孟立言垂訓。蓋欲學者體諸身。見諸行。充之爲天德。達之爲王道。有體有用。有補於世。否則假途干進。豈聖賢立言之初心。國家期望之本意耶。時容城孫奇逢之學盛於北。餘姚黃宗羲之學盛於南。與顥鼎足。世稱三大儒。惟顥起自孤根。上接關學之傳。尤爲難及云。……卒年七十六。（清史列傳儒林傳李顥傳）

（戊）顏李之學

理學專重實用者。爲顏李之學。

顏元字易直。直隸博野人。……其爲學。以堯舜之道在六府三事。周公教士以三物。孔子以四教。非主靜專誦讀。流爲禪宗俗學者所可託。乃易靜坐以習恭。內而敬直。外而九容交攝。讀書擇經史有用者。餘不盡究。嚴課孝弟謹信。稽禮樂兵農之尤宜今古者。爲倡六藝。以教來學。……著存性篇二卷。……存學編四卷。……存治

編一卷。大旨欲全復井田、封建、學校、徵辟、肉刑及寓兵於農之法。又存人編四卷。大旨戒愚民奉佛及儒者談禪。……康熙四十三年卒。年七十。……常語友人曰。如天不廢予。將以七字富天下。墾荒、均田、興水利。以六字

強天下。人皆兵。官皆將。以九字安天下。舉人才。正大經。興禮樂。其自負如此。（清史列傳儒林傳顏元傳）

李據字剛主。直隸蠡縣人。……據弱冠學禮於顏元。又學琴於張而素。學射於趙思光。學數於劉見田。學書於

彭通。學兵法於王餘祐。於田賦、禘祫、郊社、宗廟諸大典。靡不研究。摭摭史志所載經史大略。爲廖志編以備用。既而深服顏元六藝之教。遂執贄稱弟子。……平書者。大興王源所著。據訂之。爲分民、分土、建官、取士、制田、武備六政者也。……雍正十一年卒。年七十五。（清史列傳儒林傳李據傳）

（己）道光後理學復興

乾、嘉之際。考據盛行。理學寢衰。海疆事起。說者謂由考據破碎所致。未免過甚。但學風由此遂變。爲漢學者多。漢宋兼包。爲理學者多。言排外。倭仁以詆同文館著名。徐桐以理學自命。實兼學淨土宗。又信術數之學。而贊義和團最力。

華亭倪奮香明經元坦。營刻二曲集錄要六卷、儒林法語要七卷、儒學入門一卷及自著書共九種。今名讀易樓合刻。嘉慶己卯入都。因會稽莫侍郎晉。得交諸公卿。力言正人心息邪說。莫如興理學。當軸者信之。道光初元以後。睢州、容城、宣公、戴山、漳浦、寧陵諸儒。先後從祀廟廡。湯文端公刻四書反身錄。麟見亭觀察刻二曲全

集。莫侍郎刻明儒學案。潘文恭公刻正學編。程簡敬刻新吾全集。盧容菴通參刻爲學須知。宋學復盛。乃自一老明經開其端。乾嘉考證校讎瑣碎之態稍息矣。（平步青霞外攬屑卷五）

唐鑑字鏡海。善化人。……爲太常寺卿。海疆事起。嚴効琦善、耆英等。直聲震天下。鑑潛研性道。宗尙洛閩諸賢。著學案小識。推陸隴其爲傳道之首。以示宗旨。時蒙古倭仁、湘鄉曾國藩、六安吳廷棟、昆明寶玢、何桂珍。皆從鑑考問學業。陋室危坐。精思力踐。年七十。斯須必敬。致仕南歸。主講金陵書院。……咸豐……十一年卒。年八十有四。（清史稿儒林傳一唐鑑傳）

倭仁字良峰。烏齊格里氏。蒙古正紅旗人。河南駐防。……同治元年……秋。拜文淵閣大學士。……六年。同文館議考選正途五品以下京外官。入館肄習天文、算學。聘西人爲教習。倭仁謂根本之圖。在人心不在技藝。尤以西人教習爲不可。且謂必習天文算學。應求中國能精其法者。上疏請罷議。於是詔倭仁保薦。別設一館。卽由倭仁督率講求。復奏意中並無其人。不敢妄保。尋命在總理各國事務衙門行走。倭仁屢疏懇辭。不允。因稱疾篤。乞休。命解兼職。仍在弘德殿行走。（清史稿列傳一七八倭仁傳）

李棠階字文園。河南河內人。……同治元年。……命爲軍機大臣。……四年。……軍書旁午。一事稍有未安。輒憂形於色。積勞致疾。十一月卒。年六十八。……諡文清。棠階初入翰林。卽潛心理學。管手鈔湯斌遺書以自勵。會通程、朱、陸、王學說。無所偏主。要以克己復禮。身體實行爲歸。日記自省。畢生不懈。家故貧。旣貴。儉約無改。嘗曰。憂患者生之門。吾終身不敢忘。忍饑待米時也。（清史稿列傳一七八李棠階傳）

徐桐字蔭軒。漢軍正藍旗人。……光緒……二十二年。拜體仁閣大學士。桐崇宋儒說。守舊。惡西學如讎。門人言新政者。屏不令入謁。……二十六年。義和拳起。釁仇外。載漪大喜。導之入都。桐謂中國當自此強矣。至且親送之。……聯軍入。……桐迺投繯死。年八十有二矣。（清史稿列傳二五二徐桐傳）

（2）經學

（甲）明代經學之衰

永樂中。頒行五經大全。類於講章。一代學者醉心宋儒言理之書。辯朱陸異同。浮辭相尚。其稍精者。尤多倚悅不可捉摸。治經不重訓詁典制。師心自用。故明史儒林傳譏其疏漏。謂專門經訓授受源流。則二百七十餘年間。未聞以此名家者。茲略舉足以參證者如下。

周易象旨決錄七卷。明熊過撰。過字叔仁。號南沙。……明人之易。言數者入道家。言理者入釋氏。……過作此書。雖未能全復漢學。而義必考古。……凡證字一百有一。證音三十有八。證句二十有六。證脫字七十有九。證衍文三十。證當移置者三十有二。證舊以不誤爲誤者三。……間有未審。然皆據前文。非由臆撰。（四庫全書總目卷五）

周易集註十六卷。明來知德撰。知德字矣鮮。梁山人。……居萬縣深山中。精思易理。……閏二十九年而成此

書。其立說。專取繫辭中錯綜其數以論易象。而以雜卦治之。……皆由冥心力索。得其端倪。因而參互旁通。自成一說。當時推爲絕學。……（四庫全書總目卷五）

尙書考異五卷。明梅鷟撰。……是編辨正古文尙書。其謂二十五篇爲皇甫謐所作。蓋據孔穎達疏。……至謂孔安國序並增多之二十五篇。悉雜取傳記中語以成文。則指摘皆有依據。……（四庫全書總目卷一二）
尙書日記十六卷。明王樵撰。……以蔡傳爲宗。……採舊說補之。又取金履祥通鑑前編所載。凡有關當時事蹟者悉爲採入。……引據詳明。……於經旨多所發明。而亦可用於科舉。（四庫全書總目卷一二）

詩故十卷。明朱謀瑋撰。……多以漢學爲主。與朱子集傳多所異同。其間自立新義。……未免失之穿鑿。然謀瑋博極羣書。學有根柢。要異乎剽竊陳言。……（四庫全書總目卷一六）

詩經世本古義二十八卷。明何楷撰。……專主孟子知人論世之旨。依時代爲次。……各爲序目於前。又於卷末。仿序卦傳例。作屬引一篇。……於三千年後。鉤棘字句。牽合史傳。以定其名姓時代。……大惑不解。楷之謂乎。然楷學問博通。引援賅洽。凡名物訓詁。一一考證詳明。典據精確。實非宋以來諸儒所可及。（四庫全書總目卷一六）

周禮傳十卷。圖說二卷。翼傳二卷。明王應龍撰。……論說頗爲醇正。雖略於考證。而義理多所發明。（四庫全書總目卷一九）

春王正月考二卷。明張以寧撰。……徵引五經。參以史漢。著爲一書。決數百載之疑案。可謂卓識。……（四庫

全書總目卷二八

六書本義十二卷。明趙撝謙撰。……焦竑筆乘稱其字學最精。……是編……辨別六書之體。頗爲詳晰。其研索亦具有苦心。（四庫全書總目卷四一）

俗書刊誤十二卷。明焦竑撰。……其辨最詳。而又非不可施用之僻論。（四庫全書總目卷四一）

春秋事義全考十六卷。明姜寶撰。……謂孔子於周王魯侯事有非者。直著其非而已。後人說經。用惡字、罪字、譏貶字。皆非聖人之意。其言明白正大。爲啖、趙以來所未及。（四庫全書總目卷二八）

春秋億六卷。明徐學謨撰。……大旨以春秋所書。皆據舊史。舊史所闕。聖人不能增益。……一掃公羊、穀梁無字非例之說。……言簡理明。多得經旨。……（四庫全書總目卷二八）

樂律全書四十二卷。明朱載堉撰。……凡書十一種。……載堉究心律數。積畢生之力。以成是書。……所論橫黍百粒當縱黍八十一粒之尺度。及半黃鐘不與黃鐘應而半太簇與黃鐘應之說。皆精微之論。（四庫全書總目卷三八）

其思想奇特者。略如下。

易學殘本十二卷。明卓爾康撰。……大旨附會河洛。推演奇偶。紛紜轆轤。展卷如曆家之數表。（四庫全書總目卷八）

河洛定議贊一卷。明喻國人撰。其說以伏羲則河圖。畫乾、坎、艮、震四卦。則洛書。畫巽、離、坤、兌四卦。由河圖四卦。

得訟、遯十六陽卦。由洛書四卦得家人、中孚十六陰卦。合河洛迭爲上下。而得否、姤、履、泰三十二陰陽配合之卦。……自以河洛之議至此書而始定。書成。且祭河洛之神。及天地四聖。爲文以告。（四庫全書總目卷八）周易對卦數變合參一卷。明喻國人撰。謂朱子不知易中十年三年七日八日之旨。及訟九二三百戶之數。國人乃於反對兩卦得之。合屯、蒙二卦。以屯下蒙上。謂屯二爻爲一年。逆數之。至蒙五爻。歷十爻爲十年。合需、訟二卦。以需下訟上。謂訟二畫九即九十戶。訟初畫六即六十戶。需上畫六即六十戶。五畫九即九十戶。合之得三百戶。以爲此意數千年不明。真穿鑿附會之說也。（四庫全書總目卷八）

三易大傳七十二卷。明李陳玉撰。書分二冊。一曰先天古易。以解圖畫。又每篇繫以贊語。其最異者。以無極、太極、無極而太極分爲三圖。而先天八卦配以英輔九星之名。後天八卦配以疏附先後之名。支離破碎。全無理據。一曰後天周易。以解經傳。雖言象數而皆出臆說。（四庫全書總目卷八）

古書世學六卷。明豐坊撰。……其序曰。正統六年。慶官京師。朝鮮使臣嬀文卿。日本使臣徐容入貢。……以尙書質之。文卿曰。吾先王箕子所傳。起神農政典至洪範而止。睿曰。吾先王徐市所傳。起虞書帝典至秦誓而止。又笑官本錯誤甚多。……固請訂其錯誤。僅錄一典二謨。……見示。……今考明英宗實錄正統六年。無此二國使臣之名。則其爲子虛烏有。已可不辨。……（四庫全書總目卷一三）

國風尊經一卷。……明陶宗儀撰。……解君子好速云。速從求從辵。謂行而求之也。解參差荇菜云。荇從草從行。謂草生水中而東西行者也。解左右芼之云。芼從草從毛。言以菜加於食物之上。如毛之附麗於外。……穿

繫不通。不可枚舉。（四庫全書總目卷一七）

周禮述註六卷。明金瑤撰。……謂周禮之文，爲漢儒所竄改。其中有僞官亂句。悉爲考定。別以陰文書之。……若親得周公舊本。一一親校而知之者。（四庫全書總目卷二三）

禮記意評四卷。明朱泰貞撰。……棄置一切。惟事推求語氣。某字應某字。某句承某句。如場屋之講試題。非說經之道也。（四庫全書總目卷二四）

春秋說志五卷。明呂柟撰。……務爲新說苛論。凡所譏刺。皆假他事以發之。而所書之本事。反置不論。如以公及邾儀父盟于蔑。……爲平王之罪。……叔孫豹卒。經不書餓死。乃爲賢者諱。……大抵褒貶迂刻。不近情理。

（四庫全書總目卷三〇）

春秋私考三十六卷。明季本撰。……言惠公仲子非桓公之母。盜殺鄭三卿。乃晉人使刺客殺之。晉文公歸國。非秦伯所納。諸如此類。皆無稽之談。……於二千餘年之後。杜撰事實。以改易舊文。（四庫全書總目卷三〇）春秋以俟錄一卷。明瞿九思撰。……多穿鑿附會之談。如十二公配十二月。二百四十年配二十四氣之類。

（四庫全書總目卷三〇）

大學指歸二卷。附考異一卷。明魏校撰。……首以古篆寫古本正文。奇形詭狀。（四庫全書總目卷三七）

四書大全辨三十八卷。附錄六卷。明張自烈撰。……首列揭帖序文之類。盈一巨冊。而所列參訂姓氏。至四百八十六人。（四庫全書總目卷三七）

(乙)清代經學派別

清代經學。自顧炎武開始以考據之法治左傳。同時毛奇齡、朱鶴齡、馬驥、閻若璩皆有盛名。乾、嘉時。有一人而兼數經。多宗鄭玄。稱鄭學所以別於朱。稱漢學所以別於宋。多爲義疏之學。直欲越六代而接兩漢。故王懿榮有編清代十三經義疏之請。至於辨僞輯佚。自廣博而極於微細。因致瑣碎之譏。經學名家。源流有緒者。首推徽州。次則揚州、常州、蘇州。有繼其業至三、四代者。浙東西相望稱盛。故清代經學跨越前代。極盛於三吳。至乾、嘉而蔑以復加矣。北方學者。通州雷學淇、壽陽祁雋藻、平定張穆、曲阜桂馥、棲霞郝懿行、武威張澍、西南學者。浪穹王崧、番禺陳澧、遵義鄭珍。各有成就。光緒之末。俞樾極博。孫詒讓極精。王闓運徧箋十一經。皆有足多。茲述派別及家法之顯明者如次。

「蘇州之學」

蘇州惠氏之學。專經而不廢詞章。故惠棟爲王士禛精華錄作訓纂。世傳周易。以易漢學爲最精。

惠周惕原名恕。字元龍。江蘇吳縣人。父有聲。……與徐枋善。周惕少從枋游。又受業於汪琬。康熙十七年。舉博學鴻儒科。……三十年成進士。……選直隸密雲縣知縣。卒於官。周惕邃於經學。爲文章。有矩度。著有易傳二卷。詩說三卷。三禮問六卷。春秋問五卷。及硯谿詩文集。……子士奇。……字天牧。康熙五十年進士。……洊任侍讀學士。……乾隆。……六年卒。年七十一。撰易說八卷。……春秋說十五卷。……禮記說十四卷。大學說一卷。……琴瑟理數考四卷。又所著詩有紅豆齋小草。詠史樂府。及南中諸集。子七人。棟最知名。棟字定宇。元和學生員。……於經史。諸子。稗官。野乘。及七經緯之學。靡不肄業及之。小學本爾雅。六書本說文。餘及急就章。經典釋文。漢魏碑碣。……作九經古義二十二卷。……易漢學（八卷）。……易例二卷。……周易述二十卷。……明堂大道錄八卷。禘說二卷。……古文尙書考二卷。……後漢書補注二十四卷。王士禎精華錄訓纂二十四卷。九曜齋筆記。松厓筆記。松厓文鈔。及諸史會最。竹南漫錄諸書。乾隆二十三年卒。年六十二。其弟子知名者。余蕭客最爲純實。余蕭客字仲林。江蘇長洲人。……撰古經解鈎沈三十卷。……文選紀聞三十卷。文選音義八卷。文選雜題三十卷。選音樓詩拾若干卷。……乾隆四十三年卒。年四十七。（清史列傳儒林傳惠周惕傳）

沈彤字冠雲。江蘇吳江人。……乾隆元年。薦舉博學鴻儒。報罷。與修三禮及一統志。書成。授九品官。以親老歸。……撰周官祿田考三卷。……儀禮小疏一卷。……果堂集十二卷。……春秋左傳小疏。尙書小疏。氣穴考略。內經本論。……保甲論。……十七年卒。年六十五。（清史列傳儒林傳沈彤傳）

錢大昕字曉徵。江蘇嘉定人。乾隆十六年。召試舉人。授內閣中書。十九年進士。……三十九年。……提督廣東學政。……嘉慶九年卒。年七十七。大昕幼慧。善讀書。時元和惠棟、吳江沈彤以經術稱。其學求之十三經注疏。及唐以前子史小學諸書。大昕推而廣之。錯綜貫串。發古人所未發。……始以辭章名。沈德潛、吳中七子詩選。大昕居一。既乃研精經史。蔚爲著述。於經義之聚訟難決者。皆剖析源流。文字、音韻、訓詁、天算、地理、氏族、金石以及古人爵里、事實、年齒。瞭如指掌。古人賢姦是非。疑似難明者。皆有確見。……嘗與修音韻述微。續文獻通考。續通志。一統志。天球圖諸書。所著有唐石經考異一卷。經典文字考異三卷。聲類四卷。二十二史考異一百卷。唐書史臣表一卷。唐五代學士年表二卷。宋學士年表一卷。元史氏族表三卷。元史藝文志四卷。三史拾遺五卷。諸史拾遺五卷。通鑑注辨證三卷。四史朔閏考四卷。南北史雋一卷。三統術衍三卷。術鈴三卷。風俗通義逸文二卷。吳興舊德錄四卷。先德錄四卷。洪文惠年譜一卷。洪文敏年譜一卷。王伯厚年譜一卷。王弼州年譜一卷。疑年錄三卷。潛學堂文集五十卷。詩集二十卷。詞垣集四卷。潛學堂金石文跋尾二十五卷。金石文字目錄九卷。天一閣碑目二卷。養新錄二十三卷。恆言錄六卷。竹汀日記鈔三卷。族子塘、坵。能傳其學。塘字學淵。乾隆四十五年進士。改教職。選江寧府學教授。塘少大昕七歲。相與共學。又與大昕弟大昭及弟坵相切磋。爲實事求是之學。於聲音、文字、律呂。推步尤有神解。著律呂古義六卷。……史記三書釋疑三卷。……仲官雅樂釋律四卷。說文聲繫二十卷。淮南天文訓補注三卷。其所作古文。曰述古編。凡四卷。年五十六。坵字獻之。副貢生。……以直隸州州判官於陝。與洪亮吉、孫星衍討論訓詁。輿地之學。論者謂坵沈博不及大昕。而精當過

之。嘉慶二年……署華州……倣古爲合竹強弓。厚背紙爲翎。二人共發之。達百五十步。又以意爲發石之法。……著史記補注百三十卷。……詩音表一卷。車制考一卷。……（清史列傳儒林傳錢大昕傳）

錢大昭字晦之。嘉定人。太學生。大昕弟也。……少於大昕二十年。事兄如嚴師。得其指授。……著爾雅釋文補三卷。及廣雅疏義二十卷。……說文統釋六十卷。……兩漢書辨疑四十卷。……三國志辨疑三卷。……後漢書補表八卷。……詩古訓十二卷。經說十卷。補續漢書藝文志二卷。後漢郡國令長考一卷。邇言二卷。嘉定金石文字記四卷。……嘉慶……十八年卒。年七十。子東垣。繹。侗。東垣字旣勤。嘉慶三年舉人。官浙江松陽縣知縣。以艱歸。服闋。補上虞縣。東垣與弟繹。侗。皆潛研經史金石。時稱三鳳。……爲孟子解誼十四卷。……小爾雅校證二卷。補經義考四十卷。列代建元表。勤有堂文集。繹初名東塘。字以成。……爲十三經斷句考。又著方言箋疏十三卷。……說文解字讀若考三卷。闕疑補一卷。釋大。釋小各一卷。釋曲一卷。訓詁類纂一百六卷。侗字同人。諸生。嘉慶……十五年舉人。議敘知縣。……爲釋聲八卷。……羣經古音鈞沈四卷。正名錄四卷。九經補韻考二卷。說文音韻表五卷。……（清史列傳儒林傳錢大昭傳）

「寶應之學」

寶應諸劉。台拱、寶楠、恭冕、嶽雲。皆各有名。

劉台拱字端臨。江蘇寶應人。……九歲作顏子頌。……及長。見同里王懋竑、朱澤澐書。遂篤志程、朱之學。乾隆三十五年舉人。……與朱筠、程晉芳、戴震、邵晉涵及同郡任大椿、王念孫等遊。稽經考古。旦夕討論。……選丹

徒縣訓導……嘉慶十年卒。年五十五……稿多零落。僅輯成論語駢枝一卷。儀禮傳注一卷。經傳小記三卷。荀子補注一卷。漢學拾遺一卷。文集一卷。及方言補。校淮南子補。校國語補諸書。（清史列傳儒林傳劉台拱傳）

劉寶楠字楚楨。江蘇寶應人……從從父台拱請業。以學行聞鄉里。爲諸生時。與儀徵劉文淇齊名。人稱揚州二劉。道光二十年進士。授直隸文安縣知縣……咸豐元年調三河……五年卒。年六十五……著論語正義二十四卷……釋穀四卷……漢石例六卷……寶應圖經六卷。勝朝殉揚錄三卷。文安隄工錄六卷……端山樓詩文集。子恭冕。恭冕字叔俛。光緒五年舉人……主講湖北經心書院……卒年六十。著有論語正義補。何休論語註訓述。廣經室文鈔。（清史列傳儒林傳劉寶楠傳）

「儀徵二劉」

儀徵劉氏二世爲左傳義疏。至襄公而止。

劉文淇字孟瞻。江蘇儀徵人。嘉慶二十四年優貢生……爲左氏舊註疏證八十卷……左傳舊疏八卷……楚漢諸侯疆域志三卷……揚州水道記四卷。又讀書隨筆二十卷。文集十卷。詩一卷……卒年六十六。子毓崧。孫壽曾。能世其學。毓崧字伯山。道光二十年優貢生……成春秋左氏傳大義二卷……周易尚書毛詩禮記舊疏考正各一卷……史乘諸子通義各四卷。又經傳通義十卷。王船山年譜二卷。彭城獻徵錄十卷。舊德錄一卷。通義堂筆記十六卷。文集十六卷。詩集一卷。卒年五十。壽曾字恭甫……初文淇爲左氏春秋長

編。晚年欲編輯成疏。甫得一卷而歿。毓松思卒其業。未果。壽曾乃發憤。以繼志述事爲任。……至襄公四年而卒。年四十五。其讀左劄記。春秋五十凡例表。……亦未竟。他著有昏禮別論對駁義。南史校議集平。博雅堂集。芝雲雜記。（清史列傳儒林傳劉文淇傳）

「徽州之學」

徽州之學。始於江永。得其傳者。戴爲最精。胡爲最專。段玉裁受學於戴。而傳之陳奐。以至江沅。可謂源流至遠。

江永字慎修。安徽婺源人。諸生。……有周禮疑義舉要七卷。禮記訓義擇言六卷。深衣考誤一卷。律呂闡微十卷。律呂新論二卷。春秋地理考實四卷。鄉黨圖考十一卷。讀書隨筆十二卷。古韻標準四卷。四聲切韻表四卷。音學辨微一卷。河洛精蘊九卷。推步法解五卷。七政衍。金水二星發微。冬至權度恆氣注。曆辨。歲實消長辨。曆學補論。中西合法擬草各一卷。近思錄集注十四卷。考訂朱子世家一卷。乾隆二十七年卒。年八十二。（清史列傳儒林傳江永傳）

戴震字東原。安徽休寧人。……與郡人鄭牧、汪肇龍、汪梧鳳、方矩、程瑤田、金榜從婺源江永游。震出所學質之永。永爲之駭歎。永精禮經及推步、鐘律、音聲、文字之學。惟震能得其全。……年二十八。補諸生。……與吳縣惠棟、吳江沈彤爲忘年友。……北方學者。如獻縣紀昀、大興朱筠。南方學者。如嘉定錢大昕、王鳴盛。餘姚盧文弨。

青浦王昶。皆折節與交。尙書秦蕙田纂五禮通考。……延之纂觀象授時一門。乾隆二十七年。舉鄉試。……開四庫館。……震充纂修。四十年特命。……赴殿試。賜同進士出身。改翰林院庶吉士。……四十二年。卒於官。年五十有五。……其小學書有六書論三卷。聲韻考四卷。聲類表九卷。方言疏證十卷。……其測算書有原象四篇。迎日推策記一篇。句股割圓記三篇。曆問一卷。古曆考二卷。續天文略三卷。策算一卷。……有詩經二南補注二卷。毛鄭詩考四卷。尙書義考一卷。儀禮考正一卷。考工記圖二卷。春秋卽位改元考一卷。大學補注一卷。中庸補注一卷。……水經注四十卷。……屈原賦注七卷。……震卒後。其小學則高郵王念孫、金壇段玉裁傳之。測算之學。則曲阜孔廣森傳之。典章制度之學。則興化任大椿傳之。皆其弟子也。（清史列傳儒林傳戴震傳）

段玉裁字若膺。江蘇金壇人。……年十三。補諸生。……乾隆二十五年舉人。至京師。見休寧戴震。好其學。遂師事之。以教習。得貴州玉屏縣知縣。……著六書音韻表五卷。……尋任巫山縣。……引疾歸。……著說文解字注三十卷。……述漢讀考。先成周禮六卷。又撰禮經漢讀考一卷。……古文尙書撰異三十二卷。……春秋左氏古經十二卷。……毛詩小學三十卷。汲古閣說文訂十六卷。經韻樓集十二卷。嘉慶二十年卒。年八十一。……弟子長洲陳奐。……徐頴、嘉興沈壽、及女夫仁和龔麗正。俱知名。而奐尤得其傳。（清史列傳儒林傳段玉裁傳）

陳奐字碩甫。江蘇長洲人。諸生。咸豐元年。舉孝廉方正。……受學玉裁。刻說文解字注。校訂之力。奐居多。……

著詩毛氏傳疏三十卷。……毛詩說一卷。……毛詩音四卷。……毛傳。……義類十九篇一卷。……鄭氏箋考徵一卷。……詩語助義三十卷。公羊儀禮考徵一卷。師友淵源記一卷。……家居授徒。從游者數十人。……同治二年卒。年七十有八。（清史列傳儒林傳陳奐傳）

江沅字子蘭。優貢生。金壇段玉裁僑居蘇州。沅出入其門者數十年。……沅先著說文釋例。後承玉裁屬。……爲說文解字音韻表。凡十七卷。沅於段紕譌處。略箋其失。……卒年七十二。（清史列傳儒林傳江聲傳附江沅傳）

胡培翬字載平。安徽績溪人。嘉慶二十四年進士。官內閣中書。戶部廣東司主事。……主講鍾山、雲間。……道光二十九年卒。年六十八。……著燕寢考三卷。……儀禮正義。……四十卷。……別爲儀禮賈疏訂疑一書。……他著有禘祫答。研六室文鈔。（清史列傳儒林傳胡培翬傳）

胡承珙字景孟。安徽涇縣人。嘉慶十年進士。……遷御史。……補臺灣道。……道光十二年卒。年五十七。……鍵戶著書。與長洲陳奐往復討論。不絕於月。著毛詩後箋三十卷。……儀禮古今文疏義十七卷。……爾雅古義……二卷。……小爾雅義證十三卷。（清史列傳儒林傳胡承珙傳）

「高郵王氏」

高郵王氏父子。訓詁之學。前無古人。

王念孫字懷祖。江蘇高郵人。……乾隆四十年進士。……嘉慶。……六年。調永定河道。……道光。……十二年

卒。年八十有九。……著讀書雜誌八十二卷。……初從休寧戴震受聲音、文字、訓詁。……撰廣雅疏證……三十二卷。……子引之。……（清史列傳儒林傳王念孫傳）

公諱引之。字伯申。……嘉慶己未成進士。……授工部尙書。……著有經義述聞三十二卷。不爲鑿空之談。不爲墨守之見。聚訟之說。則求其是。假借之字。則正其解。又就古人名字音義之相比附。以觀聲音訓詁之會通。作周秦名字解詁。又考明漢志太歲在子爲在寅之譌。爲說二十八篇以正之。名曰太歲考。又以小學之書皆釋名物實義。若經傳語辭。釋之者無幾。語義未明。經義反因之而晦。爰博考九經三傳及周秦西漢之書。發明助語古訓分字編次。爲經傳釋辭十卷。以補爾雅、說文、方言之缺。……享年六十有九。（續碑傳集湯金釗伯申王公墓志銘）

「常州之學」

常州之學。皆有文采。通經多傳絕學。張惠言而外。莊存與、劉逢祿、宋翔鳳。皆傳公羊之學。遂開後來維新一派。

莊……存與。江蘇武進人。官禮部侍郎。幼傳太原閻若璩之學。博通六藝。而善於別擇。……爲尙書既見三卷、說二卷。……象傳論一卷。彖象論一卷。繫辭傳論二卷。附序卦傳論、八卦觀象解二卷。卦氣論一卷。毛詩說二卷。補一卷。附一卷。周官記五卷、說二卷。春秋正辭十二卷。附舉例一卷。要指一卷。四書說二卷。（清史列傳儒林傳）

莊述祖傳

劉逢祿字申受，江蘇武進人。……外祖莊存與與舅莊述祖並以經術名。逢祿盡傳其學。嘉慶十九年進士。……道光四年補儀制司主事。……爲公羊春秋何氏釋例三十篇。……箋一卷。答難二卷。申何難鄭四卷。……議禮決獄四卷。……論語述何。夏時經傳箋。中庸崇禮論。漢紀述例各一卷。……緯略二卷。春秋賞罰一卷。……春秋論上下篇。……左氏春秋考證二卷。……易虞氏變動表。……一卷。……尙書今古文集解三十卷。書序述聞一卷。詩聲演二十七卷。……道光九年卒。年五十六。（清史列傳儒林傳劉逢祿傳）

宋翔鳳字子庭，江蘇長洲人。嘉慶五年舉人。湖南新寧縣知縣。亦莊述祖之甥。……得莊氏之真傳。著論語說義十卷。……論語鄭注十卷。大學古義說二卷。孟子趙注補正六卷。……過庭錄十六卷。……卒年八十二。（清史列傳儒林傳劉逢祿傳附宋翔鳳傳）

（丙）清代經學名著

清代說經之書浩如烟海。阮經解一百八十種。續經解二百十種。尙不能盡。茲舉其不朽者。

凌廷堪……著禮經釋例十三卷。謂儀禮委曲繁重。必須會通其例。如鄉飲酒鄉射、燕禮大射不同。而其爲獻酢酬、旅酬、無算爵之例則同。聘禮、覲禮不同。而其爲郊勞、執玉、行享、庭實之例則同。特性饋食、少牢饋食不同。而其爲尸飯、主人初獻、主婦亞獻、賓長三獻、祭畢飲酒之例則同。乃區爲八例。以明同中之異、異中之同。曰通

例。曰飲食例。曰賓客例。曰射例。曰變例。曰祭例。曰器服例。曰雜例。禮經第十一篇。自漢以來。說者雖多。由不明尊尊之旨。故罕得經意。乃復爲封封尊尊服制考一篇。附於變例之後。大興朱珪讀其書。贈詩推重之。廷堪禮經而外。復潛心於樂。謂今世俗樂與古雅樂。相隔唐人燕樂一闕。蔡季通、鄭世子輩俱未之知。因以隋沛公鄭澤五旦七調之說爲燕樂之本。又參考段安節琵琶錄、張叔夏詞源、遼史樂志諸書。著燕樂考原六卷。江都江藩歎以爲思通鬼神。（清史列傳儒林傳凌廷堪傳）

程瑤田字易疇。安徽歙縣人。……與戴震、金榜同學於江永。篤志治經。震自言遜其精密。其學長於涵泳經文。得其真解。不屑依傍傳注。以喪服緦麻章末長殤中殤降一等四句。鄭氏誤以爲傳文。故觸處難通。又不杖期章惟子不報傳文。公妾以及士妾爲其父母傳文。鄭氏以爲失誤。大功章。大夫之妾。爲君之庶子。女子已嫁者未嫁者。爲世父母叔父母姑姊妹。舊讀以大夫之妾爲建首。下二爲字貫之。鄭氏謂女子別起貫下。斥傳文爲不辭。皆援據經史。疎通證明。以規鄭失。著儀禮喪服文足徵記十卷。又以考工記諸言磬句磬折。鄭氏度直矩解之。致與前後經文不合。謂磬折不明。由於倨句不明。欲明倨句。先辨矩字。矩有直有曲。倨句之云。折其直矩而爲曲矩。即今木石工所用之曲尺。著磬折古義一卷。又以鄭注太宰九穀稷梁二者。言人人殊。因詢考農家。據說文釋之。謂梁爲粟。以稷爲秫。今高粱也。著九穀考四卷。又宗法小記。釋宮小記。考工創物小記。溝洫疆理小記。水地小記。解字小記。聲律小記。釋草小記。釋蟲小記。各一卷。皆考證精確。爲學者所宗。又論學小記一卷。外篇一卷。……又有禹貢三江考。讀書求解數度小記。九勢碎事修辭餘鈔各一卷。統名通藝錄。（清史列傳

儒林傳程瑤田傳

惟聶崇義三禮圖二十卷見於世。於考工諸器物尤疏舛。同學治古文辭。有苦考工記難讀者。余語以諸工之事。非精究少廣旁要固不能推其制。以盡文之奧曲。鄭氏注善矣。茲爲圖翼贊鄭學。擇其正論。補其未逮。圖傳某工之下。俾學士顯白觀之。因一卷書。常知古六書九數等。儒者結髮從事。今或皓首未之聞。何也。休寧戴震。
(戴震考工記圖自序)

孫詒讓字仲容。浙江瑞安人也。……德清戴望、海寧唐仁壽、儀徵劉壽曾。皆治樸學。詒讓與游。學益進。以爲典莫備於六官。故疏周禮。……初賈公彥周禮疏多隱略。世儒各往往傳以今文師說。而拘牽後鄭義者。皆仇王肅。又糅雜齊魯間學。詒讓一切依古文彈正。郊社禘祫則從鄭。廟制昏期則從王。益宣究子春、少贛、仲師之學。發正鄭。凡百餘事。古今言周禮者。莫能先也。(太炎文集卷二孫詒讓傳)

張爾岐字稷若。……讀儀禮。……因鄭康成注文古質。賈公彥釋義曼衍。學者不能尋其端緒。乃取經與注章分之。定其句讀。疏其節錄。取其明注而止。有疑義則以意斷之。亦附於末。始名儀禮鄭注節釋。後改名儀禮鄭注句讀。又參定監本脫誤凡二百餘字。並考石經脫誤凡五十餘字。作正誤二篇附於後。(江藩漢學師承記卷一張爾岐傳)

閻若璩字百詩。山西太原人。……年二十。讀尚書。至古文二十五篇。卽疑其僞。沈潛三十餘年。乃盡得其癥結所在。作古文尚書疏證八卷。引經據古。一一陳其矛盾之故。古文之僞大明。所列一百二十八條。毛奇齡尚書

古文宛詞。百計相軋。終不能以強辭奪正理。則有據之言。先立於不可敗也。（清史列傳儒林傳閻若璩傳）王鳴盛字鳳喈。江蘇嘉定人。……著尚書後案三十卷。專述鄭康成之學。若鄭注亡逸。采馬王注補之。孔傳雖出東晉。其訓詁猶有傳授。間一取焉。又謂東晉所獻之太誓僞。而唐人所斥之太誓實非僞。故附書今文太誓一篇。存古之功。自謂不減惠氏周易述也。（清史列傳儒林傳王鳴盛傳）

段玉裁……以諸經惟尚書離厄最甚。古文幾亡。賈逵分別古今。劉陶是正文字。其書皆不存。乃廣蒐補闕。正晉唐之妄改。存周漢之駁文。著古文尚書撰異三十二卷。（清史列傳儒林傳段玉裁傳）

惠棟……古文尚書考二卷。辨鄭康成所傳之二十四篇爲孔壁真古文。東晉晚出之二十五篇爲僞。（清史列傳儒林傳惠周惕傳附惠棟傳）

孫星衍字淵如。江蘇陽湖人。……爲尚書今古文注疏三十九卷。……其書意在網羅放失舊聞。故錄漢魏人佚說爲多。又兼采近代王鳴盛、江都段玉裁諸人書說。惟不取趙宋以來諸人注。以其時文籍散亡。較今代無異聞。又無師傳。恐滋異說也。凡積二十二年而後成。論者以爲勝王鳴盛書。（清史列傳儒林傳孫星衍傳）

陳奐於詩。謹守家法。精深爲一代之冠。

陳奐嘗言。大毛公詁訓傳。言簡意該。漢以來無不稱引。韜晦不彰。乃博徵古書。發明其義。大抵用西漢以前舊說。而與東漢人說詩者不苟同。又以毛氏之學源出荀子。而善承毛氏者。惟鄭仲師、許叔重兩家。故於周禮注說文解字。多所取說。著詩毛氏傳疏三十卷。（清史列傳儒林傳陳奐傳）

顧棟高春秋大事表。以表類事。足爲讀史之法。

顏棟高字復初。江蘇無錫人。……精心經術。尤嗜左氏傳。……著春秋大事表五十卷、輿圖一卷、附錄一卷。以春秋列國諸事比而爲表。又爲辨論以訂舊說之譌。凡百三十一篇。條理詳明。議論精覈。多發前人所未發。

（清史列傳儒林傳顧棟高傳）

張惠言通虞氏易。荀氏九家易。眞千古絕學也。

張惠言字皋聞。江蘇武進人。……嘗從歙金榜問故。其學要歸六經。而尤深易禮。著有周易虞氏義九卷、虞氏消息二卷。嘗謂虞翻之學既遠。又具見馬、鄭、荀、宋氏書。考其是否。故其義爲精。又古書亡而漢魏師說可見者十餘家。然惟鄭、荀、虞三家。略有梗概可指說。而虞又較備。然則求七十子之微言。田何、楊叔、丁將軍之所傳者。舍虞氏之注其何所自焉。故求其條貫。明其統例。釋其疑滯。信其亡闕。庶以探蹟索隱。存一家之學。其所未寤。俟有道正焉耳。（清史列傳儒林傳張惠言傳）

清代小學。跨越前代。音學五書。實爲開山之祖。

顧炎武……尤精韻學。撰音論三卷。言古韻者。始自明陳第。然創闢榛蕪。猶未遽密。炎武乃推尋經傳。探討本原。又詩本音十卷。其書主陳第詩無協韻之說。不與吳棫本音爭。亦不用棫之例。但卽本經之韻互考。且證以他書。明古意原作是讀。非由遷就。故曰本音。又易音三卷。卽周易以求古音。考證精確。又唐韻正二十卷、古音表二卷、韻補正一卷。皆能追復三代以來之音。分部正舛而知其變。（清史列傳儒林傳顧炎武傳）

段玉裁……著說文解字注三十卷。謂爾雅以下義書也。聲類以下音書也。說文形書也。凡篆一字。先訓其義。次釋其形。次釋其音。合三者以完一篆。故曰形書。又謂許以形爲主。因形以說音說義。其所說義與他書絕不同者。他書多假借。則字多非本義。許惟就字說其本義。知何者爲本義。乃知何者爲假借。則本義乃假借之權衡也。說文、爾雅。相爲表裏。治說文而後爾雅及傳註明。又謂自倉頡造字時。至唐虞三代、秦漢。以及許叔重造說文。曰某聲曰讀若某者。皆條理合一不紊。故既用徐鉉切音。又某字志之曰。古音第幾部。後附六書音韻表。俾形聲相爲表裏。始爲長編。名說文解字讀。凡五百四十卷。既乃隱括之成此注。……高郵王念孫序之曰。千七百年無此作矣。（清史列傳儒林傳段玉裁傳）

桂馥字東卉。山東曲阜人。……爲說文義證五十卷。……其書薈萃羣書。力窮根柢。爲一生精力所在。馥與段玉裁生同時。同治說文。學者以桂段並稱。而兩人兩不相見。書亦未見。段氏之書。聲義兼明。而尤邃於聲。桂氏之書。聲義並及。而尤博於義。段氏鉤索比傳。自以爲能冥合許指。勇於自信。自成一家之言。故破字源義爲多。桂氏敷佐許說。發揮旁通。令學者引申貫注。自得其義之所歸。故段書約而猝難通闢。桂書繁而尋省易了。其專臚古籍。不下己意。則以意在博證求通。輾轉孳乳。觸長無方。亦如王氏廣雅疏證、阮氏經籍纂詁之類。非可以己意爲獨斷者也。（清史列傳儒林傳桂馥傳）

（3）史學

明人喜紀載而乏史裁。元史之修。倉卒成書。缺而不備者有之。重複者有之。以畏忌

之故。至不具論贊。爲前史所無。有明一代。未修國史。通行者陳建通紀而已。而陳建本無其人。萬斯同謂爲梁億所託。王世貞留心史事。輯錄甚備。僅成弇州山人別集一書。或謂錢謙益修史。取世貞所輯琬琰集爲藍本。非也。謙益所采。名爲史略。蓋本於李燾長編。蒐集甚廣。絕不限於世貞之書。清初潘耒章、吳炎撰明書體例謹嚴。惜未成書。樞章別撰國史考異六卷。精確無比。明清兩代未嘗有第二人也。明代政書。兩京部院多有之。私人所輯如徐學聚國朝典彙二百卷。馮用孚皇朝經世實用編二十八卷。陳仁錫皇明世法錄九十二卷。黃溥皇明經濟錄五十二卷。陳九德刪次名臣經濟錄十八卷。鄧球泳化續編十七卷。皆原原本本。言之有物。蓋練習當代掌故。爲其時風氣使然。非清代所能及也。

（甲）明代官修之史

〔實錄〕

太祖實錄曾經三修。睿宗未登帝位而有實錄。熹宗實錄崇禎時改修未成。崇禎無實錄。今所傳者康熙修明史時補輯之本。明代實錄之修。雖無史法。當時頗重其事。總裁之任。必擇有文望者。自萬曆中始有人鈔以流傳。然多脫落顛倒。顧炎武、萬斯

同皆信實錄。以爲勝於野史謬悠之談。實錄編年。實訓類事。今實訓更難睹其全矣。

太祖高皇帝實錄二百五十七卷。建文元年正月修。三年十二月成。靖難後重修。永樂元年六月成。九年三修。十六年五月成。太宗文皇帝實錄一百三十卷。洪熙元年修。

仁宗昭皇帝實錄十卷。洪熙元年閏七月修。宣宗章皇帝實錄一百十五卷。宣德十年七月修。正統三年四月成。英宗睿皇帝

實錄三百六十一卷。天順八年修。成化三年八月成。附景泰帝事。實于中。稱廢帝。廢王附錄。凡八十七卷。憲宗純皇帝實錄二百九十三卷。正德十六年六月修。嘉靖四年六月成。世宗肅

孝宗敬皇帝實錄二百二十四卷。正德元年十二月修。四年五月成。武宗毅皇帝實錄一百九十七卷。正德十六年六月修。嘉靖四年六月成。世宗肅

皇帝實錄五百六十六卷。隆慶元年五月修。五年八月成。穆宗莊皇帝實錄七十卷。隆慶六年十月修。萬曆二年七月成。神宗顯皇帝實錄五百九

十四卷。天啓元年修。光宗眞皇帝實錄八卷。天啓三年七月成。熹宗哲皇帝實錄八十四卷。月及七年。月（千頃堂

書目卷四）

〔寶訓〕

大明寶訓五卷。皇明寶訓十五卷。太宗文皇帝寶訓十五卷。宣德五年修。仁宗皇帝寶訓六卷。宣德五年修。宣宗皇帝寶

訓十五卷。正統三年修。英宗皇帝寶訓十五卷。成化三年修。憲宗皇帝寶訓十卷。弘治四年修。孝宗皇帝寶訓十卷。正德四年修。武宗皇

帝寶訓十卷。嘉靖四年修。世宗皇帝寶訓二十四卷。萬曆五年修。穆宗皇帝寶訓八卷。神宗皇帝寶訓□卷。光宗皇帝寶訓

四卷。（千頃堂書目卷四）

〔元史〕

宋濂等修元史二百十二卷。洪武二年二月丙寅。詔修元史。上謂廷臣曰。近克元都。得元十三朝實錄。元雖亡

國事當紀載。況史記成敗示勸懲。不可廢也。乃詔中書左丞相宣國公李善長爲監修。前起居注宋濂、漳州通判王禕爲總裁。徵山林遺逸之士。汪克寬、胡翰、宋禧、陶凱、陳基、趙勳、曾魯、高啓、趙訪、張文海、徐尊生、黃篴、傅恕、王琦、傅著、謝徽十六人。同爲纂修。開局天界寺。取元經世大典諸書。以資參攷。至八月癸酉。書成。善長表進。凡爲紀三十七卷。志五十二卷。表六卷。傳六十三卷。通一百六十九卷。至三年二月乙丑。儒士歐陽和等采摭元統以後事實還朝。仍命翰林學士宋濂、待制王禕爲總裁。趙壩、朱右、貝瓊、朱世濂、王彝、張孟兼、高巽志、李懋、李汝、張宣、張簡、杜寅、殷弼、俞同十四人續修。七月丁亥朔。書成。計五十有三卷。紀十。志五。表二。傳三十六。凡前書未備者悉補完之。通二百十二卷。學士宋濂表進。詔刊行之。人賜白金二十兩、文綺帛各二。授儒士張宣等官。惟趙壩、朱右、朱世濂乞還。從之。（千頃堂書目卷四）

「政書」

大明會要八十卷。不知何人編。太祖開國時事。凡三十九則。曰帝系。曰仁政。曰后妃。曰封建。曰職官。曰官制。曰內職。曰版籍。曰方域。曰蠲放。曰禮樂。曰祭祀。曰賞賜。曰祥異。曰學校。曰建言。曰兵政。曰除寇。曰僧道。曰開基議酒。曰定策渡江。曰定鼎金陵。曰定北平。曰降西蜀。曰平雲南。曰克張士誠。曰取關隴。曰取山西。曰平廣海。曰來方國珍。曰下八閩。曰平溪洞。曰定塞北。曰服荆楚。曰降遼東。曰奠西域。曰來哈出。曰定四彝。（千頃堂書目卷九）

大明會典一百八十卷。弘治十年十一月。上以累朝典制。散見疊出。未會於一。敕大學士徐溥等。倣唐會要、元

經史大典、大元通制爲書。十五年正月書成。未及頒行。正德四年。復命大學士李東陽、焦芳、楊廷和等。勘定補正遺缺。成書刊布。兩朝皆有御製序。其書止於弘治十五年。至嘉靖八年。復命閣臣纂修。十六年以後迄於嘉靖九年以前事例。續之。（千頃堂書目卷九）

重修大明會典二百二十八卷。萬曆四年。閣臣續修嘉靖以來事例。迄萬曆十四年成書。（千頃堂書目卷九）
大明官制二十八卷。（千頃堂書目卷九）

諸司職掌十卷。洪武二十六年三月吏部署部事侍郎翟善同翰林儒臣編。先是。帝以諸司秩有崇卑。政有大小。無方冊以著成法。恐位官者罔知職任政事設施之詳。乃命依唐六典制。自五府至六部、都察院以下諸司。凡設官分職之務。類編爲書。及是成。詔刊行頒布中外。（千頃堂書目卷九）

憲綱一卷。洪武四年五月御史臺進。凡四十條。上親加刪定刊行矣。後諸臣有任情增改者。宣宗再令考舊文而申明之。益入後定風憲事宜。正統四年十月頒布。（千頃堂書目卷九）

（乙）明代私人撰述

明代學者。知今而不知古。其所撰關於史事之書。能考前代得失。通知類例者甚少。且持迂腐之見。評量史實。不脫學究習氣。如：

宋史質。明王洙撰。洙字一江。臨海人。正德辛巳進士。其仕履未詳。是編因宋史而重修之。自以臆見。別釋義例。

大旨欲以明繼宋。非惟遼金兩朝皆列於外國。卽元一代年號亦盡削之。而於宋益王之末。卽以明太祖之高祖追稱德祖元皇帝者。承宋統。大德三年。以太祖之曾祖追稱懿祖恆皇帝者。繼之。延祐四年。以太祖之祖追稱熙祖裕皇帝者。繼之。後至元五年。以太祖之父追稱仁祖淳皇帝者。繼之。至正十一年。卽以爲明之元年。且於瀛國公降元以後。歲歲書帝在某地云云。仿春秋書公在乾侯。綱目書帝在房州之例。荒唐悖謬。僂指難窮。自有史籍以來。未有病狂喪心如此人者。其書可焚。其版可斧。其目本不宜存。然自明以來。印本已多。恐其或存於世。焚無識者之聽。爲世道人心之害。故辭而闕之。俾人人知此書爲狂吠。庶邪說不至於誣民焉。（四庫全書總目卷五〇）

柯維騏宋史新編二百卷。會宋遼金三史爲一。以宋爲正統。遼金列於外國傳。瀛國二王升於帝紀。以存宋統。正亡國諸叛臣之名以明倫。升道學於循吏之前以重道。釐複補漏。擊異訂譌。閱二十寒暑始成。其後祥符王惟儉。吉水劉同升。皆以刪定宋史。咸未行世。（千頃堂書目卷四）

季漢書五十六卷。明謝陞撰。陞字少連。歙縣人。其書遵朱子綱目義例。尊漢昭烈爲正統。自獻帝迄少帝爲本紀三卷。附以諸臣爲內傳。吳、魏之君則別爲世家。而以其臣爲外傳。復以董卓、袁紹、袁術、公孫瓚、公孫度及呂布、張邈、陶謙諸人爲載記。凡更事數姓。與依附董卓袁諸人者。則爲雜傳。又別作兵戎始末、人物生歿二表。以括一書之經緯。卷首冠正論五條。答問二十二條。凡例四十四條。以揭一書之宗旨。（四庫全書總目卷五〇）南宋書六十卷。明錢士升撰……是編以宋史繁冗。故爲刪薙。然所刊削者。不過奏疏及所歷官階而已。別無

事增文省之處。亦不見翦裁鑄錄之功。又去姦臣、叛臣之例。仍列於衆人之中。案隋書以前。姦臣、叛臣本不別傳。新唐書始另列之。後來作者。多依其例。亦足見彰獐之公。今併而一之。殊失示戒之意。未足以言復古。至所增鄭思肖數人列傳。亦疏略不詳。惟遵循古例。不以道學、儒林分傳。能掃除門戶之見。爲短中之一長耳。（四庫全書總目卷五〇）

明人喜記當代之事。萬曆以後。實錄既出。乃有根據實錄兼採邸報以成書者。雖不免舛譌。而載筆甚勤。茲舉其著者。

向嘗流覽前代。竊記其姓氏。因欲遍觀有明一代之書。以爲既生有明之後。安可不知有明之事。故嘗集諸家記事之書讀之。見其牴牾疏漏。無一得滿人意者。如鄭端簡之吾學編。鄧潛谷之皇明書。皆仿紀傳之體。而事迹頗失之略。陳東莞之通紀。雷古和之大政記。皆仿編年之體。而褒貶間失之誣。袁永之之獻實。猶之皇明書也。李宏甫之續藏書。猶之吾學編也。沈國元之從信錄。猶之通紀也。薛方山之獻章錄。猶之大政記也。其他若典彙。史料。史概。國權。世法錄。昭代典則。名山藏。頌天臚筆。同時尙論錄之類。要皆可以參攷。而不可以爲典要。唯焦氏獻徵錄一書。搜輯最廣。自大臣以至郡邑吏。莫不有傳。雖妍媸備載。而識者自能別之。可備國史之採擇者。唯此而已。（萬斯同石園文集卷七寄范筆山書）

鄭曉吾學編六十九卷。大政記一卷。遜國記一卷。同姓諸王表二卷。傳三卷。異姓諸侯表一卷。傳二卷。直文淵閣諸臣表一卷。兩京典銓表一卷。名臣記三十卷。遜國臣記八卷。天文述一卷。地理述一卷。三禮述二卷。百官

述二卷。四裔考二卷。北鹵考一卷。外吾學編餘一卷。餘無。（千頃堂書目卷四）

何喬遠名山藏一百卷。分三十七類。曰典謨記。曰坤則記。曰開聖記。曰繼體記。曰分藩記。曰勦封記。曰天因記。曰天啟記。曰輿地記。未全。曰典體記。曰樂舞記。皆缺。曰刑法記。曰河漕記。曰漕運記。曰錢法記。曰兵制記。曰馬政記。曰茶馬記。曰鹽法記。曰臣林記。曰臣林外記。曰關柝記。曰儒林記。曰文苑記。曰俘賢記。曰宦者記。曰列女記。曰臣林雜記。曰高道記。曰本土記。曰本行記。曰藝妙記。曰貨殖記。曰方伎記。曰方外記。曰王享記。始於洪武。終於隆慶。（千頃堂書目卷四）

朱國禎皇明史概一百二十卷。其目曰大政。曰大訓。曰大因。曰大志。曰大事。大因、大志皆缺。列傳曰開國。曰遜國。曰歷朝。曰外。曰內。亦惟開國、遜國二傳。餘并缺。（千頃堂書目卷四）

尹守衡皇明史竊一百七卷。字用平。東莞舉人。新昌知縣。左遷趙府審理正。書爲帝紀八卷。志六卷。世家十卷。列傳八十三卷。高后紀、百官志、田賦志、河漕志四卷。俱缺。（千頃堂書目卷四）

龍飛紀略八卷。明吳樸撰。……是編仿綱目體例。紀明太祖事蹟。初名征伐禮樂書。後改今名。自壬辰至壬午共五十一年。蓋據元史及明初武胄貼黃列傳則例紀載。旁蒐博採而成。（四庫全書總目卷四八）

明大政記二十五卷。明雷禮撰。……所輯者至武宗而止。僅二十卷。其世宗四卷。卽范守己之肅皇外史。穆宗一卷。則譚希思所續編。（四庫全書總目卷四八）

昭代典則二十八卷。明黃光昇撰。……起元至正壬辰明太祖起兵。至穆宗隆慶二年而止。編年紀事。每條皆

提綱列目。（四庫全書總目卷四八）

憲章錄四十七卷。明薛應旂撰。所載上起洪武。下迄正德。用編年之體。（四庫全書總目卷四八）

嘉隆兩朝聞見紀十二卷。明沈越撰。……取世、穆兩朝政績。彙次成編。起正德十六年世宗卽位。止於隆慶六年。（四庫全書總目卷四八）

兩朝憲章錄二十卷。明吳瑞登撰。……輯嘉靖隆慶兩朝。以續薛應旂之書。大抵鈔撮邸報而成。（四庫全書總目卷四八）

陳建明通紀四十卷。又續通紀十卷。（千頃堂書目卷四）

肅皇外史四十六卷。明范守己撰。……記明世宗一代朝政。編年系月。立綱分目。頗見詳備。（四庫全書總目卷五四）

世穆兩朝編年史六卷。明支大綸撰。……所載自嘉靖元年至四十五年。凡四卷。自隆慶元年至六年。凡二卷。（四庫全書總目卷四八）

國史紀聞十二卷。明張銓撰。（四庫全書總目卷四八）

此外沈國元從信錄四十卷。兩朝從信錄三十五卷。許重熙五陵注略十四卷。乾隆時俱列入禁書。文秉定陵注略十卷。談遷國權一百卷。取材甚備。惜至今無刻本。其紀見聞者。以黃瑜雙槐歲抄、李默孤樹哀談爲較翔實。而以沈德符萬曆野獲編爲

既精且博。多能考正前人之失。

(丙)清代官修之史

「實錄」

清初修太祖武皇帝實錄十卷。出自譯文。不免鄙俚。故康熙時改修三朝實錄。乾隆中復一再修改。而忌諱多矣。實錄有滿蒙漢三種文字。今尙能從滿蒙文實錄中。尋求未改之迹。有清實錄之修。但錄上諭而無紀事。且多首尾不備。德宗實錄成於民國十年。尤爲草率。自王先謙私鈔實錄。刻爲東華錄一書。學者始略知一代之事。朱壽朋光緒東華錄。成書則在德宗實錄之前。實錄與聖訓同修。互有詳略。唯聖訓梓行。尙有歷朝起居注及國史館所修國史。分紀表志傳。而傳分大臣、昭忠、忠義、孝義、循吏、儒林、文苑、武臣、逆臣、宗室王公表傳、蒙古王公表傳。史材之備。視明代有加焉。

太祖實錄十三卷。

崇德元年敕纂。康熙二十一年重修。雍正十二年敕加校訂。

太宗實錄六十八卷。

順治九年勅纂。康熙十二年敕加校訂。

世祖實錄一百四

十七卷。

康熙六年勅纂。雍正十二年敕加校訂。

聖祖實錄三百三卷。

康熙六十一年動纂。

世宗實錄一百五十九卷。

雍正十三年動纂。

高宗實錄一千五百卷。

嘉慶四年敕纂。

宣宗實錄四百七十六卷。

道光四年敕纂。

文宗實錄三百五十六卷。

同治元年 勅纂。穆宗實錄三百七十四卷。光緒五年 德宗實錄五百六十一卷。宣統時 勅纂。（清史稿藝文志二）

〔聖訓〕

太祖高皇帝聖訓四卷。康熙二十五年 勅編。太宗文皇帝聖訓六卷。順治時 勅編。康熙二十六年告成。世祖章皇帝聖訓六卷。康熙二十六年 勅編。

祖仁皇帝聖訓六十卷。雍正九年 勅編。世宗憲皇帝聖訓三十六卷。乾隆五年 勅編。高宗純皇帝聖訓三百卷。嘉慶十二年 勅編。仁宗睿

皇帝聖訓一百十卷。道光四年 勅編。宣宗成皇帝聖訓一百三十卷。咸豐六年 勅編。文宗顯皇帝聖訓一百十卷。同治五年 勅編。穆宗

毅皇帝聖訓一百六十卷。光緒五年 勅編。（清史稿藝文志二）

〔方略〕

有清軍事。與一代相終始。官書紀其事者。曰方略。曰紀略。書成頒佈。以紀武功。亦有未刊行者。如臺灣鄭氏之類。方略之修。始於三藩。乾隆時。始設方略館。與國史館並立。平時以軍機章京兼任提調。以其典掌軍機處檔案也。每一軍事告終。必撰方略。多以軍機大臣總其事。先後所修。無慮數十種。

平定三逆方略六十卷。康熙二十一年 勅編。德洪等奉勅撰。親征平定朔漠方略四十八卷。康熙四十七年 溫達等奉勂撰。平定金川方略三十二卷。

乾隆十三年來 保等奉勂撰。平定準噶爾方略前編五十四卷。正編八十五卷。續編三十三卷。乾隆三十七年 傳 臨清紀略十六卷。 恆等奉勂撰。

乾隆四十二年于 敏中等奉勂撰。平定兩金川方略一百五十二卷。乾隆四十六年 阿 蘭州紀略二十卷。乾隆四十六年 石峰堡紀略二十

卷。乾隆四十九年敕撰。臺灣紀略七十卷。乾隆五十三年敕撰。安南紀略三十二卷。乾隆五十六年敕撰。廓爾喀紀略五十四卷。乾隆六十年敕撰。巴布

勒紀略二十六卷。乾隆時敕撰。平定苗匪紀略五十二卷。嘉慶二年鄂輝等奉敕撰。勦平三省邪匪方略。前編三百六十一卷。續編

三十六卷。附編十二卷。嘉慶十五年慶桂等奉敕撰。平定教匪紀略四十二卷。嘉慶二十一年托津等奉敕撰。平定回疆剿擒逆裔方略八十卷。

道光九年曹振鏞等奉敕撰。剿平粵匪方略四百二十卷。同治十一年敕撰。勦平捻匪方略三百二十卷。同治十一年敕撰。平定陝甘新疆回匪方

略三百二十卷。光緒二十二年敕撰。平定雲南回匪方略五十卷。光緒二十二年敕撰。平定貴州苗匪紀略四十卷。光緒二十二年敕撰。（清

史稿藝文志二）

方略之外。有道光、咸豐、同治三朝吏務始末之修。凡實錄不便紀載者。皆備於此書。由史官纂修。其體裁在實錄與方略之間。爲備省覽。故不頒行。

「明史」

順治初。詔修明史。久而未成。康熙十八年。特設博學鴻儒科。中式者五十人。多山林隱逸之士。極一時人才之選。就東廠舊址設局纂修。四五年間。與修者或以事黜。或請假歸。其時黨見未除。是非未明。興革之際。甚難著筆。故顧炎武力拒熊賜履修史之約。鴻博諸君所撰。未見採用。後多刻入私人文集。先後總裁明史者。葉方藹、徐元文、張玉書、陳廷敬、王鴻緒諸人。乃招萬斯同入都。委以考訂之事。先後二十四年。輯

成明史稿。屬筆者錢名世也。別爲鴻緒撰橫雲山人明史稿三百十卷。雍正元年上之。再命史臣纂修。卽就鴻緒所撰加以增省。帝紀兼及南渡三王。任其事者。楊椿爲有名。至乾隆四年始克告成。凡本紀二十四卷、志七十五卷、表十三卷、列傳二百三十卷、目錄四卷。共三百三十六卷。蓋前後五、六修。歷時幾及百年。秉筆者多屬名流。故體例詳明。執筆不苟。推爲唐以後良史。實惟斯同之功。然尙不無舛誤。猶有明季門戶之見。爲清諱。不敢述建州事。則修史之難也。

近代諸史。自歐陽公五代史外。遼史簡略。宋史繁蕪。元史草率。惟金史行文雅潔。敘事簡括。稍爲可觀。然未有如明史之完善者。蓋自康熙十七年。用博學宏詞諸臣分纂明史。葉方藹、張玉書總裁其事。繼又以湯斌、徐乾學、王鴻緒、陳廷敬、張英先後爲總裁官。而諸纂修皆博學能文。論古有識。後玉書任志書。廷敬任本紀。鴻緒任列傳。至五十三年。鴻緒傳稿成。表上之。而本紀志表尙未就。鴻緒又加纂輯。雍正元年再表上。世宗憲皇帝命張廷玉等爲總裁。卽鴻緒本。選詞臣再加訂正。乾隆初始進呈。蓋閱六十年而後訖事。古來修史未有如此之久而功深者也。惟其修於康熙時。去前朝未遠。見聞尙接。故事跡原委。多得其真。非同後漢書之修於宋。晉書之修於唐。徒據舊人記載而整齊其文也。又經數十年參考訂正。或增或刪。或離或合。故事益詳而文益簡。且是非久而後定。執筆者無所徇隱於其間。益可徵信。非如元末之修宋遼金三史。明初之修元史。時日迫促。

不暇致詳而潦草完事也……執筆者不知幾經審訂而後成篇。此明史一書實爲近代諸史所不及，非細心默觀，不知其精審也。（趙翼廿二史劄記卷三十一）

「政書」

清以例治天下。一歲彙所治事爲四季條例。采條例而爲各部署則例。新例行。舊例卽廢。故則例必五年一小修。十年一大修。采則例以入會典。名爲會典則例。或事例。

大清會典二百五十卷。

起崇德元年迄康熙二十五年。聖祖敕撰。自康熙二十六年至雍正五年。世宗敕撰。雍正十年刊。

大清會典一百卷。會典則例一百八十卷。

乾隆二十六年履親王允禩奉敕撰。

大清會典八十卷。圖一百三十二卷。事例九百二十卷。

嘉慶二十三年敕撰。

大清會典一百卷。圖二百七

十卷。事例一千二百二十卷。

光緒二十五年敕撰。（清史稿藝文志二）

世以杜佑通典、鄭樵通志、馬端臨文獻通考爲三通。明王圻嘗撰續文獻通考二百五十四卷。乾隆中遂設三通館。依三通例而稍變通之。先後修續三通。皇朝三通。合爲九通。光緒末劉錦藻倩人撰皇朝續文獻通考三百二十卷。非其倫也。

續通典一百四十四卷。

乾隆三十二年敕撰。

續文獻通考二百五十二卷。

乾隆十二年敕撰。皇朝通典一百卷。

乾隆三十二年敕撰。

皇朝文獻通考二百六十六卷。

乾隆十二年敕撰。（清史稿藝文志二）

續通志五百二十七卷。

乾隆三十二年敕撰。（清史稿藝文志二）

(丁)清代私人撰述

清代史家林立。其著述不外考補。考以辨諸史之義。補以補修前代之史。而於當代史事。述者寥寥。蓋清初莊史之獄。株連至廣。乾隆中復有禁書之厄。學者怵目驚心。羣趨考據。以避羅織。而紀載遂視爲畏途矣。

謝啓昆西魏書二十一卷。觀察謝蘊山先生。曩在史局。編纂之暇。與閣學翁公議補是書。洎宛陵奉諱家居。乃斟酌義例。排次成編。爲本紀一、表三、考四、列傳十二、載記一。既藏事。介翁公屬序於予。讀其凡例。謹嚴有法。洵足奪伯起之席。而張洌水、考亭之幟矣。昔平繪撰中興書。其體例常類此。而隋志不著於錄。則唐初已無傳。觀察之書。不獨爲前哲補亡。而封爵、大事諸表。精覈貫串。又補前史所未備。(錢大昕潛研堂文集卷二四西魏書序)

陳鱣續唐書七十卷。唐受命二百九十年而後唐興。歷三十年。後唐廢而南唐興。又歷三十年而亡。此六十九年唐之統固未絕也。……竊不自揆。更審其順逆。著其正偏。上黜朱梁。下攢石晉及漢周。而以宋繼唐。庶幾復唐六十九年之祚。爲帝紀七、表四、志十、世家十三、列傳三十六、凡七十卷。糾薛歐之體例。正馬陸之乖違。廣考羣編。兼徵實錄。以上續劉昫唐書。續之名仿乎司馬彪續漢書。而此更參用蕭常、郝經等續後漢書例也。其十志則於經籍一類。多所收羅。各傳則於忠義諸臣。尤深致意。經籍志以補薛歐之缺。而忠佞不別列傳者。人以類從。賢否自見也。紀傳之後。略綴斷辭。不曰論而曰述者。從何法盛中興書例也。凡後述者。多旁採陞典遺聞。

補本篇未備。所謂事無重出。文省可知也。參用史文。倘義可從事。可據者。卽仍其舊。所謂不以下愚自申管見也。（陳鱣續唐書自敘）

魏源著聖武記。取材多本官書。年月不甚具備。時有舛誤。而筆勢浩瀚。足以發揮所蘊。武事餘記。尤有見地。書經數改。足見其慎。排本出。始有道光洋艘征撫記。敘次不清。題爲洋事。疑坊肆取失名夷舶入寇記。託爲源所作也。

魏源聖武記十四卷。荆楚以南。有積感之民焉。生於乾隆征楚苗之前一歲。中更嘉慶征教匪。征海寇之歲。迄十八載。畿輔靖賊之歲。始貢京師。又迄道光征回疆之歲。始筮仕京師。京師掌故海也。得借觀史館秘閣官書。及士大夫私家著述。故老傳說。於是我生以後數大事。及我生以前。上訖國初數十大事。磊落乎耳目。旁薄乎胸臆。或涉兵事。或不盡涉兵事。有得卽書。未遑述作。晚寓江淮。海警沓至。忽然觸其中之所積。乃盡發其櫝。排比經緯。切劘紬繹。先取其專涉兵事者四十有七篇。及嘗所論議若干篇。爲十有四卷。統三十餘萬言。告成於海夷就款江寧之月。（魏源聖武記自敘）

是記當海疆不靖時。索觀者衆。隨作隨刊。未遑精審。閱二載重訂於蘇州。又二載復重訂於揚州。如征苗。征緬甸。及道光回疆。嚮止一篇者。今皆增爲上下篇。其全改者如廓爾喀。俄羅斯等篇。其半改者如雍正征厄魯特篇。其餘諸記亦各有損益。至武事餘記第二十三卷。舊多冗複。今移其瑣事。散附各記之末。而更正其體例。是爲聖武記第三次重訂本。道光二十有六載。魏源識於揚州旅次。（魏源聖武記後記）

光緒初元。曾紀澤以王闓運善屬文。熟知湘軍事。因屬之撰湘軍志。闓運奮筆紀載。適入蜀。長教尊經書院。遂刻於蜀中。攜書板還湘。闓運敘事。用史遷法。能盡人情狀。其書盛行。譽者以爲唐以後所無。然與官書頗牴牾。而抑揚稍過。予人以難堪。又事不甚備。或有罅漏。遽爲曾國荃所惡。謂其顛倒是非。幾成大衅。郭嵩燾調停其間。以書板畀國荃焚毀。闓運再入蜀。蜀中復刻之。後闓運刻入湘綺樓全書。海上書估射利者。易爲巾箱小冊。題名湘軍水陸戰紀。愈益風行。嵩燾兄弟皆惡軍志。各有批本。崑燾孫振鏞輯爲湘軍志平議。嵩燾與闓運之交未絕。雖詆闓運弄筆失序。江忠源諸事。辭尙和緩。崑燾欲挑衆人之怒。竟謂闓運有意屈抑湘人。謾罵不已。安得謂之平乎。

是篇爲湘潭王湘綺先生所著。初校板於川蜀。原印不過數十本。衡陽唯程常有藏書。不輕得見。坊間翻刻。錯譌爲多。讀者艱之。同學屢謀重刊。皆爲先生所阻止。蓋是書初出。曾伯見之。若有不釋然者。故先生絕口不言。然海外流傳已數萬本。非僅欽其文章經濟足備一朝掌故。其於將才之賢否。軍謀之得失。與夫始終艱難勝敗之數。莫不言之親切。無所忌諱。實中國近今之信史也。顧蒙讀盾鼻餘瀋。載大埔之役。劉軍由間道取道會寧。上杭。獨先期至。相與畫合圍之策。敗賊塔子嶺。殲逆渠汪海洋。與志言典軍未陣而敗者不合。間舉所疑質

之先生。先生喟然曰。吁。左文襄之送克菴南歸。養親也。敷張勳烈。以爲閭里光寵。故夸大其詞。吾聞于鄧寶之親歷行陣。不可易也。又松潘之役。志言周達武所部八千人驚幾潰。莫測所由。及讀寧鄉廖先生葆畬所輯武軍紀略。言軍中懸釜待爨。朝夕不保。用羅公亨奎計。會全部所齎糧。尙支半月。各軍勻濟。檄近屬供軍。不十日糧芻填委。軍之免於譁潰者一間耳。得此二者參觀互證。然後知曾伯之隘。左侯之夸。而儒素之相契。自有真也。庶幾問一得三者乎。（喻謙湘軍志跋）

清代史學。共推錢大昕。王鳴盛。稱爲錢、王。

予弱冠時。好讀乙部書。通籍以後。尤專斯業。自史漢訖金元。作者廿有二家。反覆校勘。雖寒暑疾疫。未嘗少輟。偶有所得。寫於別紙。丁亥歲。乞假歸里。稍編次之。歲有增益。卷帙滋多。戊戌設教鍾山。講肄之暇。復加討論。間與前人開合者。削而去之。或得於同學啓示。亦必標其姓名。郭象。何法盛之事。蓋深恥之也。夫史之難讀久矣。司馬溫公撰資治通鑑成。惟王勝之借一讀。它人讀未盡十紙。已欠仲思睡矣。況廿二家之書。文字煩多。義例紛糾。輿地則今昔異名。僑置殊所。職官則沿革迭代。冗要逐時。欲其條理貫串。瞭如指掌。良非易事。以予儔劣。敢云有得。但涉獵既久。啓悟遂多。著之鉛槧。賢於博弈云爾。且夫史非一家之書。實千載之書。祛其疑。乃能堅其信。指其瑕。益以見其美。拾遺規過。匪爲齟齬前人。實以開導後學。而世之考古者。拾班、范之一言。擿沈、蕭之數簡。兼有竹素爛脫。豕虎傳譌。易斗分作升分。更子琳爲惠琳。乃出校書之陋。本非作者之響。而皆文致小疵。目爲大創。馳騁筆墨。夸曜凡庸。予所不能效也。更有空疏措大。輒以褒貶自任。強作聰明。妄生疣瘡。不叶年代。

不揆時勢。強人以所難行。責人以所難受。陳義甚高。居心過刻。予尤不敢效也。（錢大昕廿二史考異自序）國初以來。諸儒或言道德。或言經術。或言史學。或言天學。或言地理。或言文字音韻。或言金石詩文。專精者固多。兼擅者尙少。惟嘉錢辛楣先生能兼其成。……先生於正史雜史無不討尋。訂千年未正之譌。此人所難能四也。……別有十駕齋養新錄廿卷。乃隨筆札記經史諸義之書。學者必欲得而讀之。乞刻於版。凡此所著。皆精確中正之論。卽瑣言剩義。非貫通原本者不能。譬之析枝一枝。非鄧林之大。不能有也。（阮元十駕齋養新錄序）

王鳴盛字鳳喈。江蘇嘉定人。……乾隆十九年一甲二名進士。授翰林院編修。……擢內閣學士兼禮部侍郎銜。坐濫支驛馬左遷光祿寺卿。丁內艱。遂不復出。……又十七史商榷一百卷。於一史中紀志表傳。互相稽考。因而得其異同。又取稗史叢說。以證其舛誤。於輿地。職官。典章。名物。每致詳焉。別撰蛾術編一百卷。其爲目十。說錄。說字。說地。說制。說人。說物。說集。說刻。說通。說系。蓋倣王應麟顧炎武之意。而援引尤博。……嘉慶二年卒。年七十六。（清史列傳儒林傳王鳴盛傳）

二紀以來。恒獨處一室。覃思史事。既校始讀。亦隨讀隨校。購借善本。再三讐勘。又搜羅偏霸雜史。稗官野乘。山經地志。譜牒簿錄。以暨諸子百家。小說筆記。詩文別集。釋老異教。旁及於鐘鼎尊彝之款識。山林冢墓。祠廟。伽藍碑碣斷闕之文。盡取以供佐證。參伍錯綜。比物連類。以互相檢照。所謂考其典制事蹟之實也。……學者每苦正史繁塞難讀。或遇典制茫昧。事蹟繆葛。地理職官。眼眯心昏。試以予書爲孤竹之老馬。置於其旁而參閱。

之。疏通而證明之。不覺如開開節解。筋轉脈搖。殆或不無小助也與。（王鳴盛十七史商榷自序）

西莊先生著述富有。同時後進。稱其遠儕伯厚。近匹弇州。而先生自任亦曰。我於經有尙書後案。于史有十七史商榷。于子有蛾術編。于集有詩文。以敵弇州四部。其庶幾乎。然諸書皆已風行。而蛾術編則向未窺全豹也。己亥春。余從其鄉張吟樓司馬^鑑處見之。乃先生外孫姚八愚茂才^{緒承}藏本。凡九十三卷。假歸盡讀。如獲拱璧。即欲付剞劂氏。會同邑迮青崖進士^{壽鑑}見過。忻任勘校。以編中說刻。說系二門。已見金石萃編及王氏家乘。因鈔說錄至說通八門。爲八十二卷。而每卷之中。間加案語。先生于前代諸儒。及近時亭林顧氏、東原戴氏。多所辨駁。而青崖所見。又與先生異同。予惟考據之學。言人人殊。要之是非不謬。俟諸後之論定。而各衷一說。亦足廣學者見聞焉。爰並付梓。而爲誌其顛末云。（沈琳惠蛾術編序）

章學誠著文史通義。倡六經皆史之說。重史德、史意。不重史法。論方圓二體而重紀事本末。畢生精力萃於修志。蓋視志卽史也。

章學誠字實齋。浙江會稽人。乾隆四十三年進士。官國子監典籍。性耽墳籍。不甘爲章句之學。從山陰劉文蔚、童鈺遊。習聞戴山、南雷之說。言明季黨禍緣起。奄寺亂政。及唐魯二王本末。往往出於正史之外。秀水鄭炳文稱其有良史才。自遊朱筠之門。筠藏書甚富。因得遍覽羣書。日與名流討論講貫。嘗與休寧戴震、江都汪中。同客寧紹台道馮廷丞署。廷丞甚敬禮之。震論修志。謂悉心於地理沿革。則志事以竟。侈言文獻。非所急務。陽湖洪亮吉嘗撰輯乾隆府廳州縣志。其分部乃以布政司分隸廳州縣。學誠均著論相譴。所修和州、亳州、永清縣

諸志論者謂是非斟酌。非兼才學識之長者不能作云。所自著有文史通義八卷、校讎通義三卷。其中倡言立論。多前人所未發。大抵推原官禮。而有得於向、歆父子之傳。故於古今學術之原。輒能條別而得其宗旨。自謂卑論仲任。俯視子元。未免過詡。然亦夾漈之伯仲也。又著有實齋文集。（清史列傳文苑傳章學誠傳）

（4）文學

（甲）古文

「明初宋王」

明初宋濂、王禕並稱大家。濂弟子方孝孺能得濂之筆

宋濂字景濂。……金華……潛溪人。……除江南儒學提舉。命授太子經。……進學士承旨。知制誥。……洪武十

三年。安置茂州。濂狀貌豐偉。美鬚髯。視近而明。一黍上能作數字。自少至老。未嘗一日去書卷。於學無所不通。爲文醇深演迤。與古作者並。在朝郊社、宗廟、山川、百神之典。朝會、宴享、律歷、衣冠之制。四裔貢賦賞勞之儀。旁及元勳巨卿碑記刻石之辭。咸以委濂。屢推爲開國文臣之首。士大夫造門乞文者。後先相踵。外國貢使亦知其名。數問宋先生起居無恙否。高麗、安南、日本至出金購文集。四方學者悉稱爲太史公。不以姓氏。雖白首侍從。……而一代禮樂制作。濂所裁定者居多。其明年卒于夔。年七十二。（明史卷一二八宋濂傳）

王禕字子充。義烏人。……太祖……用爲中書省掾史。……修元史。命禕與宋濂爲總裁。禕史事擅長。裁煩剔

穢。力任筆削。書成。擢翰林待制。同知制誥。……洪武五年正月。議招諭雲南。命禕齋詔往。……遇害。（明史卷二

八九王禕傳）

方孝孺字希直。一字希古。寧海人。……從宋濂學。……惠帝卽位。召爲翰林侍講。明年。遷侍講學士。……燕兵入。……欲使草詔。……孝孺投筆於地。且哭且罵。……成祖怒。命磔諸市。……孝孺工文章。醇深雄邁。每一篇出。海內爭相傳誦。永樂中。藏孝孺文者罪至死。門人王稔潛錄爲侯城集。故後得行於世。（明史卷一四一方孝孺傳）

「復古之文」

李、何倡言復古。文宗西京。詩自中唐以下一切吐棄。自李攀龍、王世貞起。文主秦漢。詩規盛唐。以與李、何相倡和。學者並稱爲何、李、王、李。明季陳子龍。猶遵王、李之教。

李夢陽字獻吉。慶陽人。……弘治六年。舉陝西鄉試第一。明年成進士。……遷江西提學副使。……削籍。頃之卒。……夢陽才思雄鷲。卓然以復古自命。……倡言文必秦漢。詩必盛唐。非是者弗道。……嘉靖朝。李攀龍、王世貞出。復奉以爲宗。天下推李、何、王、李爲四大家。無不爭效其體。……譏夢陽詩文者。則謂其模擬剽竊。得史遷少陵之似。而失其真。（明史卷二八六李夢陽傳）

何景明字仲默。信陽人。八歲能詩古文。弘治……十五年第進士。……擢陝西提學副使。……卒年三十有九。……夢陽主摹倣。景明則主剽竊。各樹堅壘。不相下。（明史卷二八六何景明傳）

李攀龍字子鱗。歷城人。……舉嘉靖二十三年進士。……擢河南按察使。……其持論謂文自西京。詩自天寶而下。俱無足觀。於本朝獨推李夢陽。諸子翕然和之。非是則詆爲宋學。攀龍才思勁驚。名最高。……作文則聲牙戟口。讀者至不能終篇。好之者推爲一代宗匠。亦多受世挾摘云。（明史卷二八七李攀龍傳）

王世貞字元美。太倉人。……嘉靖二十六年進士。……擢南京刑部尙書。……萬曆二十一年卒於家。世貞始與

李攀龍狎主文盟。攀龍歿。獨操柄二十年。才最高。地望最顯。聲華意氣。籠蓋海內。一時士大夫及山人詞客。衲子羽流。莫不奔走門下。片言褒賞。聲價驟起。其持論文必西漢。詩必盛唐。大曆以後書勿讀。而藻飾太甚。晚年攻者漸起。世貞顧漸造平淡。（明史卷二八七王世貞傳）

王、李之筆。古奧至不可句讀。而後公安、竟陵冷峭之作。亦盛行於時。

袁宏道字中郎。公安人。與兄宗道、弟中道。並有才名。時稱三袁。……宏道……舉萬曆二十年進士。……天啓四年。進南京吏部郎中。卒於官。先是王、李之學盛行。袁氏兄弟……矯以清新輕俊。學者多舍王、李從之。目爲公安體。……鍾、譚者。鍾惺、譚元春也。……名滿天下。謂之竟陵體。（明史卷二八八文苑傳袁宏道、鍾惺、譚元春傳）

「八家文之復興」

自王慎中、唐順之倡爲八家之文。專宗歐、曾。至歸有光而言義法。其體益醇。力詆王、李。錢謙益取法有光。並力詆袁、鍾、艾南英、王爲時文。亦標歐、曾之幟。

歸有光字熙甫。崑山人。……人稱爲震川先生。嘉靖四十四年始成進士。……爲南京太僕丞。留掌內閣制敕房。修世宗實錄。卒官。有光爲古文。原本經術。好太史書。得其神理。時王世貞主盟文壇。有光力相觝排。目爲妄庸巨子。世貞大憾。其後亦心折有光。爲之讚曰。千載有公。繼韓、歐陽。余豈異趨。久而自傷。其推重如此。（明史卷二八七文苑傳歸有光傳）

錢謙益字受之。號牧齋。一號蒙叟。晚自稱東澗遺老。江南常熟人。萬曆庚戌進士及第。官禮部尙書。有初學、有學等集。（盧見曾漁洋感舊集小傳卷一）

觀先生之文。初變於曆、啓之交。規摹經營。不失纍黍。其規矩繩尺。猶可尋也。已而學益博。思益深。氣益厚。自唐宋以迄金元。精營營魄。攝合於尺幅之上。方軌橫鶩。而未知孰爲後先。修詞持論。崇尚體要。金科玉條。凜不可易。至於諷諭時政。磨切當世。或正而若反。或戒而若頌。微詞譎諫。層見側出。擬議變化。雖作者亦或不知其所以然。此亦古人所未有也。（瞿式耜初學集目錄後序）

艾南英字千子。東鄉人。……以興起斯文爲任。……不第而文日有名。負氣陵物。人多憚其口。始王、李之學大行。天下談古文者悉宗之。後鍾惺、譚春元出而一變。至是錢謙益負重名於詞林。痛相糾駁。南英和之。排詆王、李。不遺餘力。……入閩。唐王……授兵部主事。尋改御史。……卒於延平。章世純字大力。臨川人。……官柳州知府。年已七十。……悲憤。遘疾卒。羅萬藻字文止。世純同縣人。……唐王……擢禮部主事。南英卒。……數月亦卒。陳際泰字大士。亦臨川人。……以時文名天下。其爲文敏甚。一日可二三十首。……成進士。年六十有八。

矣。……南行。卒於道。（明史卷二八八文苑傳艾南英傳）

「清初三家」

三代之文。侯之文雄而俚。汪之文高而近於疎。皆不如魏之文醇肆得中。同時姜宸英則較雅而筆弱。黃宗羲爲傳狀之文。記明末忠烈事。後來全祖望繼之有作。皆關史事。不當以文論。而文亦奇恣可喜。

魏禧字冰叔。江西寧都人。……其爲文凌厲雄傑。遇忠孝節烈事。則益感激。摹畫淋漓。……康熙十七年。詔舉博學鴻儒。禧以疾辭。……後二年卒於儀徵。年五十七。（清史列傳文苑傳魏禧傳）

侯方域字朝宗。河南商丘人。……順治八年。中式副榜。……爲詩古文。倡韓歐學於舉世不爲之日。嘗游吳下。將刻集。集中文未脫稿者。一夕補綴立就。人益奇之。順治十一年卒。年三十七。……所著有壯悔堂文集。（清

史列傳文苑傳侯方域傳）

汪琬字茗文。江蘇長洲人。順治十二年進士。……試博學鴻儒。列一等。授翰林院編修。纂修明史。……以病乞歸。……卒年六十七。……琬少孤。自奮於學。銳意爲古文辭。古文自明代膚濫於七子。纖佻於三袁。至啓禎而敝極。國初風氣還醇。一時學者。始復唐宋以來之矩矱。琬學術既深。軌轍復正。其言大抵原本於六經。灝灝流暢。頗近南宋諸家。廬陵、南豐。固未易言。接跡唐之順光。歸有。無媿色也。其敘事尤善。一時公卿誌銘表傳。必以

琬爲重。（清史列傳文苑傳汪琬傳）

「桐城派」

乾隆以後。盛行桐城方苞、姚鼐之文。辭務脩潔。力避經史詞賦語。善於抑揚頓挫。至梅曾亮而法度愈備。世人尊爲桐城派。咸同之際。其風尤盛。光緒之末。吳汝綸猶以之爲教。而能工者鮮矣。

桐城方公……雍正九年……爲中允……遷爲侍讀學士……尋遷禮部侍郎……乾隆十有四年八月十有

八日卒。春秋八十有二。公諱苞。字靈臯。學者稱爲望谿先生。江南安慶之桐城人……公少而讀書。能見其大。及遊京師。吾鄉萬徵君季野最奇之。因告之曰。勿讀無益之書。勿爲無益之文。公終身誦以爲名言。自是一意窮經……其文尤峻潔。未第時。吾鄉姜編修湛園見之。曰。此人吾輩當讓之出一頭地者也。然公論文。最喜班史、柳集。嘗條舉其所短而力詆之。世之人或以爲過。而公守其說彌篤。（全祖望鮚埼亭集卷一七前侍郎桐城方公神道碑銘）

姚鼐字姬傳。安徽桐城人。乾隆二十八年進士……累遷至刑部郎中。記名御史……乞病歸……時侍郎方苞以古文鳴當世。上接震川。同邑劉大櫟繼之。鼐世父範與大櫟友善。範嘗問鼐志。曰。義理、考證、文章。闕一不可。範乃以經學授鼐。而命鼐受古文法於大櫟。然鼐本所聞於家庭師友間者。益以自得。不盡用大櫟法也。所

爲文高簡深古。尤近司馬遷、韓愈。其論文根極於性命。而探原於經訓。至其淺深之際。有古人所未嘗言。鉅獨抉其微而發其蘊。論者以爲辭邁於方氏。而理深於劉氏焉。（清史列傳文苑傳姚鼐傳）

梅曾亮字伯言。江蘇上元人。道光三年進士。用知縣。援例改戶部郎中。少時文喜駢儷。既游姚鼐門。與管同友善。同輒規之。始頗持所業相抗。已乃一變爲古文辭。義法一本桐城。稍參以歸震川。居京師二十餘年。篤老嗜學。與宗稷辰、朱琦、龍啓瑞、王拯輩遊處咸噴噴稱賞其才。一時碑版敍記。率其手筆。……咸豐六年卒。年七十一。（清史列傳文苑傳梅曾亮傳）

與桐城塗轍稍異者。有張惠言、惲敬。其辭宏深。大要出周秦諸子。非有學者不能。世稱爲陽湖派。

張惠言字皋聞。江蘇武進人。……嘉慶四年進士。……授翰林院編修。七年卒。年四十二。……少爲辭賦。擬司馬相如、揚雄之文。及壯。又學韓愈、歐陽修。（清史列傳儒林傳張惠言傳）

惲敬字子居。江蘇陽湖人。乾隆四十八年舉人。……同郡莊述祖、莊獻可、張惠言、海鹽陳石麟、桐城王灼。先後集京師。敬與之友。商榷經義古文。而尤所愛重者惠言也。……署吳城同知。嘉慶二十六年卒。年六十一。敬少好爲齊梁駢儷之作。稍長棄去。治古文。四十後。益研精經訓。深求史傳興衰治亂得失之故。旁覽縱橫、名、法、兵、農、陰陽家言。較其醇駁。而折衷於儒術。將以博其識而昌其詞。以期至於可用而無弊。會張惠言歿。敬聞之。慨然曰。古文自元明以來。漸失其傳。吾向所以不多作古文者。有惠言在也。今惠言死。吾當併力爲之。……其文

得力於韓非、李斯。與蘇洵相上下。近法家言。敘事似班固、陳壽。而敬自謂其文自司馬遷而下無北面。其論文曰典。曰自己出。曰審勢。曰不過乎物。論者謂國朝文氣之奇推魏禧。文體之正推方苞。而介乎奇正之間者惟敬苞之文。學者尊爲桐城派。至敬出。學者乃別稱爲陽湖派云。（清史列傳文苑傳惲敬傳）

其不依桐城法者。有龔自珍、魏源。力摹高古奇詭之文。維新以後。世爭效之。

龔自珍字璦人。浙江仁和人。道光九年進士。授內閣中書。陞宗人府主事。十七年改禮部。尋告歸。……生平著作等身。出入於九經七緯諸子百家。自成一家言。……所爲文。獨造深峻。論者謂桐城之文如泰山主峰。不可褻視。自珍文如徂徠新甫。相與揖讓。俛仰於百里之間。不自屈抑。蓋一代文字之雄云。（清史列傳卷七三文苑傳龔自珍傳）

魏源字默深。湖南邵陽人。道光二年順天舉人。……二十四年成進士。……補高郵州。……咸豐六年卒。年六十三。（清史列傳卷六九儒林傳魏源傳）

（乙）駢體文

明代工駢體文者甚鮮。明季陳子龍、李舒章、張宸始有佳製。清初陳維崧開其端。吳綺、陸繁弢、章藻功皆工斯體。自後臺閣籤表冊立。祝祭之文競尚之。稱爲一代典制。陳維崧字其年。江蘇宜興人。……補諸生。……開博學鴻儒科。……列一等。授翰林院檢討。與修明史。……卒年

五十八。時康熙二十一年也。……所著……迦陵文集。……駢體自喜特甚。長洲汪琬謂。唐以前不敢知。自開寶後。七百年無此等作矣。國初以駢儷文擅長者。推維崧及吳綺。綺才地視維崧稍弱。維崧導源於庾信。泛濫於初唐四傑。故氣脈雄厚。綺則追步李商隱。以秀逸勝。蓋異曲同工云。（清史列傳卷七十一文苑傳陳維崧傳）吳綺字蘭次。江蘇江都人。五歲能詩。長益淹貫。順治十一年拔貢生。……授浙江湖州府知府。……所作詩詞駢體。合編爲林蕙堂集。（清史列傳卷七十一文苑傳吳綺傳）

陸繁昭字拒石。浙江錢塘人。

……工駢體文。年十五。作春郊賦。辭藻流美。筆不停揮。伯父圻以爲王筠芍藥遜其敏。正平鸚鵡讓其工。時陳維崧、吳綺皆下世。繁昭自許儷語爲海內無雙。弟子章藻功等得其講畫。多足名家。……

著有善卷堂詩文集。（清史列傳卷七〇文苑傳陸繁昭傳）

章藻功字登績。浙江錢塘人。康熙四十二年進士。改翰林院庶吉士。……國初以駢體名者。推陳維崧、吳綺。藻功欲以新巧勝二家。然遁爲別調。著有思綺堂集。（清史列傳卷七十一文苑傳章藻功傳）

乾嘉中孔廣森、洪亮吉最善駢儷之作。皆學人也。

孔廣森字彥軒。山東曲阜人。……乾隆三十六年進士。改翰林院庶吉士。散館授檢討。……卒時乾隆五十一年。年三十五。……駢體兼有漢魏六朝初唐之勝。江都汪中讀之。歎爲絕手。（清史列傳卷六八儒林傳孔廣森傳）

洪亮吉字君直。江蘇陽湖人。……乾隆五十五年一甲二名進士。授翰林院編修。……貴州學政。……嘉慶二

年。命在上書房行走。……十四年卒。年六十四。（清史列傳卷六九儒林傳洪亮吉傳）

君洪亮吉善於漢魏六朝之文。每一篇出。世爭傳之。以倦於鈔寫。茲友人爲刊其乙集四卷。（袁枚卷施閣文集序）

集序

能摹晉、宋者有汪中。所謂驚心動魄之文。同、光時。共推王闈運。才大思精。格高韻古。然闈運不自貴其文也。

汪中字容甫。江蘇江都人。……乾隆四十二年拔貢。……生平於詩文書翰。無所不工。所作廣陵對、黃鶴樓銘、漢上琴臺銘。皆見稱於時。……五十九年卒。年五十一。（清史列傳卷六八汪中傳）

余少學爲文。思兼單複。及作桂陽圖志。下筆自欲陵子長。讀之乃顧似明史。意甚惡焉。比作湘軍志。庶乎軼承祚。皖蔚宗矣。志、銘、小記、敍。則置於晉、宋之間。可以亂真。然嘗自貴其有韻之文。以其本從詩出。如欲標榜吾文。非知己也。（陳兆奎王志卷二論文答陳深之）

（丙）制義文

「八股」

八股文亦隨時而變。明之天、崇、清之同、光。皆尙墨卷。濫惡極矣。每藝初不過三、四百字。至於末世。乃務冗長。故場中限字七百。過此者爲逾幅。不收。

經義之文。流俗謂之八股。蓋始於成化以後。股者對偶之名也。天順以前。經義之文。不過敷衍傳注。或對或散。初無定式。其單句題亦甚少。成化二十三年會試。樂天者保天下文。起講先提三句。卽講樂天四股。中間過接四句。復講保天下四股。復收四句。再作大結。……每四股之中。一反一正。一虛一實。一淺一深。其兩扇立格。則每扇之中各有四股。其次第之法。亦復如之。故今人相傳。謂之八股。（顧炎武日知錄卷一六）

其格律有破題、接題、小講。謂之冒子。冒子後入官題。下有原題。有大講。有餘意。亦曰從講。又有原講。亦曰考經。有結尾。承襲既久。以冗長繁複爲可厭。或稍稍變通之。而大要有冒題、原題、講題、結題。則一字不可易。（梁章鉅制義叢話卷一）

「名家」

名家多以古文之法爲時文。最著者方舟也。其以時文之法爲古文。最著者張溥、陳際泰也。

今天下言舉業。斷自成化。至嘉靖。以守溪、荆川、昆湖、方山爲四大家。（艾南英天慵子集今文定序篇下）王鏊字濟之。又字守溪。吳縣人。成化甲午解元。乙未會元。探花。武英殿大學士。諡文恪。明史有傳。有王守溪文稿。（梁章鉅制義叢話題名）

唐順之字應德。又字義修。又稱荆川。武進人。嘉靖己丑會元。僉都御史。巡撫淮陽。諡襄文。明史有傳。（梁章鉅制義叢話題名）

瞿景淳字師道。又字昆湖。常熟人。嘉靖癸卯舉人。甲辰會元。南京吏部侍郎。諡文懿。明史有傳。（梁章鉅制義叢話題名）

薛應旂字仲常。又字方山。武進人。嘉靖甲午舉人。乙未會元。陝西提學副使。（梁章鉅制義叢話題名）

歸有光制舉業。湛深經術。卓然成大家。後德清胡友信與齊名。世並稱歸。胡友信博通經史。學有根柢。明代舉子業最擅名者。前則王鏊。唐順之。後則震川。思泉。思泉。友信別號也。（梁章鉅制義叢話卷五）

艾南英。……萬曆末。場屋文腐爛。南英深疾之。與同郡章世純、羅萬藻、陳際泰。以興起斯文爲任。乃刻四人所作。行之世。世人翕然歸之。稱爲章、羅、艾。（明史卷二八八文苑傳艾南英傳）

紀文達師曰。國朝制義。自以劉黃岡、熊漢陽、李文貞、韓文懿爲四大家。其繼起足稱後勁者。斷推桐城方望溪。（梁章鉅制義叢話卷八）

劉子壯字克猷。黃岡人。順治己丑進士。狀元。翰林修撰。有劉克猷稿。熊伯龍字次侯。又字鍾陵。漢陽人。順治己丑進士。榜眼。翰林侍讀學士。有熊鍾陵稿。（梁章鉅制義叢話題名）

李光地字晉卿。又字厚菴。又稱榕村。安溪人。康熙庚戌進士。文淵閣大學士。諡文貞。有榕村制義。（梁章鉅制義叢話題名）

韓英字元少。又字慕廬。長洲人。康熙壬子順天舉人。癸丑會元。狀元。禮部尙書。諡文懿。有有懷堂制義。（梁章鉅制義叢話題名）

方舟字百川。桐城人。康熙初諸生。有自知集。方苞字靈臯。又字望溪。桐城人。舟弟。康熙己卯解元。丙戌進士。內閣學士兼禮部侍郎。有抗希堂稿。（梁章鉅制義叢話題名）

王步青字己山。又字漢階。又稱罕皆。金壇人。康熙甲午舉人。雍正癸卯進士。翰林檢討。有敦復堂稿。制義所見集。程墨所見集。考卷所見集。八法集。（梁章鉅制義叢話題名）

陳兆崙字句山。又字星齋。仁和人。雍正庚戌進士。太僕寺卿。有紫竹山房制義。（梁章鉅制義叢話題名）
管世銘字韞山。又字緘若。陽湖人。乾隆甲午舉人。戊戌進士。有韞山制義。（梁章鉅制義叢話題名）

「選家」

選家重名。何焯學人。乃欲與天蓋樓爭得失。且謂八股爲先朝未變之制。其重之若此。故康熙之初。廢止八股。未久卽復。

昔有明之季。時文古文。俱日趨於弊。艾千子先生起而維且挽之。其所選評今文定待二集。以遵傳註返醇樸爲主。一時學者翕然從之。而文體爲之一變。（高峻天慵子集序）

戊辰……天如張溥介生周鍾有復社國表之刻……先君子杜麟徵與彝仲夏允彝有幾社六子會義之刻……六

子者何。先君子與彝仲……周勒甫先生立勳。徐關公先生孚遠。彭燕又先生賓。陳臥子先生子龍是也……

金沙周鍾名山業一選。膾炙人口……己卯……關公……秉文一選。爲天下第一部書。蓋吳下選手。亦虛無

人。唯艾千子有艾選。溧陽陳百史先生名夏有五十大家之刻。他房行社稿試牘統於秉文。莫敢與之爭衡者。

……復社之大局雖少衰，而吾松幾社之文會則日以振。……壬申文選之刻。……另刻幾社會義初集。……至丙子刻二集。戊寅刻三集。己卯刻四集。……至庚辰辛巳間刻五集。……壬午。……六集之刻。……於是……有求社會義之刻。……有幾社景風之刻。……有雅似堂之刻。……贈言社亦有初集之刻。……何我抑率其徒。有昭能社之刻。盛隣汝先生率徒爲野腴樓小題之刻。王玠右先生率其徒。……有小題東華集之刻。……七集之刻。委于徐子麗。冲允貞。……詩義之選。則委之王子勝。……庚寅。……刻原社初集一部。……甲子春。原社有二集之刻。（杜登春社事始末）

議論無所發洩。一寄之於時文評語。大聲疾呼。不顧世所顧忌。……欲補輯朱子近思錄及三百年制義名知言集二書。……晚年點勘八股文字。精詳反覆。窮極根柢。每發前人之所未及。樂不爲疲也。有疑時文恐不足以講學者。先君曰。事理無大小。文義無精粗。莫不有聖人之道焉。但能篤信深思。不失聖人本領。卽擇之狂夫。察之邇言。皆能有得。況聖賢經義乎。（呂晚村文集附錄呂公忠晚村行略）

弟小題選。歲內僅可刻成二百餘首。必至來春始竣。卽使刻完。亦必待老師李光地諸文。以爲一集之心官元首。庶幾使初學小生卽窺尋六經風味也。（何焯義門先生集卷四與人書）

近來時文。內中皆買入。前此刻詩文者皆受累。不無過慮耳。試質之老師。如不妨。則會場商之未晚。閩門近日火災。寶翰樓書舖又燒去。坊間聘選。絕無其事。卽無此亦蕭索不堪。聘書事絕響矣。（何焯義門先生集卷四與人書）

忠文仲子易亭先生。痛心家國之故。不應有司課試。今且老矣。而顧好爲經義。積成巨編。噫。豈非先代典章損益幾盡。而此猶爲未變之制乎。（何焯義門先生集卷一楊易亭制藝序）

坊刻時文。興於隆萬間。房書始於李衷。……一十八房之刻。自萬曆壬辰鉤元錄始。旁有批點。自王房仲選程墨始。厥後坊刻乃有四種。曰程墨。則三場主司及士子之文。曰房稿。則十八房進士平日之作。曰行卷。舉人平日之作。曰社稿。諸生會課之作。（阮葵生茶餘客話卷一六）

（丁）詩

「明初四家」

明初四家懲元詩。惟求清新。不重體格。故力摹唐宋諸大家。

高啓字季迪。長洲人。……居吳淞江之青邱。……洪武初。……召修元史。授翰林院國史編修官。……放還。……腰斬於市。年三十九。初。吳下多詩人。啓與楊基、張羽、徐賁稱四傑。以配唐王、楊、盧、駱云。基字孟載。其先蜀嘉州人。……遷山西副使。進按察使。……謫輸作。……卒。……張羽字來儀。後以字行。本潯陽人。……領鄉薦。……授太常司丞。……坐事竄嶺南。……投龍江以死。……徐賁字幼文。其先蜀人。……洪武七年被薦。……擢河南左布政使。……下獄。瘐死。（明史卷二八五文苑傳高啓楊基張羽徐賁傳）

李東陽曰。國初稱高、楊、張、徐。高才力聲調。過三人遠甚。百餘年來。亦未見卓然有過之者。（錢謙益列朝詩集小傳甲集）

明初文學之士。承元季虞、柳、黃、吳之後。師友講貫。學有本原。宋濂、王禕、方孝孺以文雄。高、楊、張、徐、劉基、袁凱以詩著。其他勝代遺逸。風流標映。不可指數。蓋蔚然稱盛已。（明史卷二八五文苑傳序）

「明七子」

七子學盛唐。雍容雄渾。而遺辭不免空泛。

李夢陽……與何景明、徐禎卿、邊貢……康海、王九思……王廷相號七才子。皆卑視一世。而夢陽尤甚。（明史卷二八六李夢陽傳）

獻吉生休明之代。負雄鷲之才。偶然謂漢以後無文。唐以後無詩。以復古爲己任。信陽何仲默起而應之。自時厥後。齊、吳代興。江、楚特起。北地之壇坫不改。近世耳食者。至謂唐有李杜。明有李何。自大曆以迄成化。上下千載。無餘子焉。嗚乎。何其諄也。何其陋也。……國家當日中月滿。盛極孽衰。麤材笨伯。乘運而起。雄霸詞盟。流傳譌種。二百年以來。正始淪亡。榛蕪塞路。先輩讀書種子。從此斷絕。豈細故哉。後有能別裁僞體如少陵者。殆必以斯言爲然。（錢謙益列朝詩集小傳丙集）

李攀龍、王世貞等稱後七子。或稱嘉靖七子。或稱八子。世貞最爲傑出。故云。名雖七子。實惟一雄。

李攀龍……與……謝榛……吳維岳……王世貞……宗臣、梁有譽……徐中行、吳國倫……稱七子。（明

史卷二八七文苑傳李攀龍傳)

李于鱗舉進士。候選里居。發憤讀書。刺探鉤擿。務取人所置不解者。撫拾之以爲資。而其矯悍勁鷲之材。足以濟之。高自夸許。詩自天寶以下。文自西京以下。誓不污我毫素也。官郎署五六年。倡五子七子之社。吳郡王元美以名家勝流。羽翼而鼓吹之。其聲益大噪。及其自秦中挂冠。搆白雪樓于鮑山。華不注之間。杜門高枕。聞望茂著。自時厥後。操海內文章之柄。垂二十年。其徒之推服者。以謂上追虞夏。下薄漢唐。有識者心非之。叛者四起。而循聲贊誦者。迄今百年。尙未衰止。(錢謙益列朝詩集小傳丁集)

王元美弱冠登朝。與濟南李于鱗。修復西京大曆以上之詩文。以號令一世。于鱗既歿。元美著作日益繁富。而其地位之高。游道之廣。聲力氣義。足以翕張賢豪。吹噓才俊。於是天下咸望走其門。若玉帛職貢之會。莫敢後至。操文章之柄。登壇設壇。近古未有。迄今五十年。兪州四部之集。盛行海內。毀譽翕集。彈射四起。輕薄爲文者。無不以王李爲口實。……迨乎晚年。……論藝苑卮言。則曰。作卮言時。年未四十。與于鱗輩是古非今。此長彼短。未爲定論。行世已久。不能復秘。惟有隨事改正。勿誤後人。(錢謙益列朝詩集小傳丁集上)

「鍾譚」

公安、竟陵、矯七子之弊。務爲刻劃、冷雋之作。

王李之學盛行。袁氏兄弟獨心非之。……宏道益矯以清新輕俊。……目爲公安體。……鍾惺、譚元春。……復矯其弊。變而爲幽深孤峭。……鍾譚之名滿天下。謂之竟陵體。(明史卷二八八文苑傳袁宏道鍾惺譚元春)

傳)

中郎袁宏之論出。王李之雲霧一掃。天下之文人才士。始知疏淪性靈。搜剔慧性。以蕩滌摹擬塗澤之病。其功偉矣。機鋒側出。矯枉過正。於是狂瞽交扇。鄙俚公行。雅故滅裂。風華掃地。竟陵代起。以淒清幽獨矯之。而海內之風氣復大變。(錢謙益列朝詩集小傳丁集中)

所謂深幽孤峭者。如木客之清吟。……以淒聲寒魄爲致。……自鍾譚而晦。競於僻澁蒙昧。所謂以昏氣出之也。(錢謙益列朝詩集小傳丁集中)

「錢吳陳之派別」

明末。錢謙益兼取蘇、陸而輕七子。號爲虞山派。領袖東南者四五十年。吳偉業則學元、白。號爲婁東派。承其緒者太倉十子也。陳子龍規摹大曆。近七子而無其浮響。號爲雲間派。揚其餘波者。西泠十子也。

錢謙益 先生之詩以杜、韓爲宗。而出入於香山、樊川、松陵。以迨東坡、放翁、遺山諸家。才氣橫放。無所不有。……采苓之懷美人。風雨之思君子。飲食燕樂。風懷諱浪。未嘗不三致意焉。太史公之論離騷也。必原本國風、小雅。其斯爲先生之詩已矣。(瞿式耜初學集目錄後序)

先生諱偉業。字駿公。姓吳氏。吳爲崑山名族。……崇禎……辛未會試第一。殿試第二。……南中召拜少詹事。

……本朝……授國子監祭酒。……間一歲……南還。……卒於今康熙辛亥十二月二十四日。享年六十有三。
三。（梅村詩集附顧湄梅村先生行狀）

尤以詩自鳴。悲歌感激。有不得於中者。悉寓於詩。居婁東。以詩倡海內。海內宗之。（陳廷敬午亭文編卷四七
吳梅村先生墓表）

吳偉業選婁東十子詩。以黃與堅爲冠。其九人爲周肇、許旭、顧湄、王揆、王抃、王攄、王昊、王曜昇也。（清史
列傳卷七〇文苑傳黃與堅傳）

陳子龍字人中。一字臥子。青浦人。崇禎丁丑進士。……魯王立。授兵部侍郎。兼侍讀學士。事敗。被獲。投水死。
（陳田明詩紀事辛籤卷一）

臥子負曠世逸才。年二十。與臨川艾千子論文不合。面斥之。其四六跨徐庾。論策視二蘇。詩特高華雄渾。睥睨
一世。好推崇右丞。後又模擬太白。於少陵微有異同。要亦倔強。語非絲中也。初與夏考功瓊、周文學勒卣、徐
孝廉闇公同起。而李舒章特以詩故雁行。號陳李詩。繼得轅文。又號三子詩。然皆不及。（吳偉業梅村家藏稿
卷五八）

陸圻字麗京。……與陳子龍等爲登樓社。世號西冷十子體。十子者圻與同里丁澎、柴紹炳、毛先舒、孫治、張丹、
吳百朋、沈謙、虞黃吳、陳廷會也。（清史列傳卷七〇文苑傳陸圻傳）

「亭林之名世」

明亡之後。人皆棄帖括而致力於詩。台閣亦以此爲招。故詩教盛于一時。其卓然名世者。唯亭林一集。氣象萬千。鎔經鑄史。無一字虛設。感歎滄桑。令人流涕。與以國破家亡爲詩料者又不同。日知錄論詩一則。其詩造詣。卽此可以知之。蓋學杜者也。

詩文之所以代變。有不得不變者。一代之文沿襲已久。不容人人皆道此語。今且千數百年矣。而猶取古人之陳言。一一而摹倣之。以是爲詩。可乎。故不似則失其所以爲詩。似則失其所以爲我。李、杜之詩所以獨高於唐人者。以其未嘗不似而未嘗似也。知此者可與言詩也已矣。（顧炎武日知錄卷二一）

詩無長語。事必精當。詞必古雅。抒山長老所云。清景當中。天地秋色。庶幾似之。（朱彝尊靜志居詩話卷二二）

「朱王領袖南北」

朱、王繼虞山而起。領袖南北。力絕楚聲。而皆學宋。金台十子與漁洋同聲氣。嶺南三家別成一派。而與朱、王爲友。惟屈大均與汪琬同聲皆詆虞山。

朱彝尊字錫鬯。浙江秀水人。……康熙十八年。……舉博學鴻儒科。……除翰林院檢討。……作明詩綜百卷。

……彝尊詩不名一格。少時規撫王孟。未盡所長。中年以後。學問愈博。風骨愈壯。長篇險韻。出奇無窮。益都趙執信論國朝之詩。以彝尊及王士禛爲大家。謂王之才高。而學足以副之。朱之學博。而才足以運之。……著曝書亭集八十卷。……四十八年卒。年八十一。（清史列傳卷七一 文苑傳 朱彝尊傳）

王士禛山東新城人。順治十五年進士。……遷刑部尚書。……康熙五十年五月卒於家。年七十有八。所著有帶經堂集。……（清史列傳卷九大臣畫一傳檔正編六王士禛傳）

輦下稱詩。有十子之目。謂田雯、宋犖、王又旦、丁煒、曹禾、曹貞吉、謝重輝、葉封、汪懋麟及顏光敏也。（清史列傳卷七〇文苑傳顏光敏傳）

陳恭尹字元孝。……築室羊城之南。以詩文自娛。自稱羅浮布衣。……其爲詩激昂頓挫。足以發其哀怨之思。自言平生文辭。多取諸胸臆。僕僕道塗。稽古未遑也。卒年七十一。著獨漉堂集。王隼取恭尹詩。合屈大均、梁佩蘭共刻之。爲嶺南三家集。大均字介子。番禺人。……工詩。高渾兀莽。有翁山詩文集。佩蘭字芝五。南海人。……有六瑩堂集。（清史稿文苑傳陳恭尹傳）

「袁蔣趙張」

乾、嘉詩人袁蔣趙張特起。矯康熙季年之荒率。倡爲性情之說。務極警闢痛快。其弊遂流爲淺俚。與溫柔敦厚之旨。相去遠矣。

袁枚字簡齋。浙江錢塘人。……乾隆……四年成進士。……改知縣。……調江寧。……卜築於江寧之小倉山。號隨園。……所爲詩文。天才橫逸。不可方物。然名盛而膽放。才多而手滑。後進之士。未學其才能。先學其放蕩。不無流弊焉。……著有小倉山房詩文集七十餘卷。……嘉慶二年卒。年八十二。（清史列傳卷七二文苑傳袁枚傳）

蔣士銓字心餘。江西鉛山人。……乾隆十九年。由舉人官內閣中書。二十二年成進士。……授編修。……記名以御史用。……以病乞休。四十九年卒。年六十一。……所爲詩。氣體雄傑。得之天授。變化伸縮。能拔奇於古人之外。至敘述節烈。讀之使人感泣。……與袁枚、趙翼、稱袁、蔣、趙三家。……論者謂袁詩多可驚可喜。蔣詩則多可味。不能軒輊。其詩古體勝近體。七言尤勝。……著有忠雅堂文集十二卷。詩集二十七卷。（清史列傳卷七十二文苑傳蔣士銓傳）

趙翼字耘松。江蘇陽湖人。……舉乾隆十五年鄉試。……以一甲三名進士授翰林院編修。……擢貴西道。……以母老乞歸。……撰廿二史劄記三十六卷。……陔餘叢考四十三卷。甌北詩集五十三卷。皇朝武功紀盛四卷。簷曝雜記六卷。唐宋十家詩話十二卷。其詩與袁枚、蔣士銓齊名。枚稱其忽奇忽正。忽莊忽俳。稗史方言皆可闖入。士銓則謂其奇恣雄麗。不可偁視。人以爲知言。嘉慶……十九年卒。年八十六。（清史列傳卷七十二文苑傳趙翼傳）

張問陶字仲冶。四川遂寧人。……乾隆五十五年進士。……山東萊州府知府。嘉慶十九年。卒於蘇州。年五十一。……詩尤工。嘗作寶鷄題壁詩十八首。指陳軍事。得老杜諸將之遺。一時傳誦焉。在都與洪亮吉、羅聘相唱和。無虛日。後往見袁枚。枚謂之曰。所以老而不死者。以未見君詩耳。其推重如此。……著有船山詩文集。論者謂國朝二百年來。蜀中詩人以問陶爲最。（清史列傳卷七十二文苑傳張問陶傳）

「道光之復古」

道光時。咏歎之作。多摹少陵五言。競尙選體。詩事復盛。潘德輿、張際亮其最著者。旁枝有龔自珍。恣奇好怪。多爲澁語。

潘德輿字四農。江蘇山陽人。道光八年舉人。十五年大挑知縣。分發安徽。未幾卒。年五十五。……居京後。所與往來。若永豐郭儀霄、建寧張際亮、震澤張履、益陽湯鵬、歙徐寶善、窮精畢力。研悅剴切。盡一時之選。……爲文章入幽出顯。沈痛吐露。詩精深奧。一語之造。有耐人十日思者。所著有養一齋詩文集二十六卷。（清史列傳卷七三文苑傳潘德輿傳）

余幼奉庭訓。讀漢魏李杜詩最洽。熟杜詩尤多。未冠。先子見背。操筆學詩。苦無指授。漫然棄幼所讀者。案頭有一部精華錄。亦知其非絕境。然薰染數月。遂專趨中晚唐人。蓋劉賓客、張司業、李昌谷、溫飛卿、杜司勳、許丁卯。皆其所涉歷者。已乃謂韓、蘇爲鉅觀。年少氣盛。愛爲盡言。殊自豪也。至二十六七歲。迺知以陶公爲法。於詩漸辨好醜。近四十歲。稍就確實。以杜爲宗。而精力不專。學問不廣。子美之門牆。至今不能入。況堂室乎哉。（潘德輿養一齋集自識）

張際亮字亨甫。福建建寧人。……道光十六年舉於鄉。會試復報罷。……負經濟才。磊落有奇氣。所爲詩。天才奇逸。感時記事。沈鬱雄宕。嘉慶、道光以來作者。未能或之先也。著有松寥山人詩集、婁光堂稿。（清史列傳卷七三文苑傳張際亮傳）

李慈銘自謂得力於何、李。而其門有袁昶、沈曾植。遂開宋詩生硬一派。

李慈銘字愛伯。會稽人。……光緒六年。成進士。歸本班。改御史。……卒年六十六。慈銘爲文沈博絕麗。詩尤工。自成一家。……著有越縵堂文十卷。白華絳趺閣詩十卷。詞二卷。又日記數十冊。（清史稿文苑傳三李慈銘傳）

予二十年前。已薄視淫靡麗製。惟謂此事當以魄力氣體補其性情。幽遠清微傳其哀樂。又必本之以經籍。宓之以律法。不名一家。不專一代。疵其浮薄。二陸三潘。亦所棄也。賞其情悟。梅邨樊榭。亦所取也。至於感情切摯之作。登臨閒適之篇。集中所存。自謂雖蘇李復生。陶謝可作。不能過也。硯樵之評。實深思之而不可解。以詩而論。世無仲尼。不當在弟子之列。而謂學溫岐規沈宋乎。（李慈銘越縵堂日記第一六冊）

得香濤復。言予詩雄秀二字。皆造其極。真少陵適派。其火候在竹垞、阮亭之間。竹垞、阮亭七古。皆學杜也。此語殊誤。阮亭七古。平弱已極。無一完篇。豈足語少陵宗悛。竹垞亦僅規東坡耳。若予此詩。儼之空同。大復則殆庶乎。（李慈銘越縵堂日記第一六冊）

王闓運專摹晉、宋。湘綺樓詩集。僅刻五七古及五律。平心而論。自是清末一大家。

唐人初不能爲五言。杜子美無論矣。所稱陳子昂、張子壽、李太白纔劉公幹之一體耳。何足盡五言之妙。故曰唐無五言。學五言者。漢、魏、晉、宋盡之。齊、梁至隋。別創律詩一派。卽杜所云庾、鮑、陰、何清逸苦心者也。（陳兆奎王志卷二）

（戊）詞

「明詞」

明代曲盛而詞衰。漸至失傳。隆萬以後。此風稍盛。程明善嘯餘譜十卷之作。平仄字數。均出臆定。自汲古閣刻行宋名家詞六十一家。矩矱始備。朱彝尊撰詞綜三十六卷。自唐迄元。獨缺明初。蓋以難於著手之故。

明初詞人。猶沿虞伯生、張仲舉之舊。不乖於風雅。及永樂以後。南宋諸名家詞皆不顯於世。惟花間、草堂諸集盛行。至楊用修、王元美諸公。小令中調頗有可取。而長調則均雜於俚俗矣。然一代之詞。亦有不可盡廢者。

（王昶明詞綜序）

「清詞之盛」

有清經學、小學、駢體文。俱爲明代所不能及。而填詞尤盛。蓋文網過密。詩之所不能直言者。乃託爲香草美人。以寄其幽憂之思。初卓人月撰詞統十六卷。錄隆慶、萬曆間詞而不及天崇。倚聲繼之。成於順治十七年。瑤華又繼之。成於康熙二十五年。合三集觀之。可以知百年間詞之變遷。

鄒祇謨倚聲集二十卷。近世如用修、元美、元朗、仲茅諸先生。無不尋流溯源。探其旨趣。而詞學復明。犁然指掌。然如錢功甫、卓珂月、人月字。沈天羽諸前輩。有成書而網羅未備。賀黃公、毛馳黃、劉公猷諸同志有論斷而甄

汰未聞。僕乃與漁洋山人。綜覈近本。攬攬芳蕤。被以丹黃。申之辨論。爲時不及百年。而爲體與數與人。彷彿乎兩宋之盛。（鄒祇謨倚聲集序）

蔣景祁瑤華集二十二卷。國家文敎詩興。詞爲特盛。倚聲集上溯慶曆。比於詩之陳隋。此集惟斷自六七十年來。詞人出處在交會之際。無不甄收。與倚聲所輯時代稍別。（蔣景祁瑤華集述）

顧貞觀納蘭成德今詞初集二卷。清初選家最盛。選八股以射利。選古文詩詞以通聲氣。顧貞觀、納蘭成德亦有今詞初集之選。所以主壇坫招賓客。而其間頗有抑揚。與者爲榮。不與者爲辱。徐嘉炎未得入門。而致怨於朱彝尊。足見一時熾熱情事。士也罔極。二三其德。斯之謂矣。（五石齋題識）

清初詞家輩出。孫默所輯十七家最著。

國朝名家詩餘十七家三十九卷。孫默字無言。號梓菴。休寧人。家於揚州。清初各家集中多有送孫無言歸黃山序。日日言歸。得序數十篇。詩數百篇。而卒未歸。以康熙十七年卒。年六十六。見汪懋麟百尺梧桐閣文集孫處士墓志銘。此本吳偉業梅村詞二卷。龔鼎孳香嚴詞二卷。梁清標棠村詞二卷。宋琬二鄉亭詞二卷。王士祿炊聞詞二卷。尤侗百末詞二卷。陳世祥含影詞二卷。黃永南溪詞二卷。陸求可月湄詞四卷。曹爾堪溪南詞二卷。鄒祇謨麗農詞二卷。彭孫適延露詞三卷。王士禛衍波詞二卷。董以寧蓉渡詞三卷。陳維崧烏絲詞四卷。董俞玉鳧詞二卷。程康莊衍愚詞一卷。凡十七家三十九卷。初默輯三家詞。曰麗農、延露、衍波。刻於甲辰。合南溪、炊聞、百末曰六家。刻於丁未。合含影、烏絲、蓉渡、玉鳧四家。刻於戊申。始名國朝名家詩餘。至丁巳又刻其餘。

始有十六家之稱。衍愚又後來所刻。予別藏越閒青蕪詞二卷。廣陵唱和詞一卷。所未得者紅橋唱和詞一卷耳。蓋默隨時增刻。故世鮮全書。昔惟江南圖書館有十六家詞。亦有缺卷。此本十七家爲最完整可貴矣。清初詞尙綺語。清標、士禎俱悔少作。不以入全集。餘人詞集亦多零落。皆賴此以傳。不可謂非一時之淵藪。後之君子。或有取焉。（五石齋題識）

浙西六家多奉玉田。其詞皆有格律。

翼翔麟浙西六家詞十一卷。翔麟刻朱竹垞江湖載酒集三卷。李武曾秋錦山房詞一卷。沈融谷柘西精舍詞一卷。李分虎來邊詞二卷。覃九沈黑蝶齋詞一卷。而殿以己作紅藕莊詞三卷。故曰六家。玉田詞爲當時好尙。朱、李皆以清真立教。附刻之所以張目也。明人填詞。喜作豔語。清初猶然。自竹垞選刻詞綜。繼刻六家詞。詞律始正。人皆知撫南宋。萬紅友之功。亦不可沒。（五石齋題識）

納蘭成德。宰相明珠之子。而善倚聲。學南唐二主。頗有俊語。與顧貞觀投分最深。吳兆騫得由寧古塔釋歸。與有力焉。一時文士。以其勢要而推之。徐乾學其座主也。至代刻通志堂經解。以要名譽。世遂謂飲水側帽二詞爲清代詞家之冠。殆非確論。四庫全書不取其詞。蓋有微意。

性德納喇氏。初名成德。……字容若。滿洲正黃旗人。……康熙十四年成進士。年十六。……授三等侍衛。再遷

至一等。……卒年止三十一。……尤長倚聲。徧涉南唐北宋諸家。窮極要眇。所著飲水側帽二集。清新秀雋。自然超逸。……顧貞觀字梁汾。無錫人。康熙十一年舉人。官內閣中書。……與陳維崧及朱彝尊稱詞家三絕。清世工詞者。往往以詩文兼擅。獨性德爲專長。仁和譚獻嘗謂爲詞人之詞。（清史稿文苑傳一性德傳）

道光以後。競尙填詞。周之琦金梁夢月一集。稱爲名貴。周之琦。河南祥符人。嘉慶十三年進士。改翰林院庶吉士。……授廣西巡撫。……同治元年卒。（清史列傳卷四九周之琦傳）

清季大家。應推臨桂王鵬運。歸安朱祖謀。專學草窗、夢窗。兼刻宋詞。校勘極精。足正汲古閣六十家詞之失。

王鵬運字幼遐。號半塘。晚號鴛翁。廣西臨桂人。同治九年舉人。……遷禮科掌印給事中。……精研詞學。爲近代宗匠。生平惻款抑塞。悉寄於是。嘗校定唐宋元名家之作。哀刻爲四印齋詞。（半塘定稿附小傳）

始予在汴梁。納交君。相得也。已而從學爲詞。愈益親。……約爲詞課。拈題刻燭。於唱唱酬。日爲之無間。一藝成。賞奇攻瑕。不隱不阿。……予謂君詞於回腸蕩氣中。仍不掩其獨往獨來之概。……導源碧山。復歷稼軒、夢窗。以還清真之渾化。……其必名於後。固無俟余之贅言。（朱祖謀半塘定稿序）

朱祖謀字古微。後改名孝臧。號滙尹。又號彊村。浙江歸安人。光緒癸未二甲一名進士。……累遷禮部侍郎。……早歲工詩。及交王鵬運。乃專力爲詞。抗古邁絕。海內稱宗匠焉。嘗輯刻唐宋金元詞爲彊村叢書。其自著

者。俱見彊村遺書中。（朱祖謀彊村語業附小傳）

其哀感頑豔。子夜吳趨。其芬芳悱惻。哀蟬落葉。……觸緒造端。湛冥過之。信乎所憂者廣。發乎一人之本身。抑聲之所被者有藉之者耶。（張爾田彊村語業序）

詞律成書於康熙二十六年。自是四聲及字句始有定則。杜文瀾復加增訂。採戈載之說。益嚴去上之辨。

世傳囑餘一編即爲鐵板。近更有圖譜數卷。尤其是金科。凡調之稍有難諧。皆譜所已經駁正。但從順口。便可名家。于是篇牘汗牛。棗梨充棟。至今日而詞風愈盛。詞風愈衰矣。……用是發爲願力。加以校讐。……攷其調之異同。酌其句之分合。辨其字之平仄。序其編之短長。務標準於名家。必酌中於各製。有調同名別者。則刪而合之。有調別名同者。則分而疏之。複者釐之。缺者補之。時則慎庵吳子。相爲助閱於其初。蒼崖姜君。更共編摩於其後。錄之成帙。稍有可觀。計爲卷二十。爲調六百六十。爲體千一百八十有奇。其篇則取之唐、宋、兼及金、元。而不收明朝自度、本朝自度之腔。于字則論其平仄。兼分上去。而每詳以入作平。以上作平之說。（萬樹詞律自序）

張惠言選詞。務以生澀爲貴。詞家始尙南宋。

宋之詞家。號爲極盛。然張先、蘇軾、秦觀、周邦彥、辛棄疾、姜夔、王沂孫、張炎、淵淵乎文有其質焉。其盪而不反。傲而不理。枝而不物。柳永、黃庭堅、劉過、吳文英之倫。亦各引一端。以取重于當世。而前數子者。又不免有一時放

浪通脫之言出于其間。後進彌以馳逐。不務原其指意。破析乖刺。壞亂而不可紀。故自宋之亡而正聲絕。元之末而規矩廢。以至於今四百餘年。作者十數。諒其所是。互有繁變。皆可謂安蔽乖方。迷不知門戶者也。（張惠言詞選目錄敘）

（己）戲曲小說

「雜劇」

明初雜劇。寧獻王、周憲王開其端。寧王首撰卓文君獨步大樂天。周王有誠齋雜劇三十一種。曲文流便。多寫民間俗事。

獻王助長陵靖難。以善謀稱。及徙封豫章。頗多缺望。晚乃折節讀書。開雕秘笈。（朱彝尊靜志居詩話卷一）憲園留心翰墨。譜曲尤工。中原絃索。往往藉以爲師。李景文夢陽詩云。齊唱憲王新樂府。金梁橋外月如霜。牛左史恒詩云。唱徹憲王新樂府。不知明月下樊樓。是也。（朱彝尊靜志居詩話卷一）

自是以後。曲家最盛。以雜劇著名者。劉東生嬌紅記。日本有印本。康海中山狼。王九思杜子美沽酒游春。徐文長四聲猿。劉明初人。康王嘉靖時人。

太和正音譜曰。劉東生之詞。如海嶠雲霞。又云。鎔意鑄詞。纖無塵氣。可與王實父輩並驅。（王國維曲錄卷三）敬夫之再謫。以及永銅。皆長沙李西涯柄國時事。盛年屏棄。無所發怒。作爲歌謠。及杜甫春游雜劇。力詆西涯。

流轉騰湧。關隴之士。雜然和之。嘉靖初。纂修實錄。議起敬夫。有言於朝者曰。游春記李林甫固指西涯。楊國忠得非石齋。賈婆婆得非南塢耶。吏部聞之。縮舌而止。（錢謙益列朝詩集小傳丙集）

王漢陂詞固多佳者。何元朗……云。杜甫遊春劇。金元人猶當北面。此劇蓋借李林甫以罵時相者。其詞氣雄宕。固陵厲一時。然亦多雜凡語。何得便與元人抗衡。王元美復謂其聲價不在關馬之下。皆過情之論也。（王驥德曲律卷四）

對山亦忤於時。放情自廢。與漢陂皆以聲樂相尚。彼此酬和不輟。康所作尤多。非不莽具才氣。然喜生造。喜堆積。喜多用老生語。不得與王並驅。所著汧東樂府。可數百首。（王驥德曲律卷四）

按文人之意。往往託之填詞。王九思杜甫游春。指李西涯。楊石齋。賈南塢三相。康對山之中山狼。則指李空同。李中麓之寶劍記。則指分宜父子。王辰玉之哭倒長安街。則指建言諸公。相傳湯若士之紫簫。亦指當時秉國首揆。纔成其半。即爲人所議。因改爲紫釵。（焦循劇說卷三）

近之爲詞者。北調則關中康狀元對山。王太史漢陂。蜀則楊狀元升菴。金陵則陳太史石亭。胡太史秋宇。徐山人髯仙。山東則李尙寶伯華。馮別駕海浮。山西則常廷評樓居。維揚則王山人西樓。濟南則王邑佐舜耕。吳中則楊儀部南峰。康富而燕。王豔而整。楊俊而葩。陳胡爽而放。徐暢而未汰。李豪而率。馮才氣勃勃。時見紕繆。常多俠而寡馴。西樓工短調。翩翩都雅。舜耕多近人情。兼善諧謔。楊較粗莽。諸君子間作南調。則皆非當家也。南則金陵陳大聲。金在衡。武林沈青門。吳唐伯虎。祝希哲。梁伯龍。而陳梁最著。唐、金、沈小令並斐然有致。祝小令

亦佳。長則草草。陳梁多大套。頗著才情。然多俗意陳語。伯仲間耳。餘未悉見。不敢定其甲乙也。（王驥德曲律卷四）

徐天池先生四聲猿。故是天地間一種奇絕文字。……月明度柳翠一劇。係先生早年之筆。木蘭、禰衡。得之新創。而女狀元則命余更覓一事。以足四聲之數。余舉楊用脩所稱黃崇嘏春桃記爲對。先生遂以春桃名嘏。（王驥德曲律卷四）

徐文長本古樂府木蘭歌。演爲雌木蘭雜劇。與狂鼓吏、翠鄉夢、女狀元。爲四聲猿。（焦循劇說卷五）

清初。吳偉業撰秣陵春、通天臺、臨春閣三種。

吳梅村通天臺雜劇。借沈初明流落窮邊。傷今弔古。以自寫其身世。……臨春閣雜劇。哀悱頑豔。不類通天臺之悲惋。要其用意有在。於全篇結尾。從馮夫人口中。特爲點出。蓋諷明末諸帥也。（楊恩壽詞餘叢話卷二）

尤侗五種。桃花源、黑白衛、弔琵琶、讀離騷、清平調。皆譜舊事。惟鈞天樂傳奇獨有所指。

丁酉之秋。薄游太末。阻兵未得歸。逆旅無聊。漫填詞爲傳奇。率日一齣。閱日而竣。題曰鈞天樂。家有梨園。歸則授使演焉。明年科場弊發。有無名子編爲萬金記者。制府以聞。詔命進覽。其人匿弗出。臬司大索江南諸伶雜治之。適山陰姜侍御還朝。過吳門。函徵予劇。同人宴之申氏堂中。樂既作。觀者如堵。靡不咋舌駭歎。而邏者亦雜其中。疑其事類。馳白臬司。臬司以爲奇貨。既檄捕優人。拷掠誣服。既得主名。將窮其獄。且徵賄焉。會有從中

解之者。而予已入都門。事亦得癢。（尤侗鈞天樂自序）

桂馥有後四聲猿四種。放楊枝、題園壁、謁府帥、投園中。蓋嘉慶時官雲南永平知縣。自傷老大而作也。

同年桂未谷先生。以不世才。擢甲科。名震天下。與青簾殊矣。然而遠官天末。簿書麤項背。又文法束縛。無由徜徉自快意。山城如斗。蒲葵雜庭牖間。先生才如長吉。望如東坡。齒髮衰白如香山。意落落不自得。乃取三君軼事。引宮按節。吐臆抒感。與青簾爭霸風雅。獨題園壁一折。意於戚申交游間當有所感。而先生曰無之。要其爲猿聲一也。（王定柱後四聲猿序）

「傳奇」

明初有荆釵記、白兔記、拜月記、殺狗記。世稱荆、劉、拜、殺。其作者多不可攷。曲本錯誤。亦經後人改正。

古戲如荆、劉、拜、殺等。傳之幾二三百年。至今不廢。（王驥德曲律卷三）

世傳拜月爲施君美作。然錄鬼簿及太和正音譜。皆載在漢卿所編八十一本中。不曰君美。君美名惠。杭州人。吳山前坐賈也。南戲自來無三字作目者。蓋漢卿所謂拜月亭。係是北劇。或君美演作南戲。遂仍其名。不更易耳。（王驥德曲律卷三）

荆、劉、拜、殺。爲劇中四大家。荆釵柯丹邱作。白兔卽劉也。拜月施君美作。君美名惠元。武林人。今名幽閨記。殺狗俗名玉環。徐啞仲由作。仲由淳安人。洪武中徵秀才。至藩省辭歸。有巢雲集。自稱曰。吾詩文未足品藻。惟傳奇詞曲。不多讓古人。（焦循劇說卷二）

荆釵記一種。明寧王權撰。明鬱藍生曲品題柯丹邱撰。黃文暘曲海目仍之。蓋舊本當題丹邱先生。鬱藍生不知丹邱先生爲寧獻王道號。故遂以爲柯敬仲耳。（王國維曲錄卷四）

湯顯祖有臨川四夢。

臨川湯奉常之曲。當置法字。無論盡是案頭異書。所作五傳。紫簫、紫釵、第脩藻豔。語多瑣屑。不成篇章。還魂妙處。種種奇麗動人。然無奈腐木敗草。時時纏繞筆端。至南柯、邯鄲二記。則漸削蕪類。俛就矩度。布格既新。遣辭復俊。其掇拾本色。參差麗語。境往神來。巧湊妙合。又視元人別一谿徑。技出天縱。匪由人造。使其約束和鸞。稍閑聲律。汰其贅字累語。規之全瑜。可令前無作者。後鮮來詰。二百年來。一人而已。（王驥德曲律卷四）

湯顯祖字義仍。號若士。臨川人。萬曆癸未進士。所著玉茗四種。還魂記、爛柯記、邯鄲記、紫釵記。以還魂爲第一部。俗呼牡丹亭。句如雨絲風片。煙波畫船。皆酷肖元人。惜其使才。于韻脚所限。多出以鄉音。如子與宰叶之類。其病處在此。佳處亦在此。（李調元雨村曲語卷下）

玉茗四夢。牡丹亭最佳。邯鄲次之。南柯又次之。紫釵則強弩之末耳。（梁廷枏曲話卷三）

明季以阮大鍼爲最工。所撰有雙金榜、牟尼合、忠孝環、春燈謎、燕子箋。

相傳阮圓海作燕子箋是刺倪鴻寶。（焦循劇說卷三）

燕子箋一曲。鸞交兩美。燕合雙姝。設景生情。具微巧思。春燈謎之十錯認。亦似有悔過之意。隱然露於楮墨外。然其人既已得罪名教。即使陽春白雪。亦等諸彼哉之列。置而不論可矣。況其文章之未必能醉人心腑耶。

（梁廷柸曲話卷三）

清初李笠翁有十種曲。

李漁音律獨擅。近時盛行其笠翁十種曲。十種者。憐香伴、風箏誤、意中緣、鳳求凰、奈何天、比目魚、展中樓、玉搔頭、巧團圓、慎鸞交。勾吳虞巍序而行之。稱笠翁妻妾和諧。雖長貧賤。不作白頭吟。另具紅拂眼。亦可取也。世多演風箏誤。其奈何天。曾見蘇人演之。（李調元雨村曲話卷下）

笠翁十種曲。自俱近平妥。行世已久。姑免置喙。近人惟縣州李太史調元最深喜之。謂如景星慶雲。先覩為快。家居時。常令歌伶搬演為樂。其第十種名比目魚。有自題詩云。邇來節義頗荒唐。盡把宣淫罪戲場。思借戲場維節義。繫鈴人授解鈴方。太史謂。讀是詩。方知其繡曲心苦。蓋追十種中命意。結穴在此也。客有笑其偏嗜笠翁曲者。太史嘗誦此詩答之。（梁廷柸曲話卷三）

長生殿為譜董鄂妃事而作。

稗畦居士洪昉思昇。仁和人。工詞曲。撰長生殿雜劇。薈萃唐人諸說部中事。及李、杜、元、白、溫、李數家詩句。又刺取古今劇部中絳麗色段。以潤色之。遂為近代曲家第一。在京師填詞初畢。選名優譜之。大集賓客。是日國忌。

爲臺諫所論。與會凡數人。皆落職。趙秋谷時官贊善。亦罷去。秋谷年二十三。典試山西。國時。驟車中。惟攜元人百種曲一部。日夕吟諷。至都門。值長生殿初成。因爲點定數折。防思跌宕孤逸。無俗情。年五十餘。落水死。毛西河長生殿院本序云。洪君防思好爲詞。以四門弟子。遨遊京師。初爲西蜀吟。旣而爲大晟樂府。又旣而爲金。元間人曲子。自散套雅劇。以至院本。每用作長安往來歌詠酬贈之具。嘗以不得事父母。作天涯淚劇。以寓其思親之旨。應莊親王世子之請。取唐人長恨歌事。作長生殿院本。一時勾欄多演之。越一年。有言日下新聞者。謂長安邸第。每以演長生殿。爲見者所惡。會國恤止樂。其在京朝官。大紅小紅已浹日。而纖練未除。言官謂遏密讀曲。大不敬。賴聖明寬之。第褫其四門之員。而不予以罪。然而京朝諸官。則從此有罷去者。（焦循劇說卷四）錢塘洪防思昇撰長生殿。爲千百年來曲中巨擘。以絕好題目。作絕大文章。學人才人。一齊俯首。自有此曲。無論驚鴻、綵毫。空慚形穢。即白仁甫秋夜梧桐雨。亦不能穩占元人詞壇一席矣。如定情、絮閣、窺浴、密誓數折。俱能細針密線。觸緒生情。然以細意熨貼爲之。猶可勉強學步。讀至彈詞第六、七、八、九轉。鐵撥銅琶。悲涼慷慨。字字傾珠落玉而出。雖鐵石人不能不爲之斷腸。爲之下淚。筆墨之妙。其感人一至於此。真觀止矣。（梁廷枏曲話卷三）

近今李笠翁漁十種填詞。洪防思昇長生殿。亦大手筆。各有妙處。但李之賓白似多。洪之曲文似冗。又不知後人作何評論也。（劉廷璣在園雜志卷三）

孔尙任製桃花扇。寫南渡事。最易感人。所謂南朝興亡。盡在桃花扇底是也。

予未仕時。每擬作此傳奇。恐聞見未廣。有乖信史。寤歌之餘。僅畫其輪廓。實未飾其藻采也。然獨好誇于密友曰。吾有桃花扇傳奇。尙秘之枕中。及索米長安。與僚輩飲讌。亦往往及之。又十餘年。興已闌矣。少司農田綸霞先生來京。每見必握手索覽。予不得已。乃挑燈填詞。以塞其求。凡三易藁而書成。蓋己卯之六月也。……桃花扇鈔本。久而漫滅。幾不可識。津門修蓀村者詩人也。與粵東屈翁山善。翁山之遺孤。育於其家。修爲謀婚產。無異己子。世多義之。薄游東魯。過予舍。索鈔本讀之。纔數行。擊節叫絕。傾囊囊五十金付之梓人。計其竣工也。尙難於百里之半。災梨真非易事也。（孔尚任桃花扇本末）

桃花扇筆意疎爽。寫南朝人物。字字繪水繪聲。至文詞之妙。其豔處似臨風桃蕊。其哀處似着雨梨花。固是一時傑構。然就中亦有未愜人意者。福王三大罪五不可之議。倡自周鑑。雷演祚。今阻奸折竟出自史閣部。則與設朝折大相逕庭。使觀者直疑閣部之首鼠兩端矣。且既以媚座爲二十一折矣。復加入孤吟一折。其詞義猶之家門大意。是爲蛇足。總屬閒文。至若曲中詞調。伶人任意刪改。爲斯文一大恨事。然未有先慮其刪改。而特在作曲時。爲俗伶豫留地步者。今桃花扇長者七八曲。其少者四五曲。未免故走易路。又以左右部分正間合潤四色。以奇偶部分中辰餘煞四氣。以總部分經緯二星。毋論有曲以來。萬無此例。卽謂自我作古。亦殊覺淡然無味。不知何所見而云也。（梁廷枏曲話卷三）

孔雲亭原稿第十三齣。直敍寧南謀逆。膏何忠誠公同叛。何公投江。逆流六十里。遇神獲救。諸軼事。左夢庚急以千金爲雲亭壽。哀其削去。雲亭遂改哭主一齣。生氣勃勃。宛然爲烈皇復仇。與史法可黃功鼎立而三。爲勝國

忠臣之最。信乎文人之筆操予奪權也。（楊恩壽詞餘叢話卷三）

蔣士銓藏園九種。爲四絃秋、一片石、忉利天、雪中人、香祖樓、臨川夢、桂林霜、冬青樹、空谷香。臨川夢乃譏袁枚而作。

藏園九種。爲乾隆時一大著作。專以性靈爲宗。具史官才學識之長。兼畫家皴瘦透之妙。洋洋灑灑。筆無停機。乍讀之。幾疑發洩無餘。似少餘味。究竟無語不鍊。無意不新。無調不諧。無韻不響。虎步龍驤。仍復周規折矩。非臆西、笠翁所敢望其肩背。（楊恩壽詞餘叢話卷二）

黃燮清倚晴樓七種。爲茂陵絃、帝女花、脊令原、鴛鴦鏡、凌波影、桃谿雪、居官鑑。

黃燮清原名憲清。字韻甫。浙江海鹽人。道光十五年舉人。……調松滋縣有政聲。未幾卒。燮清穎敏過人。才思秀麗。詩格不名一家。尤工倚聲。所撰樂府諸詞。流播人口。時比之尤侗。（清史列傳卷七三文苑傳黃燮清傳）長平公主經烈皇手刃。斷臂不殊。入我朝後。奉詔訪原聘駙馬周世顯。照公主例賜婚。……芝龕記有感徽一齣。敘此事不甚周備。海鹽黃韻珊譜作帝女花院本。本末較詳。詞筆逼近藏園。非芝龕可同日語也。（楊恩壽詞餘叢話卷二）

「小曲」

詩之餘爲詞。詞之餘爲曲。曲之餘爲小曲。務以通俗爲貴。錢大昕謂傳奇之演繹。優

伶之賓白。情詞動人心目。雖里巷小夫婦人。無不爲之歌泣者。實則小曲之感人。尤甚於雜劇傳奇。以其通俗也。然亦須有筆力者。

小曲掛枝兒。卽打棗竿。是北人長技。南人每不能及。昨毛允遂貽我吳中新刻一帙。中如噴嚏、枕頭等曲。皆吳人所擬。卽韻稍出入。然措意俊妙。雖北人無以加之。故知人情原不相遠也。（王驥德曲律卷四）

元人小令。行於燕趙。後浸淫日盛。自宣、正至化、治後。中原又行。瑣南枝、傍妝臺、山坡羊之屬。李崧峒先生。初自慶陽徙居汴梁。聞之。以爲可繼國風之後。何大復繼至。亦酷愛之。今所傳泥捏人及鞋打卦、熬鬚髻三闋。爲三牌名之冠。故不虛也。自茲以後。又有耍孩兒、駐雲飛、醉太平諸曲。然不如三曲之盛。嘉隆間。乃興鬧五更、寄生草、羅江怨、哭皇天、乾荷葉、粉紅蓮、桐城歌、銀絞絲之屬。自兩淮以至江南。漸與詞曲相遠。不過寫淫嫖情態。略具抑揚而已。比年以來。又有打棗竿、挂枝兒二曲。其腔調約略相似。則不問南北。不問男女。不問老幼良賤。人人習之。亦人人喜聽之。以至刊布成帙。舉世傳誦。沁人心腑。其譜不知從何來。真可駭歎。又山坡羊者。李何二公所喜。今南北詞俱有此名。但北方惟盛愛數落羊坡羊。其曲自宣大遼東三鎮傳來。今京師妓女慣以此充絃索北調。其語穢褻鄙賤。并桑濮之音。亦離去已遠。而羈人游惰。嗜之獨深。丙夜開樽。爭先招致。而教坊所隸箏箏等色。及九宮十二則。皆不知爲何物矣。俗樂中之雅樂。尙不諧里耳如此。況真雅樂乎。（沈德符萬曆野獲編卷二五）

小曲者。別於崑弋大曲也。在南則始於掛枝兒。如貫華堂西廂所載。送情人直送到丹陽路。你也哭。我也哭。趕

脚的也來哭。趕脚的他哭是因何故。去的不肯去。哭的只管哭。你兩下裏調情。我的驢兒受了苦。一變爲劈破玉。再變爲陳垂調。再變爲黃鸝調。始而字少句短。今則累數百字矣。在北則始於邊關調。蓋因明時遠戍西邊之人所唱。其辭雄邁。其調悲壯。本涼州伊州之意。如云。斗大黃金印。天高白玉堂。大丈夫豪氣三千丈。百萬雄兵腹內藏。要與皇家做個棟梁。男兒當自強。四海把名揚。姓名兒定標在凌煙閣上。明詩云。三絃緊撥配邊關。是也。今則盡兒女之私。靡靡之音矣。再變爲研研優。研研優者夜夜遊也。或亦聲之餘韻。呀呀啲。如倒拔漿。駝花開。跌落金錢。不一其類。又有節節高一種。節節高本曲牌名。取接接高之意。自宋時有之。武林舊事所載元宵節乘肩小女是也。今則小童立大人肩上。唱各種小曲。做連像。所馱之人。以下應上。當旋即旋。當轉即轉。時其緩急而節湊之。想亦當時鷓鴣、柘枝之類也。今日諸舞失傳。徒存其名。烏知後日之節節高。不亦今日之鷓鴣、柘枝也哉。（劉廷璣在園雜志卷三）

文小槎者。外火器營人。曾從軍西域及大小金川。歸途自製馬上曲。即今八角鼓中所唱之單絃雜牌子及岔曲之祖也。本名小槎曲。減稱槎曲。訛爲岔曲。又稱脆唱。（崇彝春明談往）

果勒敏字杏岑。博爾濟吉特氏。世襲子爵。官杭州將軍罷歸。窮極無聊。日游戲園。頗通詞曲。無聊時所編排子曲岔曲甚多。能以市井俚語加入。而有別趣。於最窄之轍。押之極穩妥。此實偏才。亦能作詩。則打油類也。殊不可耐。凡歌唱類分十三轍。猶之韻也。如中東、言前、江陽、花發、由求、仁辰、灰堆、依期、簑波、姑蘇、懷來、遙條之類。最窄之轍爲捏邪。皆作疊雪不符。此二字皆仄聲。戲界多忌此轍。果公有自編大排子曲。用此轍極俏。惜忘其名。所居在王府大

街。即今之培元學校。（崇彝春明談往）

排子曲每段更換一調。故呼爲雜排子。多至三十餘種。常用之名。有金錢蓮花落、雲蘇調、南城調、倒推船、疊斷橋、羅江怨、南鑼、翠蓮卷、數唱、快書、湖廣調、靠山調之類。開唱時必有數句。曰曲兒頭。住頭處曰臥牛兒。尾聲非以快書。即以數唱兒結之。亦由慢而改緊。今之所謂單絃者。即拆之排子曲中之餘也。他若馬頭調。即大七句。其曲甚長。並非只有七句。因其腔調僅七個。倒換用之而已。（崇彝春明談往）

「小說」

小說爲講史之遺。經文人潤色。而爲章回說部。相傳爲羅貫中所著者有三國志傳通俗演義。隋唐志傳通俗演義。殘唐五代傳。水滸傳。平妖傳。

羅貫中太原人。號江湖散人。與人寡合。樂府隱語。極爲清新。與余爲忘年交。遭時多故。各天一方。至正甲辰復會。別來又六十餘年。竟不知其所終。（錄鬼簿續編）

三國志演義。明人作琵琶記傳奇。而陸放翁已有滿村都唱蔡中郎之句。今世所傳三國演義。亦明人所作。然東坡集記王彭論曹劉之澤云。塗巷小兒薄劣。爲其所厭苦。輒與數錢。令聚聽說古話。至說三國事。聞玄德敗。則嘔噎有涕者。聞曹操敗。則喜唱快。以是知君子小人之澤。百世不斬云云。是北宋時已有演說三國野史者矣。又李義山驕兒詩。或謔張飛胡。或笑鄧艾吃。似當日俳優已有以益德爲戲弄者。（沈濤交翠軒筆記）水滸傳。故老傳聞。羅氏爲水滸傳一百回。各以妖異語引其首。嘉靖時郭武定重刻其書。削其妖語。獨存本

傳。金壇王氏小品中亦云。此書每回前各有楔子。今俱不傳。予見建陽書坊中所刻諸書。節縮紙板求其易售。諸書多被刊落。此書亦建陽書坊翻刻時刪落者。（周亮工因樹屋書影卷一）

水滸傳。相傳爲洪武初越人羅貫中作。又傳爲元人施耐庵作。田叔禾西湖遊覽誌又云。此書出宋人筆。近金聖歎自七十回之後斷爲羅所續。因極口詆羅。復僞爲施序於前。此書遂爲施有矣。予謂世安有爲此等書人。當時敢露其姓名者。闕疑可也。（周亮工因樹屋書影卷一）

金瓶梅。袁中郎觴政。以金瓶梅配水滸傳爲外典。余恨未得見。丙午。遇中郎京邸。問曾有全帙否。曰。第睹數卷。甚奇怪。今惟麻城劉延白承禧家有全本。蓋從其妻家徐文貞錄得者。又三年。小脩上公車。已攜有其書。因與借抄。挈歸吳。友馮猶龍見之驚喜。慙吳書坊以重價購刻。馬仲良時權吳關。亦勸余應梓人之求。可以療饑。余曰。此等書必遂有人板行。但一出則家傳戶到。壞人心術。他日閹羅究詰始禍。何辭以對。吾豈以刀錐博泥犂哉。仲良大以爲然。遂固篋之。未幾時。而吳中懸之國門矣。然原本實少五十三至五十七回。徧覓不得。有陋儒補以入刻。無論膚淺鄙俚。時作吳語。即前後血脈亦絕不貫串。一見知其贋作矣。聞此爲嘉靖間大名士手筆。指斥時事。如蔡京父子則指分宜。林靈素則指陶仲文。朱勛則指陸炳。其他各有所屬云。（沈德符萬曆野獲編卷二五）

西遊記。舊志稱吳射陽性敏多慧。爲詩文下筆立成。復善諧謔。著雜記數種。惜未注雜記書名。惟淮賢文目載射陽撰西遊記通俗演義。是書明季始大行。里巷細人樂道之。而前此亦未之有聞。世乃稱爲證道之書。批

評穿鑿。謂臆合金丹大旨。前冠以虞道園一序。而尊爲長春真人秘本。亦作僞可嗤者矣。按明郡志謂出射陽手。射陽去修志時未遠。豈能以世俗通行之元人小說攘列己名。或長春初有此記。射陽因而衍義。極誕幻詭變之觀耳。亦如左氏之有列國志。三國之有演義。觀其中方言俚語。皆淮上之鄉音街談。巷弄市井婦孺皆解。而他方人讀之不盡然。是則出淮人之手無疑。然射陽才士。此或其少年狡獪。遊戲三昧。亦未可知。要不過爲村翁塾童笑資。必求得修煉秘訣。則夢中說夢。（阮葵生茶餘客話卷二一）

今行世之批本四大奇書原書多經修改。

四大奇書……如水滸……金聖歎加以句讀字斷。分評總批。覺成異樣花團錦簇文字。……再則三國演義……杭永年一做聖歎筆意批之。似屬效顰。然亦有開生面處。較之西遊。實處多於虛處。蓋西遊爲證道之書。……乃汪洋濤從。而刻畫美人。唐突西子。其批註處。大半摸索皮毛。卽通書之太極無極。何能一語道破耶。若深切人情世務。無如金瓶梅。真稱奇書。……彭城張竹坡爲之先總大綱。次則逐卷逐段分註批點。可以繼武聖歎。是德是勸。一目了然。惜其年不永。歿後。將刊板抵償夙逋於汪君蒼孚。蒼孚舉火焚之。故海內傳者甚少。嗟乎。四書也以言文字。誠哉奇觀。（劉廷璣在園雜誌卷二）

封神演義。以幽渺之思。恣肆之筆。寫鬱勃之懷。所予者沒而封神。所不予者則爲興朝佐命。蓋千古憤世之作。王闓運頗賞之。其弟子宋育仁經生也。遂詮釋此書。衡量

三教。

封神演義者。本擬水滸傳西遊記而作。亦兼襲三國志。其文有狼筈。在明嘉靖以後。而俗間大信用之。至以改撰神號。至今言四天王。哼哈財神。溫痘皆本之。已爲市井不刊之典矣。余童時喜其言太極圖有焚身之禍。蓋意在譏明太宗殺方正學諸君。及其言豬狗佐白蟻總戎。以譏李景隆諸將。以爲各有所指。然其文衍成數十萬言。必有所命意。乃能敷演。而聞仲者。又以擬張江陵不學而跋扈也。其言姜環又明斥挺擊事。明人喜爲傳奇演義之言。而此獨恢詭不平。多所指斥。大致以財色爲戒。故獨重趙公明兄妹。財爲兄而色爲妹。未有無財而能耽色者也。置之十絕之中者。戕生多端。中年尤在財色也。十絕破而殺仙。萬仙誅而沐猴冠矣。此由庶人以至天子。不可以太極圖自陷於落魄也。故必以太極圖易草菅人。不可以太子入太極圖。乃憤時嫉俗者之所爲。大要言賢智皆助逆。讒邪皆爲神。唯禽獸乃可通天。甚惡道學之詞。疑李卓吾之所爲也。昔疑其有金丹醫方之說。嘗欲評之。今乃知其仍爲迂儒。故標其作意如此。至其神名。蓋別有所本。非由此始。則無可考矣。

（王闔運湘綺樓日記光緒十九年正月二十日）

醒世姻緣。或謂蒲松齡所作。以書中所述濟南旱災。與聊齋文集紀災前後篇所述康熙四十二年旱災。約略相同也。

楊復吉夢闌瑣筆述。鮑以文云。留仙尙有醒世姻緣小說。實有所指。書成。爲其家所訐。至褫其衿。（骨董瑣記卷七）

康熙五十三年嚴禁小說。書估不敢私刻販賣。明季以來。小說盛行之風。自此頓衰。又四五十十年。始有紅樓夢之作。然只抄閱而已。作者閱者俱有避忌。又久之。始有刻本。

紅樓夢。聞舊有風月寶鑑一書。又名石頭記。不知爲何人之筆。曹雪芹得之。以是書所傳述者。與其家之事跡略同。因借題發揮。將此部刪改至五次。愈出愈奇。乃以近時之人情諺語。夾寫而潤色之。借以抒其寄托。曾見抄本。卷額本有其叔脂研齋之批語。引其當年事甚確。易其名曰紅樓夢。此書自抄本起。至刻續成部。前後三十餘年。恒紙貴京都。雅俗共賞。遂浸淫增爲諸續部六種。及傳奇盲詞等等雜作。莫不依傍此書創始之善也。雪芹二字想係其字與號耳。其名不得知。曹姓。漢軍人。亦不知其隸何旗。聞前輩姻戚有與之交好者。其身胖頭廣而色黑。善談吐。風雅游戲。觸境生春。聞其奇談娓娓然令人終日不倦。是以其書絕妙盡致。聞袁簡齋家隨園。前屬隋家者。隋家前卽曹家故址也。約在康熙年間。書中所稱大觀園。蓋假托此園耳。其先人曾爲江寧織造。頗裕。又與平郡王府姻戚往來。書中所托諸邸甚多。皆不可考。因以備知府第舊時規矩。其書中所假托諸人。皆隱寓其家某某。凡性情遭際。一一默寫之。惟非真姓名耳。聞其所謂寶玉者。尙係指其叔輩某人。非自己寫照也。所謂元迎探惜者。隱寓原應嘆息四字。皆諸姑輩也。其原書開卷有云。作者自經歷一番等語。反爲狡獪托言。非實跡也。本欲刪改成百二十回一部。不意書未告成而人逝矣。余曾于程高二人未刻紅樓夢板之前。見抄本一部。其措辭命意。與刻本前八十回多有不同。抄本中增處減處。直截處委婉處。較刻本總

當亦不知其爲刪改至第幾次之本。八十回書後。惟有目錄。未有書文。目錄有大觀園抄家諸條。與刻本後四十回四美釣魚等目錄迥然不同。蓋雪芹於後四十回雖久蓄志全成。甫立綱領。尙未行文。時不待人矣。又聞其嘗作戲語云。若有人欲快觀我書。不難。惟日以南酒燒鴨享我。我卽爲之作書云。觀刻本前八十回雖係其真筆。粗具規模。其細膩處不及抄本多多矣。或爲初刪之稿乎。（裕瑞棗窗閒筆）

同時儒林外史亦盛行於南方。

先生姓吳氏。諱敬梓。字敏軒。一字文木。全椒人。世望族。科第仕宦多顯者。先生生而穎異。讀書才過目輒能背誦。稍長。補學官弟子員。襲父祖業。有二萬餘金。素不習治生。性復豪上。遇貧卽施。偕文士輩往還。飲酒歌呼窮日夜。不數年而產盡矣。安徽巡撫趙公國麟聞其名。招之試。才之。以博學鴻詞薦。竟不赴廷試。亦自此不應鄉舉。而家益以貧。乃移居江城東之大中橋。環堵蕭然。擁故書數十冊。日夕自娛。窘極。則以書易米。或冬日苦寒。無酒食。邀同好汪京門、樊聖口輩五六人。乘月出城南門。繞城堞行數十里。歌吟嘯呼。相與應和。逮明。入水西門。各大笑散去。夜夜如是。謂之暖足。余族伯祖麗山先生與有姻連。時周之。方秋霖潦三四日。族祖告諸子曰。比日城中米奇貴。不知敏軒作何狀。可持米三斗、錢二千往視之。至則不食二日矣。然先生得錢則飲酒歌嘯。未嘗爲來日計。其學尤精文選詩賦。援筆立成。夙構者莫之爲勝。辛酉、壬戌間。延至余家。與研詩賦相贈答。恹意無間。而性不耐久客。不數月別去。生平見才士。汲引如不及。獨嫉時文士如讎。其尤工者。則尤嫉之。余恒以爲過。然莫之能禁。緣此所遇益窮。與余族祖綿莊爲至契。綿莊好治經。先生晚年亦好治經。曰。此人生立命處。

也。歲甲戌。與余遇于揚州。知余益貧。執余手以泣曰。子亦到我地位。此境不易處也。奈何。余返淮。將解纜。先生登船言別。指新月謂余曰。與子別。後會不可期。卽景悵悵。欲搆句相贈。而澀於思。當俟異日耳。時十月七日也。又七日。而先生歿矣。先數日。哀囊中餘錢。召友朋酣飲。醉輒誦樊川人生祇合揚州死之句。而竟如所言。異哉。先是先生子娘。已官內閣中書舍人。其同年王又曾。數原適客揚。告轉運使盧公。殮而歸其殯於江寧。蓋享年五十有四。所著有文木山房集。詩說若干卷。又仿唐人小說爲儒林外史五十卷。窮極文士情態。人爭傳寫之。子三人。長卽娘也。今官寧武府同知。論曰。余生平交友。莫貧於敏軒。抵淮訪余。檢其囊。筆硯都無。余曰。此吾輩所倚以生。可暫離耶。敏軒笑曰。吾胸中自具筆墨。不煩是也。其流風餘韻。足以掩映一時。窆其躬。傳其學。天之於敏軒。儼意別有在。未可以流俗好尙測之也。（程晉芳勉行堂文集卷六文木先生傳）

明季馮夢龍纂古今小說、警世通言、醒世恆言。謂之三言。大約採宋人通俗小說。或加刪改。增以明人及己所作。同時凌濛初復編刻拍案驚奇及二刻拍案驚奇。謂之二拍。濛初蓋湖州書賈也。

馮夢龍字猶龍。長洲人。由貢生選授壽寧知縣。有七樂齋稿。明府善爲啓顏之辭。間入打油之調。雖不得爲詩家。然亦文苑之滑稽也。（朱彝尊靜志居詩話卷二〇）

蒲松齡擬唐人小說。而成聊齋志異。自謂集腋爲裘。妄續幽冥之錄。浮白載筆。僅成

孤憤之書。其書取材太平廣記等書所記狐鬼事而變化之。兼采邸報所記及里巷見聞。唐人小說一變而爲宋人通俗小說。由文言而白話。再變而爲聊齋志異。由白話而文言。摹經摹史。窮形盡相。刻畫如生。風行最廣而最久。續者不休。皆以聊齋爲名。最爲可笑。惟史襄齡枕瑤雜記三卷。曲折有致。能得其神似。

先生諱松齡。字留仙。一字劍臣。柳泉其別號也。先生初應童子試。卽以縣府道三第一。補博士弟子員。文名藉藉諸生間。然入棘闈。輒見斥。慨然曰。其命也夫。用是決然捨去。而益肆力於古文辭。奮發砥淬。與日俱新。而其生平之佗僚失志。遷落鬱塞。俯仰時事。悲憤感慨。又有激發其志氣。故其文章穎發蒼鬱。恢詭魁壘。用能絕去町畦。自成一家。而蘊結未盡。則又搜抉奇怪。著爲志異一書。雖事涉荒幻。而斷制謹嚴。要歸於警發薄俗。扶持道教。則猶是其所以爲古文者而已。非漫作也。先生性樸厚。篤交遊。重名義。而孤介峭直。尤不能與時相俯仰。少年與同邑李希梅及余從伯父歷友。視旋諸先生。結爲郢中詩社。以風雅道義相闢切。終始一節。無少間。鄉先生給諫孫公爲時名臣。而風烈所激。其廝役佃屬。或陰爲恣睢。鄉里莫敢言。先生獨毅然上書千餘言以諷。公得書驚歎。立飭其下皆斂戢。新城王司寇素奇先生才。屢寓書。將一致先生於門下。卒以病謝。辭不往。此妄言也。集中與阮亭書。有十年前一率几杖語。嗚呼。學者目不見先生。而但讀其文章。耳其聞望。意其人必雄談博辯。風義激昂。有不可一世之概。及進而接乎其人。則循循然長者。聽其言則訥訥如不出諸口。而窺其中則蘊

藉深遠。要皆可以取諸懷而被諸世。然而阨窮困頓。終老明經。獨其文章意氣。猶可以耀當時而垂後世。先生之不幸也。而豈足以盡先生哉。先生祖諱生泐。父諱榮。娶劉氏。增廣生劉公季調女。子四人。孫八人。曾孫四人。五世孫才一人。所著文集四卷。詩集六卷。聊齋志異八卷。以康熙五十四年正月二十二日卒。享年七十有六。以本年葬村東之原。又十年爲雍正改元之三年。其孤將爲碑以揭其行。以文屬余。以余於先生爲同邑後進。且知先生之深也。乃不辭而爲之文以表於墓。（聊齋文集附張元柳泉蒲先生墓表）

紀昀撰四庫全書總目提要有名。別有閱微草堂筆記二十四卷。爲灤陽消夏錄。如是我聞、槐西雜志、姑妄聽之、灤陽續錄。或稱紀五種。言鬼狐及因果報應。詆講學家。及人情機詐。最喜說理。又聊齋志異之變體。後來俞樾右台仙館筆記稍似之。

河間先生典校秘書廿餘年。學問文章。名滿天下。……年近七十。不復以詞賦經心。惟時時追錄舊聞。以消閒送老。……先生嘗曰。聊齋志異盛行一時。然才子之筆。非著書者之筆也。虞初以下。干寶以上。古書多佚矣。其可見完帙者。劉敬叔異苑、陶潛續搜神記。小說類也。飛燕外傳、會真記。傳記類也。太平廣記事以類聚。故可並收。今一書而兼二體。所未解也。小說既述見聞。即屬敘事。不比戲場關目。隨意裝點。伶元之傳。得諸樊懣。故猥瑣具詳。元稹之記。出于自述。故約略梗概。楊升庵僞撰秘辛。尙知此意。升庵多見古書故也。今燕昵之詞。蝶狎之態。細微曲折。摹繪如生。使出自言。似無此理。使出作者代言。則何從而聞見之。又所未解也。留仙之才。余誠莫逮其萬一。惟此二事。則夏蟲不免疑冰。（姑妄聽之附盛時彥跋）

補遺

卷五 明清上

(二) 明初之政局

(3) 永樂大典

(甲) 纂修之經過

明成祖靖難功成，盛行誅戮之後，即命儒生修永樂大典。蓋與宋初修太平御覽、冊府元龜、文苑英華同一用心。而規模之鉅則遠過之。其爲書凡二萬二千八百七十七卷。凡例目錄六十卷。共爲冊萬一千九十五。始纂于永樂元年。越年奏進。初名文獻大成。繼以所輯尙多未備。遂命重修。與其事者凡二千餘人。告成于永樂五年。更名永樂大典。當時政令嚴急。故能迅速成書。一準洪武正韻。以韻統字。以字繫事。所載諸書均散

入各韻之中。有以一字一句分韻者。有析取一篇。以篇名分韻者。有鈔錄全書。以書名分韻者。有割裂。無刪改。明以前佚文祕本世所不傳者。賴其全部。全篇收入。得以略存古人著作。其功蓋不可沒。

永樂元年一四〇三年。秋七月丙子朔……上諭翰林侍讀學士解縉等曰。天下古今事物。散載諸書。篇帙浩穰。不易檢閱。朕欲悉采各書所載事物。類聚之而統之以韻。庶幾考索之便。如探囊取物爾。嘗觀韻府。回溪二書。事雖有統。而采摘不廣。紀載大略。爾等其如朕意。凡書契以來。經、史、子、集、百家之書。至于天文、地志、陰陽、醫卜、僧道、技藝之言。備輯爲一書。毋厭浩繁。（明太宗實錄卷二〇）

永樂二年一四〇四年。十一月丁巳。翰林院學士兼右春坊大學士解縉等進所纂錄韻書。賜名文獻大成。賜縉等百四十七人鈔有差。賜宴于禮部。既而上覽所進書。尙多未備。遂命重修。而勅太子少師姚廣孝、刑部侍郎劉季篪及縉總之。命翰林學士王景、侍讀學士王達、國子祭酒胡儼、司經局洗馬楊溥、儒士陳濟爲總裁。翰林院侍講鄒緝、修撰王襄、梁潛、吳溥、李貫、楊觀、曾榮、編修朱紘、檢討王洪、蔣驥、潘畿、王侁、蘇伯厚、張伯顙、典籍梁用行、庶吉士楊相、左春坊左中允尹昌隆、宗人府經歷高得賜、吏部郎中葉砥、山東按察僉事晏璧爲副總（裁）。命禮部簡中外官及四方宿學老儒有文學者充纂修。簡國子監及在外郡縣學能書生員繕寫。開館於文淵閣。命光祿寺給朝暮膳。（明太宗實錄卷三二）

永樂五年一四〇七年十一月乙丑。……太子少師姚廣孝等進重修文獻大成。書凡二萬二千二百一十一卷。一千九十五本。更賜名永樂大典。上親製序以冠之。（明太宗實錄卷五四）

（乙）副本之重錄

大典原本。不詳何時移來北京。後貯于文樓。至嘉靖三十六年。奉天、華蓋、謹身三殿火。亟命救出。于是有重錄永樂大典之舉。始事于嘉靖四十一年。訖工于隆慶元年。繕寫者逾百人。每人日寫三葉。歷時五六年。止重錄一部。閣臣及在事諸臣陞賞極優。蓋重其事。

嘉靖四十一年一五六二年八月乙丑。詔重錄永樂大典。命禮部左侍郎高拱、右春坊右中允管國子監司業事張居正。各解原務。入館校錄。拱仍以侍郎兼翰林院學士。同左春坊左諭德兼侍讀瞿景淳充總校官。居正仍以中允兼翰林院編修。同修撰林燦、丁士美、徐時行、編修呂旻、王希烈、張四維、陶大臨、檢討吳可行、馬自強充分校官。初文皇帝命儒臣彙粹祕閣書籍。分韻類載。以便檢考。供事編輯者三千餘人。爲卷凡二萬有奇。名曰永樂大典。書成。貯之文樓。其帙甚鉅。上初年好古禮文之事。時取探討。殊寶愛之。自後凡有疑卻。悉按韻索覽。凡案問每有一二帙在焉。及三殿災。上聞變。卽命左右趣登文樓。出大典。甲夜中諭凡三四傳。是書遂得不燬。上意欲重錄一部。貯之他所。以備不虞。每爲閣臣言之。至是諭大學士徐階曰。昨計重錄永樂大典。兩處收藏。茲秋涼。可處理。乃選

各色善楷書人禮部儒士程道南等百餘人。就史館分錄。而命拱等校理之。（明世宗實錄卷五十二）
萬曆間。禁中又火。原本貯文淵閣者。竟無下落。而副本在明季已有散佚。

曩臣若愚曾聞成祖勅儒臣纂修永樂大典一部。係胡廣、王洪等編輯。時號召四方文墨之士。累十餘年而就。計二萬二千八百七十卷。一萬一千九十五本。因卷帙浩繁。未遑刻板。正寫冊原本。至孝廟弘治年。以大典金匱祕方。外人所未見者。乃親灑宸翰。識以御寶。賜太醫院使臣王聖濟。殿內臣寵蓋。欲推之以福海內也。閣臣王文恪鑒恭撰頌以揄揚盛美。相傳至嘉靖年間。於文樓安置。偶遭回祿之變。世廟亟命擲救。幸未至焚。遂勅閣臣徐文貞階。復令儒臣照式摹抄一部。當時供謄寫官生一百八名。每人日抄三葉。自嘉靖四十一年起。至隆慶元年。始克告成。及萬曆年間。兩宮三殿復遭回祿。不知此新舊永樂大典二部。今又見貯於何處也。（劉若愚酌中志卷一八）

胡儀部青蓮攜其尊人所出中祕書名永樂大典者。與韻山政相類。大帙三十餘本。一韻中之一字猶不盡焉。
（張岱陶菴夢憶卷六）

其副本貯皇史宬者。雍正初移于翰林院敬一亭。所缺幾二千冊。則存者九千餘冊而已。光緒初。存三千餘冊。甲午。經翁同龢點查。只存八百餘冊。庚子之役。翰林院被焚。全書蕩然無餘。通計世界各國圖書館所藏大典。凡三百餘冊。而我有其三分之一焉。

聖祖仁皇帝實錄成。詞臣屏當皇史宬書架。則副本在焉。因移貯翰林院。然終無過而問之者。前侍郎臨川李公絨在書局。始借觀之。於是予亦得寓目焉。……會逢今上纂修三禮。予始語總裁桐城方公苞鈔其三禮之不傳者。惜乎其闕失幾二千冊。（全祖望鮚埼亭集外編卷一七鈔永樂大典記）

光緒乙亥。

元年、一八七五年。

重修翰林院衙門。皮置此書不及五千冊。嚴究館人。交刑部。斃於獄。而書無著。余丙子

二年、一八八六年。

七十六年。

入翰林。詢之清祕堂前輩。云尙有三千餘冊。……迨丙戌。

十二年、一八八六年。

志伯愚侍讀銳始導之入敬一亭觀書。並允借閱。每冊高一尺六寸。廣九寸五分。以至蠟黃絹連腦包過。硬面宣紙。朱絲闌。每葉八行。每行大十五、小三

十字。朱筆句讀。書名或朱書或否。乾隆間館臣原籤尙有存者。（繆荃孫藝風堂文續集卷四永樂大典考）

午初至翰林院。赴大教習任。……至清祕堂坐。辦事諸君咸集。揖坐。向來所無。因此次有院長也。看明鈔四史不全。永樂大典賸八百餘本。又至寶善亭看藏書。較從前不過有十之三耳。（翁文恭公日記甲午六月初十日）

（丙）大典中所存古書

乾隆三十七年二月。有詔搜訪遺書。安徽學政朱筠請輯大典中古書善本。因有四庫全書處之設。先後十餘年間。輯出古書數百種。多刻入聚珍板叢書。其爲四庫著錄者三百六十五種。附存目者又一百有六種。其中以舊五代史、續資治通鑑長編、建炎以來繫年要錄、水經注諸書爲最有名。

臣在翰林院常繕閱前明永樂大典。其書編次少倫。或分割諸書以從其類。然古書之全而世不恆觀者。輒具在焉。臣請勅擇取其中古書完者若干部。分別繕寫。各自爲書。以備著錄。書亡復存。藝林幸甚。（朱筠河文集卷一謹陳管見開館校書摺子）

乾隆三十八年八月庚午……諭。昨據軍機大臣議覆朱筠條奏。校覈永樂大典一摺。已降旨派軍機大臣爲總裁。揀選翰林等官。詳定規條。酌量辦理……著再添派王際華、裘曰修爲總裁官。卽會同遴簡分校各員。悉心酌定條例……尋議……此書卷帙浩繁。必須多派人員。方能迅速排纂。謹派分校翰林三十員專司纂輯。仍派辦事翰林。並酌選軍機司員。作爲提調。翰林院典簿等官作爲收掌。常川趕辦。毋致作輟……再查翰林院署內迤西房屋一區……作爲辦事之所。檢查較爲近便。得旨依議。將來辦理成編時。著名四庫全書。（清高宗實錄卷九二六）

章學誠謂周永年專司其事。實則鄒炳泰纂輯者最多。

宋元遺書。歲久湮沒。畸篇廢簡。多見采於明成祖時所輯永樂大典。時議轉從大典采綴。以還舊觀。而館臣多次擇其易爲功者。遂謂搜取無遺逸矣。書昌周永年固執以爭。謂其中多可錄。同列無如之何。則盡舉而委之書昌。書昌無間風雨寒暑。目盡九千鉅冊。計卷一萬八千有餘。丹鉛標識。摘抉編摩。於是永新劉氏兄弟公是、公非諸集以下。又得十有餘家。皆前人所未見者。咸著於錄。好古之士。以爲書昌有功斯文。而書昌自是不復任載筆矣。

（章學誠章氏遺書卷一八周書昌別傳）

最先鈔大典者爲全祖望。其未及鈔者。後皆入四庫。嘉慶中徐松所輯皆鉅帙。光緒中葉繆荃孫復輯得數種。文廷式嘗錄經世大典駟站。今僅存諸冊中足資輯錄者尙不少。

但鈔其欲見而不可得者。而別其例之大者爲五。其一爲經。諸解經之集大成者。莫如房審權之易衛湜。王與之二禮。此外莫有仿之者。今使取大典所有。稍爲和齊而斟酌。則諸經皆可成也。其一爲史。自唐以後。六史篇目雖多。文獻不足。今采其稗野之作。金石之記。皆足以資考索。其一爲志乘。宋元圖經舊本。近日存者寥寥。明中葉以後所編。則皆未見古人之書而妄爲之。今求之大典。釐然具在。其一爲氏族。世家系表而後。莫若夾漈通略。然亦得其大概而已。未若此書之該備也。其一爲藝文。東萊文鑑不及南渡。遺集之散失者。大典得十九焉。其餘偏端細目。信手薈萃。或可以補人間之缺本。或可以正後世之僞書。則信乎取精多而用物宏。不可謂非宇宙間之鴻寶也。……自從事于是書。每日夜漏三下而寢。可盡二十卷。而以所簽分令四人鈔之。或至浹旬未畢。（全祖望鮚埼亭集外編卷一七鈔永樂大典記）

祁門馬嶢谷曰瑄。仁和趙谷林昱。均爲謝山全祖望致鈔資。而謝山改知縣。未久於其事。鈔出者。宋田氏學易蹊徑二十卷。高氏春秋義宗百五十卷。曹粹中詩說。王安石周官新義。劉公是文鈔。唐說齋文鈔。史真隱尙書。周禮。論

語解。二袁先生文鈔。元寶萃酒耘先生令譜。

今周官新義、劉公昇文、二袁先生文均成書。有餘本。餘未聞。

杭葦浦

世駿

續禮記集說所采宋元人說。

半出於大典。(繆荃孫藝風堂文續集卷四永樂大典考)

第諸書輯散爲整。考訂不易。有業經輯出而未及進呈者。如宋元兩鎮江志、嘉泰吳興志、嘉定維揚志、奉天錄、九國志之類。亦復不少。……而修全唐文時。大興徐星伯先生松曾鈔出宋會典五百卷、中興禮書一百五十卷、河南志三卷、祕書省續到闕書二卷。仁和胡書農學士敬鈔出施諤臨安志十六卷、大元海運記一卷。孫文靖公爾準鈔出仇遠山村詞。(繆荃孫藝風堂文續集卷四永樂大典考)

前後閱過九百餘冊。而余丁內艱矣。零落不完。毫無鉅籍。鈔出宋十三處戰功錄、曾公遺錄、順天志、瀘州志、宋中興百官題名、國清百錄諸書。(繆荃孫藝風堂文續集卷四永樂大典考)

一九五八年十二月

統一書號：11018.37
定價：2.70 元